

張江陵書牘

(卷上)

張江陵書牘



張江陵書牘序

漢唐以來。以功業炳史冊者夥矣。至若意量廣遠。氣充識定。志以天下爲己。任而才。又能副其志者。則惟明張江陵一人而已。方明隆萬之際。明之政已弛矣。自世宗西內。靜攝君荒於上。臣縱於下。將嬉於邊。士囂於庠。紀綱萬事。群墮壞於冥昧之中。而瓦解土崩之禍。將隱中於晏安無事之日。自非有雷霆萬鈞之力。不足以集上下。渙散之。執非有整齊嚴厲之法。不足以起積久疲翫之習。江陵知其然也。慨然出其身以任之。奮乾剛行獨斷。官府內外。一聽於己。賞罰予奪。悉決於心。不以偏上爲嫌。不以死權爲諱。推其意。豈不以爲大丈夫。亦既乘時遇主。得行其志矣。則天下之責當於我。任之之而當。雖挾無上之威權。而不疑任之。而不當。雖蒙莫大之戮辱。而不悔。夫豈特無保爵位。顧妻子之心。卽傲名譽之心。而亦無之所患者。吾志不行。事功不立。而至於衆謗叢於生前。奇禍發於身後。則已於任事之初。逆睹而熟計之矣。嗚呼。世之君子。欲立非常之功。則莫務爲一切之計。莫徇衆人之論。當機而立斷。獨立而不懼。昔人嘗以天變不足畏。祖宗不足法。人言不足恤。爲荆公詬。又烏知夫勞臣志士之苦心。不如是則不足以。

敵。危。難。歷。疑。謗。膺。艱。鉅。成。大。事。者。哉。彼。世。俗。顧。乃。以。迂。儒。鄙。生。齷。齷。汁。之。行。以。繩。豪。傑。以。庸。奴。織。豎。量。鹽。數。米。之。智。以。測。高。深。宜。其。驚。駭。而。欲。絕。河。漢。而。無。極。也。善。乎。呂。新。吾。之。言。曰。江。陵。豐。功。偉。業。不。可。磨。滅。者。一。言。以。蔽。之。曰。任。其。庶。幾。真。能。知。江。陵。者。哉。江。陵。一。生。相。業。其。大。指。在。六。事。疏。附錄卷末而。時。時。見。於。與。人。書。中。雖。寥。寥。尺。幅。而。論。政。籌。邊。規。畫。詳。盡。吏。私。民。隱。亦。罔。有。遺。匿。萬。里。外。皆。惴。惴。然。若。有。一。相。君。伺。察。於。其。旁。匪。特。韓。魏。公。生。平。未。嘗。以。膽。許。人。抑。亦。其。精。神。雷。行。宇。宙。不。自。暇。逸。有。以。致。之。也。江。陵。嘗。自。言。吾。神。遊。九。塞。一。日。二。三。其。殆。信。然。歟。嗚。呼。此。其。所。以。能。肩。勞。任。怨。舉。廢。飭。弛。弼。成。神。宗。十。年。之。治。者。歟。夫。自。古。國。家。治。未。嘗。不。以。修。明。亂。未。嘗。不。以。廢。弛。法。積。久。則。必。敝。在。有。人。焉。率。作。而。與。廢。之。雷。厲。風。行。與。天。下。更。始。然。而。其。人。又。豈。易。得。哉。孟。子。曰。五。百。年。必。有。王。者。興。其。間。必。有。名。世。者。又。曰。當。今。天。下。舍。我。其。誰。吾。序。是。書。而。不。禁。擲。筆。而。興。曰。微。斯。人。吾。誰。與。歸。若。夫。其。文。字。之。明。白。了。亮。而。曲。當。乎。事。理。則。又。近。世。曾。胡。諸。公。書。牘。所。從。出。也。覽。者。宜。知。所。擇。焉。南。海。潘。博。

原序

太岳張公集若干卷。卽公之相業也。當時主上以冲齡踐祚。舉天下大政。一一委公。公亦感上恩遇。直以身任之。思欲一切修明祖宗之法。而綜覈名實。信賞必罰。嫌怨不避。毀譽利害。不恤中外。用是凜凜。蓋無不奉法之吏。而朝廷亦無格焉。而不行之法。十餘年間。海宇清宴。蠻夷賓服。不可謂非公之功也。惟是人情憚檢束。而樂因循。積玩既久。一旦以法繩之。若見以爲苛。而公持之益堅。爭之益力。以是遂與世齟齬。而又一二非常之事。有衆人未易測識者。其跡不無似。復似少容。似專權。似純任。霸術以與。金革變禮。終未盡合。上一時雖優容。實已不能無疑。比公既謝世。言者益譁。張其詞。上眷寵始移。而公家之禍。於是不可解矣。至今觀場者。猶多煩言。顧其先法後情。先國事後身。家任勞。任怨。以襄成。萬曆十年。太平之理。我明相業。指固未易多屈也。藉令後人循其已定之規摹。而但稍濟以寬緩。亦自可以收拾人心。保固元氣。顧乃不深惟其終。而但畏多口。遂盡反其所爲。以取悅一時。卒使紀綱陵遲。浸淫以至今日。幾無法矣。世道人心。識者有隱憂焉。誰陷之。厲豈非公之罪人哉。公生平不屑爲文人。然其制作實亦非文。

人所能爲。濡毫伸腕。悉經世大猷。自奏對代言在天子左右。蘭臺石室外。遭禍後。藁多散逸。無存。即存亦祕滅。無傳者。迨今二十餘年。而厥嗣殿元君始蒐求遺業。僅得什一於舊書記刻之。嗟乎。斯亦禁鼎一臠。嘗者可以知其味已。余往守翰林。公與新鄭時同在政府。其初謀斷相資。豪傑自命。卽丙魏房杜。固未肯多讓也。無奈宵人從中搆之。遂爾隙末。以致人言紛紛。而上之恩遇。亦因以不終焉。世遂兩詬之。其實兩公者。皆社稷重臣。未可輕訾也。近新鄭公論大明業已蒙恩追卹。而海內亦漸多思公功。有形之章奏者。可見直道在人心不容泯。是非未有久而不定者。況皇上無私如天地。踏碑立碑。斷非有成心。昭雪表章。是在主持世教之君子。且夕林莽之人。固不足爲公重。要之公功業在天壤間。亦非待人重者。特因殿元君遠來調序。聊書此以歸之。

崑崙曆壬子歲重九日。賜同進士出身柱國光祿大夫少保兼太子太保禮部尙書文淵閣大學士知制誥同知經筵前翰林院庶吉士門生沈鯉頓首拜譔

編次先公文集凡例敬題

先公文集在舊記室所者。自嗣修等逢難。十餘年後始得完歸。存者十八。逸者十二。如少年所作諸賦全逸。應制詩敕撰文逸十之二。僅據存者編次之。凡爲詩六卷。爲文十四卷。爲書牘十五卷。爲奏對十一卷。合之則爲全集。離之亦可四種。嗣修等雖不能讀父書。然竊見先公詩擬盛唐十二家。而亦未專事模擬。文擬兩漢。而亦未全師漢語。若書牘則極其意。所至奏對則極其誠。所敷皆精。誠之所獨注也。律之以才人之致。則非彫龍篆刻。自矜其才。律之以事功之臣。則非椎魯質直。不顯其才。大雅則無奇。而炫奇者又似不及。蓋由質以徵奇。則見其抱負奇。結構奇。踐履奇。得禍亦奇。由奇以徵實。則見其抱負實。結構實。踐履實。得禍亦實。總之未可以常品目之。昔向歆著書。父子異議。不肖等老矣。且就木焉。而一班之見。不敢有異議於先公。乃私評之如此。託諸梓以備家乘。倘旂常大老。文章鉅公。搜逸闡幽。留心國故。得賜一言以冠諸首。則白日賁於覆盆。青雲起夫枯骨。違衆非以一是。即一是以萬年。死者不朽。存者不朽。非不肖小子輩所敢望也。此外著述。尙有帝鑑圖說。四書直解。書經直解。通鑑直解。板俱在內閣。而四

書書經直解。又皆詞林名公體貼大全撰集。而先公裁定。極切於舉業者。又有謨訓類編。大寶箴註。貞觀政要解。皆以進御。家無存稿。因并記於此。

### 書牘凡例敬題

先公書牘。自舊記室所攜來。蓋嗣修等遭家難十餘年所。而手澤完歸。考其年月。似裁答俱無恙也。或有舉其官缺其號。或有舉其號缺其官。或官號俱備。或直舉其諱。凡例不定。嗣修等不敢以己意追補。仍其舊日授書記語耳。謹次爲編年。始隆慶元年。初入相也。終萬曆十年。訖告終也。釐爲十二卷。蓋其廟勝。旣審循實而行。雖名簡牘。實同文移。記始至終成績。可鏡所以明相業微勞也。又二卷報答知己。若徐高顧王最著者。人爲一類。各有編年。所以明師友誼義也。其示懋修手澤附之於末。所以略見庭訓之最著者也。其翰林時附見於後者何。緣未當事。寒溫之問。不能悉錄。錄其尤著者十餘篇。所以明志學也。志學宜在前。而更居後者何。先公之言後多踐履。所以明先行其言而後從之之義也。存此以備家乘。非曰敢冀修詞者也。然修詞家所不必道。亦修詞家所不能道也。吳鴻扈稽。銀者始知其爲苦。干將莫耶。用者始知其爲神。而奈何綜覈。卽東



濕之成譏。任事卽擅權之蜚語。總之稟河岳之氣已來。其用物精弘矣。留此一段。精誠在天壤間。古人所謂知我罪我。先公意在茲乎。史家所稱爲功爲過。小子輩何敢避焉。先公致禍之由敬述。

萬曆元年答閱邊吳堯山曰。二十年前。曾有一弘願。願以其身爲薦。薦使人寢處其上。溲溺垢穢之。吾無間焉。有欲割取吾耳鼻者。吾亦歡喜施與。

答張操江曰。受顧託之重。誼當以死報國。遠嫌避怨。心有不忍。惟不敢以一毫已私與焉耳。

答李太僕漸菴曰。草茅孤介。擁十齡幼主。立於天下臣民之上。國威未振。人有侮心。僕受恩深重。當以死報國。宋時宰相。卑主立名。違道干譽之事。直僕之所薄而不爲。

萬曆五年答應天巡撫論大政曰。僕今所爲。暫時雖不便於流俗。他日去位之後。必有思我者。僕之愚忠。無一毫爲己之心故也。

答總憲李漸菴論驛遞曰。天下事非一手一足之力。僕不難破家沉族。以徇公家之務。而一時士大夫。乃不爲分謗。任怨以圖共濟。將奈何哉。計獨有力竭而死已矣。

萬曆六年答河道林按院曰。既已忘家殉國。遑恤其他。雖機。筭。滿。前。衆。鏃。攢。體。不。之。畏。也。如。是。少。有。建。立。耳。

四


萬曆八年答學院李公曰。不穀棄家忘軀。以殉國家之事。而議者猶或非之。然不穀持之愈力。畧不少回。故得失。毀譽。關頭。若打不破。天下事無可爲者。

答朱按院辭建三召亭曰。吾平生學在師心。不但一時之毀譽有所不顧。雖萬世之是非。亦所不計。張文忠亦近時賢相。其聲施於後者。亦不因三召亭而後顯。不穀自許。似不在文忠之列。使後世有知我者。則不朽之稱。亦不因三召亭而後顯明矣。時異勢殊。高臺傾。曲池平。即吾宅第且不能保。何有於亭。

懋修曰。夫人必回顧。然後周慮。足以庇後。必好名。然後完美。足以保功。未有見先公專行一意。但知報主。禍機毀怨。身後名都置之不顧者。明知其且破家而不卹。明知容容多厚福。而不爲難乎免。其後矣。長老先生每責余曰。而大人忠勞之。不白。而荏苒苟活。不思辯雪。而子職之謂何矣。吾甚羞之。余聞之。愧駭矣。久之。猶見追章陸續。莫非溫莽之波。野史浸淫。咸歸魯墨之謗。余心亦疑之矣。二十年後。漸有思先公者。蓋人固以蓋

棺而論定。事亦有必世而後明者。先公與人書語。若此。行事若此。皆不回顧。不好名之心。使之也。固知一片忠肝義膽。留在天壤。非么麼小子輩所能肆辯。憶先父之心。亦有不。必辯者。敬述以復長老先生。謝嘉義焉。懋修輩至是始得無疑於心矣。





明史本傳

張居正，字叔大，江陵人。少穎敏，絕倫。十五爲諸生。巡撫顧璘奇其文。曰：國器也。未幾，居正舉於鄉。璘解犀帶以贈。且曰：君異日當腰玉犀。不足溷子。嘉靖二十六年，居正成進士。改庶吉士。日討求國家典故。徐階輩皆器重之。授編修。請急歸。亡何還職。居正爲人，頤面秀眉目，鬚長至腹，勇敢任事，豪傑自許。然沉深有城府，莫能測也。嚴嵩爲首輔，忌階。善階者皆避匿。居正自如。嵩亦器居正。遷右中允，領國子司業事。與筭、酒、高拱、善。相期以相業。尋還理坊事。遷侍裕邸講讀。王甚賢之。邸中，中官亦無不善居正者。而李、芳、數、從、問、書、義，頗及天下事。尋遷右諭德，兼侍讀，進侍講學士，領院事。階代嵩首輔，傾心委居正。世宗崩，階草遺詔，引與共謀。尋遷禮部右侍郎兼翰林院學士。月餘，與裕邸故講官陳以勤俱入閣。而居正爲吏部左侍郎兼東閣大學士。尋充世宗實錄總裁。進禮部尚書兼武英殿大學士。加少保，兼太子太保。去學士五品，僅歲餘。時徐階以宿老居首輔，與李春芳皆折節禮士。居正最後入，獨引相體，倨見九卿，無所延納。間出一語，輒中肯。人以是嚴憚之。重於他相。高拱以很躁被論去。徐階亦去。春芳爲首輔。亡何趙貞

吉入。易視居正。居正與故所善掌司禮者李芳謀。召用拱。俾領吏部。以扼真吉。而奪春芳政。拱至。益與居正善。春芳尋引去。以勤亦自引。而真吉殷士儻皆爲所搆罷。獨居正與拱在。兩人益相密。拱主封俺答。居正亦贊之。授王崇古等以方略。加柱國太子太傅。六年滿。加太傅。吏部尙書建極殿大學士。以遼東戰功。加太子太師。和甫成。加少師。餘如故。初徐階旣去。令三子事居正謹。而拱銜階甚。嗾言路追論不已。階諸子多坐罪。居正從容爲拱言。拱稍心動。而拱客構居正。納階子三萬金。拱以誚居正。居正色變。指天誓辭甚苦。拱謝不審。兩人交遂離。拱又與居正所善中人馮保郤。穆宗不豫。居正與保密處。分後事。引保爲內助。而拱欲去保。神宗卽位。保以兩宮詔旨逐拱。事具拱傳。居正遂代拱爲首輔。帝御平臺。召居正獎諭之。賜金幣及繡蟒斗牛服。自是賜賚無虛日。帝虛已委居正。居正亦慨然以天下爲己任。中外想望。采居正勸。帝遵守祖宗舊制。不必紛更。至講學親賢愛民。節用皆急務。帝稱善。大計廷臣。斥諸不職及附麗拱者。復具詔召羣臣廷飭之。百僚皆惕息。帝當尊崇兩宮。故事皇后與天子生母並稱皇太后。而徽號有別。保欲媚帝生母李貴妃。風居正以並尊。居正不救。義寧皇言曰。一皇皇太

后。皇貴妃曰慈聖皇太后。兩宮遂無別。慈聖徙乾清宮。撫視帝。內任保。而大柄悉以委居正。居正爲政。以尊主權。課吏職。信賞罰。一號令爲主。雖萬里外。朝下而夕奉行。黔國公沐朝弼。數犯法當逮。朝議難之。居正擢用其子。馳使縛之。不敢動。既至。請貸其死。錮之南京。漕河通。居正以歲賦逾春發。水橫溢。非決則涸。乃采漕臣議。督艘卒。以孟冬月兌運。及歲初畢發。少罹水患。行之久。太倉粟充盈。可支十年。互市饒馬。乃減太僕種馬。而令民以價納太僕。金亦積四百餘萬。又爲考成法。以責吏治。初部院覆奏。行撫按勸者。常稽不報。居正令以大小緩急爲限。誤者抵罪。自是一切不敢飾非。政體爲肅。南京小奄醉辱給事中。言者請究治。居正謫其尤激者趙參魯於外。以悅保。而徐說保。裁抑其黨。毋與六部事。其奉使者。時令緹騎陰誦之。其黨以是怨居正。而心不附保。居正以御史在外。往往凌撫臣。痛欲折之。一事小不合。詬責隨下。又敕其長加考察。給事中余懋學。請行寬大之政。居正以爲風已。削其職。御史傅應楨。繼言之尤切。下詔獄杖戍。給事中徐貞明等羣擁入獄。視具。鑿篋。亦逮謫外。御史劉臺按遼東。誤奏捷。居正方引故事繩督之。臺抗章論居正專恣不法。居正怒甚。帝爲下臺詔獄。命杖百遠戍。居正陽具

疏救之。僅奪其職。已卒戍臺。由是諸給事御史益畏居正。而心不平。當是時。太后以帝冲年。尊禮居正。甚至同列。呂調陽莫敢異同。及吏部左侍郎張四維入。恂恂若屬吏。不敢以僚自處。居正喜建。豎能以智數。馭下人多樂爲之。蠶。俺答款塞。久不爲害。獨小王子部衆十餘萬。東北直遼左。以不獲通互市。數入寇。居正用李成梁。鎮遼。威繼光。鎮薊。門。成梁力戰却敵。功多至封伯。而繼光守備甚設。居正皆右之。邊境晏然。兩廣督撫殷正茂。凌雲翼等。亦數破賊有功。浙江兵民再作亂。用張佳允往撫。卽定。故世稱居正知人。然持法嚴。覈驛遞。省冗官。清庠序。多所澄汰。公卿羣吏不得乘傳。與商旅無別。郎署以缺少。需次者輒不得補。大邑士子額隘。艱於進取。亦多怨之者。時承平久。羣盜蝟起。至入城市。劫府庫。有司恒諱之。居正嚴其禁。匿弗舉者。雖循吏必黜。得盜卽斬決。有司莫敢飾情。盜邊海錢米盈數例皆斬。然往往長繫或瘦死。居正獨亟斬之。而追捕其家屬。盜賊爲衰止。而奉行不便者。相率爲怨言。居正不恤也。慈聖太后將還慈寧宮。諭居正。謂我不能視皇帝朝夕。恐不若前者之向學勤政。有累先帝付託。先生有師保之責。與諸臣異。其爲我朝夕納誨。以輔台德。用終先帝憑几之誼。因賜坐蟒白金綵幣。未幾



丁父憂。帝遣司禮中官慰問視粥藥止哭。絡繹道路。三宮賻贈甚厚。戶部侍郎李幼孜欲媚居正。倡奪情議。居正惑之。馮保亦固留居正。諸翰林王錫爵張位趙志皋吳中行趙用賢習孔教沈懋學輩。皆以爲不可。弗聽。吏部尙書張瀚以持慰留旨被逐去。御史曾士楚給事中陳三謨等。遂交章請留。中行用賢及員外郎艾穆。主事沈思孝。進士鄒元標。相繼爭之。皆坐廷杖謫斥有差。時彗星從東南方起。長亘天。人情洶洶。指目居正。至懸謗書通衢。帝詔諭羣臣再及者誅無赦。謗乃已。於是使居正子編修嗣修。與司禮太監魏朝。馳傳往代司喪。禮部主事曹誥治祭。工部主事徐應聘治喪。居正諱。無造朝以青衣。素服。角帶。入閣治政。侍經筵。講讀。又請辭歲俸。帝許之。及帝舉大婚禮。居正吉服從事。給事中李涑言其非禮。居正怒。出爲僉事。時帝顧居正益重。常賜居正札。稱元輔。張少師先生。待以師禮。居正乞歸葬父。帝使尙寶少卿鄭欽。錦衣指揮史繼書。護歸。期三月葬畢。卽上道。仍命撫按諸臣先期馳賜璽書敦諭。範帝賚忠良銀印以賜之。如楊士奇張孚敬例。得密封言事。戒次輔呂調陽等。有大事毋得專決。馳驛之江陵。聽張先生處分。居正請廣內閣員。詔卽令居正推。居正因推禮部尙書馬自強。吏部右侍郎

申時行入閣。自強素迕居正。不自意得之。頗德居正。而時行與四維。皆自昵於居正。居正乃安意去。帝及兩宮賜賚慰諭有加禮。遣司禮太監張宏。供張餞郊外。百僚班送。所過地有司飭厨傳治道路。遼東奏大捷。帝復歸功居正。使使馳諭。俾定爵賞。居正爲條列以聞。調陽益內漸。堅臥累疏乞休不出。居正言母老不能冒炎暑。請俟清涼上道。於是內閣兩都部院寺卿給事御史。俱上章請趣居正亟還朝。帝遣錦衣指揮翟汝敬。馳傳往迎。計日以俟。而令中官護太夫人。以秋日由水道行。居正所過。守臣率長跪。撫接大吏越界迎送。身爲前驅。道經襄陽。襄王出候。要居正宴。故事。雖公侯謁王。執臣禮。居正具賓主而出。過南陽。唐王亦如之。抵郊外。詔遣司禮太監何進宴勞。兩宮亦各遣大璫李琦。李用宣諭。賜八寶金釘川扇。御膳餅果醪醴。百僚復班迎入朝。帝慰勞懇篤。予假十日而後入閣。仍賜白金影幣寶鈔羊酒。因引見兩宮。及秋。魏朝奉居正母行。儀從煊赫。觀者如堵。比至。帝與兩宮復賜賚加等。慰諭居正母子。幾用家人禮。時帝漸備六宮。太倉銀錢多所宣進。居正乃因戶部。進御覽數目。陳之。謂每歲入額不敵所出。請帝置坐隅。時省覽量入爲出。罷節浮費。疏上留中。帝復令工部鑄錢給用。居正以利不勝

費止之。言官請停蘇松織造。不聽。居正爲面請。得損大半。復請停修武英殿工。及裁外戚選官恩數。帝多曲從之。帝御文華殿。居正侍講讀畢。以給事中所上災傷疏聞。因請賑。復言上愛民如子。而在外諸司。營私背公。剝民罔上。宜痛鉗以法。而皇上加意撙節於宮中。一切用度服御。賞賚布施。裁省禁止。帝首肯之。有所蠲貸。居正以江南貴豪怙勢。及諸奸猾吏民善逋賦。選大吏精悍者。嚴行督責。賦以時輸。國藏日益充。而豪猾率怨。居正居正服將除。帝召吏部問期日。敕賜白玉帶大紅坐蟒盤蟒。御平臺召對。慰諭久之。使中官張宏引見慈慶慈寧兩宮。皆有恩賚。而慈聖皇太后加賜御膳九品。使宏侍宴。帝初卽位。馮保朝夕視起居。擁護提抱有力。小扞格即以聞慈聖。慈聖訓帝嚴。每切責之。且曰。使張先生聞奈何。於是帝甚憚居正。及帝漸長。心厭之。乾清小璫孫海客用等。導上游戲。皆愛幸。慈聖使保捕海用。杖而逐之。居正復條其黨罪惡。請斥逐。而令司禮及諸內侍自陳上裁去留。因勸帝戒遊宴。以重起居。專精神。以廣聖嗣。節賞賚。以省浮費。却珍玩。以端好尚。親萬幾。以明庶政。勤講學。以資治理。帝迫於太后。不得已。皆報可。而心頗嫌保居正矣。帝初親政。居正嘗纂古治亂事百餘條。繪圖以俗語解之。使

帝易曉。至是復屬儒臣紀太祖列聖寶訓實錄。分類成書。凡四十。曰創業艱難。曰勵精圖治。曰勤學。曰敬天。曰法祖。曰保民。曰謹祭祀。曰崇孝敬。曰端好尚。曰慎起居。曰戒遊佚。曰正宮闈。曰教儲貳。曰睦宗藩。曰親賢臣。曰去奸邪。曰納諫。曰理財。曰守法。曰儆戒。曰務實。曰正紀綱。曰審官。曰久任。曰重守令。曰馭近習。曰待外戚。曰重農桑。曰興教化。曰明賞罰。曰信詔令。曰謹名分。曰裁貢獻。曰慎賞賚。曰敦節儉。曰慎刑獄。曰褒功德。曰屏異端。曰飭武備。曰御戎狄。其辭多警切。請以經筵之暇進講。又請立起居注。紀帝言動。與朝內外事。日用翰林官四員入直。應制詩文。及備顧問。帝皆優詔報許。居正自奪情後。益偏恣。其所黜陟。多由愛憎。左右用事之人。多通賄賂。馮保客徐爵。擢用至錦衣衛指揮。同知署南鎮撫。居正三子。皆登上第。蒼頭游七。入賞爲官。勛戚文武之臣。多與往還通姻好。七具衣冠報調。列於士大夫。世以此益惡之。亡何居正病。帝頻頒敕諭。問疾。大出金帛爲醫藥資。四閱月不愈。百官竝齋醮爲禱。南都秦普楚豫諸大吏。亡不建醮。帝令四維等理閣中細務。大事卽家令居正平章。居正始自力。後憊甚。不能徧閱。然尙不使四維等參之。及病革乞歸。上復優詔慰留。稱太師張太岳先生。居正度不起。

薦前禮部尙書潘晟及尙書梁夢龍侍郎余有丁許國陳經邦已復薦尙書徐學謨會省吾張學顏侍郎王篆等可大用帝爲黏御屏晟馮保所受書者也強居正薦之時居正已昏甚不能自主矣及卒帝爲輟朝諭祭九壇視因公兼師傅者居正先以六載滿加特進中極殿大學士以九載滿加賜坐蟒衣進左柱國蔭一子尙寶丞以大婚加歲祿百石錄子錦衣千戶爲指揮僉事以二十載滿加太傅以遼東大捷進太師益歲祿二百石子由指揮僉事進同知至是贈上柱國謚文忠命四品京卿錦衣堂上司禮太監護喪歸葬於是四維始爲政而與居正所薦引王篆曾省吾等交惡初帝所幸中官張誠見惡馮保斥於外帝使密詔保及居正至是誠復入悉以兩人交結恣橫狀聞且謂其寶藏踰天府帝心動左右亦浸言保過惡而四維門人御史李植極論徐爵與保挾詐通奸諸罪帝執保禁中逮爵詔獄謫保奉御居南京盡籍其家金銀珠寶鉅萬計帝疑居正多蓄益心豔之言官劾篆省吾并劾居正篆省吾俱得罪新進者益務攻居正詔奪上柱國太師再奪謚居正諸所引用者斥削殆盡召還中行用賢等遷官有差劉臺贈官還其產御史羊可立復追論居正罪指居正搆遼庶人憲熾獄庶人妃因

上疏辯寃。且曰：庶人金寶萬計，悉入居正。帝命司禮張誠及侍郎邱橧，偕錦衣指揮給事中籍居正家。誠等將至荊州，守令先期錄人口，錮其門。子女多遜避空室中。比門啟，餓死者十餘輩。誠等盡發其諸子兄弟藏，得黃金萬兩，白金十餘萬兩。其長子禮部主事敬修，不勝刑，自誣服，寄三十萬金於省，吾篆及傳、舟等，尋自縊死。事聞，時行等與六卿大臣合疏，請少緩之。刑部尙書潘季馴疏尤激楚，詔留空宅一所，田十頃，贍其母。而御史丁此呂復追論科場事，謂高啟愚以舜禹命題，爲居正策禪受。尙書楊巍等與相駁。此呂出外。啟愚削籍。後言者復攻居正不已。詔盡削居正官秩。奪前所賜璽書四代，誥命以罪狀示天下。謂當剖棺戮屍而姑免之。其弟都指揮居易，子編修嗣修，俱發成烟瘴地。終萬曆，世無敢白居正者。熹宗時，廷臣稍稍追述之。而鄒元標爲都御史，亦稱居正。詔復故官，予葬祭。崇禎三年，禮部侍郎羅喻義等訟居正寃。帝令部議復二廡及誥命。十三年，敬修孫同儻請復武廡。併復敬修官。帝授同儻中書舍人，而下部議敬修事。尙書李日宣等言：故輔居正受遺輔政，事皇祖者十年，肩勞任怨，舉廢飭弛，殫成萬曆初年之治。其時中外又安，海內殷阜，紀綱法度莫不修明。功在社稷，日久論定。人

益追思。帝可其奏。復敬修官。同敞負志節。感帝恩。益自奮。十五年。奉敕慰問湖廣諸王。因令調兵雲南。未復命。兩京相繼失。走詣福建。唐王亦念居正功。復其錦衣世廕。授同敞指揮僉事。尋奉使湖南。聞江州破。依何騰蛟於武崗。永明王用廷臣薦。改授同敞侍讀學士。爲總兵官劉承蔭所惡。言翰林吏部督學必用甲科。乃改同敞尙寶卿。以大學士瞿式耜薦。擢兵部右侍郎兼翰林侍讀學士。總督諸路軍務。同敞有文、武、材、意、氣、慷慨。每出師。輒躍馬爲諸將先。或敗奔。同敞危坐不去。諸將復還戰。或取勝。軍中以是服同敞。大將王永祚等久圍永州。大清兵赴救。胡一青率衆迎敵戰敗。同敞馳至全州。檄楊國棟兵策應。乃解去。順治七年。大清兵破嚴關。諸將盡棄桂林走。城中虛無人。獨式耜端坐府中。適同敞自靈川至。見式耜。式耜曰。我爲留守。當死此。子無城守責。盍去。諸同敞正色曰。昔人恥獨爲君子。公顧不許同敞共死乎。式耜喜。取酒與飲。明燭達旦。侵晨被執。諭之降不從。令爲僧亦不從。乃幽之民舍。雖異室。聲息相聞。兩人日賦詩倡和。閱四十餘日。整衣冠就刃。顏色不變。旣死。同敞屍植立。首墜。躍而前者三人皆辟易。而居正第五子允修。字建初。廕尙寶丞。崇禎十七年正月。張獻忠掠荊州。允修題詩於壁。

不食而、死。

贊曰。張居、正、通、識、時、變。勇於、任、事。神宗、初、政。起衰、振墮。不可、謂、非、幹、濟、才、而威柄之操。幾於震主。卒致禍發身後。書曰。臣罔以寵利居成功。可弗戒哉。





# 張江陵書牘卷上

江陵 叔大張居正 著

## 答列卿毛介川

今之士大夫。冠纓相摩。踵足相接。一時號爲交游者。蓋不少矣。然而未必皆可與之言也。可與之言矣。猶未可與之微言也。可與之微言矣。猶未可與之不言也。若夫目擊而道存。無心而冥解者。若僕與翁。蓋庶幾焉。僕每一相見。卽頽然嗒然。若遊太虛而涉廣漠者。不知翁之洗我以德耶。豈亦僕之鄙樸任率。有當於翁之心。相薰相忘。莫知所以然而然耶。旌麾漸遠。悵望爲勞。惟此一段精神。相期於形神之外者。則固非地所能限耳。承翰教瞻戀彌增。南中會楚侗丈。幸言僕與翁所以相與者如此。

## 答南中題學御史耿楚侗

去冬賀道長至得翰教。會有大行之事。哀悰卒卒。不及裁答。進香使至。伏承訊及感慰。別諭云云。俱盡事理。其間有未及舉行者。推公之意。次第行之。僕以淺薄。驟冒非分。日

夕惶惶。罔知攸措。思所以。酌主恩。而慰知己者。惟虛平此心。不敢向人間作好惡耳。至於轉旋之機。未免有迹。非心是之判。士大夫責望深。或不能盡如其意。然亦不暇顧矣。高明以爲何如。

答中丞洪芳洲

鄙人辱公之愛有年矣。頃者因緣際會。驟涉崇階。聖主念甘盤之舊。不棄簪履。元翁垂接引之慈。無遺菅蒯。深惟謏薄。任過其才。夙夜念之。若爲稱塞。惟當堅平生硜硜之節。竭一念縷縷之忠。期不愧於名教。不負於知己耳。然切劘之益。實在同心。將伯助予。幸毋遐棄。熊廉憲旋草草附謝。厚惠概不敢當。謹用納璧。知公素諒其狂直。不罪也。

答總督魏確菴

承示邊圖。既詳且覈。動勸之略。於此亦微見其緒矣。敬服敬服。近聞虜欲西犯。今士馬之力萃於薊矣。如不得志。必將東逞。願公嚴備之。

答宗伯董潯陽

僕以謏薄。獲依日月之末光。猥從末階。驟躋三事。束櫪作柱。用荷爲梁。庸愚之人。猶將

嘑之。况高明者。碩如翁者乎。乃辱不鄙。遠賜問賀。獎借過情。重增其愧。至勉僕以作者之事。尤不敢當。古人以行誼文章兼顯於時者。世不多見。明興二百餘年。名世之輔。專闡之彥。凡幾作矣。而一代文章。猶未能追踪古昔。乃欲責之於椎魯人。詎能耶。若使以其經。經。小人之守。惓惓納誨之心。朝夕。衰職。有缺。時用一。縷。補之。以仰。答。隆。遇。而免於罪戾。或庶幾耳。再氏云。如其禮樂。以俟君子。惟翁學綜墳典。冠絕等倫。海內士孰不望之以爲宗主。誦之以爲軌範。今天子誠不欲興禮樂則已。如欲稽古禮文之事。以潤色鴻業。發揮典籍。則舍翁將何之焉。願努力自愛。弓旌之賁。當有日也。令郎奇才久屈。誠有遺珠之嘆。茲旋草草附謝。辱惠過腆。愧不敢當。謹領綾絹二事。餘璧上。別具侑柬。統惟鑒原。

答雲南巡撫陳見吾

沐國公者。素不相知。自去年以來。屢次寄書。俱有重禮。僕屢竣却之。并其書亦未敢拆。恐此等事。皆其從人所爲。其主不知也。丈會間語次。煩爲道鄙意。其諸未受禮儀。亦宜稽查。毋爲乾沒。再惟世臣之道。但能守法安靖。自可長保爵祿。廣交行賂。徒爲驅騙者。

之資耳。況今朝廷清明。倖途斷絕。如有違犯。雖親不宥。天威赫赫。誰敢干之。以貨求全。恐不能也。渠若有知。亦可以此警之。亦誘人爲善之一端也。伏惟留意。餘無言。

四

答兩廣督撫張元洲

廣事不意披猖至此。諸將所領兵船。亦不甚少。乃見賊不一交鋒。輒望風奔北。何耶。將不得人。軍令不振。雖有兵食。成功亦難。故繫四敗將於闕下。不重懲之。無以示警。諸凡調處兵食事宜。似宜少破常格。乃克有濟。公若有高見。宜亟陳本兵。當爲議處也。元老去。百務動。勳。冗不多及。

答少司馬楊二山

比來士習。人情漸落。晚宋窠臼。中有識者。雖心憂之。而不敢言。僕不揣淺陋。妄有所陳。猥辱高明。特垂鑒獎。感謝感謝。賈生有言。使管子而愚人也。則可使管子而少知治體。則豈不爲之寒心哉。今遇清明之朝。當改絃之會。而不相與。勵翼協力。共圖實事。猶欲守故轍。驚虛詞。則是天下之事。終無可爲之時矣。來教謂自今。祇論事功。以爲黜陟。凡稱清稱高。談立及議。論無實者。一切斥之。不願旨哉。旨哉。言乎。

與中丞孫淮海

比者冒昧。妄有論建。辱獎譽過情。深以爲愧。大厦之成。非一木之幹。僕旣已唱之矣。尙賴一時賢士同心和之。庶克有濟。奈何人心玩愒已久。溺於故常。蔽於私意。雖心知其當。然而終不能踴躍以趨赴也。今惟積此真意。漸次薰蒸。假以一二年。庶可少變。但僕以病軀。久欲棄人間事。恐不能從容以需之耳。辱道誼知已。輒盡其愚。

與叅議高廉泉

前有小柬。托趙太府人將致。諒登記室。張文簡公繼夫人祭葬。已經該科叅駁。僕懇之於禮曹。始得題履如例。蓋其中亦稍有未順故耳。張使回附此。諸惟鑒原。

答張中翰仰峰

感文至始知有太夫人之變。悽感悽感。卹典該科以例欠合。叅駁區區懇於部中始得之。使旋附復。厚惠概不敢領。輒用歸璧。統惟亮原。

答司馬楊二山

今秋邊烽無警。亭障完固。公之功當爲諸鎮之冠矣。徐君條議馬政。鑿鑿可行。而公止

據原議。輒與轉聞。略無增損。視人之善。如己之善。此尤見公之襟度。恢闊。非世之沾沾有己者可比也。敬服敬服。

答廣西熊巡撫

辱翰教。知廣事已有次第。山賊多所斬獲。公之威望已著。盪定可預睹矣。但聞該省軍儲甚乏。昨與部議。量發帑銀以濟之。往年剿閩寇。發銀二十萬。今廣中應解錢糧已奏。而川浙又可責償原貸。今擬半閩中之數。似宜足用。期使炎荒之民。知朝廷軫念之殷。不以遐遠而或遺也。頃科中建論。欲更置督府。代者尙未定。先此復。

答中丞梁鳴泉

恭喜令望益隆。崇階伊邇。欣慰之懽。良不可喻。近來士習人情。似覺稍異於昔。浮議漸省。實意漸孚。鄙人疏發其端。而太宰公力助之。太平之休。庶幾可望。但不知後來何如耳。

答御史顧公曰唯

辱揭示領悉。惟公端亮之節。冠於臺表。比者一二注措。尤協輿情。太阿發矟。虛以運之。

遊刃有餘地矣。近來士習人情。似覺稍異於昔。李石翁寬和沈靜。幹握機衡。僕亦竭其  
駑鈍。以共相疏附。詩所謂伯氏吹壎。仲氏吹箎者。或庶幾焉。

答馬總兵

今歲秋防無警。貴鎮又有此奇功。足下赤心報國。功冠諸邊。於僕亦有光矣。幸努力。功  
名朝廷自有大爵賞。一切事體不必過慮。如有難處之事。一一說來。僕自有處。

答薊撫劉北川

今歲秋防無警。雖國家之福。然亦督撫諸公先聲之所震疊也。欣慰欣慰。承示易將請  
兵數事。皆於邊備有裨。容與本兵卽爲議處。薊鎮有沈痼之疾。非旦夕可療者。惟本之  
以實心。鎮之以沈靜。審處機宜。弛張並用。需以歲月。庶可成功。顧前此爲浮議所眩。使  
當事者不得展其所長。私心每憤恨之。數月以來。覺士習人情。少異於昔。實意潛孚。浮  
言漸熄。來教所謂牽制譏議者。自今可毋慮矣。望努力功名。以慰注想。臧帥才略。在今  
諸將中誠爲稀有。幸公以道眼觀之。

答河道巡撫翁見海

僕不肖。切抱敬賢之心。如公之高節弘猷。則尤私心所嚮慕者。理漕特借以爲簡畀之地。不久勞也。辱示疏沁道衛。分渚上源。誠爲急務。但渠初成。勢難再舉。俟休養生息二三年後。物力稍舒。當卽計之。若此圖獲就。實國家萬世之利也。

答廣西熊巡撫

往者冒昧。妄有所陳。誠激於時弊。不得已也。公不以爲狂且愚。而辱賞許之。感甚感甚。詩不云乎。唱予和汝。僕旣唱之矣。尙賴中外諸賢同心共和。庶克有濟。不然。將並鄙言亦屬之議論矣。海賊據閩中。報謂已盪盡。恐未必實然。要之其勢已敗。殄滅有期矣。

答南祭酒姜鳳阿

聞公振鐸南雍。教先行實。卽大疏所陳。亦可見其梗概。而推轂處士。尤於風教有裨。已下部議覆矣。

與薊遼總督譚二華

前聞道體小違和。無任懸念。今想勿藥矣。近日處分戚師。誠出下策。然非得已也。頃會霍司馬云。公本欲論郭琿。則屬者之舉。似亦與高見懸符。且事權歸一。法令易行。兵不



遠。索。浮。議。自。省。假。之。以。便。宜。需。之。以。歲。月。薊。鎮。之。事。亦。未。必。不。可。振。也。但。以。總。理。體。面。比。之。鎮。守。爲。優。今。旣。易。銜。則。上。下。承。接。自。有。常。分。用。之。雖。重。而。禮。則。少。損。矣。昨。本。兵。題。覆。慮。不。及。此。不。知。公。議。疏。中。亦。可。爲。一。處。否。如。不。可。處。則。於。常。禮。之。外。少。加。優。借。以。鼓舞。之。又。本。兵。疏。以。巡。關。御。史。監。軍。此。言。大。誤。蓋。戚。帥。之。請。監。軍。謂。於。本。鎮。之。外。別。練。兵。五。萬。也。今。旣。爲。鎮。守。有。地。方。之。責。則。巡。關。御。史。何。事。不。可。督。察。又。何。必。更。爲。監。軍。名。色。以。撓。之。哉。公。於。議。疏。中。幸。婉。詞。以。破。其。說。至。於。射。打。一。事。極。爲。虛。文。其。中。情。弊。可。笑。可。恨。今。但。以。訓。練。之。實。責。之。戚。帥。如。有。不。效。巡。關。御。史。得。論。劾。之。固。不。必。襲。此。故。套。虛。文。爲。也。又。鄙。意。謂。南。兵。旣。不。可。取。鎮。兵。或。不。足。數。必。須。聽。其。召。募。庶。可。充。伍。且。訓。練。若。成。則。老。弱。可。以。漸。汰。援。兵。可。以。漸。減。又。不。苦。於。供。億。之。繁。矣。兵。不。貴。多。而。貴。精。李。抱。眞。在。澤。潞。以。二。萬。人。雄。視。山。東。豈。在。衆。哉。

又

戚帥以總理改總兵。誠爲貶損。緣渠當僕以書相問之時。不急以此意告我。而本兵又倉卒題覆。故處之未盡其宜。然及今尙可爲也。望公於議疏中委曲爲言。不但體面降。

抑爲下所輕。且督撫標兵。皆欲付之訓練。若不兼總理。何以行。便乞特致一書於閣中。二公及虞坡思齋。僕得從中贊之。更易爲力也。倘得如意。當於勅書中增之。其關防當改鑄矣。昨議增築敵臺。實設險守要之長策。本兵卽擬覆行。但據大疏。謂一臺須五十人守之。則千臺當五萬人矣。不知此五萬人者。卽以擺守者聚而守之乎。抑別有增益乎。聚則乘垣者無人。增則見兵止有此數。不知又當何處也。又四面周廣才一丈二尺。雖是收頂之式。度其根腳。當亦不過倍此數耳。以五十人周旋於內。一切守禦之具。與士卒衣糧薪水之類。充牣其中。無乃太狹乎。便中仍望見教。萬萬山東民兵。徒有征戍之勞。而無戰守之益。若折解工食銀兩。則一歲中卽可得十餘萬。以此十餘萬之賞。召募土著精壯之人。便可得勝兵五六千。比之千里遣戍。功相萬矣。僕久懷此意。未有以發。公熟計其便。再疏言之何如。凡僕所白。皆密要語。故不敢令人代書。極知草草。

答某巡撫

辱示大疏。俱於邊屯切要。已下所司次第題覆。公以正氣直道。董正官邪。緣此見嫉。亦誠有之。幸太宰知公最深。三至不惑。萬無足慮。

答閩中巡撫

廣賊猖狂。蔓延閩地。當事者張皇奏捷。本兵據揭題覆。遽行賞賚。俱爲大謬。辱示大疏。讀之使人憤恨。頃該科亦以爲言。向後當別有處分也。差人旋草草附復。外新刻文苑英華。有便幸惠寄一部。冗不多及。

答湖廣李布政

遠辱華翰。感荷厚情。大惠概不敢領。輒附差人壁。上趙守自處慎抑。不敢遽抗禮於諸公。昨銓部訪知其未履任而卽繳憑。故行查耳。今聞兩院已有定論。上下相安。實地方之幸也。承諭及并此以復。餘惟鑒原。

答奉常羅月岩

往令弟春元及鎮山公差入茲因洞岩至。三辱華翰之及。感悉垂念至意。近來士習人情。紀綱法度。似覺稍異於昔。實自小疏發之。然忘我者亦自此始矣。念旣已身荷重任。義當直道正言。期上不負天子。下不負所學。違恤其他。執事久困流言。今公論稍定。賜環有期矣。

答憲長宋陽山

十二

自丈從閩中解歸。久不聞問。然此心實不能一日忘也。比者激於時弊。不得已妄有所陳。近來士習人情。紀綱法度。似覺有異於昔。實自小疏發之。然以公之亮節弘才。久困流言。僕不能刷而振之。蔽賢之咎。必不能逭矣。別楮所云。往亦略聞其概。行當與李石老圖解之。譜帙實已遺失。有便再寄一通。當踐宿諾也。

與蘄遼總督

蘄中事。公所措畫。咸極精當。本兵一一題覆。初亦有一二異同之論。僕據事理譬解之。今皆帖然矣。臧帥復總理。不載議中。諒公有難言者。已具部疏。擬特旨行之。即有言者。無足慮矣。但乞諭意。臧帥努力功名。以答群望。僕亦與有光焉。

與兩廣總督

賊起已有端。公不待其潰裂而早圖之。策之得者也。此中是非甚明。無煩自白。今南方之事。一以託公。幸益殫忠猷。以慰輿望。乞身之舉。非所敢聞。

與廣西巡撫

惠州之變。傳聞甚駭。廣事猖披至此。日夕懷憂。帶川至。幸與之熟計。積弊之餘。非破格整頓。恐不能濟。有當言者。宜即疏聞。僕當從中力贊之也。新任陳憲長名瑞者。頗練南中事。公試與籌之何如。

寄太宰吳望湖

知賢而不能薦。去而不能留。孔子所謂竊位者也。公雖欲遂其高志。僕輩將何以道竊位之譏哉。其懇留公者。不獨以爲國家。亦以自爲也。

與薊遼督撫

薊事仗公雄略。有漸振之勢。慰甚。入衛之師。疲於奔命。人人以爲不便。然而終不可裁者。勢誠不能也。大疏已明。無容復議。感帥不知近日舉動何如。折節以下士夫。省文以期實效。坦懷以合。揆貳正己。以振威稜。乃渠今日最切務也。相見幸一勉之。

與兩廣熊督撫

惠州之變。或言城已陷矣。遊聲噂。至不可聞。僕日夕以此爲憂。頃得捷音。無任欣慰。至於不自爲功而歸之虎鎮。尤見無我。至公。然公之功。亦自不容掩也。陸寇旣除。自此

十四  
可專意海上。帶川至。幸與之熟計。事有當言者。宜卽疏聞。僕當從中力贊之也。新任陳憲長名瑞者。頗練南中事。試與籌之何如。

答奉常劉小魯

辱翰示。知道從已至留都。慰慰。公雅致高懷。僕所深諒。昨曾見臺告歸提督有缺。銓司欲擬公調補。僕再三力止之。蓋知公之不樂驟徙。用成高致焉。有便可致書於選君。謝且止焉可也。區區淺薄。無補於時。欲去不能。欲留不可。又值老母南歸。情懷愈惡。人旋附此。

答雲南巡撫陳見吾

遠辱翰賜。感荷厚情。滇事部覆具如尊指。但通道馬湖。蜀中士大夫咸以爲未便。俟其論定。當有處也。

與葡遼督撫

承示虜賊聚兵。及三路入犯。恐屬未的。何者。虜若大舉。必不止於八千一萬。審欲大舉。亦必匿形斂翼。豈肯以三路之說。明告於人。且今天氣漸熱。虜馬已弱。零騎往來。難保。

必無若欲深入恐非其時。雖然不可不過爲之防也。已告於本兵。俟有的報。卽行調遣。僕近訪得薊鎮軍糧。有開支於一二百里之外者。士卒甚以爲苦。夫以數口之家。仰給於一石之粟。支放不時。斗斛不足。而又使之候支於數百里之外。往返道路。顧倩負戴。費將誰出。是名雖一石。其實不過八九斗止矣。况近日又有撫賞探柴等項。名色頗出。其中如是。欲土皆飽食折衝禦侮。能乎。聞舊制各區。隨在皆有倉口。該官守支。今各倉廩或頗圯壞。而其制猶存。其官猶在。獨不可併廩修理。就近坐派乎。此事不必疏請。但與管糧郎中一討處可也。

### 與薊遼督撫

向有人告僕云。戚帥求望太過。志意太侈。雖公亦甚苦之。故僕以爲問。今奉來教。知昔之所快快者。徒以削其總理舊銜耳。今旣力爲光復。更將何求。近屢得渠稟帖。極爲感奮。頗務收拾人心。漸圖實事。仍望公時時教督之。雖然。僕何私於戚哉。獨以此輩國之爪牙。不少優假。無以得其死力。今西北諸將如趙馬輩。僕亦曲意厚撫之。凡皆以爲國家耳。縷縷之忠。惟天可鑒。若此輩不爲國家盡力。是負天矣。郭琥之賢。誠如來教。卽召

至面諭以公相知之意。嗟乎。人誠難知。知人亦未易也。

與應天龐巡撫

辱示條議。鑿鑿可行。敬服敬服。國用出納之數。計部每季具題。歲終又總報。雖未會計成錄。而其數亦明。但朝廷未嘗加之意耳。今邊費日增。計每歲所入之數。尙少銀百四十餘萬兩。民力已竭。費出無由。日夜憂之。不知所出。奈何奈何。公竣節清望。冠冕一時。頃大察。雖有一二欲肆流言。而竟無間可入。精鏐在治。百鍊愈光。願公自信益堅。勿起疑障也。

與湖廣巡撫

屢辱翰示。已一一具復。近聞施州兵備。決當裁革。乃李僉憲亦自以爲當裁。則輿論可知矣。部中已停缺不補。幸早具議。以便題覆。

答湖廣雷巡按

辱翰示。知道從已臨楚地。無任欣慰。茲有一事請教。施州兵備。舊無此官。偶以鄰境小寇。設爾增設。今地方事寧。此爲剩員矣。夫官多民擾。供億費煩。姑未敢論。且分巡荆南



道。原控制蜀之瞿塘。如得其人。何事不舉。乃舍其專職。而另設官於事體。便乎否也。今李僉憲已陞銓部。停缺未補。俟兩院具題。卽議省矣。惟裁之幸甚。

### 與蘄鎮督撫

西北邊患。無大於板升者。朝廷宵旰西顧。屢厪諭問。僕輩謬膺重寄。主憂臣辱。不敢不以爲慮。但審彼量。已圖之甚艱。又前奉翰教。謂道遠隔河。難於進取。妙算蓋籌之已熟。卽趙帥亦自謂難圖。故不敢復言取之之計。獨招降一節。元年詔書。如李自馨等。明許其歸順。又本兵題准賞格。及近日見行事例。皆布之遐邇。傳之虜中。非所謂始禍而開釁也。昨偶因趙帥以李自馨手帖見寄。竊以爲自馨等來歸之意。其誠僞固未可知。但朝廷有詔招降。則又不可漫然不爲之所。故面付趙帥使密圖之。且戒之曰。受降如受敵。不可輕忽。蓋正恐其輕舉妄動而墮奸人之計也。茲奉來教。無任惶悚。闔外之事。書生不敢妄談。亦不敢遙制。惟公熟計之。若果出於至誠。因其來歸而撫之。惟命審其不誠。而閉關以謝之。亦惟命惟求。以便於國家而已。

### 與司成胡劍西

別來不覺再稔。眼前世局。凡幾變矣。平生膠漆。或化爲戈矛。大道康莊。皆鞠爲榛莽。其中情態。難以盡言。數月以來。委曲幹旋。乃得寧帖。然其爲力也勞。而其心亦甚苦矣。知己遠邈。誰與晤言。悵悵。丈遠避流言。淹棲林壑。大察之後。公論昭然。諒不久必有處也。旋當爲丈圖之。

答歐少卿

辱翰示領悉。時屬休明。衆賢勵翼。方欲蒐遺佚於巖穴。以共圖治理。況高節雅望如公者。可使之淹留林壑耶。大疏部已案候。雅志終不能遂。幸惠然肯來。以慰鄙念。

答涂巡撫

聞中捷報。在蔣伯清失事之先。言者不察。遂爲訾詆。比來公議甚明。朝廷方精覈名實。以勸有功。卽謗書盈篋。終不爲動也。願公自信。毋慮。

答王巡按

辱翰示領悉。紀功之差。鄙意甚不欲之。乃貴院堂公持之必行。而同事者主其說。又卽以異公。皆非事體。非公心也。待地方稍寧。生當獨奏省之。

辱示條議。鑿可底行。容與當事者酌處之。威之聲名。雖著於南土。然觀其才智。似亦非泥於一局而不知變者。且旣已被鎮守之命。有封疆之責。豈宜別有注畫乎。今人方以此窺威之覺。恐不知者又將以爲口實也。公如愛威。惟調適衆情。消弭浮議。使之得少展布。卽有裨於國家多矣。

### 答施兵憲

辱示江漢地圖。公軫念民患。加惠荆人。甚厚甚厚。堤工告成。地方百世之利也。僕爲呂子。誼當紀述。重以汝泉公之命。豈敢以不文辭。時下薄冗。稍俟從容。卽勉成請教。

### 與蘄鎮巡撫

近來邊臣。人思奮勵。而宣大二鎮督撫將領。尤爲得人。僕以淺薄。謬膺重寄。其於該鎮之事。苦心積慮。雖寢食未嘗忘也。奈何人心不同。議論不一。如馬趙二帥去歲出塞之功。實數年僅見。卽破格優賚。豈足爲過。而人猶有議其功微賞厚者。本兵遂惱縮疑畏。而不敢爲之主。其掩春防之功。抑王公之請。咸以是耳。一二年來。言者率云。責實責實。

矣。而又不明賞罰。以勵之。則人孰肯冒死犯難。爲國家用哉。辱教容與本兵議之。督撫寬洪持重。王公明達敏練。馬之沈勇。趙之才氣。皆僕素所敬信者。文武輯睦。事乃克濟。不知雲中事體。得如宣鎮否也。

與魏巡撫

邊虜之功。大於斬獲。往者本兵濬於羣議。功賞不明。乃僕輩亦有過焉。惶愧惶愧。茲者斬馘至百數十級。近年以來所僅見者。文吏又可以法繩之耶。俟覈勘至當。請旨優錄。茲先行薄賚耳。

與兩廣督撫

惠州之戰。非贛兵往援。則廣事不知今作何狀矣。自公鎮黔之後。巢賊嗾兌懾伏不敢動。乃隣封亦藉其威望。用成大功。嗟乎。圖治之要。豈不在用人哉。聞捷不勝喜慰。

答薊撫朱龍岡

雲中開府。近鮮其人。借公之重。移而鎮之。實出於李石翁與僕之意。方欲爲國家掄才。故未遑爲交游擇地也。願益展弘猷。以副羣望。趙帥才勇。公所素知。重鎮大將。關係不

小望公之垂盼也。

與荊州趙知府汝泉

前老母舍弟回。及西石家人去。兩啟馳候。諒俱入覽。頑奴不知已擒獲。追併否。望速爲處分。翹俟翹俟。新任劉尹。志行甚佳。且老成有幹局。必堪厥職。但縣事廢弛已久。釐振似當。以漸望公。曲賜教掖。假以歲月。俾得從容料理。庶可責其治効也。

答朱巡撫

辱示條議。皆鑿可底行。至於罪人就近發戍事。尤足兵良策。此不獨貴治。即近邊諸省。皆可行也。

與薊遼督撫王鑑川

承諭失事官軍。不必提問。徑付軍門處治。知公微意。欲借此以申軍令也。卽諭意本兵。必如所請。近巡關訪擊南兵。聞其事已往。且經戚帥重治。何又爲苛求如此。聞該道誤信一二屬官之譖。多方羅織。務在挫辱之。使不得有爲。果爾。薊事終無可振之日矣。望公與撫臺。曲爲一處。庶關外之事。得少展布也。

答兩廣總督劉帶川

三十一

伏讀大疏。賊已在目中矣。但廣中人情多變。將領利於養寇。奸民樂於從賊。此逋寇所以得遊魂海上也。願公留意焉。所請已如命。借發南部銀五萬兩。計先後奏留。及內帑所發。各省所償。不下四十餘萬。仗公雄畧。似亦足以辦此矣。如再不敷。又當措處。羣情喁喁。佇聞凱捷。以舒宵旰之憂。

答浙撫谷近滄

兩承翰示。領悉。武備弛而財用乏。文武將吏。虛文塞責。此不獨浙中爲然。朝廷方欲綜覈名實。以興太平。奈何積習成風。因循難振。此在司風紀者一加之意耳。頃聞粵驛騷患。將及浙。預防之策。兵餉爲急。乃往者撫臺。每一人至。卽奏請蠲貸。徒爲節省之名。不思幹濟之實。脫一旦有急。帑藏空匱。當其時。能不徵派於民乎。此務虛名而貽實禍者也。昨敝鄉周道長者。亦曾以此告之。須兩院同心籌畫。事乃克濟也。

答督學曾確菴

承示大閱事。誠爲要論。今武備廢弛。如此不及。今圖之。則衰宋之禍。殆將不遠。僕於此

事頗殫心力。乃昨南科有疏。又以此非急務。今朝野喁喁。方謂朝廷舉希曠之典。九邊將士。亦莫不扼擊。而思奮。而此君乃獨持異議。人之識見相去。豈不遠哉。選貢事。不知各郡已徧試否。此與歲貢不同。但求得儻。不必取盈。近例甚嚴。昨楚中已黜四人矣。若諸郡尚有未起送者。幸嚴加甄別。合諸郡之士而試之。優劣乃見。惟其人不惟其地可也。

### 答陝撫王鑑川

關西三獻捷音。斬馘逾百。實數年所僅見者。仗公雄畧。分陝得人。朝廷無復西顧之憂。今誠欲興文武之業。豈不在擇任賢儻哉。功高而賚薄。尙當有待也。

### 與楚學憲胡廬山

敝省文宗。借重高賢。命下之日。輿論稱允。惟公遵養已久。亦宜及時效用。幸早戒行。以慰羣望。昔也倦翼知還。今也無心出岫。時行時止。無意必焉可也。

### 與憲使羅月岩

令舅翁轉示華翰。雅愛至情。藹然盈楮。僕以寡昧。謬膺重寄。一念惓惓許國之忱。實不

敢上負明時。下負所學。昨者。疏陳萬不得已。然知者以我爲忠。不知者將以爲炫。已而先人也。其苦心處。惟鎮山公知之。難以盡言。比者之議。雖爲極枉。然宿嫌舊怨。亦借此而宣泄。比已借重東省。驛驢屬路。從此皆康莊矣。願早戒行。以慰鄙望。

答福建涂巡撫

顧監丞至。得所惠文苑英華一部。感悉厚情。聞船聞已出洋。廣中亦漸有次第。計海醜不日盪定矣。夾剿雖事關兩省。而公之勞動爲多。佇聽捷音。以慰輿望。

答南太宰吳望湖

大疏簡切溫厚。深得大臣告君之體。而召對一節。尤爲當今急務。此事僕輩亦屢次入告。未荷允行。若此。關不啟。治平未可望也。奈何奈何。

答魏巡撫

往與李選郎談。當今人物。語及於公。謾有云云。誠望公之切。爲慮之深。故不覺其言之過耳。乃公不以爲罪。辱垂虛納。惶愧惶愧。誠場之捷。本屬奇功。本兵守文。復欲行勦。俟勤至。當另議優擢。往者薄賚。豈足耐哉。



答吳操江

比見浙中亦有警報。吳越接壤。桑土之防。不得不預。大疏本兵已卽具覆。又借重暫行撫院事。東南有賴矣。

答薊遼劉督撫

辱示麾下暫駐廣慶。俟兵船俱集。而後乘之。所謂始如處女。敵人開戶者也。賊雖未破。吾已見勝徵矣。選調浙兵。卽具覆允行。但浙中議論。苦於調發召募之擾。倘五千人足辦此事。似不必復求更代也。兵難遙度。惟公裁之。

答司知縣

兩辱華翰俱悉。但九江胡兵。憲原未入京。區區素不識其人。實亦未嘗託之。不敢市德於執事。恐爲人所誑也。近來外間盜竊名字者甚多。後有此等事。宜細加審覈。

答荊州趙知府

頑奴犯法。致煩尊慮。惶愧不可言。據招承之詞。似已明實。今欲正法。必申呈兩院轉達。乃事體也。但當時發覺此事。止令錦衣衛緝拿各棍。原未送法司問理。蓋以所騙之人。

乃一士夫之子。以愚被欺。若欲送問。則受財與請求之人。於例俱當發遣。已既不能。禁戢其下。又因而連累他人父子前程。心有所不安耳。今止二棍監在錦衣衛。待此歸結。竊意謂不必申呈兩院。但求一印信揭帖。并招詞原贓。差人徑送與僕。卽將來文贓發與該衛立案歸結。二棍亦就衛中處治。免送法司也。此既不傷潘氏父子前程。亦不經由許多官司。留此形迹也。僕以淺薄。謬膺重任。日夕檢點此身。思以率先百辟。而頑奴乃敢犯憲條。孽本自作。死不爲枉。幸爲速除之。以警其餘。揭帖中明開已監故可也。其贓銀必解來者。蓋以二棍見其口詞贓物。乃肯輸服。且僕之心迹。亦俟此而後明耳。今各省撫院兩司印信關防揭帖論公事者甚多。固不拘於公移體式也。鄙事煩瑣。屢瀆尊嚴。愧悚無已。

### 與分宜尹

聞故相嚴公已葬。公陰德及於枯骨矣。使死而知也。當何如其爲報哉。

### 與劉進士禹謨

別後一辱記問。感荷厚情。兒輩得奉教於門下。幸甚。比來頗知奮勵。不敢廢業。謝君選

期當在八月。度其名次當得內除。但既授職。則自有官守之責。不得專精於教督矣。竊思執事大事既襄。讀禮有暇。且憶前別時。亦曾有接館之約。不知終愛否。便中專懇。幸惟亮之。

答凌叅政洋山

惟公宿望宏猷。久淹藩服。旦夕且當有大畀於左右。雅志高懷。決不能遂也。手示薊事。咸中機宜。譚公戚帥。殫忠効實。人罕知者。賴公委曲調護。裨益弘多。節得西報。虜酋尙未回巢。東虜勢孤。或亦不能大舉。若隘要處墩臺已就。秋防諒保無虞。需以一二年。守備漸修。士氣稍振。即可議戰矣。奈何人心不同。好生異議。阻壞成事。殊可恨耳。

答閩撫涂任齋

海賊挾倭奴爲患。閩中之訊。欲牽我師。仗公雄略。成就殲夷。從此併力海上。盪定之期。匪伊朝夕矣。慰甚慰甚。懋賞酌功。朝廷自有異典。孰得而掩之哉。

答中丞孫淮海

辱惠佳刻。略讀數種。皆入玄造奧。含菁咀華。且其議論不詭於聖人。向也吾見公之貌。

而已。今乃得窺其深矣。蘇氏有言。千金之富。卿相之貴。苟非天之所與。求一言之幾乎道不可得也。公以涉壯之年。早窺道域。天所與也。願勉旃自愛。歸見令叔。慮吾證以山中所得何如。恐當遠遜阿戎矣。

答中丞李沾渠

辱華翰。諭麾從已。臨節鎮。慰慰。雲中迫鄰虜境。比年主將非人。邊備久弛。近得趙帥。稍覺改觀。公資其雄畧。授以勝算。虜不足慮矣。

答漕河督撫

淮徐困敝已極。豈堪重罹大災。惟幸新渠安流。漕艘無恙。然吾元元之衆。與苦甚矣。賴公經畫有方。勞來安集。得以少舒朝廷南顧之憂。慰甚慰甚。大疏一一覆行。

答中丞谷近滄

近來考課不精。吏治日敝。去歲曾一疏陳之。而人皆溺於故常。務爲姑息。以悅下。今實行。惟見公之論先尹而已。方今幹蠱之時。非加意綜覈。不足以振敝維風。公之此舉。其有裨於治道不淺。敬服敬服。前所控者。不知其人已獲否。便中附及。

答總督譚二華論任事籌邊

築臺守險。可以遠哨望。運矢石。勢有建瓴之便。士無露宿之虞。以逸待勞。爲不可勝。乃策之最得者。其利害長短。亦不待智者而後知。奈何世間一種幸災樂禍之人。妬人有功。阻人成事。好爲異說。以淆亂國是。又幸天下之有事。而欲以信其言。闇者不察。從而和之。數月紛紛盈耳。僕隨事破妄。因機解惑。舌幾欲敝。而唇幾欲焦矣。近來稍稍寧帖。昨巡關出。亦曾與之極言其利害。又故以他事獎之。而使之知所嚮往。自此之後。異議者諒無以鼓其喙矣。公之忠赤。勞勩人雖不盡知。我祖宗在天之靈。必陰鑒之。願堅持此心。保無他虞。僕在此。一日必爲國家肩一日之事。今人心不同。趨向靡定。百爾委曲調御。僅得少濟。終無能大有建明。其苦心極力。處有不敢爲公告者。亦惟仰祈我祖宗在天之靈。鑒此歎歎耳。西邊屢有偵報。虜酋未回。目前或可無事。再假一春寧謐。則緊要墩臺。皆已竣役。即可議減客兵一枝。然此須自公發之爲妙。且看明春事勢何如。再作商量也。大疏所陳。計慮深遠。規模閎闊。非爭逐於刀錐者可望。已下部議覆。但人情玩愒已久。雖有良法美意。不肯着實舉行。一切皆成故紙。殊可恨也。當此幹蠱之時。不

少。行。綜。覈。之。政。惡。能。振。之。哉。威。帥。久。不。聞。問。不。知。比。來。何。如。辱。翰。示。之。及。謾。爾。具。復。不。悉。欲。言。

答兩廣總督熊近湖論廣寇

數年劇賊。一旦就擒。仗公雄畧。收此奇績。斯朝廷付托得人之效也。功高賞懋。國家自有彝典。本兵方按故事。奏凱論功。嗣容專賀。竊以爲滅賊固難。善後尤難。蓋廣之動勦。非一日矣。數年以來。憂在曾賊耳。未遑他圖也。今鯨醜雖已就戮。而奸民反側者。尙懷觀望。山寇陸梁者。伺我疲勞。海防久廢。法紀未張。吏不恤民。驅而爲盜。此皆釀禍之根。未可遂謂寧帖也。且張璉擒而吳平繼之。吳平殲而曾一本繼之。往事失策。可爲爛鑒。爲今之計。似宜乘戰勝之餘威。藉兵餉之少裕。急將海防事宜。嚴加整飾。如林道乾輩。旣爲良民。便當遵吾約束。渙其羣黨。釐其宿弊。如懷疑貳。即可名之爲賊。因而除之。仍當於沿海一帶。分區設寨。修飾兵船。嚴申海禁。又廣中原題設六水寨。今宜選諳習舟師。分任責成。至於山寇。乃坐守虜耳。勝兵往加。勢如破竹。亦宜殲其渠魁。後乃可議招撫。區畫已定。然後簡汰有司。一意拊輯。所謂乘威之後。以行惠。則惠尊而民悅。此數世。

之。利。若。狃。於。一。勝。遂。謂。無。事。而。姑。息。以。求。安。竊。恐。亂。本。不。除。餘。毒。再。作。終。當。復。勞。尊。慮。耳。萬。里。之。外。事。難。遙。度。第。以。管。閩。質。之。左。右。公。其。採。而。行。之。幸。甚。

### 答楊兵憲

近邊兵憲。待次撫臺。比者借重。寔遴選也。願益展猷爲。以需崇簡。薊事不振久矣。頃雖加意整飾。輒聞實效。弊在人心不一。論議煩多。將令不行。士氣難作。此雖督將領之責。然司道實分任其事。幸公留意焉。

### 答薊鎮戚總兵

廣事自區區力主夾剿之議。及請發帑銀先治海賊諸事。人皆未以爲然。今偶得成功。幸也。但善後之圖。全在督撫。頃所示者。悉中機宜。已卽授之於熊巡撫矣。

### 與漕河督撫

敝省改折漕糧三萬石。原因荊州左衛。移調顯陵。該衛運船灑派江西。無軍無船。其勢不得不行改折。非暫因災傷蠲免者比也。昨該部不查緣由。議復本色。竊以爲欲復本色。必先造船。又議撥軍。今湖廣一省軍衛。除邊方守禦外。大抵皆爲運卒矣。今欲增撥。

將何所出。造船既費，不賞撥軍，重行勞擾。而所復本色，不過三萬石。況京軍月糧，近亦本折兼支。則改折事體，亦爲兩便。又何必拘拘以復本色爲哉。今當下貴衙門查議，惟公留意熟計之。幸甚。

答兩廣總督熊近湖

前承差去。妄有所陳。管闕之見。聊以助公一籌耳。茲辱翰示。欲以貴恙引去。大失鄙望。災荒勸勤。使公獨勞。僕輩亦何嘗不以爲念。但善作貴於善成。克終乃爲有始。萬一代公者不得其人。致墮前功。則公之盛美。毋乃亦有缺乎。大疏部已案候。願勉思國家大計。慎醫藥。厚自持。以副羣望。幸甚。

答司空林退齋

近見南中駱掌科疏。始知公所以屢疏求去之意。雖然。世之所望於大人君子者。固以其能弘濟於艱難也。古人迂身善君。不潔其名。願勉抑高懷。以副羣望。

答閩中涂巡撫

廣寇遇閩師而奔。勢窮力憊。折腰之兔。虞者得而置之。論其功。閱自不可同日而語。但



以兩省事體不得不均。處耳。功高賞薄。卽鄙心亦深歎焉。

### 答廣中督撫

辱華翰領悉。不用斗粟片甲。而使積年逋寇。皆束手歸降。買犢賣刀之化。不足以媲美矣。慰甚慰甚。贛兵援廣。聊以拯一時之急耳。向此中有欲議留蔡將者。僕力止之。今廣寇漸平。不容再借矣。

### 答方巡撫金湖

惟丈雅望雄才。久困鹽駟。茲者諸公之舉。實出輿議之允。正人登顯。國家之幸也。賊入應州。據報四萬。實不過一二萬。兩鎮之兵。併力蹙之。諒不敢深入。但虜居塞外者尙多。宜鎮空虛。殊爲可慮。丈宜與繼津公熟計。嚴爲之備。

### 答施兵憲

辱別教領悉。往者部擬推陞。稍有一二間言。後訪之郡中士民。咸切傾戴。其議卽息。公更勿以此介意。但委心任理。仗大公履。至正。至於道之通塞。有命存焉。決非人所能爲也。今人心叵測。時事艱難。遇事則委難。以責人事。平則抑人以揚己。誠有如來論者。至

於。居。上。位。者。一。有。爲。國。家。任。事。之。心。尤。不。免。於。人。之。相。議。捧。誦。至。此。再。三。興。慨。嗟。乎。此。正。僕。之。茹。苦。而。不。以。告。人。者。也。然。僕。之。所。以。自。處。則。亦。唯。委。心。任。理。仗。大。公。履。至。正。而。以。通。塞。付。之。於。命。耳。將。奈。何。哉。辱。以。僕。爲。知。己。故。敢。盡。其。區。區。

答南司徒馬鍾陽

惟公昔在司農。僕忝胄監。以官曹之伊邇。幸得時時瞻儀範。奉清論。蓋傾向者久矣。比者主上留心國計。召公於留京。委以重任。輿情顛顛。方以得人爲慶。公乃獨眷念慈闈。浩然長往。旣違鄙願。又孤衆心。詢之來使。言太夫人福履倍增。公亦靜攝愈勝。不知承歡之暇。亦嘗以主恩士望爲念否乎。僕因緣際會。謬參重寄。深惟寡昧。無補於時。惟有薦賢一念。庶可以報塞於萬一。而今海內名流。適於當世之用。寔未有踰於公者。此憐惓之愚。所以結注於左右而不能已也。李帥功名著於閩中。旣與地方相安。何必又爲更置。辱諭俱領悉矣。

答張廬山

往銓部問可爲督學者。僕妄以己見。列足下及海內名士十餘人以應之。今皆次第登

敍猶足下尙滯籙書之任。然或又以足下之才器。卽亦畀以重且大者。不必更煩於文墨間也。幸努力自愛。僕寡昧。竊抱敬賢之心。居常所推轂天下士甚衆。然而皆不欲人知。敢以口惠市德於足下哉。致煩遣謝。深以爲媿。人旋草草附復。厚惠概不敢領。輒用歸璧。統惟鑒原。

答督撫魏確菴

公之情。驚苦切。西石已備言之。顧以疆事孔棘。不能從命耳。茲奉來教。卽白之太宰。徐當爲公處。

答督撫王鑑川

諸鎮斬捕首虜幾二百級。自來出塞之功。未有如是之奇者。宜破格錄敍。以風諸將。而人之所見。乃有大不然者。其時僕偶以病出沐。不獲與議。徑從薄賚。然公論皆以爲未允。俟勸疏至尙當有處也。

答南司徒張華峯

僕以孤直。不能徇俗取容。謬當鼎軸。爲衆所忌。聞公以令親陳道長在南中。密爲護持。

感戢洞於心膂。然知公此心。非獨私於僕。爲世道慮也。今歲南北俱水。閭閻嗷嗷。此中隱憂伏禍。又有不可勝言者。僕以寡昧。秋毫無補於時。而拙直之性。又不能浮沈和光。以保榮祿。惟當引去。庶可道責耳。

答憲長楊晴川

辱示城守保甲事宜。皆地方切務。但患有司不能著實奉行耳。須屢省詳覈之。庶不徒爲文具。近來薊事。視昔何如。當事諸公經畧。亦有次第否。今歲雖幸寧謐。來年尙有可慮。諸公爲備。果足恃否。便中更望密示。

答薊遼總督魏確菴

遼左重鎮。正仗雄才。乃西石道公中欸懇至。不得已勉從所請。然區區之愚。於交情雖篤。而爲地方計則疎矣。行矣。強食自愛。墨子之突。恐不及黔也。

答中翰張後湖

辱揭示領悉。疏當案候。春初戒行可也。令先翁之謚不稱其行。公評咸以爲歎。昨已致書雷院。求爲具題請改矣。茲有一事。敬問掌記。先年張文簡公會得內閣所藏冊府元

龜一部其後文簡公卒於京邸其僕即將此書於部前貨賣。令先翁識其爲閣本也。贖而藏之於家。嘗語區區曰。吾欲將此書仍送內閣。以完先代之寶何如。僕時起賀曰。幸甚。此義舉也。無何而令先翁亦逝。竟弗克踐其言。今憶此書。必無恙也。僕欲倍價奉贖。仍歸閣中。以卒成先公之志。惟執事其幸許之。夫此一書也。文簡得之。令先翁贖之。至僕而還之。三更張氏。皆楚人也。將以媿於古之左史倚相。能讀墳典丘索。不亦美乎。

按文簡公石首張暨中翰先公茶陵張治也初謚文隱

### 答遼東巡撫方金湖

遼左重鎮。仰仗雄才。簡命自天。允孚輿論。在僕私衷。尤爲欣忭。雲中賴公秉持公議。聞燕院近亦洞豁無苛責。皆公調停之力也。

### 答山西按院饒成山

遠辱華翰。知旌節已臨三晉。慰慰。別諭云云。深感至愛。太宰爲人所傾。殊可歎憤。臺高老起。用素在同。心世事。尙可爲也。

### 答湖廣按院雷信菴

張江陵書牘 卷上

屢辱華翰。深荷遠情。龍湖老先生改謚事。卽辱允俞。存沒銜感。聞榮滿屆期。代者擬是遵化陳君。此君沈毅敏達。可繼公後。敝府太守代趙者王君。亦佳士也。地方有賴矣。

答遼撫方金湖

辱教知旌節已東。無任欣慰。遼左虜警。多在春間。防禦之策。所宜預圖。二帥更換。原非鄙意。但議者以彼中鎮巡頗不相能。欲借曲處之耳。議尙未定。辱示具見。留念邊鎮至意。

又

適借東藩。又移西鎮。諸老之意。僕不能違。所喜馬帥素辱知遇。文武輯睦。邊方之幸也。初春已聞有小警。願適發征旆。以慰將士之望。

答湖廣撫院劉唐岩

承差至。辱華翰領悉。監利賊首既已首服。自宜宣布威信。許其自新。土司讐殺。雖其恒態。但至於劫質衛官。則事體重大。必須會題。惟不宜輕調兵動衆。俟從容以計取之。幸責成。該道兵備於軍衛有司中。選有智畧。知兵機者。專任其事。或計誘相近土司。伺便。

圖之可也。去歲敝縣逋欠漕糧甚多。荷臺下曲處。其有德於地方甚厚。但借過藩司銀。亦宜補還也。

### 答荆守徐太室

辱華翰。感賤厚情。惟公卓行宏才。久淹外服。屬者楚中學憲缺擬借重。而銓曹以公資望既深。旦夕且將畀以重且大者。不欲更以文墨相煩。而不知公之標格蘊蓄。於此更爲宜也。老親家居。深荷垂念。銜感無任。施州土官事。前已具復。頃科中以爲言。生譬之。金崗事情與四川都蠻不同。故部覆亦甚圓活。大抵需以歲月計處之自定。

### 答閩撫熊北潭

比聞山海餘孽。尙爾縱橫。知公籌畫爲勞。乃其用兵次第。則宜以海寇爲先。浙兵既到。宜及其鋒而用之。若屯聚坐食。無他奇道以取勝。使山賊得乘吾之懈。非善計也。

### 答楚按院雷信菴

比者旌節按行荆南。辱枉顧敝廬。兼承厚貺。感荷感荷。辱教江堤經始。羣盜解散。在僕得免鄉里之憂。黎民咸獲安恬之利。公之造福於楚人。所宜世世而俎豆之者也。差人

旋草附謝。感仰之私。萬不悉一。統惟亮存。

四十

答應天巡撫海剛峯

三尺法。不行於吳久矣。公驟而矯。以繩墨。宜其不能堪也。訛言沸騰。聽者惶惑。僕謬忝鈞軸。得與叅廟堂之末議。而不能爲朝廷獎奉法之臣。摧浮搖之議。有深愧焉。

答薊鎮巡撫

虜馬弱矣。乃敢騫入塞內。遊騎往來。乍進乍退。此必誘我也。馬帥堅壁威平。遏其東犯。甚爲得策。致之平川。出其不意。以夜取之。必獲志焉。但恐我力少備多。不敢輕動耳。計此時當已退遁。卽無斬獲。馬帥之功。仍當優錄。幸與察院一計之。

答薊鎮撫院王鑑川

辱翰示。知已得代。東征有日。無任欣慰。虜馬南牧。自春涉夏。誘我逋逃。擾我稽事。彼能多方以誤我。而我竟不能出奇以制之。邊將可謂無人矣。今秋之事。深爲可虞。望早發征虜。預緝雄策。以副明主倚重之意。大疏所陳。事事據實。皆可旋至。而有效者。卽寄語西石公。經畧旣定。惟當遵行約束。守而勿失可也。



答藩伯施恒齋

聲容盛而武備衰。議論多而成功少。宋之所以不競也。不圖今日復見此事。僕不度德量力。欲一起而振之。而力不從心。動見齟齬。茹莖懷冰。有難以言控者。唯當鞠躬盡瘁。以達主知而已。其濟與否。誠不可逆觀也。辱華翰。勞問勤渠。深荷道誼真愛。

答楚學道胡廬山論學

承教虛寂之說。大而無當。誠爲可厭。然僕以爲近時學者。皆不務實得於己。而獨於言語名色中求之。故其說屢變而愈淆。夫虛故能應。寂故能感。易曰。君子以虛受人。寂然不動。感而遂通天下之故。誠虛誠寂。何不可者。惟不務實得於己。不知事理之如一。同出之異名。而徒兀然嗒然。以求所謂虛寂者。宜其大而無當。窒而不通矣。審如此。豈惟虛寂之爲病。苟不務實得於己。而獨於言語名色中求之。則曰致曲。曰求仁。亦豈得爲無弊哉。願與同志共勗之也。

答薊鎮督撫計邊鎮臺工

臺工之議。始終以爲可行。確然而不搖者。惟區區一人而已。辱示云云。近來會士大夫。

未嘗不一爲譬曉。但今人任事者少。識事者尤少。任事者真見其事。理之當爲而置。是非毀譽於不顧。不識事者未觀利害之所在。而喜爲欺言。臆說以眩名。兩者相與宜其說之。曉曉而不可止也。世事如此。可嘆可慮。昨部覆兵科疏。尙欲下督撫議。區區再三。曉以頃總督疏臺工限已寬矣。賞已併矣。大工垂成。奈何終止。既不可止。又何議爲。徒使任事者疑畏而自阻耳。部中因予言而止。覆詞頗亦分曉。會軍門可達此意。勿生退悔。今年虜情可虞。聞鎮中哨夜亦有得至虜帳中者。想得其的耗。幸密以告我。當秘之不泄也。

答薊鎮撫院王鑑川論薊邊五患

辱華翰。知己建牙誓衆矣。欣慰臨淮一至軍。而旌旗服色。皆爲改觀。豈獨其法嚴哉。蓋亦威望素著故也。但此中事情。與關西稍異。虜強一也。雲中北直虜庭。板升叛逆。倚胡爲患。二也。士無鬪志。惟務賄免。三也。卒惰而玩。將令不行。四也。密邇畿甸。畏避情深。小入則大虜勢。以爲解脫之地。小勝則張虛聲。以邀式遏之功。積習故套。牢不可破。五也。夫世必有非常之人。然後有非常之事。有非常之事。然後有非常之功。公折謂非常之。

人也。五者之患。庶其有瘳乎。願熟計而審圖焉。

### 答北邊撫院孟豐麓

往時總督當秋防之時。卽移駐懷來。雲中三關。聲援遼絕。議者每以爲言。然南山一帶。逼近陵京。今復舊制。令督撫仍駐陽和。居中調度。東西應援可也。乃欲盡撤入衛之兵。棄南山而不守。則失策矣。且防守數年。虜中亦知有此徑路。一旦棄而弗守。假令虜乘吾之閒。以一軍綴上谷。守將而以勅卒掩吾不備。當其時。誰任其咎乎。善謀國者。必不如是之踈也。大疏請兵。亦爲得策。但以京師驕脆之卒。使之乘障遠戍。恐不堪用耳。容與本兵計之。

### 答薊鎮總督譚二華言邊事

卽月三日。得大同密報。言把都兒於月中旬。領三十騎來俺酋營。約搶京薊。俺酋遂率衆於二十等日。徙營威寧海之東。調集諸部。日漸東行。云云。據此與公所遣偵探相符。則虜之東犯必矣。聞虜中荒旱。饑疲馬弱。諸部東西相牽。心不齊一。或未能深入。然不可不爲之備。今議者咸謂薊人疲於工作。決不能戰。公誠督勵諸將。鼓率士氣。併力一。

決則。馭馭之口。不攻自息。其南兵三千。宜置之前行當虜。卽有損失。人能諒之。若令北卒。居前而已。擇利便。則憤怨愈不可解也。年來困於薊議。心焉如擣。苦廟堂不能擔當。視聽疑惑。奈何奈何。京兵已促之赴鎮。本兵懦弱。甚可慮也。

答薊鎮撫院劉北川言分將當虜

頃得譚公書。言各路措畫已定。戒備甚嚴。諒保無虞。但聞虜欲分道入犯。則我之勢力。自。分。曹。壻。古。石。譚。公。已。自。任。之。馬。大。付。之。戚。帥。燕。河。以。東。願。公。當。之。胡。守。仁。南。人。恐。威。力。不。足。以。制。諸。將。須。公。親。駐。邊。隘。督。勵。將。士。乃。能。有。功。拒。之。不。入。此。爲。上。策。卽。不。幸。而。入。亦。望。思。爲。可。戰。之。具。因。地。合。營。懸。賞。勵。士。乘。間。覷。擊。彼。亦。安。能。狂。逞。哉。薊。事。經。營。數。年。視。此。一。舉。望。公。留。意。辱。示。某。生。所。著。書。皆。根。及。理。奧。匆。匆。不。暇。細。讀。聊。取。其。一。二。策。觀。之。蓋。篤。志。好。學。君。子。也。惜。其。齒。暮。無。以。自。見。得。公。爲。之。表。章。亦。足。以。償。其。平。生。矣。

與薊鎮巡撫

虜情。巨。測。無。恃。其。不。來。恃。吾。有。以。待。之。昨。已。申。告。薊。人。務。以。整。暇。毋。勞。擾。毋。忘。備。但。得。西。警。少。緩。專。意。東。防。虜。雖。入。吾。據。灣。河。以。東。無。足。憂。者。觀。公。措。畫。不。俟。遇。敵。已。見。勝。數。

矣。老酋若果不東，則上谷雲中，恐不得安枕。公宜戒諸帥嚴爲之備。板升大饑，聞日有南歸者，亦可因其饑而招諭之。

### 與薊遼總督謀俺答板升之始

賊聚而西，患在雲中晉陽矣。既有的耗，公自不得不西應之。但南山一帶，尙爲可慮。幸留標下一二枝，以東事托之趙帥，乃可專意西防也。近聞土虜亦未動，薊中或可無虞。卽有事，薊人自足當之，無煩西援矣。外板升一事，望公密切圖之。去歲謀之，業已六七分就矣。而爲大同守所壞，殊爲可恨。今之視昔，則又不同。俺酋老矣，其子台吉嘗切齒此輩，欲盡屠之，乘其危懼之時，招之易耳。此一機也。彼中荒旱饑窘，人思南歸，此又一機也。故願留意熟計之。今東患在屬夷，西患在板升，二患不除，我終無安枕之日。然西事稍易，宜先圖也。人旋附此，以備採擇。

### 答宣大巡撫劉白川

頃據東西報，虜謀皆已解散。過望後無警，則薊永之間，可以安枕矣。此雖朝廷有福，胡運將衰，然先聲伐謀，屈兵不戰，在督撫諸公之功，尤當與殺敵者同論也。

與薊遼總督譚二華論邊虜爭功

四十六

宣大之說。妄誕狂肆。見者無不笑之。其意不過妬薊人之戒備却虜。欲邀以爲功。不知疆場寧謐。國家無事。人臣并受其福。奚必功之自己出耶。其疏不復下部。徑批量賞。蓋恐部覆又滋口說也。公於此。但宜付之不知。置之勿論。若與之辯折。則又一某矣。事寧之後。可上一疏。言今秋虜情。據宣大初報。十分重大。邊臣恐懼無措。躬履戎行。晝夜戒備。賴天威遠讐。廟堂指畫。西鎮之強兵猛將。既有以振其先聲。內地之足餉守要。又有以破其陰計。是以醜虜畏阻。自行解散。在我無亡矢遺簇之費。而在彼有奔走約會之勞。臣等待罪邊疆。幸勉愆戾云云。不惟不與之爭功。而反推以與之。彼當嚼舌愧死矣。恐公聞之。或不免動意。特以走告。統惟鑒裁。

答兩廣督撫

頃廣中士人。力詆俞帥。科中亦以爲言。該部議欲易之。僕聞此人。老將知兵。第數年以來。志頗驕怠。意其功名已極。亦欲善刀而藏之。論者之言。適中其意。前聞公以十月進剿。臨敵易將。兵家所忌。代者或未必勝之。且撫按俱未嘗有所論劾。乃獨用鄉官之言。

而罷之。亦非事體。故止於戒飭。然不知其人畢竟何如。公與同事。必知之真。若果不可用。亦宜明示。以便易置也。

答兩廣李蟠峰

各處有司。當易者多。但甲科。今已除盡。須俟新科。然僕以爲良吏。不專在甲科。甲科未必皆良吏。若廉其已試有效者。就近更調可也。他途亦可也。容即與太宰公議之。大抵論廣中諸吏官。以操守爲先。廉且能上也。卽不能兼。且先取廉者。蓋數年以來。廣盜之起。始皆貪吏利其賄。以致滋蔓。故唐人有送南海尉詩云。此鄉多寶玉。慎勿厭清貧。蓋自古以爲難也。僉大猷者。畢竟爲人何如。便示。

與撫院王鑑川訪俺答爲後來入貢之始

昨有人自雲中來。言虜酋有孫。率十餘騎來降。不知的否。俺答之子。見存者獨黃台吉一人耳。其孫豈卽黃台吉之子耶。彼何故率爾來降。公何不以聞。若果有此。於邊事大有關係。公宜審處之。望卽密示。以信所聞。

答鑑川策俺答之始

虜種來降。雖朝廷有道。能使遠人向化。亦公威德所及也。慶幸慶幸。顧此事關係至重。制虜之機。實在於此。往年桃松寨事。廟堂處置失宜。人笑之。至今齒冷。今日之事。又非昔比。不宜草草。頃據報俺酋臨邊索要。僕正恐彼棄而不取。則我抱空質而結怨於虜。今其來索。我之利也。公第戒勵將士。堅壁清野。扼險守要。以待之。使人以好語欺之。曰。吾非誘汝孫來降。彼自慕吾之化。醜彼之俗。故來耳。中國之法。得虜酋若子孫首者。賞萬金。爵通侯。吾非不能斷汝孫之首以請賞。但以彼慕義而來。又汝親孫也。不忍殺之。且給賜衣服飲食甚厚。汝欲得之。自當卑詞效款。或斬吾叛逆趙全等之首。盟誓於天。約以數年騎不入吾塞。乃可奏聞天朝。以禮遣歸。今乃肆其凶逆。稱兵挾取。吾豈畏汝者。今宜大人馬。豈復往年之比。汝來則來。吾有以待之。且聞汝子辛愛。怨汝之愛少妾。溺幼子。誘納吾中國叛人。踈其種類。旦夕且將殺汝。汝肘腋之患不虞。而何以汝孫爲哉。彼聞此言。未必不動。又聞那吉之來。皆其奶公主之其人。必有智計。可使入密誘之。曰。我太師知那吉之降。皆是汝意。汝誠識事體。知順逆者。今太師已奏聞朝廷。大大與汝官職。以賞汝功。但今老酋臨邊索要。願進羊馬數年。贖取汝等。得即寸斬汝矣。我太



師念汝等慕義而來。不忍利賄而殺汝。任其索取。斷不與之。然今有何計可取老酋之首。除汝等之害者。殺得老酋。卽封那吉爲王。遣兵送汝等歸故地。永爲中國藩籬。長享富貴。渠聞此言。亦未必不動。吾得因其計而圖之。亦一策也。虜之入犯。乃其常事。卽其孫不降。彼亦必入。我亦必防。公宜堅持初意。審定計謀。毋爲衆言所淆。今冬節已深。塞外草枯。彼亦不能遲久。且虜中今歲饑荒。頭畜多死。東犯不遂。西搶不成。力罷於奔命。計阻於多歧。衆叛親離。內難將作。此亦天亡之時也。向者僕固謂世必有非常之人。然後有非常之事。有非常之事。然後有非常之功。此所謂非常之事。非公孰能了之。但那吉、數人置之。鎮城宜加防範。毋令與外人相通。厚其給賜。毋使復萌歸念。續降之人。眞虜分。配將士。華人各與寧家。亦不宜聚於一處。恐生他虞。書生之見。聊備採擇。統惟鑒裁。

### 再答王鑑川策俺答

降虜事一如公所議。旨云且與做。云候旨另用。皆含蓄未盡。後來操縱自有餘地。在相機行之。但聞老酋臨邊不搶。又不明言索取其孫。此必趙全等教之。誘吾邊將而執之。

以爲質。伺吾間隙。而掩其所不備。願公戒勵諸將。但併堡堅守。勿輕與戰。即彼示弱。見短。亦勿乘之。多行間諜。以疑其心。或遣精騎出他道。擣其巢穴。使之野無所掠。不出十日。勢將自遁。固不必以斬獲爲功也。薊鎮援兵。已有旨掣回西防。冗中草草統爲鑒裁。

與王鑑川言制俺酋款貢事

降虜事情。廷臣初意紛紛然。廟堂論定前。已獨聞於上。然後擬旨處分。闕外之事。一切付之於公矣。乃昨承翰教。似與初指少異。聞者疑之。異議稍起。僕竊計公發書時。尙未見近日之旨也。承教謂宜乘老酋欲孫之急。因與爲市。誠然。但朝廷納降和戎。須自有體。今旣與之。以官卽爲吾人。若謾然而納之。率然而與之。事屬挾取。迹同兒戲。損威傷重。取輕外夷。非計之得者也。據巡撫差人鮑崇德親見老酋云云。回時又令自揀好馬。其言雖未必皆實。然老酋舐犢之情。似亦近真。其不以諸逆易其孫者。蓋恥以輕博重。非不忍於諸逆也。乳犬驚駒。畜之何用。但欲挾之爲重。以規利於虜耳。今宜遣人先布朝廷厚待其孫之意。以安老酋之心。却令那吉衣其賜服。緋袍金帶。以誇示虜使。彼見吾之寵異之也。則欲得之心愈急。而左券在我。然後重與爲市。而求吾所欲。必可得也。

僕料老酋此來決不敢搶東賊之入非其本心昨已密授方畧於方公趙帥計此時想已出邊若諸將肯併力一挫之則黃酋不敢復入而老酋之勢自孤計利圖便陰陽開闔在我自有勝算矣或慮虜久住不退兵連財費者此不揣於利害者也今日之事幸而成即可以紓數年邊患其所省豈直數十百萬而已哉而又何惜於目前之少費哉恐公爲衆議所格措畫少失遂棄前功故敢陳其愚

又

頃有妄言者已奉宸斷黜之此中更無異議但此事關係重大須處置得宜操縱在我上不失朝廷之體下可獲柔服之利乃爲勝算也來教有授使口詞及虜中來語發緘無之想忘付來使也虜使以二十日發去計今想已得其要領必如初意執送趙全等首惡數人納款效貢索其番文信使乃可奏聞朝廷爲之哀懇仍加那吉一職銜賚以衣幣禮而遣之則老酋旣感不殺之恩小虜亦受中國之命自可以銷其惡毒懷我好音邊境之利也處分有緒望先期密示或更有商量乃可題請虜酋賜衣差人於內庫揀鮮好者付去使費致幸即命製予之大疏已下部當先行優賚徐議陞復耳

## 與方金湖言制俺酋款貢事

間謀一行。虜即喙晚。賴天之靈。愚計幸而屢中。慶甚慶甚。小酋定許其歸。但須少留難之。務令執送諸逆。誓永不犯。乃可奏聞朝廷。禮而歸之。小小結局。僕之始謀。固不止此。然亦數年之利也。今錄去寄鑑川前後二書奉覽。鮑崇德返自虜中。倘有定議。幸星夜密以見教。以便措畫。鑑川謂馬帥賊在門庭。按兵不赴。意甚銜之。僕再三爲之營解。謂老酋方駐在近邊。渠豈敢輕身東援。乃得免於重參。公須爲調護於中。可也。今秋邊事。公功最多。須先行薄賚。徐當議處。

## 寄太史吳後菴

念昔與公投分非淺。中更離隔。可爲惋嘆。玆當聖明之隆。方欲招隱遺於邁軸。賁束帛於邱園。而公以青年儁才。竟爲例格。一蹶而不振。豈非命哉。然人能抑公之官職。而不能抑公之人品。能使其事業不顯於當時。而不能使其文章不傳於後世。其所能者。則既無可奈何矣。其所不能者。則願公勉焉。

## 與王鑑川謀取板升制虜

降虜事前已悉。若彼果能執送諸逆。則當以禮遣還那吉。厚其賞賚。以結其心。卻責令奉表稱臣。謝朝廷不殺之恩。賜賚之厚。因求講和。納款效貢。俟其誠心向化。誓永不犯。乃可議其封爵貢額耳。但僕猶有意外之防。不敢不告。趙全諸人。背華即夷。爲日久矣。彼豈不預結於俺酋之左右。邊墩之人。亦豈無爲之耳目者。今我明以此要求。彼亦慨然允許。此輩豈得全不知覺。若知之。彼亦安肯坐而待縛。如雞狗乎。萬一語泄。彼得而謀。或聊以脅從。數人塞責。而朝廷明旨一出。不可復返。輕棄重質。但獲其毛賊數人。則於國家威重。豈不大損。此其可慮者一也。據鮑崇德所傳俺酋之言。雖若哀懇。然猶身駐近邊。擁兵自強。平虜城外。遊騎不絕。轉餉哨探。俱屬艱難。名雖哀求。事同強挾。未見其爲誠款也。今必責令將有名逆犯。盡數先送入境。返其巢穴。掣回遊騎。然後我差官以禮遣歸其孫。則彼之誠款。既伸。我之懷柔。有體。若擁兵要質。兩相交易。則夷狄無親事。或中變。唐時吐蕃劫盟之事。取笑強胡。此其可虞者二也。今之議者。皆以小酋爲禍媒。急欲遣之。圖眼前無事耳。至於封爵貢市二事。皆在可否之間。若鄙意。則以爲今邊防利害。不在於那吉之與不與。而在於彼求和之誠與不誠。若彼果出於至誠。假以封爵。

許其貢市。我得。以開修戰守之具。興屯田之利。邊鄙不聳。稽人成功。彼若尋盟。則我示羈縻之義。彼若背盟。則與問罪之師。勝算在我。數世之利也。但恐其孫一歸。彼願已遂。求和之意。必乖本圖。或請乞多端。難於聽許。明年當復來侵。雖獲趙全等數人。恐於彼無大損益。此可慮者三也。大疏早晚即復。其中委曲。難以一一指授。望公與金湖兢兢圖之。公亦須移駐鎮城。庶便措畫。又阿力哥本導那吉來降。與之必至糜爛。今彼既留周元二人。則此人亦可質之以相當。統惟留意。

## 與王鑑川計送歸那吉事

向者奉書。誠爲過防。辱來教事。事有備。可坐而收功矣。慰甚慰甚。初擬老酋賞賚。那吉加官。後思今虜所急者。在於得其孫。且了此一事。待封貢事成。則其部下酋長。皆授官爵。而老酋例有蟒服之賜。向後給之。未爲晚也。旨中不重執叛。而重輸誠哀懇。蓋朝廷懷柔外夷之體。幣布已於內庫索出。星夜賞上。到卽行事。毋使虜久候心變。小酋既去。宜厚撫之。傳與方金湖。凡那吉所用諸物。可悉與之。宴賚皆宜從厚。彼亦人也。能不懷感。他日有事。卒相遇於疆場。知軍中有王太師。亦必避公三舍矣。此在公可以便宜行。

之不必一一以聞也。諸逆旣入境。可即執送闕下。獻俘正法。傳首於邊。使叛人知畏。先將那吉移駐近邊。叛人先入那吉。後行彼若。却質即斬。那吉首示之。閉城與戰。彼曲我直。戰無不克矣。阿力哥斷不可與之留得。此人將來大有用處。望公審圖之。姚子之言甚妄。恐金湖聞之。意或灰阻。願公曲加慰勉。此事關係甚重。倘處置少失。雖離地方。責亦難諉。況未必得去乎。事機所在。間不容髮。尊見旣定。斷而行之。勿自製肘。彼雖有言。廟議已決。無足恤也。

### 答徐太室憲長

虔中之轉。已乖輿論。至乃橫被口語。形之論列。則是非倒置甚矣。疏中所云。絕無影響。即欲擬旨徑留。又思衆不可蓋。公論未伸。將謂僕有私於公。則公之卓行貞操。終無以白於天下矣。故不得已而行。勤已曾達意代者。令其虛心體察。毋入先言。諒人心之公。自不容泯。近訪之敝鄉人云。公以志行高潔。爲衆所忌。似不宜獨咎一人。以自樹敵也。

### 答王鑑川

虜酋內附。逆賊伏誅。邊境救寧。神人胥慶。此不世之功也。加秩廕賚。未足以酬。尙當有

待封貢事既與虜約。豈宜先背。奈本兵畏縮異常。庸夫尙多異議。將來若欲收功。未免復排衆論。但僕昨於處降執叛一事。心力已竭。今未知復能任此事否。時難得而易失。功難成而易壞。奈何奈何。

與王鑑川議堅封貢之事

僕竊祿無補。濫被恩私。夙夜省循。顛躋是懼。乃辱華翰遣賀。益增其愧耳。感謝感謝。封貢事乃制虜安邊大機。大畧時人以媚嫉之心。持庸衆之議。計目前之害。忘久遠之利。遂欲搖亂而阻壞之。國家以高爵厚祿畜養此輩。犬馬之不如也。僕受國厚恩。死無以報。况處降納叛。既以身任之。今日之事。敢復他諉。待大疏至。仍當極力贊成。但許貢之後。當更有一番措畫。金湖既去。代者恐未必相成。須借公威望。屈留數月。庶可免事後之慮耳。

答王鑑川計貢市利害

今之議者。皆謂講和示弱。馬市起釁。爲此言者。不惟不忠。蓋亦不智甚矣。夫所謂和者。謂兩敵相角。智醜力均。自度未足以勝之。故不得已而求和。如漢之和親。宋之款納。是



制和者在夷狄而不在中國。故賈誼以爲倒懸。寇公不肯主議。今則彼稱臣。納款。效順。乞封。制和者在中國而不在夷狄。比之漢宋之事。萬萬不侔。獨可謂之通貢。而不可謂之講和也。至於昔年奏開馬市。官給馬價。市易胡馬。彼擁兵壓境。恃強求市。以款段駑罷。索我數倍之利。市易未終。遂行搶掠。故先帝禁不復行。今則因其入貢之便。官爲開集。市場使與邊民貿易。有無稍爲之約束。毋得闕出中國財物。及應禁者。其期或三日。或二日而止。如遼開原事例耳。又豈馬市可同語乎。且此事有五利焉。虜旣通貢。邏騎自稀。邊鄙不聳。稽人成功。一利也。防守有暇。可以修復屯田。蓄吾土馬之力。歲無調援。可省行糧數十百萬。二利也。土蠻吉能。每借俺酋以爲聲勢。俺酋旣服。則二虜不敢輕動。東可以制土蠻。西可以服吉能。三利也。趙全等旣戮。板升衆心已離。吾因與虜約。有願還者。必勿阻之。彼旣無勾引之利。而又知虜之不足恃。則數萬之衆。皆可漸次招來。曹州之地。可虛矣。四利也。彼父子祖孫。情乖意阻。胡運將衰。其兆已見。老酋死。家族必分。不死必有冒頓呼韓之變。我得因其機而行吾之計。五利也。凡此五利。皆古之謀臣策士所爲禱祀而求者也。而今之議者。獨以邊將不得擣巢。家丁不得趕馬。計私家之

害。忘公室之利。遂失此機會。不爲國家審圖。故僕以爲此言者。不惟不忠。蓋亦不智。甚矣。至於桑土之防。戒備之慮。此自吾之常事。不容一日少懈者。豈以虜之貢不貢而有加損乎。今吾中國親父子兄弟相約也。而猶不能保其不背。况夷狄乎。但在我制御之策。自合如是耳。豈能必虜之不吾背乎。數十年無歲不掠。無地不入。豈皆以背盟之故乎。即將來背盟之禍。又豈有加於此者乎。利害之歸。較若黑白。而議者猶闕。以此爲言。故僕又以爲不智甚矣。劉院旣知此事顛末。又與公同心。必能共襄大事。幸採取其議。及鎮守兵備以下所呈。折以高見。并圖上貢額。貢期市易事宜。僕與立老當備聞於上。請旨行之。浮議雖多。不足恤也。

答南御史張懷川

使至辱華翰。深荷雅情。比來南中諸疏。皆愜輿論。臺諫公議。所出朝廷耳目。攸係願諸君勉旃。毋以言爲諱也。

寄陳松谷相公

都門解袂。與立老相對哽咽者久之。不惟感德傷離。蓋亦惜大賢之去國。嗟善類之無

依也。別後邊聲四起。羽檄交馳。幸內外蠱備。虜亦旋遁。有間。卽有虜孫來降之事。主上用愚計。幸而時中。板升賊首。纍纍生致於闕庭。誠宗社之福。邊疆之幸。但外寧內憂。聖人所戒。未知向後。何如耳。此必台念所切。敢以奉聞。餘惟若時珍攝。以需寵召。辱長公惠書。冗不及裁答。師翁旣去。不宜復奪上左右簪筆之臣也。幸卽命北發。以慰惓惓。

與王鑑川計四事四要

封貢議起。發言盈庭。類皆以媚嫉之心。而持其庸衆之見。本兵錯愕惶惑。莫展一籌。不得已乃於文華殿面奏請旨行之。又將成祖封和寧太平賢義三王故事。揀付本兵。然覲覲之喙。雖已暫息。而暗暗之讒。伺釁而動。彼旣不能爲。而妬人之有爲。必且幸其人之無功。而求中其說。此僕所以日夜兢兢。不遑寧處者也。昨旨乃僕所擬。其中蓋有二意。一則欲公悉心經畫。務極穩妥。一則欲公教督諸臣。比常倍加防守。今就二意之中。所當經畫者有四。互市。初開邊氓。畏慮不敢貿易。虜人不市。覺怨易生。今歲且宜官爲處置。使邊氓睹利。則人自樂從。一也。鐵鍋乃虜所急者。頃部議禁不與市。將來必求索無已。今聞廣鍋毀。則不可復爲兵。宜稍口口口市之。來歲責令如數更換。二也。虜使。

既不許入朝。須安置得所。鎮城之中。民物殷阜。易啟戎心。昔年豪宗。獻城之事。可爲殷鑒。頃者流議。皆起於鎮城之人。虜使一入。人人惴恐。宜嚴加防範。以杜奸萌。倘邊堡可容。無令得入鎮城。三也。馬趙久爲邊帥。趙雖喜事而近忠。可馴伏也。馬故多端。素與虜通。其部下多眞虜。而又有內主。封貢之議。渠最不願聞。公近日以法繩之。頗不能堪。以其含憤蓄怨之私。而行其幸災樂禍之計。何所不至。雲中人情。公所素知。今旣不能去。亦宜以計用之。毋令積恨生變。四也。其所當修備者。亦有四要。城堡及時修併。邊境之險。漸次可復。一也。募招沿邊之氓。開墾荒屯。充實行伍。鍛礪戈矛。演習火器。訓練勇敢。常若敵來。二也。趙全等妻。子黨與。尙在虜中。宜於互市之時。陰察賊情。知其主名。可招則招之。不可則擒之。庶逆黨可消。後患可弭。三也。擣巢趕馬在邊。士雖借以邀功。冒賞而虜中亦頗畏之。今旣禁不出塞。則虜人寡畏。而邊士袖手無所覲幸。他日渝盟之事。不在虜而在邊人矣。此宜預慮。以杜弊端。四也。前四事不急圖之。則貢市之事不成。必快讒妬之口。後四要不預畫之。則貢市雖成。無益反貽他日之憂。僕與公委心爲國。休戚相關。故敢縷縷罄其愚悃。惟公採而行之。幸甚幸甚。

答荆關水部金省吾

遠辱翰貺。深荷雅情。客有荆南來者。道公權政清肅。誠近年罕覩。濟時大業。大受根基。於此可窺其概矣。敬仰敬仰。厚惠不敢當。附使歸璧。外小錄奉覽。諸惟鑒存。

與薊鎮楊巡撫

虜已東行。不知遼左有備否。貴鎮清查虛餉。萬有餘人。數十年宿蠹。一朝剔去。司國計者。方且嘖嘖稱羨。乃聞近日。又欲募卒補伍。是以弊易弊也。且南兵工食。在常額之外。方患無以給之。賴此補數。似不必更招浮濬。以滋冗濫也。又聞百川公有示。令軍士有能告言將官虛冒軍餉者。賞銀五十兩。恐啓陵上之漸。然其中必各有謂。不如所聞。幸密以見教。東事無日不在鄙懷。故喋喋如此。統惟原亮。

答三邊總督邵文川

辱華翰。知己建牙視事矣。無任欣慰。北虜乞貢。頃於文華面奏。奉宸斷行之。惟三邊事體稍異。須兩督撫會議耳。響水極當虜衝。急宜脩繕。昨何君請馬價。原與督府會行。乃太僕遂加醜詆。過矣。神木兵備查盤。道長有疏。意欲照舊。似宜從之。其參守兵馬。亦不

必更兌矣。

六十二

答貴州撫院阮沙城

辱示知安。曾事已有次第。別時所云。今一一具獲實効。審爾則差官可不必行矣。此事不煩一兵。不費斗粟。而凶狡服罪。地方救寧。公建此大功。宜膺上賞。俟大疏至。當有以處之。

答督撫鑑川

封虜使者。本兵依違久之不能決。竟遣一參將行。其人年少。輕率。恐不可使之見虜。曾第令捧勅。至幕府。另選邊吏充使可也。副之者鴻臚署丞王勳。頗諳夷語。能辯番文。可備驅使。惟裁而用之。偶患泄瀉。伏枕占授。不悉欲言。

答廣西撫院李蟠峯

古田積寇盪平。地方寧敕。公威德所及遠矣。頃本兵奏績。薄行陞賚。聞廣左又以大捷。隆恩懋賞。當有待也。聖德光被。南北寢兵。僕伴食無功。陰受其福。

答兩廣殷石汀論平古田事

積寇盪平。黎庶安堵。此不世之功也。乃鄙陋者猶有事後之議。雖聖明遠矚。功罪不淆。然亦足亂人意。聞其說皆柳州士夫倡之。以此見丈之暫留數月。不獨爲地方計。亦所以爲丈計也。近來人心不古。好生異議。以其媚嫉之心而持其庸衆之見。惟欲徧徇己私。不顧國家便否。卽如昨年虜孫之降。舉朝駭懼。以爲不可納。僕曰。納之而索。吾叛人可盡得也。貴州之事。撫臣請兵。請餉。衆皆曰。可許。僕曰。此渠。叔姪間爭殺耳。不足以煩朝廷。古田。密邇會省。叢爾小醜。敢戮天子之命吏。不容不討。衆皆曰。劇賊據險。兵力所不能加。卽欲除之。非集數省之兵費五六十萬不可。僕曰。不然。吾知殷公必能辦此。諸君但觀其破之。此三策者皆大違羣議。而僕獨以身任其事。主上用僕之策。幸而時中矣。乃異議者猶欲搜求破綻。阻毀成功。以快私指。嗟乎。人臣爲國家忠計。可如是乎。若僕則誠愚矣。前承教廣鹽議。鑿鑿可行。然必得丈處置有緒。後人乃可持循。恐終爲異說所壞也。南明磊落偉奇之士。昨卽欲引賓部堂。以其夙蒙譽議。今初召起。聲實未著。故暫借敝省撫臺。旋當與丈先後登進耳。同年在仕籍可用者無幾。他日爲國家柱石。在丈與南明公。新安一郡。產此連璧。敬羨敬羨。先後領華翰。或不能盡復。大都具此。統

惟鑿原。

六十四

答楚按院陳燕野

楚中連歲災饑。人不聊生。公精覈吏治。脩舉實政。百方省節。加意增循。楚氓所宜世世而祝頌者也。去歲秋闈。流言脩起旋滅。今則惟聞頌聲休譽而已。徐憲副昔守敝郡。甚有政績。而恃其才守。屢憎於人。雷院之論。蓋誤聽人言。非有私惡也。襄漢士民。自有公論。願公博訪而審聽之。如事有實跡。則亦非僕所能庇也。

答松谷陳相公

別後。樞衡之地。屢致隱隱。機辟盈野。鳳翔九霄。以翁之出處。視今人之去就。豈得並日而談哉。欣慕欣慕。蕪錄向欲呈覽。以無便翼。茲撫臺承差去。敬附二冊。內學論二義論及策之一二三。實出拙構。知已傳笑於蜀中久矣。倉卒不敢脩起居之敬。尙容專候。統冀台原。

答三邊總督戴晉菴

頃五月二十一日。已封拜虜酋俺答爲王。諸小酋俱授以官職。入貢互市。次第舉行。獨



西虜未靖。兩省府會議。部中遲疑。近有人云。公謂僕以舍親西石之言。變其初說。此傳者非也。西石之意。原與鄙見相左。僕初未嘗因其言少有疑阻。但以西事與宣大微有不同。所慮者。撫賞之費。無從措處故耳。行兩督府虛心計議。務求停妥。今東事既已就緒。在西勢不能獨異。幸早決大計。以便題覆。

與楚撫阮汪南明

辱惠不敢例辭。登領感謝。承教云云。今日籌邊第一計。僕已慮之久矣。但譚、戚、二君。數年間。大忤時宰。意幾欲殺之。僕委曲保全。今始脫諸水火。一旦驟用之。恐不可成。徒益衆忌。且以九邊萬里之遠。馳驅經略而責效於三載之間。卽二君高才亦未能辦也。當取公策秘之錦囊中。酌而行之。大疏封還。未敢宣泄。惟冀台原。

答兩廣殷石汀

前有小柬。言近事頗悉。不審徹記室否。紛紛之議。聞皆起於柳人。聽者不察。率爾奏臆。其中自相牴牾。茫無的據。幸聖明遠矚。公論昭然。公亦不必以此疑阻。要令餘毒盡銷。士民安堵。則忌吻浮談。不摧自破矣。人旋附此。諸惟鑒存。

答河道按院胡玉吾

六十六

新河之議。原爲國計耳。今旣灼見其不可。則亦何必罄有用之財。爲無益之費。持固必之。見期難圖之功哉。幸早以疏聞。亟從寢閣。始者建議之人。意蓋甚美。其說雖不售。固亦無罪也。

又

始慮新河水泉難濟。臆度之見。不意偶中。辱別揭所云。剴切洞達。深合事理。自勝國以來。二百餘年。紛紛之議。今日始決。非執事之卓見高識。不能剖此大疑。了此公案。後之好事者。可以息喙矣。書至。卽過立翁。言其不可成之狀。立翁亦慨然請罷。蓋其初意。但憂運道艱阻。爲國家久遠計耳。今旣有不可。自難膠執成心。蓋天下事。非一人一家之事。以爲可行而行之。固所以利國家。以爲不可行而止之。亦所以利國家也。此翁之高爽。虛豁。可與同心共濟。正在於此。誠社稷之福也。海運一策。亦不得已而思其次者。尙須淮南直達天津。風洋無阻。乃可圖之。僕猶慮海禁一弛。他日更有可憂者耳。大疏會同巡撫梁鳴泉。不必另疏。

答河南巡撫梁鳴泉

膠萊新河。始即測知其難成。然以其意出於玄翁。未敢遽行阻闕。故借胡掌科一勸。蓋以胡固玄翁所親信。又其人。有識見。不隨衆。以爲是非。且躬履其地。又非臆料遙度者。取信尤易也。昨觀胡掌科揭呈。明白洞切。玄翁見之。亦慨然請停。不必阻之而自罷。以是知執事向者之言。雖極痛切。未免預發其機也。區區今處天下事。大率類此。雖竭盡心力。不過小補而已。終無能有所建明。此易所謂屯其膏。施未光者也。王敬所在齊中。政事何如。兩司及諸郡長吏。孰爲可用。統希見教。不悉。

答閩中憲使李義河

使至辱教。知道從己入關。良慰鄙懷。以丈素所蘊蓄。豈欲專一邱一壑以終老者哉。古人云。得時無怠。裹糧躍馬。猶恐失時。今主上虛己以任宰相。百執事師師濟濟。咸欲有所表見。周道寧夷。倖門壅塞。以時言之。似亦可矣。願丈急乘之母怠。又喜榮轉近關。且夕且將有大畀焉。

答南宗伯秦華峰

惟公昔以無妄蒙議。私心嘗爲不平。會在位者有不悅於公。未敢昌言之也。茲幸玄翁掌銓。又雅敬重。故得以贊其區區。願留曹清閒。尙未足以展摠宏蓄耳。徐判屢有書來。道公相念厚情。感切感切。

答薊遼總督王鑑川

前得饒君書。虜王已憤怒北還。秋間糾衆來市。計虜帳旣歸。豈望驟返。商民一散。難以復集。當秋高馬肥之時。值新虜再至之銳。求索必多。釁端易起。故欲延至冬間。徐爲措處耳。茲奉教。知虜尙未去。市期近在此月。則便當以速了爲妙。何必又改期再約乎。饒疏已寢不上。一切惟公所裁。但至期仍望公提一旅稍稍西行。以彈壓之。虜王聞公之來。必堅奉約束。且大軍在近。三晉之文吏懦將。亦有所恃而無恐。知公爲疆場攬慮。不憚一行也。承教謂虜酋動以封爵誇示其衆。公亦使人屈禮以歆艷之。甚善甚善。僕嘗恐虜不慕官爵之榮。不貪中國之利。但以戎馬與吾相角於疆場。則真無可奈何。今誠有慕於我。我因其機而制之。不過出吾什一之富。則數萬之衆皆可折箠而使之。願今時人皆不足以語此。反以爲狂且悖耳。昨上谷二市。甚得其利。黃酋彌耳帖伏。皆仗公

威望遠懾。但水泉事完。則大功克就矣。頃慶禮告成。中外胥悅。在僕私心。尤爲欣忭。

### 答貴州撫院阮沙城

坐鎮在雲貴土司。原有故事。但須擇廉慎有謀者遣之。不然反足以納侮啓釁。前見水西衆頭目有疏言安國亨子幼不能統衆。此必安酋使之。但其中委曲亦宜審處。貴竹土司與雲南鎮守不同。難以例論。或省諭安酋令其安插阿傀停當。及各犯盡數執出。錢糧抵補俱完。許與乞恩。盡赦前罪。照舊管事。則坐鎮亦不必遣矣。阿傀旣出省城。禍根已絕。向後家事亦豈盡卵翼而乳哺之乎。在公心知此意。審計之耳。然事機遼遠。不能遙度。不敢以制幸與鄭道詳計之。

### 答憲長施恆齋

雷道長誤聽人言。論劾徐君。徐君又妄自猜疑。謂公揭之。轉轉相疑。竟成蕉鹿。受病之根。必有所在。久當自知之。昨徐君亦有書言此事。僕已再三譬曉之。渠必開悟。其事已屬之陳道長勸處。諒爲昭雪。徐君平日心行。僕固未能深知。若在荆襄。則誠未可議也。

### 答河南巡撫梁鳴泉

膠河罷議。不惟寬東土萬姓財力。且使數百年謬計。一朝開豁。不致復誤後人。誠一快也。胡掌科之勸議詳明。玄翁之心無意必。皆足以爲後來處事之法。區區何知焉。誤辱獎借。深以爲愧。別楮所云。一一領悉。

## 答郝巡撫

西事處置略備。部中方議覆行。但未貢先市。恐非事體。至於家丁增餉數款。乃調停撫馭之策。恐不宜與貢市同題。已屬本兵酌處之。戴公計惑於主斷。氣奪於嚴旨。故倉皇失措如此。人旋草草附復。西鎮遼遠。事機不能悉知。望不時密示。以便措畫。

## 答河南巡撫梁鳴泉

今歲徐邳河患更劇。將來漕事。深有可虞。得通此一線。以備不然。誠預防至計。但事關海防。理須慎重。一應造船設官。皆計慮周密。庶可無虞。昨所遣商販。須換來面。訊之明歲。且姑少載。試行。若果通利。逐漸加之。可也。統惟審圖。冗不多及。

## 答宗伯高南宇

辱教。知東山情切。高駕夷猶。殊失朝野之望。茲溫綍再頒。敦勸愈篤。恐上命不可屢抗。

物望不可終。孤區鄙衷。曾與陸儀制畧言其概。想亦以轉達矣。如僕輩薄劣。不足以致天下賢者。然公平。生自負。謂何可終。老林壑乎。

### 答河道潘印川

頃報運舟漂覆。近百。正糧虧失四萬有餘。數年損耗。未有如此之甚者。國計所關。日夕懸切。今海道既已報罷。河患又無寧時。不得已復尋泐口之議。頃已奉旨。煩公與張道長勸議。幸熟計其便。且將從事焉。

### 答關中憲使李義河述時政

倅至奉書。知道從己抵闕。甚慰鄙懷。敕書爲管文書內監所持。茲卽查付。奉敕行事。可不須文憑也。邊事近稍次第。賈誼欲以三表五餌制單于。蓋古之謀臣策士。所以勞心籌慮。做口遊談。冀望而不可得者。正在於此。今我不煩一士。不役一兵。坐而得之。此天贊我也。奈何。今人爲宋儒之說。沁入心脾。與之語。此如陷烏附。異議紛紛。幾至顛躓。願主上納用愚計。幸而時中。然爲國家謀則忠。自爲謀則愚矣。計然三策。今始售一。向後未卜利鈍何如。辱教云云。固知豪傑所見。自與凡人殊也。試錄小技。不足入目。且意丈

久已見之。故未敢寄覽。茲奉命付去二冊。其中文字。大抵皆僕所削。若學論二義論及策之一二三。則全出拙筆也。麻姑擲豆。猶作狡獪變態。可笑可笑。丈瑣闌宿望。久困藩服。鄙心未嘗敢忘。有待有待。相去伊邇。此中動靜。想得具聞。有可以助我者。望不特直教。幸勿以秦越相視也。

答邊鎮巡撫

辱密示。言虜情邊事。一一俱中肯綮。西事以總督持議不決。以致驕虜怨憤。及奉旨詰責。則又倉皇失措。未貢先市。殊非事體也。威正恰者。不知前已授官否。渠既能制吉能。即可用。此人以行吾之策。切盡黃台吉。通佛經。識義理。昨在宣大調伏俺答。老把都二酋。甚有功於中華。故特賜敕賞賚。此二人者。一宜以計用之。一宜以禮處之。俟延寧貢市事完。疏中可畧叙此二人。另行量賞。若疏已發行。不及叙錄。公可自以己意。陰厚之。以結其心。蓋制馭機宜。自合如此。延寧勢異。馬價平給。委爲失宜。昨諭意本兵。此後尙有劑量也。

答總督方金湖



邊事近來處置幸已就緒。今秋三陲晏然。一矢不驚。誠宗社生靈莫大之慶。但外寧內憂。聖人所戒。封疆之臣。未可一日而忘備也。昨具疏請敕飭戒諸邊。仰荷聖明允行。世必有非常之人。然後有非常之事。有非常之事。然後有非常之功。今邊政久弛。誠欲及時整理。興建鴻業。非常人所能也。如虞坡二華故事。借丈以墨經臨戎。使旋輒附鄙意。外小疏寄覽。

### 答薊鎮巡撫劉百川

調取南兵事。俱如高議。本兵已覆行矣。永東小警。雖聲在遼左。然亦不可不多爲之備。公但駐適中地方。以便調度。似未可便東行也。聞公與撫按諸君。方議調兵行糧事。薊永事勢。與他鎮不同。若俟賊已見形。而後調兵支糧。則無及矣。事有權宜。不宜膠柱。惟公裁之。

### 答南學院周乾明

書稱敬敷五教在寬。所謂寬者。始以人之才質。有昏明強弱之不同。須涵育薰陶。從容引接。使賢者俯而就。不肖者企而及焉。如是而已。今人不解寬義。一切務爲姑息弛。

縱。賈。譽。於。衆。以。致。士。習。驕。侈。風。俗。日。壞。間。有。一。二。力。欲。挽。之。則。又。崇。飾。虛。談。自。開。邪。徑。所。謂。以。肉。驅。蠅。負。薪。救。火。也。本。朝。監。規。及。臥。碑。所。載。凜。若。冰。霜。督。學。使。者。俱。用。憲。臣。爲。之。皆。有。深。意。南。都。首。善。之。地。惟。公。留。意。焉。

答奉常陸五台

僕雖無似。夙抱敬賢之心。今幸備位台省。其所振舉甄拔。不可勝數矣。乃平生敬慕如丈者。顧不能一引手焉。君相造命。豈其然哉。雖然。中心藏之。不敢忘也。令弟回。草草附候。聞以華嚴合論梓行。此希有功德也。刻成幸惠寄一部。別具潞紉二端侑柬。統惟鑒存。

答石麓李相公

弟平生孤子寡與。獨受知於門下。及同居政府。一心協德。庶幾有內魏同心之誼。中外士民。亦靡不懽悅和合。各適其意。不啻坐春風而飲醇醪也。豈意風雲倏起。陰晴頓殊。昔爲比目魚。今作分飛鳥。人生聚散離合。可勝嘆哉。愴然愴然。綠野開尊。庭闈綉彩。且用慰心自娛而已。他何足論。盛使回。草草附此。諸惟台亮不宣。

答楚按院陳燕野辭表闕

辱示敝省錢糧。查刷已有次第。易知單冊。正月可完。知公爲楚民計慮深遠。仰戴仰戴。孫方伯前已言其仰承德意。悉心措畫。此外如温大參。劉糧儲。亦誠一時之選也。楚人何幸何幸。頃得家信。言公表闕之命。堅不可回。方切愧悚。乃又垂念先世。再辱嘉賜。是重僕之不德也。昔念先曾祖平生急難振乏。嘗願以其身爲蓐薦。而使人寢處其上。使其有知。決不忍困吾鄉中父老。以自眩其闔里。且今歲楚中重苦墊溺。少省一分。則小民亦受一分之賜。在寒門少此無損。纖毫而衷多益。寡在鄉人。則有大惠焉。萬望俯諒鄙心。出於誠悃。並價之命。一切停寢。則信我之深。比之惠我之厚。又萬萬不侔矣。敢布腹心。惟公裁許焉。

答宣大巡撫吳環洲策黃酋

黃酋書。昨鑑川公亦曾抄寄本兵。此酋貪縱。寡謀終當歸。吾羈縲。觀其書詞。已非昔時之倔強。可用其幾。而制之。多行間諜。以疑其心。時用利餌。以中其欲。諒彼無能爲也。其妻家在三衛者。卽傳與薊人。量加優恤。亦制馭之一機也。史大官去歲侵盜二酋馬近

千。故二酋恨之已甚。其欲尋殺。不獨爲其近邊。蓋亦思以報之矣。然此雖小僮。其技與虜同。且倚山爲險。料二酋亦無如之何。宜撫而用之。以爲宣鎮外藩。時時戒諭以各守分地。住牧爲業。毋妄肆侵盜。使二酋得借以爲口實。但此輩撫賞之資。半出軍士月糧。割肉充腹。乃自困之道。宜有以處。吳兵憲道南。感公同心之契。思以自効。其志甚銳。不知畢竟能成否。辱示今所宜措置者。一一中的。但願審度時宜。慮定而動。天下無不可爲之事。況今時則易然耳。

答薊鎮總督王鑑川言邊屯

日來屢辱翰教。差人皆不索報。坐是失候。承示大疏八事。公圖之皆已有緒。要在邊吏着實奉行。期有成效可也。然八事之中。屯政爲要。今之議者。皆患兵冗。一切務爲清汰節縮。僕竊以爲過矣。天生五財。民並用之。誰能去兵。孔子稱必不得已而去。今之時非有甚不得已也。乃不務爲足兵。而務爲去兵。則唐之季世是矣。然足食乃足兵之本。如欲足食。則舍屯種莫繇焉。誠使邊政之地。萬畝皆興。三時不害。但令野無曠土。毋與小民爭利。則遠方失業之人。皆將襁負而至。家自爲戰。人自爲守。不求兵而兵足矣。此言

似迂。然在往時誠不暇。今則其時矣。故願公留意焉。黃酋邇來。聞漸就羈縻。觀其書詞。可見。此酋雖狼戾無親。然貪縱寡謀。尙爲易制。第無使老把都與之合。戮此孤虜。無能爲也。疆場小釁。或不能無。在因。其機而御之。期不害吾大計耳。使旋草草附候。屢失裁復。并此謝過。統惟鑒原。

答吳環洲策黃酋

辱手書及麻參將揭帖。具悉黃酋沉迷酒色。憚於西搶。祇欲近邊謀生。故屢次需索。又威脅屬夷爲之納進。其情不過如此。未敢卽踰盟也。史大官服屬已久。昨又已嚴行約束。令其各守分區。無相侵盜。足矣。乃必欲勒之親赴虜帳。何爲哉。鑑川之意。不過以今歲貢市甫完。恐以疆場小釁。棄其大功。不知成祖封三虜王。使命方回。寇騎已至。許囊毅在大同。東邊開市。西邊搶掠。夷狄之性。豈有常哉。願吾制御機宜。何如耳。犬搖尾乞憐。罔可投之。以骨。如其狂。則大杖加焉。且渠戰兵不滿萬人。其父叔諸部俱已臣順。獨此孤虜。如其跋扈。以上谷全鎮之兵。益以史大官之衆。令雲中以勁卒擣其巢穴。彼何能爲。渠曾占卜。當死南朝。觀其狂躁不常。殆天將亡之矣。公幸與趙帥密計。如可柔。

服。以計。餌。之。如。不。可。處。卽。宜。以。大。義。責。之。明。與。之。絕。毋。但。姑。息。養。虎。以。自。貽。患。也。聞。已。遣。人。好。諭。之。倘。得。其。要。領。幸。卽。以。寄。示。萬。萬。元。不。多。及。

答雲南撫院阮沙城

得十月二日書。知公前後處置安甯事。已竭盡心力。功高賞薄。深以爲歉。然公之勳名。著於此矣。疏窮奏事人。卽貴州承差。昨已擒獲重治。向來土酋搆毀。皆此輩爲之。倘解回發遣。更加重處。毋令得脫。復爲他日之害也。

答總憲凌洋山言邊地種樹設險

辱教種樹事。邊臣博美虛套。大率類此。僕起家吠畝。頗知樹藝之理。昔謝病山居。手植榆柳。今已鬱然參天。若以官法爲之。積歲累月。竟成虛謬矣。初時人建此議。僕卽與同事者曰。種樹設險。亦守邊要務也。但只如議者之言。決無成效。同事者頗不以爲然。今已數年。迄未見有一株成者。卽如臺工一事。當時若非僕力排羣議。以身任之。二華與公。殫力運思。躬親督理。則今亦當爲烏有矣。天下事。豈有不從實幹而能有濟者哉。昨閣中小疏。已曾懇切言之。自後積習。或當少變。國家欲興起事功。非有重賞。必罰終不。

可振來歲。擬遣大臣。闕視。大行賞罰。如猶玩愒。難振。則僕自請如先朝故事。杖鉞巡邊。人臣受國厚恩。坐享利祿。不思一報。非義也。何如何如。

### 答棠川殿相公

使至。知台從已返仙里。深慰鄙念。宋人有一聯云。山中宰相無官府。天下神仙有子孫。前一句公已得之。後一句願公勉焉。使旋迫節。草草附復。別具侑柬。幸惟鑒存。

### 答宣大巡撫言虜求佛經

虜王求經。求僧。此悔惡歸善之一機也。南北數百萬生靈之命。皆繫於此。天祐中華。故使虎狼梟獍皆知淨脩善業。皈依三寶。我聖祖謂佛氏之教。陰翊全度。不虛哉。禮曹准公咨。即可題請。不必另疏。但今在京番僧。皆溷濁淫穢之流。不通釋典。遣去恐爲虜人所輕耳。所求佛經。須有我聖祖御製序文者。乃可與之。公可特作一書諭虜王。嘉其善念。曲爲開導。示之以三塗六道之苦。誘之以人天福果之說。及念珠坐具之類。亦可稍稍裁與。俾益其向化之心。則亦調伏凶人一大機括也。聖人之道。苟可以利濟生民。隨俗因其教。可也。何必先王之禮樂法度而後爲哉。

答臺長蕭兌嶠

八十

辱華翰。獎許過情。使人愧悚。猥以謏陋。謬膺重寄。頃又特奉綸音。勉以同心。望以夾輔。日夕兢兢。懼無以仰承德意。所望海內道誼知契。匡助其所不及。幸公有以教我。近見督府察院論牧地事。不相下。其言皆過激。天下事。非一人一家之事。自宜虛心觀理。務求其當。奈何忿爭如此。竊意此事非公不能解之。頃已屬意本兵議復。牧軍驕悍。論久不決。或有他虞。非細故也。

答翰學張鳳盤

別後得途中所寄二書。情款備至。慰諭諄切。觸事感懷。不覺慨然興嘆。念知己之遼闊。悵話語之無從也。邱園之賁。初擬秋期。既復思之。得時毋怠。況既奉特旨召用。自應以趨命爲恭。可勿事夷猶矣。賞咨人去。草草附復。別悰萬種。統俟面陳。幸惟鑒亮。

答總憲孫華山

僕數年圖畫邊事。苦心積慮。冒險涉嫌。惟公知之。他人不能盡諒也。茲賴祖宗之靈。主上威德所及。東師奏凱。西虜款關。區區一念報國赤忠。庶幾得以少見矣。實未敢有一



毫計功謀利之心。昨三疏辭賞。由中非矯。重違上意。暫且祇領。終當懇辭。以明愚志焉。辱華翰厚賜。重增其媿。佳綢登受。餘輒璧附使者。草草附謝。統惟鑒原。

署兩廣殷石汀計剿廣寇

廣事披猖已久。一旦乘其後。遂欲責效。雖管葛猶難。昨電白報。至僕恐好事者不察。事機妄生。譁議故卽。擬旨分剖其事。假公便宜。俾得以自展焉。治亂國用重典。廣固亂國也。其勢非用兵威以震盪之。奸宄不畏。良民無依。所慮者費用不給。將帥乏才。公有何妙算。幸一一見教。僕無魏相坐測之能。然以愚忠不量力。每事輒欲以身任之。或可爲公一助焉。願公安志審畫。毋自退阻。

答荊州道府辭兩院建坊

往者察院建坊。僕屢書止之。竟不獲命。僕竊以爲未爲知我者。今聞汗凌二公又有此舉。使僕疾首蹙額。跼蹐無措。敝郡連年水患。民不聊生。乃又重之以工役。使萬姓。睨。睨。口。咀。呪。而。心。咨。怨。將。使。僕。爲。榮。乎。辱。乎。若。欲。給。與。折。價。尤。不。敢。當。家。有。薄。田。數。畝。足。爲。俯。仰。之。資。僕。又。時。時。以。其。祿。入。奉。上。老。親。給。鮮。爲。賓。客。費。家。不。患。貧。而。諸。公。所。餽。銖。兩。

皆民膏也。僕何功以堪之。何德以享之。頃已有書懇控二公。恐未見諒。願公再以鄙意固請。必望停寢。乃見眞愛。若不可止。如向者面瀆云云。准作廢府納價貯庫作數。僕亦受惠多矣。僕雖無德於鄉人。而亦懼叢怨以重吾過。諸公誠愛我者。宜視其所無者。而與之。奈何益其所有。以滋毒於僕。恃公道誼骨肉之愛。故敢瀝竭肝膽。直露其愚。若謂僕心或欲之。而姑飾辭以沽名。則所謂穿窬之徒。不可以列於君子之林矣。義激心違。語無倫次。統惟鑒原。

答楚撫院汪南明辭建坊

疊承厚貺。深荷雅情。辱教欲爲僕建坊表閭。往固知公必有此舉。已預陳悃愾。不謂臺符已下郡。且媿且感。敝郡連年水旱。民不聊生。僕方欲拯之而未能。而敢爲大役以買衆怨。且僕前已有二坊。省此不爲缺典。而益之乃足以重其過。詩云。人之好我。示我周行。公誠愛我。則幸與以所無者。若公旣不欲煩有司。而又私值以自利。是委公惠於草莽也。反覆思惟。二者俱未得。故敢再控諸臺下。愚懇不能順承嘉命。以速大戾。幸惟鑒原。

答奉常陸五論禪

沈吉士來。辱華翰。領謝。向會誦華嚴。祇見莽宕寥廓。使人心滉神搖。後於友人處見合論抄本。借讀一過。始於此中稍有入處。佛所說法。隨順諸根。義無深淺。然廣大含攝。解脫無礙。則是經爲長。而論又入法之大導師也。僕以宿昔頗種善根。今得聞無上甚深妙義。歡喜無量。聞公將鏤梓以行。太有利益。謹以俸金二錠。少助工費。雖塵露之微。無裨山海。聊以表信心云耳。若諸時事世情。非高蹈者所樂聞。故不具論。統惟鑒原。

答南司寇謝泰東論刑獄

前得西石書。言丈不嫌岑寂。樂就西曹。敢爾推轂。若僕私衷。固有待也。南中人情狡僞。詔獄繁興。擬議失中。致傷和氣。誠如尊教。丈能留意於此。卽澤流寰宇矣。處天下事。非至虛至平。不得其理。而詔獄民之司命所繫。尤重。頃見今之持法者。類以三尺行己意耳。嗟夫。天子猶不敢以己意殺人。况人臣乎。包子尙未到。渠初聞山東之轉。卽掉臂而歸。還是舊時情態。今得此報。當欣然就道矣。

答宣大巡撫計處黃把二虜

辱示虜所乞討。後六事之不可從。公已籌之熟矣。即前六者亦宜再加審處而後可以。愚計之。封爵於國體本尊。且可分虜之勢。未爲不可。但聞把都病已危篤。封之而死。其子必援例襲替。而黃酋吉能輩。皆紛紛求王矣。今且以言款之。徐觀其勢而爲之處。增加撫賞。所費不多。但不可聽其開報人數。作爲常例。此例一定。彼即視爲當得。與之不足。爲恩減之。彼即生怨。但可於經費之中。少從寬假。以每年所積客餉。動支什一。以充撫賞。隨其所乞者裁酌與之。縱量給珍異。亦不爲過。如此庶幾操縱之權。常在於我。彼欲乞活。不得不仰給於我。而我亦得以制其死命矣。然亦須題請奉旨。乃可。其實使入朝。向已議定。恐難擅開。且彼雖暫時馴伏。終與三衛不同。待數年之後。乃可議也。大抵今日虜勢。惟當外示羈縻。內脩戰守。使虜爲我制。不可受制於虜。近見鑑川措畫東事。頗覺窘迫曲徇。恐將來不可收拾。則爲虜制之道也。車夷去留。何足爲中國重輕。前曾奉告。謂但可以此詰責之。使屈常在彼。不必苦苦索還。若索之太急。則彼又持左券而要我。聞軍門通士楊亮。乃遂許以五百人糧賞。而其二比妓。遂相隨住牧於龍門教場。夫盡車夷之衆。糧食不過數百人。乃無故額外又增五百之數。不知何以給之。且其婦

既在此住則黃酋又因而往來近地。二史皆將服屬之矣。此所謂引賊入家養虎貽患。是何等計策乎。且楊亮何人。安得擅許以五百人糧賞。先年也先入貢。亦只因通士誘虜。言中國欲與結婚也。先貢馬納聘。而朝廷實不知也。卻其聘。遂生罅隙。致有己巳之變。此前事之可鑑者。豺狼虎豹。亦有豢養於苑囿之時。然畢竟籠檻之鎖繫。之時給與肉食而已。非可効鷄豚犬馬。可擾而狎也。今其婦既已至此。似宜厚其賞。而勒其婦。不爾將來必爲患。公當思余言。且上谷事體與雲中不同。而公之所處。與鑑川亦大異。僕請得悉言之。蓋求貢之議。本起於俺答。而我之生還其孫。彼亦知感。故其臣服獨爲誠懇。若黃把二酋。原出牽復。非其本心。故每每設爲難從之請。而肆其無厭之求。何者。彼其心非俺酋之心也。夫彼既非俺酋之心。而我乃以處俺酋者處之。不亦過乎。此二虜形勢之不同也。鑑川自建此議。朝廷恩賴頗隆。渠亦自知非久於此。但欲及身無事。常恐少有破綻。虧損前功。故雖知其不可。亦每每曲徇之。公初開府。責望甚重。二虜爲剝膚之災。且非旦夕可脫者。若不及今定一規模。以爲經久。將自絆其足。望實俱喪矣。此又鑑川與公所處之不同也。雖然。僕料此虜無能爲也。二年之間。邊鄙寧謐。首議之人。

功效已見。卽有小失。無損大計。向者小疏亦已明言之矣。況今西鄙諸部。皆已帖伏。獨此二醜。亦何能爲。以上谷全鎮之兵。益以二史之衆。不能當狂醜乎。公試與有識者計之。近得吳少參書。言閩守中事有主之者。其意似疑趙帥。不知渠與趙平日何如。若果有此。望公一一調處之。

答邊道吳道南

辱華翰。具悉貢市伊邇。諸凡惟留神審畫之。切盡欲支俸。則順義亦當給以王祿。耶人之無識。一至於此。可笑可笑。督撫膺闔外重寄。操縱可否。宜自有成算。奈何獨窺廟堂。以爲重輕乎。

答兩廣殷石汀

調募浙兵。俱如公所議。頃又疏請於上。特發馬價銀拾萬。以助軍費。此二事近皆有建議停止。然以廣中之事急。故不敢徇衆議而誤大計。許瑞若果傾心效用。則以賊攻賊。策之最妙者。萬里之外。事難遙度。用兵之機。忌從中制。惟公熟計而審圖之。

答松谷陳相公

長公至。拜領台翰。嘉貺深荷。不遺。伏諗道履佳勝。尤切慰仰。希文後樂翁誠獨際其盛。然忠臣雖在。吠畝憂國之念。未能遂忘。不肖謏劣。追陪元宰。賴朝廷之福。外內寧謐。目前景象。庶幾小康。可以糜祿而藏拙。但揣時度勢。每抱隱憂。將來又不知孰爲收拾耳。盛使回。草草附候起居。外具不腆。少伸微悃。統惟鑒原。

答宮端吳澤峯

惟公昔在詞林。素持高節。乃爲縉塵所點。私心極爲不平。方欲爲公昭雪。致之亨衢。而大疏適至。故特破例爲請於上。然公之心迹雖明。而車已懸矣。厚蓄宏猷。未得一展。安能不爲世道惜哉。辱華翰。使旋草草附復。諸惟鑒原。

答憲長徐太室

知賢不敢蔽。是非不敢枉。公非有求於僕。僕非市德於公。行吾直道而已。乃辱遺謝。深以爲愧。訊之來使。聞公北上無期。雅有終焉之意。僕竊以爲過矣。方今周道寧夷。賢良彙進。以公素所蘊蓄。古人事業。豈足爲哉。願勉抑高懷。以副鄙望。

答應天撫院

安慶之事。其變雖不甚大。然朝廷紀綱所繫。不容不盡法。一處往時振武之事。姑息太過。人敢效尤。今借此一振國威。亦弭亂之一機也。然府官始則措置乖方。致人怨忿。終則擅離職守。逃往留都。亦不得無罪。今當先正倡亂之法。後究致變之由。低昂輕重之間。貴得其當而已。

### 答河漕王敬所

辱示大疏。海運事宜。處畫周悉。今歲果利涉無虞。此後即可漸增其數。裨益國計。誠不淺也。頃聞運船過淮甚早。橫決之患。庶幾可免。萬公已至河上。河漕事體。如左右手。同心併力。乃克有濟。惟公留意焉。

### 答楚按院陳燕野

承示賦役提綱冊。已周覽一過。井然有條。大抵財用經費。惟條貫精詳。出納明覈。則節用之意。自寓其中。若代公者。肯再加申飭。諸司長吏。遵奉惟謹。則規格永定。雖有姦民猾吏。無所措手足矣。監利大盜。久嬰鄙懷。以有司不能任其事。不敢易言之。竝聞首惡已盡擒獲。餘黨稍稍解散。數十年巨寇。一朝剷除。非公沉機定算。安能辦此喜躍之懷。



良不可任。監利李尹不費兵力。收此奇功。允宜破格優錄。或暫加服俸。仍管縣事。他日以兵備僉憲處之。何如。郡中人來言各處江堤俱已報完。諸吏仰承德意。惠洽閭閻。公造福楚民。誠有卑荆衡而狹江漢者。感德之私。不知當何用爲報也。

答總督王鑑川計處黃酋

把酋死。上谷以東。可以安枕。黃酋孤。虜勢將益弱。近報吉能亦於三月三日病故。俺答東哭其帝。西傷其子。志氣蕭索。恐亦不久。天將亡胡。於此可見矣。但在處之。以恩信。其子但堪負荷。卽令控告俺。答奏請襲職。管束其部落。不必擇賢撫賞之。典亦如其父。不可有減。頭目中。有少知禮義。能用其衆者。亦宜陰厚之。使之歸心。中國則盟好永堅。邊塵息警矣。把酋之子。不知何如。僕料黃酋必思東併。今當扶植青把都。使之力抗黃酋。黃稍若有東併之志。只可責之以大義。亦不必力禁之。待其兩敵而歸。命於我。俺酋老矣。必不能東畧。此皆中國之利。但在智者審圖之耳。聞黃酋二妾皆已返其故巢。幸甚幸甚。僕常有狂志。謂黃酋可擒。今惟公可以語此。暇時與吳少參哲密計。若彼誠馴伏。則亦不必爲此奇事矣。趙帥吾撫之甚厚。乃其心檢狠如此。可惡可惡。昨對其使面加

叱責。彼亦知懼。然少參素履端潔。誰不知之。公又爲之疏聞。部中又已紀錄。則彼不能揭之。適以益彰其賢耳。會少參幸加慰藉。武人不足介意。今方欲任之。用其長而略其過。可也。

答王鑑川論胡運之衰

把都吉能。一時俱殞。黃會亦且病發。天之亡胡。於茲見矣。但在。我。處。之。須。以。恩。信。其。子。但能管束其部落。即令告於順義。奏請襲職。不必擇賢。要令其勢分而覺。搆則我可因。其機而制之。數十年之利也。辱示措畫虜情。及往來書論。一一俱中機宜。所與言佛氏因果之說。妙甚妙甚。雖然。此雖一時應變之言。其實則佛氏所謂如實語也。不誑語也。大雄之教。慈悲廣大。豈不知哉。令甥既有此浮言。又當具一疏。得旨乃可戒行。夏撫本無大過。玄翁以其經論。不可留之。蔡兵備引去。以劉調代。俱如尊諭。目下虜情。有何變態。俱望見教。

答奉常周少泉

疊辱翰教。深荷雅情。今同鄉諸賢。皆聚於留都。冗散。雖僕之不肖。不能相引。而諸公之

處心無兢。自甘沉寂。其賢益彰矣。

與王鑑川計虜情

虜酋之死。可喜也。亦可慮也。喜者。卜胡運之將衰。慮者。恐諸部之無主。今歲貢市愆期。是其明驗。頃見公措畫彼中事宜。極爲得策。恤死立生。以永固盟約。遲速之間。惟公相機以行耳。比探得虜情一紙。錄呈公覽。今俺酋無恙。目前諒不至乖張。但在我備禦之策。貴在急圖。誠有其備。豈惟無患。卽大功可成也。適有所感。懷抱欠佳。草草附復。諸惟亮察。

答臺長蕭兌嶠

辱示牧地議增馬額。以事歸之司馬。則事權歸一。而馬政亦因是可舉。甚善甚善。但開墾之數。不止於五十萬。而議徵銀不過十萬。似爲太少。大抵察院之議。不欲以餉入督府。今若就與察院虛心議處。亦與渠職掌有裨也。

答宗伯潘水簾

辱別諭一一領悉。白首相知。猶按劍也。况他人乎。然義命之學。竊嘗聞之矣。自檢平生。

不。敢。有。一。事。負。國。家。不。敢。有。一。念。負。於。天。下。賢。士。大。夫。至。於。去。就。有。命。存。焉。惟。靜。以。俟。之。而。已。猥。辱。至。愛。中。心。藏。之。

答兩廣郭華溪計剿廣寇

兩廣寇盜爲患久矣。異時居官者皆畏首事莫敢發。故其患滋甚。今乘古田之餘威。用足下之妙算。殲此狐鼠。諒不爲難。但炎荒瘴癘之區。屯數萬之衆。役不宜淹久。貴在臨機速斷。沉謀遠發。先併力以破其一。巢則餘賊自然破膽。次第可平。若以三萬之餉。與之相持於嶽岑之間。使賊踰伏溪洞以逸待勞。非計之得者也。兵機不敢遙制。特獻其瞽見如此。惟高明採擇焉。

答藩伯陳魯山

昔從鄴下。得望下風。繼會舍親王司馬。稱公遼左事。益喁喁嚮慕之。然實未嘗有所推轂也。三十年科弟。今猶淹在藩服。如僕安得謂之知人能薦士哉。而又敢以市德於公哉。猥辱遺謝。深以爲愧。三復華翰。文藻璀璨。歎羨彌襟。差人旋草草附謝。厚惠概不敢領。輒附使者歸璧。統惟鑒原。

答宣大巡撫吳瓌洲

節問承藩觴之寄。深荷雅情。謝謝。曾婦素悍。右其少子。情似爲眞。彼若請封乞貢。宜令順義爲之代請。如其執迷不反。則宜姑置之度外。不必苦要之。量此孤虜。亦何能爲。況其母子異心。亦終當歸吾羈縻也。

答三邊總督戴晉菴

吉酋旣歿。其子得如三衛例。襲替請貢。大疏甚善。但鄙意謂宜令順義爲之代請。蓋昔之乞封貢馬。皆出俺答意。今以此委之。則西部有所約束。而中國之體益尊。且其子尙未回。亦未可不俟其求而遽與之也。鄙見如斯。不知可否。惟公熟計其便。

答楚撫院汪南溟

十年之諾。至今未踐。茲奉新命。再督前逋。無任悚仄。比嬰俗務。文事曠廢。毛公楮氏。幾成絕交矣。且屬有公私之冗。願少假旬月。稍理舊業。勉圖報命。

答邊鎮督撫

辱示虜乞四事。本兵方行議處。諒在必從。亦未見有異議者。獨該科有一疏耳。比奉公

書責讓僕於宣帥有所私庇。僕不識其人也。第見前任督撫諸君。咸稱其才勇可用。比之雲中。尤爲近實。故時有獎借之詞。要能感奮。爲國家用命。如其狡飾。僞借罔上行。私國典。具存孰敢庇之。近訪知其誣玷司道事。卽使人傳語。深加叱責。此足以明僕之無所私庇於人也。正功罪明賞罰。懲奸覈實。此督撫事也。僕輩何敢屈撓焉。區區一念奉公守法之誠。幸垂諒察。

## 答應天撫院張曙暉

安慶之事。朝廷欲借此以振舉紀綱。折伏奸宄。乃本意也。查守並逮。萬不得已。其中委曲。難以盡言。昨逮至之日。卽令該衛姑緩其行。又徑送司。不復考問。問究竟。不過送部調用耳。逆弁俱擬寘之重辟。法司方奏當未上。決不少加姑息。黃判實始禍之人。法當重治。細觀大疏。則其事之顛末。昭然可睹矣。

## 答王鑑川

主少國疑。艱難之會。正宜內積。惻誠調和。宮壺外事。延接收攬。物情乃可以扶危定傾。而玄老一切皆易其道。又昵比讒佞。棄絕石交。語之忠告。不惟不納。反致疑怒。竟至於

此豈非天哉。當其時。人情洵禍且不測。僕猶冒死爲之營訴。爲之請驛。謹得解脫。然國體士氣所損多矣。嗟乎。自古讒人亂國。可勝痛哉。幸新皇聰穎異常。雖幼冲已具大有爲之度。區區愚忠。幸蒙俯鑒。方今官府一體。上下一心。內外事情。幸已大定。但邊事虜情。日夕在念。腹心雖安。四肢豈可忽哉。萬望留神。以慰宵旰。辱教云云。誠高見淵識。石畫鴻謨。非公愛我之深。曷得聞此。三復三嘆。敬佩良箴。昨本兵虛席。公論咸歸。公與西石。乃太宰謂渠復銓之始。嫌於首用其親。且貢市方殷。猶借重望以鎮之。計非久當別有簡命也。

### 答棠川殷相公

伏惟先帝恭已守文。澤被寰宇。臨御六載。天下晏如。遽爾龍馭上賓。攀號莫及。此臣子之大痛也。所幸新皇天縱睿資。雖在冲年。已具大有爲之度。此又宗社之大慶也。獨媿菲薄。謬膺重寄。方將敷求於賢哲。借助同心。望公珍重。以需召命。辱翰脫使。旋草草附謝。別具薄儀。統惟鑒原。

### 答宣大巡撫劉平川

辱翰示領悉。西邊貢市已報完。獨宣大事體。尙在還回。鄙意謂不必候齊。卽有一二枝不在。且置之度外可也。

答蘄遼總督

辱教。撫鎮相與。旣外合中離。勢自難久。但目前非易帥之時。俟秋防後圖之耳。西邊貢市已報完。上谷雲中。反覺乖阻。鄙意謂此事當以俺酋爲主。永把二枝。且當置之度外耳。

答三邊總督鄧文川

西邊貢市告完。榆鎮事體。尤爲寧妥。皆公經畫之力也。欣慰欣慰。上谷虜情。少覺搖兀。然鄙意謂此一二枝不足爲輕重。來則勿拒。去則勿追。在我自有餘力。而鑑川必欲羈致以求完美。則去來之機。在彼矣。目前喜朝廷穆清。官府寧謐。宗社之慶。遐邇惟均。

答鄖陽巡撫凌洋山

屢辱翰教。深荷雅情。僕以寡昧。謬當重寄。別無他長。但性耐煩耳。今喜朝政穆清。內外寧謐。可無煩尊慮。敝鄉水災。特蒙軫念。諸所蠲恤。該部一如所擬。疲瘵之氓。幸獲甦生。



公之德澤卑衡巫而淺江漢矣。感仰感仰。

答兩廣殷總督

廣事之壞。已非一日。今欲振之。必寬文。法假便宜。乃可。近來議者紛紛然。朝廷既以。外託公。任公自擇。便宜行之。期於地方安寧而已。雖彈章盈公。車終不爲搖也。汪南溟又挂南議。已擬旨畱用。使去冗甚。草草。

答司馬劉清渠

惟公昔在計曹。以守正不悅於時宰。致忤於中貴。士論每爲惋憤。茲當朝政更新。首蒙簡用。從人望也。願遄發征塵。以慰惓惓。

答司馬戴育菴

屢承翰示。已具覆如別楮。聞套虜西掠失利。彼方構禍於番夷。則在我可因間益脩守禦。以備不虞。東虜骨肉乖離。俺酋衰老。偷欲求安。皆中國之利。但願諸公努力勳名。毋失此機會。主上雖幼。實具大有爲之資。亦不欲苟爲旦夕之慮而已。貢市事。所司一具覆。

答薊鎮巡撫楊晴川

九十八

頃報虜警。雖在遼左。然彼垂涎灤東數年矣。于鄰之震。所宜慎防。山陵不必西赴。但保疆場無虞。卽所以効忠也。撫賞用馬事。已下部看處。

答孫巡按

辱示虜情具悉。黃酋素黠。必不肯樂附土蠻。骨肉乖離。天亡有日。但靜以待之。俺酋聞已就得勝市。不知能堅守約束否。事後再望見教。

答孫兵備

虜聲在遼左。實窺灤東。于鄰之震。所宜慎防。今方有事山陵。務期疆場寧謐。烽燧不警。庶道宵旰之慮。望諸君留意焉。

答薊鎮巡撫吳環洲

辱翰示具悉。細察虜情。昆婦貢市。似無來期。永邵雖爲所牽。然貪漢財物。可招而至。然皆無足爲輕重。第常以不貢。責之時。出小利。一誘之。母令東合土蠻。爲薊鎮害耳。順義表貢已封進。今歲所貢鞍轡弓矢。視舊爲佳。亦足以驗其無他也。

與王鑑川言虜王貢市

前後奉翰教。情款備至。不勝感念。虜王表貢。該部已題請封進。今歲所貢鞍轡弓矢。視舊精美。亦足以驗其誠悃無他也。昆婦愚悍。似無來期。永邵今雖爲所牽。終貪嗜關市財物。可招而致。然皆無足爲輕重。第當以大義責之。時出小利誘之。毋令東合土蠻爲薊鎮害足矣。辱示撫賞冊。據三、鎮、二、歲、之、中、所、費、不、過、萬、餘、而、所、省、已、百、餘、萬、若、所、全、活、邊、氓、老、穉、又、不、啻、數、十、百、萬、矣。唐代宗親叩首於葉護馬前。爲百姓請命。父老觀者皆爲流涕。曰。廣平王眞華夷主也。今所與虜者。國家不啻若九牛一毛。而所獲茲如此。若公與僕所爲國謀者。忠乎。否。耶。而叟。叟。者。猶以爲言。是其識。反出長安父老下矣。幸主上雖在冲年。已具有大爲之度。近又日御便殿講讀。因而商確政事。從容造膝。動息必咨。僕亦得以罄竭忠悃。知無不言。言無不信。擬於表貢後。當以邊事虜情。細細陳奏。且以明公任事之忠。塞叟叟之口。俟山陵畢後。乃得暇耳。公幸自信自堅。勿以浮言爲介。令朔鳳盤人去。草草附此。

答劉總督

尅糧充賞。邊軍困憊已極。薊事之不振。則職此之由。今戶兵二部。已議爲曲處。但此數一增。後來遂爲歲例。帑藏之入有限。犬羊之欲無窮。歲復增加。曷有紀極。此其弊源。必有所在。不塞其源。而徒徇其欲。將不知其所終矣。薊門事體。與他鎮不同。僕日夜念之。未嘗少釋。凡有所求。所司未嘗不頻感而語。屈意而從也。僕亦坐是。往往見惡於人。若僕有所私庇於薊者。然司農所藏。委爲匱乏。固亦無怪其頻感也。幸僕今謬司國柄。俟邊警少暇。望公與鎮巡諸君。虛心商量。思一長策。著實整頓一番。庶爲經久之計。若但折東補西。支持目前。費日增而無已。兵復弱而莫支。將來必有以爲口實者。恐僕與諸公。皆不能道其咎也。僕將有山陵之役。若灤東輟警。期至陵上一會。罄所欲言。有警則已。

## 答王鑑川

前啓附令甥人轉致。諒徹記室。虜貢已進。賜賚有加。順義誠欵。與公忠勳。主上皆已具悉。有書與順義。爲言天子生而神靈。十歲即能信任輔臣。親決大政。渠當益堅忠悃。使華夷常享太平之福。如昆婦一枝。愚悍不順天道者。天必絕之。將來自可見也。田世威

回。草草附此。

答總憲李石塘

近來時事。想俱有邸報。公所具不及一一奉聞。數月以來。人心稍覺歸正。士大夫始知有名節。行檢之可貴。自茲以往。日慎一日。庶幾昇平可致。但自媿綿薄。不堪重負耳。公正直清亮。人倫冠冕。淹處節鎮。未允物情。且夕當別有處分。人旋草草附此。

答荆守王古林

費奏官來。辱華翰具悉。劉江陵尙未至。至當以諫議處之。昨九月十一日。梓宮發引。十日九日掩玄宮。大事已畢。朝野清晏。主上日御便殿講學。新政昇平之效。庶幾可睹矣。

答三邊總督邵文川

套虜西掠失利。必思報復。彼之禍結於西。則邊境可以安枕矣。年例及鹽引銀。已告計部給發。人旋此復。

答杜晴江

惟公以直節見忤於時。經綸久卷。茲膺簡擢。允協輿情。况屬清明之朝。尤君子彙征之

日。望。益。展。弘。猷。以。副。鄙。願。僕。受。國。厚。恩。死。無。以。報。惟。當。旁。求。賢。哲。共。熙。帝。載。而。已。

百〇二

與南刑部謝太東

僕自當事以來。日夕兢業。惟恐蹈於矯枉之過。顧有不容不釐剔者。要亦順人心之所共欲者。因而行之。不敢措一毫枉意於其間也。頃案掌故。請主上御便殿。召見府部大臣。諮詢之端。於此已見。目前景象。似爲穆清。此後唯當恪循軌轍。按轡徐行耳。但人苦不自知。非得道誼。知己時時提覺。不能濟也。幸必有以教之。

答湖廣巡撫趙汝泉

惟公去楚數年。楚人思公。不啻赤子之戀慈母也。茲得再借。萬姓同欣。豈直僕一人之私慶哉。比來楚土凋瘵。視昔更甚。連年滂墊。民罔攸居。目前諸務。水利爲至。望公留意焉。

答參議吳道南

辱教。滿紙皆藥石之言。但謂僕驕抗輕棄天下士。則實未敢。然因此而益加警惕。無不可也。吳堯山奉命閱視宣大。僕數年以來。經營此地。頗費心力。今以託之。屬望匪淺。不

知肯爲國家措一臂否也。

與南宗伯秦華峯

頃者浮議之起。實緣公入賀一行。然公論可終混乎。悠悠之談。或謂僕有不悅於公。此大誤也。公之起用。僕與有力。援之於久鬱之餘。而薄之於嚮用之日。揆之情理。殆不其然。恐公意有所疑。故敢直披悃曲。惟公鑒而安焉。

答兩廣殷石汀

辱教滿紙。誼同金石。至如放四海而漸進。納百川以有容。許以同心。作其鼓舞踴躍之氣。教思無替。銷其跳號拂鬱之私。尤見公沉機超識。中才以下。所未易窺測者。僕雖淺薄。敢不夙夜。以奉良箴。所幸主上年雖冲幼。聰睿異常。又純心見任。既專且篤。卽成王之於周公。恐亦未能如是也。但自媿菲劣。不足以堪之。目前景象。似覺穆清。自今而往。惟當益積悃誠。恒存兢業。恪循軌轍。按轡徐行耳。嶺表之事。一以託公。必無敢搖撓之者。願懋建奇功。以副輿望。廣右府江聞已舉事。度郭君才力。足以辦此。不意懷遠又爾。遽厯撫新。附之衆。不宜持法太急。此亦有司之過也。但古田反側之人。將視此以爲嚮

背。幸留神速處之。

答河漕總督王敬所

今方內又安。所可慮者。河漕爲最。茲賴公之力。經理什七。江淮之粟。方舟而至。來歲新運。又已戒期。計三年之後。京師之粟。將不可勝食矣。欣慰欣慰。大疏所陳。一一有裨國計。已下所司議行。敝省連年墊溺。近得鄉人書。皆以打造海舟爲苦。望公留神一酌處之。則疲氓更生之幸也。

與郭總憲

懷遠之事。雖有司不善撫御。有以激之。然至於戕天子之命使。則亦王法所必誅也。且新復諸邑。將視此以爲向背。決當討之。聞兩江已進兵。冬盡可得奏凱。如乘戰勝之威。遣師以襲之。固易易耳。但不可預露此機。恐聞風鼠竄。難以蒐獲。姑聲言撫之。乃可成也。然此乃兵機。不敢遙度。惟高明裁之。

答巡漕張懷洲

轉漕以河道爲正。海運備不虞。此誠確論。昨已告之計部。每歲一十二萬之外。升合不



得有加王君銳意任事而頗有好功之病。海運初開。小有失損。無害大計。何必諱言。處補乎。然其才足倚。未可深責也。

### 與戚總兵

汪司馬知足下素深相待之禮。必從優厚。頃已面囑之。然渠亦自不俟囑也。但足下自處。又宜務崇謙抑。毋自啓侮。昔李愬屬。鑿韃。謁。裴。度。於。道。唐。史。美。之。蓋。重。命。使。所。以。尊。朝。廷。也。司馬此行。於薊事甚有關係。幸留意焉。

### 答巡撫吳環洲

永邵今歲貢市。誠歛頗堅。具其所領衆盛。蓋亦東郡之雄也。昨陞秩加賞事。一如鑑川所請。青把都爲其母所制。旣無別情。寬至來春亦可。原額馬數。不責補矣。

### 答孫巡撫

辱示一一具悉。青把都母子。旣有歛貢之漸。俟至來春入貢亦可。黃酋窮蹙無賴。搆讒於屬夷。撫臺委曲調處。目前定無他虞。然不能保其終不變也。然此酋將來必不良。公試觀之。

答劉總督

合練之法。不獨勤兵習戰。又可以預伐虜謀。守邊之策。無急於此矣。此中已預知之。幸勿爲慮。昌餉水運。具如大議。已屬計部覆行。

答王督漕

敝省造船擾民之說。果出於劉參議。前曾以稟揭寄覽。而楚中士民。亦即有爲此言者。大抵皆有司不善奉行之弊也。今業以將完。勢難中止。但望調停善處之。若河運則事親理明。歲可期望全。鄙懷不勝欣慰。公以全力用於河漕。而以海道爲不虞之備可也。頃者南議。已即奏主上。言公任事忠勤。轉輸有託。悠悠之談。於重望初無所損。

與河道萬巡撫論河漕兼及時政

頃者南議之起。有識者皆爲不平。非僕私懷有所獨厚。今則譽言日至。浮談漸盡矣。夫。人。臣。能。具。誠。擔。任。國。之。寶。也。使。僕。苟。可。以。薦。達。之。保。護。之。即。蒙。嫌。樹。怨。亦。所。不。避。但。願。天。下。士。大。夫。共。體。此。懷。無。負。朝。廷。耳。承。教。務。頭。年。預。爲。次。年。之。計。甚。善。甚。善。果。若。公。言。豈。惟。目。前。賴。之。雖。萬。曆。千。百。年。亦。無。恙。也。然。公。能。使。河。渠。安。流。往。來。利。涉。而。不。能。使。兌。

運之期。有限。過發。此責在漕臣矣。近來朝政。愈覺清泰。宮闈之內。藹然如春。肅然如冬。主上銳意學問。隆寒不輟。造膝諮訪。史不殫書。簪紳濟濟。各勤職業。庶幾協和之風。自茲以往。唯當範我馳驅。按轡徐行耳。辱道誼知契。敢謾以聞。

答王鑑川

比者奉翰教。薄冗未能隨答。然諸所請者。一一具如尊指。屬所司覆行矣。堯山少司馬行時。已屢囑之云。宣大事體。與他鎮不同。北門有寇公。諸無足慮者。歸來但可告成事耳。無煩刻覈。徒亂人意。然此公爽朗闊大。必能成也。辰下聞邊圍救審。內外咸慶。羽書稍暇。惟公強食自愛。

答總憲朱龍崗

僕以淺薄。謬肩重任。日夕悚惕。辱華翰獎譽過情。深以爲愧。西土寧謐。真慰朝廷宵旰之懷。昔人謂自古疆場之患。非盡由夷狄。亦多邊吏擾而致之。僕嘗以爲名言。惟預脩戰守。常存儆備。則不容頃刻少忽耳。惟公留意焉。

答督撫王鑑川計處黃昆二虜

辱示昆都力黃台吉二酋事情。先已有人言之。黃酋驕悍。誠爲難馴。然剛躁寡謀。部下多怨。且其子父不和。勢難獨逞。將來疆場小釁。或不能無。然使處置有方。亦終當歸。吾羈縲也。昆都老而譎。數年以來。東糾土蠻。西合俺酋。皆此人爲之。比之黃酋。反爲難制。然俺答旣已帖服。黃酋素不附之。昨已令薊人散布流言於邊外。云昆都與吾有約。將合兵以擊土蠻。虜性多疑。必相猜忌。則此酋亦孤立無能爲也。如再言封王事。可以好語欺之云。俺答汝兄倫序爲長。且首發歸順之端。又執吾叛人。奉吾約束。朝廷嘉其悃誠。故厚賴而王之。汝頻年爲患於中國。未有尺寸功。何得遂與汝兄等。我皇上併包兼容。何惜一王號而不汝畀。但于事體有未順耳。汝若能依汝兄之言。遵奉約束。堅守盟誓。二三年後。當與汝奏聞朝廷。一體封王加賚。若欲借此事以啓釁。則我惟有一戰耳。渠聞此言。必不敢動。量此孤虜。以上谷一鎮之兵當之。東連雲朔。彼雖入亦不足畏也。文臣事虛文而無實用。武將狃小利而無遠圖。此二語最中邊吏之膏肓。今若不破此套。而徒爲整理云云。終成畫餅耳。趙帥前有人來。甚感公禮遇。爲必盡力。草草附此。諸惟鑒存。

答李中溪有道尊師

倅至，拜去年六月翰貺。萬里遣使，踰年始通。感戢至情，非言可喻。正少而學道，每懷出世之想。中爲時所羈縲，遂料理人問事。前年冬偶閱華嚴悲智偈，忽覺有省。卽時發一弘願，願以深心奉塵刹。不於自身求利益。去年當主少國疑之時，以藐然之軀，橫當天。下之變。此時唯知辦此深心，不復計身爲己。有幸而念成緣熟，上格下孚。宮府穆清。內外寧謐。而正以退食之餘，猶得默坐澄心，寄意方外。如入火聚，得清涼門。以是知山寺幽棲，風塵寓跡，雖趨舍不同，靜躁殊塗，其致一也。三塔古蹟一詩，不足以紀勝。當爲翁作一記，以垂永久。顧今冗甚，且未遑。有便幸寄開山重造顛末。正二三年後，卽欲乞身歸政。尙當與翁期於太和衡湘之間。一盡平生。使旋草草附謝。外飯僧銀二十兩。禪衣一具。內色紵二端。少見遠意。並近日奏對稿奉覽。統惟鑒存。

答潘總憲笠翁

昔年奉教門下，辱翁於後輩中獨蒙鑒許。僕嘗感其意，懼未有以當也。茲英君御極，百度維新。僕以淺薄，謬當重任。方將弋冥鴻於江海，拔碩人於薏軸。乃聞翁絕意風塵，厭

棄人間事。白駒過隙。祇用悵然。諸公子咸有濟時之才。而明允篤誠。不忝龍圖之子。深羨深羨。廣事近以屬之殷司馬。此君才略足以辦此。又假以便宜兵食。期一二年當得盪定。辱翁垂教。當奉周旋。

答趙汝泉

薄賀媿不成享。乃蒙厚酬。彌切慙歎。改折所請。已下部覆行。堤工須委任得人。乃可就功。若一處有瑕。則千丈之堅。俱屬無用矣。近來吏治。頗爲清肅。唯司牧者。不以民事爲重。好爲虛文相誑。計日待遷。此習竟不可易。惟公與監司留意焉。

答汪司馬南溟

辱示餉議。精覈委悉。數奏明切。文辭粹美。讀之再過。歎挹彌襟。獨計部謂支剩之數。與徵發相抵。幸再加查核。乃可以聞也。比來一夫作祟。幾至燎原。幸主上明聖。而左右近習。亦皆素諒。僕之悃誠。得以潛折禍萌。導迎善氣。二三子以言亂政。實朝廷紀綱所係。所謂芝蘭當路。不得不鋤者。知我罪我。其在是乎。若儀諸仲山甫之德。則曷克舉焉。猥辱鑒獎。彌以爲懼。

答司馬吳堯山

脩邊大疏。已下部議覆。乃督撫二公之見。與公議相抵。而撫臺尤爲矛盾。何耶。設險守要。乃邊政之大者。況此係脩復頽廢。非創首更建。但邊長費鉅。須漸次行之耳。馬帥旣被重劾。必當罷之。第苦代者之難。奈何。

與蜀撫曾確菴計剿都蠻之始

都蠻爲害多年。不容不除。聞之譚司馬云。蜀中兵餉。取之存留。儘可措辦。俟兵食已足。方略已定。可一鼓平之。但用兵之道。全在將得其人。前承教謂劉顯足辦此事。昨科中用閩事論之。鄙意以蜀征方。始不宜。輒易大將。而司馬又不肯獨當。故咨之於公也。若其人果可用。不妨特疏留之。立功贖罪。如不可用。則當別授能者。公宜以此意明示。劉顯。俾鼓舞奮勵。如玩寇無功。必將前罪併論。誅之。不敢庇也。地方大事。唯公熟計之。

與廣東按院唐公

府江邊平。懷遠計當不日就戮。可道九重南顧之憂矣。欣慰欣慰。主上以天縱英資。勤勤學問。比來一二大事。羣情所洵懼而莫必其所止者。須臾之間。咸底敕定。皆由明主。

信任勿貳。僕得効其赤忠。誠宗社無疆之慶也。忝在知契。附此以慰懸念。

百十二

與楚中撫臺辭建第助工

頃聞台從平荆。親詢民瘼。惓惓以江隄爲慮。幸甚幸甚。新構蝸居。三院會計欲有所助。諸公厚意。豈不知感。但僕本心。原不敢以一椽一瓦。勞費有司。故雖督造錦衣。亦止借便差用。誠恐驚擾地方也。今堤工方興。疲民無措。公私嗷嗷。困敝至此。豈復有餘羨爲僕營私第乎。僕雖無德於鄉人。實不敢貽累以賈怨。且去歲諸公所賜坊價。已卽給付工匠。卽有不足。以後逐年賜賴及俸入田租。陸續湊辦。需以二三年。可得苟完矣。若諸公創行此意。則官於楚者。必慕爲之。是僕營私第。以開賄門。其罪愈重。萬望俯諒鄙衷。亟停前命。俾僕無惡於鄉人。無累於清議。則百朋不爲重。廣厦不爲安也。人旋附此。諸惟鑒原。

答保定巡撫孫立亭

公以鴻漸之翼。困於燕雀。茲膺特簡。允愜輿情。恒臺外控三關。內制畿輔。安攘之略。惟公是賴。近來吏治。頗爲清肅。惟司牧者不以民事爲急。崇尚虛文。計日待遷。終鮮實效。



夫均徭賦役里甲驛遞乃有司第一議餘皆非其所急也四事舉則百姓安百姓安則邦本固外侮可無患矣惟公留意焉。

### 答文宗謝道長

疊辱華翰具悉雅情。近來俗尙澆漓。士鮮實學。南畿多士之區。首化之地。惟公加意一振之。陽明先生從祀事。以宗伯病不能會議。久稽題覆。好事者遂乘間而詆之。其言粗淺可哂。然何傷於日月乎。

### 答宣大孫巡撫

黃酋車夷事。前吳環洲撫臺疏甚善。即與本兵議從其策矣。乃督撫之意。又與不同。而撫臺之疏。亦爲中止。今本兵姑先覆大疏。行督撫議處。要之撫臺之策爲長也。

### 答巡撫吳環洲

黃酋事。本兵候大疏未至。據獨先題。適督撫亦有疏至。並行咨議。幸熟計之。趙帥病果痊。若尙可驅策。宜明告本兵。今代者誠難其人也。華翰云云具悉。

### 答閩視司馬吳堯山

頃先後大疏。所司已先後覆行。閱視事竣。可歸報主上矣。馬帥褫職。國法已彰。僕以淺薄。謬肩重任。雖不足以當天下事。然一念公虛平直。則可以告於天地祖宗之靈。不敢措一毫私意於其間也。乃昨吳少參有書。甚爲公不平。其辭怨憤。使人難堪。今九邊之事。宜大爲重。不以付之他人而託公者。以公爲心知故也。又面請於上。特賜命服以寵其行。公視僕此心爲可如哉。渠乃以僕爲厚猾帥而薄故舊。豈不厚誣我哉。區區之心。惟公垂鑒焉。

#### 與操江巡撫院言棍徒假借

近訪得清江驢騙奸徒。乃夷陵州人。不知其的。曾在敝鄉馮午山公處代班壞事。隆慶四年。在儀真地方附一油客船來京。沿途即詐稱僕家人。差送酒米。船上擅挂內閣牌面。詐寫僕拜帖見翁見海。見海之明。亦爲所誑。給與照身批文。一路免抽稅打過關。直至張家灣。幸僕知之。差廠衛人挈送法司。問發邊衛充軍。至戍所又詐稱僕家人。誑惑宣府總兵。縱令脫伍。不意今又發於清江。其言徐寅生張壽童及買潞綢銀遞回原籍云云。悉妄也。竊思僕素重名檢。雖親子弟。無敢以毫厘干於官府。三年前曾有一家

奴指稱小兒名目。誣人銀三兩。當即送本府杖死。可恨此棍。無故隨處打網。汚人名節。今幸臺下覺其詐。所望爲僕重治。以除禍本。奈何又輕縱之。渠之罪不止賸哨。今得漏網。將來又不知作何狀矣。若尙在配所。幸爲僕盡法處之。如已逃脫。幸密諭邏者。并逃奴朝吉。俱多方捕訪。務令得獲。忝公知己。必同其好惡。乃見真愛。冗中草草。餘容續裁不悉。

。 答閱視汪司馬南溟

額餉儀本。久與督撫會計。乃疏聞後。又有一二異同。不得不再行審覈。亦以衆不可蓋。事貴慎始。故也。議定。卽斷而行之。無所復疑。遼警方殷。借公威重震懾。計已喙兌矣。增築墩臺。及別楮所云。俱如議次第行之。

答司馬萬兩溪

昨會舍親西石公。言頃者內獄之起。衆情洶洶。獨公以爲朝有人焉。無足慮者。此足以見公知我之深也。今士大夫親見僕行事。無一人知及於此者。而公乃在外得之。人之識見相去。豈不遠哉。諸所議畫。已下所司覆行。

答兩廣總督殷石汀

百十六

惠賊斬馘至萬。諸賊當已破膽。可次第就戮矣。大功克就。嶺表輯寧。朝士大夫。始服公之雄略。而信僕知人之明。昔充國之策。惟魏相一人主之。僕雖不逮魏。而公之功烈。則過充國遠矣。欣慰。諸邑令既便於民。何必更調。已告銓司。悉如尊議。

答保定巡撫孫立亭

兵憲之薦。今歲不妨暫已。三關事體。與薊門稍異。以分閱爲便。俱如尊教。近來畿輔之地。盜賊橫行。京師百里之內。一月而二三發。似非治平景象。今內當責之巡捕。外當責之兵備。惟公留意督察之。幸甚。

答河漕劉總督

水道業有成議。昨計曹因楊耶一人之言。遽欲改陸。僕使人廉得河道疏通。轉運無阻。故請旨仍依原議。計曹又言牛欄山河道雖通。船隻未造。請加詰責。僕亦未從。今不知已造船幾何。并望留神速處。毋致以小事防大計也。

答巡撫郭華溪

懷遠之兵。既未得天時地利之便。暫宜解歸。以俟大舉。若有他巧可取之。尤妙矣。此事若非縣令苛急。賊亦未必遽叛。事之未形。一夫制之。有餘禍端。已構數萬人。取之不克。至兵連禍結。師老財費。使朝廷厯南顧之憂。疆場有不討之賊。彼激亂啓釁者。死何足恤哉。以是知天下之事。惟知幾識微者。可與圖成。而輕躁鋒銳者。適足以僨事階亂而已。

### 荅荆守王古林

奏最使至。辱翰貺感戢。公在郡治理。實冠一時。政不近名。故郡人來者。雖無毀辭。亦鮮揚譽。然僕之所以重公者。正在於此。非流俗人所知也。本圖借寇。恐致久淹。昨已屬銓部優叙矣。

### 荅吳堯山言弘願濟世

吳子感公相知之素。故爲公不平。然不思渠昔因僕而後見知於公。今若此。所謂食其粒而棄其本者矣。僕平生所厚士大夫甚多。見背者亦不少。然終不以是而易其好賢之心。卽今日內獄之事。可以觀矣。二十年前。曾有一弘願。願以其身爲幕。薦使人寢處。

其上。洩溺之垢穢。之吾無間焉。此亦吳子所知。有欲割取吾耳鼻。我亦歡喜施與。況詆毀而已乎。願公勉慰之。相見非遠。諸容面悉。

答吳參議道南

前承華翰。以冗不及答。頃有寄堯山公一書。會間亦可索觀也。

答總憲張嶠崧言公用舍

自公在郎署時。僕已知公。頻年引薦。實出鄙意。不知者乃謂僕因前宰之推用爲介。誤矣。天下之賢。與天下用之。何必出於己。且僕於前宰素厚。頃者不恤百口。爲之昭雪。區區用舍之間。又何足爲嫌哉。蔡人卽吾人。况前宰非蔡人。而公又吾人也。何嫌何疑之有。願努力勳名。以副素望。

答督撫王鑑川

辱示番書。殆亦華人導之以要我。公論阻之爲當。大抵今日虜情。惟視公爲向背。故僕前面奏主上。長城鎖鑰。專倚於公。一切操縱之機。諒公自有定筭矣。黃酋孤虜。必無能爲。然順義亦挾此以爲重。屬夷若還。其所求乞。可量許之。而示之以不得已。恐其常用。

此套爲求。索之資也。屯田事。公若熟計其便。不妨再題。宣帥被劾。諒難復留。幸公自擇可代者。咨部用之。頃聞虜中旱甚。京師亦少雨。塵霾累日不解。僕日夜惟邊事爲憂。願公留意焉。令甥近日相聞否。

### 答劉總督

撫賞爾馬之事。前承教屬之計。曹本兵一一俱如尊指議處矣。聞近日司道俱不肯著實奉行。仍蹈前轍。扣月糧以備關視之費。又夷人關關有遷延數日不去者。啓釁胎禍。實在於此。公何不督責之。不從則亦宜明告於上。裁之以法可也。比聞虜中甚旱。內地雨澤亦少。塵霾累日不解。僕日夜以邊事爲憂。而屬意於薊尤甚。望公督率文武諸大吏。及今加意經理。常若大敵在前。庶保無虞。昨已面奏皇上。言邊將不得便宜。每中制於司道。他日脫有僨事。當與將吏同罪。決不少貸。近來朝廷舉動。非復昔比。僕受國厚恩。身肩重任。死且不避。何怨謗之足恤哉。敢布區區。惟公垂諒。

### 答薊鎮巡撫言優假將官

辱翰示領悉。崔鏞與趙奇仇隙甚深。昨調處善地。實兩全之。乃因督撫之怒。而飛揭中

傷。以逞其毒。非良士也。昨部覆科疏。鄙意本欲留用之。恐督撫以僕爲有所私庇於此輩。故擬罷之。然朝廷自此頗疑文臣矣。僕與馬趙素不識面。異時當國者之家奴。率與邊將結拜。鮮不受其陷者。自僕在事以來。內外隔絕。倖門盡墮。朝房接受。公調門巷。間可張羅。亦無敢有以間語譖言入於僕之耳者。又何所私庇於人。即此兩人之狡猾無狀。僕豈不知。第以其俱護暗宿。將部下又多獷少代者。未必能馭。即有癡類。猶可驅策而用之。貢市羈虜。本難久恃。猝有緩急。無可使者。故不得已。曲爲保全。徒以爲國家耳。士大夫乃獨不諒鄙心。奈之何哉。公爲觀察。當自有公論。如以僕言爲非者。幸直賜批駁。以爲後來用人之鑒。

## 答河漕王敬所言漕運

四百萬軍儲。江海並運。洪濤飛越。若涉平津。自僕有知以來。實未見有如是之盛者。一日侍上語及今歲漕事。天顏喜悅。殿上侍臣咸呼萬歲。僕因推言此皆督臣之功也。宜加懋賞。重任之上。深以爲然。茲覽圖冊。又以見公儆戒無虞。因事納誨之忠也。敬服敬服。觸瑟之逆。幾成大獄。賴天地宗廟之靈。鑒僕赤悃。開發聖明。得以道善回和。雪誣正



法滔天之勢。齏然頓已。然賤質則因是致病。今顛毛種種。相見恐不相識矣。華翰謬及。敢陳其概。潘君才猷弘達。意思深長。他日必不負公此舉。然朝廷方有重託於公。舉代恐未能也。

### 答吳環洲

頃吳司馬復命。覈三鎮脩守之功。以公爲舉首。誠爲確論。二帥並逐。家丁四散。今歲邊事殊可憂。當事者苟欲快意。不爲後圖。非便計也。主上旣以鎖鑰付之諸公。一切更置。不從中撓。然任之愈重。望之愈殷矣。

### 答宗伯董幼海

南宮清峻。允屬高流。以公居之。可謂置瓊枝於玉案矣。當聖皇御極之時。正名僞彙登之日。區區何力之有焉。華翰歸功。深以爲媿。

### 答兩廣殷石汀

嶺表盜藪。雖在可封之時。不無姦宄之警。頃仗公雄畧。天戈所指。電掃風驅。凱聲騰於遐陬。餘威震乎殊俗。粵中縉紳。亦自謂有知以來。用兵制勝。未有如今日之盛者也。喜

而爲之折屐。功高賞薄。尙當有待。頃侍上燕閒。從容語及嶺表事。公之鴻猷峻烈。已簡在帝心矣。願益懋勳庸。以需大畀。

答崇王

先年肅皇帝使僕捧冊立殿下爲王。得一望清光。後聞殿下止生長殿。下一位不得封。心竊慮主器者或乏。又以汝臬趙都憲之意。遂屬意禮曹。爲之題請。僕一念公心。非敢望報于左右。乃蒙遣使致謝。寵頒厚惠。非僕所以存國繼世之心也。謹卽付來使璧歸。草草附謝。統惟亮原。

答罔卿李漸菴論用人才

辱翰示。具悉雅情。天生一世之才。自足一世之用。顧持衡者。每雜之以私意。持之以偏見。遂致品流混雜。措置違宜。乃委咎云。乏才誤矣。僕之淺薄。雖不足以與知人。然一念爲國之公。實無所怍。故自當事以來。諄諄以此意告於銓曹。無問是誰親。故鄉黨無計。從來所作。皆過。但能辦國家事。有禮于君者。卽舉而錄之。用三驅以顯比。懸一鏡以虛照。故一時羣才。咸有帝臣之願。今部署已定。以後仍當綜覈名實。一一而吹之。第恐人

樂混同。必有以爲刻核者。然非是。無以考成績。而亮天工也。

答藩參高廉泉親家

伴至辱華翰。深荷雅情。今運屬休明。衆賢彙進。淹抑幽咎。咸得耀乎陽春。可使驛驢久困。櫪下乎。頃薦書已上。弓旌之招。諒在不遠矣。冗中草復。厚惠概不敢當。輒以璧諸使者。圖說奉覽。外拙室所寄。令愛薄儀。統希照存。

答河漕王敬所

圖說之陳。實僕一念赤忠所發。因事納誨。早辨防微。實有人不及知。而愚心所獨苦者。非公之高識遠見。不能得之於意表也。世所稱爲知己者。謂能知其心也。今知我者非公其誰。倘以執事者之有間。綴之以瓊玖。俾永其傳。則覆瓿之誚。庶可免矣。非所敢望。聊布區區。聞河淺澁。艦行甚艱。比來稍覺通利。諒亦不出夏杪。可盡抵灣矣。山澤之氣。鬱而未暢。皆僕奉職無狀所致。惶恐惶恐。

答劉總督

界嶺之捷。誠足以伐虜謀。挫驕氣。然賊從此懷憤。必當又出於他道。當事者未可以小。

勝。狎。視。也。至於撫賞一事。幸公留神一處。薊門邊計。與他鎮不同。若能就此一事。處置得宜。俾各夷皆畏威懷惠。則制虜之策。已得其半矣。況又日夜圖吾戰守之備。先立於不敗。以求勝。何事不可爲乎。願公與在事諸君熟計之。

答兩廣殷石汀

辱示。知林賊勢孤。遠遁求活。計當不日可擒。迅雷震空。妖魅自當褫魄矣。慰甚慰甚。公爲國家戡定大亂。功在旂常。僕以參與廟畫。借被光寵。爲幸多矣。筐幣之及。非所敢當。輒付使者歸璧。統惟亮原。

答總憲張曙喙

惟公雋才厚蓄。又富於春秋。不以此時取旂常。勒鐘鼎。乃顧戀庭闈。忘在公之義。非所望也。茲屬休明之會。方將招遺佚於邁軸。寧肯縱鸞鶴於雲林。大疏已屬部覆。而雅志必不得遂。願勉奉簡書。以徇國事。

答王鑑川

辱示先後二書。俱一一領悉。以公勲業。宜膺殊賞。然忠簡帝心。絲綸賁寵。則其榮重又

近時所僅見也。去年僕力辭四恩。亦荷敕獎。僕於心感戴。竊謂九遷百朋。無以踰之。諒公感恩思報之忠。亦當與鄙衷懸符也。敕辭乃僕手撰。早晚當賞上。屯田事已屬計部改行。

### 答汪南溟

辱教迫冗。不能一一詳答。謹以原札逐款。竊附數字於後。疏中亦僭省數句。統俟尊裁。此行惟公舉動合宜。鑒裁精允。敬服敬服。

### 與王敬所

今年關河水溢。轉餉甚艱。然終以發運之早。雖遭中梗。比之往歲。猶爲駛利。皆公之功也。海運今歲微有損失。議者遂紛紛言其不便。此衆庶之見。固不足憑。但僕鄙意。竊以爲今欲河海並運。則當著實料理。歲歲加增。若止欲嘗之。則二年之間。道路已熟。何必歲以十二萬石嘗險哉。近潘大參有復遮洋總議。似爲穩便。不審高明以爲何如。僕昨因羣言稍有淆惑。但以國家大計。須虛心商量耳。

### 與蜀撫曾確菴計剿都蠻

凌霄旣破。我師據險。此天亡小醜之時也。宜乘破竹之勢。早收盪定之功。計蠻衆不過數千。我師當數倍之。無不克者。攻險之道。必以奇勝。今可徵兵積餉。爲坐困之形。而募死士從間道以擣其虛。先年破香鑪。取洮岷。皆用此道。若不奮死出奇。欲以歲月取勝。此自困之計。兵聞拙速。未覩巧之久也。惟公熟計之。劉帥功名著於西蜀。取功贖過。保全威名。在此一舉。其一切攻圍之計。宜聽其自爲便利。勿中制之。唯與之措處軍前賞功募士之費。計軍中一月當費幾何。與其曠日遲久。不若暫費速罷之爲愈也。凡此皆書生之見。謾寄以備採擇。

### 答荆南道施華江

辱翰教。深荷雅情。聞楚中水患。視往年稍平。而敝府諸堤俱無恙。皆撫臺趙公之功也。書稱六府養民之政。以水爲首。水政舉。然後五事可從而理。辱教惓惓留意於此。楚民庶其有瘳乎。

### 與王敬所論大政

月中漕艘已盡抵灣。萬庾豐溢。繫誰之力歟。可慶可慶。圖說訓蒙語耳。何足以辱大製。

僕平生拙于文辭。頗與懶性相成。間有強作者。亦輒以不得意棄去。存錄者甚尠。俟他日乞骸有暇。料檢故囊中。或有一二呈教。辱示嶺表善後事宜。誠經世之訐猷。顧事涉更置。旦夕未可遽圖。僕今事幼主。務兢兢守法。愛養小民。與天下休息。諸大擘畫。必俟聖齡稍長。睿明益開。乃可從容敷奏。上請宸斷行之。卽如宗室祿糧。及西北邊用書生爲將。與處置屬夷之策。皆國家大事。急宜經理者。目前亦未敢言。又未知他日可言之時。僕尙得立朝否耳。嘗謂世廟以大有爲之君。而當時諸臣不能佐下風。徒取儀文制度紛更一番。末以脩立結局。至經國遠猷。太平鴻業。固置而不講。至今令人怏怏也。辱教謹藏之篋中。以俟乘機入告。

答南學院謝虬峯

疊辱華翰。深荷雅情。陽明先生從祀。禮官方欲定議。而南疏復至。又極其醜詆。至欲并褫其封爵。則亦過矣。

答殷石汀計剿海寇

林賊旣失巢穴。飄泊海上。必不能久。宜與閩中約會圖之。閩撫劉君有智計。勇於任事。

必能助公共擒此賊也。近有陳廣事者。其措置頗大。不知於地方便利否。謾寄上一覽。幸惟裁教。前承厚惠。不敢當。即託使者歸璧。更不煩差人於寒家問遺。蓋僕近日曾將此事奏知主上。千萬體諒。乃見至愛。

與河漕萬兩溪論協和克讓

近有人言公與督漕不協。兩家賓客。遂因而鼓煽其間。僕聞之。深以爲憂。甚於憂洪水也。夫河漕皆朝廷所軫念者也。二公皆朝廷所委任者也。河政舉。漕運乃通。漕運通。河功斯顯。譬之左右手。皆以衛腹心者也。同舟而遇風。櫓師見帆之將墜。釋其櫓而爲之。正帆帆者。不以爲侵官。櫓師亦未嘗有德色。但欲舟行而已。二公今日之事。何以異此。唐虞人才。非獨異於後世也。良由舜禹以克讓之道。昌於上。合九官十二牧爲一人。以共熙帝載。故治功獨隆。禹之功。地平天成。萬世永賴。及將受攝。舉天下之重而讓之。臯陶叮嚀。反覆。惟恐臯陶之不已先也。然禹以是而益聖。而頌其功者。至今不衰。故曰。旣以爲人已。愈有旣以與人已。愈多。近時士大夫有才者。不少。惜哉。不講於此道。故治亦不古。若夫大道之行也。與三代之衰。僕未之逮也。而有志焉。僕願二公之留意也。朋友



之誼。所宜切磋。故敢獻其愚。唯公垂聽焉。

### 答郭華溪

懷遠之事。初謂成於有激。故往者奉書云云。意或可以分北治之。不謂其怙終不悛。敢行稱亂如此。則天討所必加。雖費財動衆。亦難中止矣。一切剿處事宜。公所畫俱當。惟公自裁。便宜行之。不敢中制。

### 答張總憲

頃侍上於便殿。從容語及公所陳二疏。歎賞者久之。且謬以僕爲薦拔得人。僕因說上以詢事考言綜覈名實之道。復蒙天語嘉納。嗟乎。以孤特無侶之士。立志於邊關萬里之外。而能上徹九重。獨蒙眷獎。非至誠而能若是乎。有君如此。何忍負之。此公報國之秋也。願樹勳庸。以酬知遇。

### 與王鑑川言兢業邊事

頃侍上於便殿。以言及邊事。上因問宣大重鎮。王總督何故取回。僕對言。朝廷用人。不宜竭其忠力。王在邊久。且少休之。他日不妨再用。上問誰可代者。僕遂以方金湖對。無

何而臺諫之疏至。僕竟以對上語擬旨行之。然公之出入實繫虜之向背。邊鎮重。輕。今東貢未完。金湖未至。僕於此兢兢。臥未能安枕也。古人去之日。如始至。惟公留意焉。

答司馬王繼津

頃者處分實出鄙意。竊以公資望。自可徑長六曹。不必又出開府。乃所以相厚也。僕自當事以來。閉門却掃。士大夫公言之外。不交一談。舊時讒譖之風。庶幾丕變。茲以公之雄畧不獲。及時展布。則蔽賢之罪。當在於僕。未可歸咎他人也。幸遵新命。共佐明時。勿復致疑。乃見高雅。

與王繼津論君臣之義

蓋聞君臣大義。分無所逃。時乎時乎。難以再得。孔子大聖。以時仕止。然猶七十說不遇而不止。豈好爲是栖栖者與。誠達於君臣之分也。唐虞之世。九官十二牧。師師濟濟。各效其能。豈必人爲禹稷。位皆百揆。而後愜於心哉。誠欣於時世之遇也。方今堯舜在上。屬任忠賢。僕躬履貫魚之行。寤寐孜孜。用天下賢者。效之于上。士生於今。義無所逃。以其時則可矣。公乃獨傲然遠引。慨慕巢由。嘲哂禹高。欲自越乎不逃之分。而背乎不易

得之時此愚蒙之所未譬也。雖然人各有志，何可相強。聊爲道其區區如此。惟高明裁之。大疏部覆休致，旨允調理。仕已之途，尙未定決。惟公審圖之。

### 與殷石汀論吏治

爲國之法，似理身。元氣欲固，神氣欲揚。廣中患不在盜賊，而患吏治之不清。紀綱之不振，故元氣日耗，神氣日索。數年之前，論者謂朝廷已無廣東矣。自公一振之，而傾者安，黜者戮，炎州以寧，豈易地易民哉。元氣漸固，神氣始暢耳。今主上天縱英明，僕日斤斤焉，以振紀綱，察吏治，安民生爲事。願公持而行之，毋渝其初心。毋畏於羣議，則元元之幸也。先後三書俱至，冗中匆匆附復，諸惟鑒原。

### 答蜀撫曾確菴

十月十四日，聞九絲捷音，不覺屣齒之折，殄此巨寇，不惟蜀民安枕，且國家神氣藉此一振。四方有逆志干紀之人，亦將破膽而不敢恣睢矣。喜甚喜甚。此地險要，宜屯兵設官以鎮之。其有功有罪人員，及一切善後事宜，當次第具奏區處。

### 與廣東督撫

向者奉書言懷遠云云。深有感於始事者處置之失宜。謂可不煩兵而服。念既怙終。稔惡。又天討之所必加。今以數月未聞捷報。日夕懸懸。且古田餘孽。亦將視此以爲向背。南夷頑梗。德義所不能化。唯懼於威強耳。公其審圖之。

與閩中巡撫劉凝齋

閩中數年無警。當事者務沽節省虛名。以致緩急無措。誤事非小。公所請者。已屬該部一一覆行。兪帥老奸。志意已隳。難以復用。非新壯將軍不能辦此。胡君舊在閩中。頗著戰功。銳於功名。惟公結以誠信。激以忠義。必能有所建立也。用兵機宜。難以遙度。甌嶺以東。一付於公。

答督撫吳環洲

頃者柔服青把都一事。具見公之雄略。慰甚。議者咸謂今日虜情。尙可數年無事。然朝廷建安攘長策。非苟圖且夕之安而已。此意惟公可語。亦惟公能辦之。

答工部郎中劉公伯燮言用人毀譽

僕近來用人處事。一秉公心。謬持愚見。旁人無所關其說。士大夫公見之外。不延一客。

公談之外。不交一語。卽有一、二親故。問一過從。不過相與道舊故。遣客懷而已。無一語及於時政。乃今蒙德者。謂有人譽之。失意者。輒謂人毀之。皆非知僕之心者也。戴公之舉。實主上體念邊臣至意。在僕猶不敢借此以市恩。况其他乎。義河云云。殆不其然。

### 答大司馬萬兩溪

老父幸登七秩。辱書問舍弟小兒。又承扁額之賜。感荷厚情。言不能悉。但近來交際禮廢。曾謂中外相知者。不煩遣使問遺。此意主上亦察知之。僕不敢自背其言。以欺朝廷。忝在心知。尤願體諒可也。

### 答王鑑川

虜酋欺服。邊鄙輯寧。始終皆公之功。僕雖曾借前箸。少効區區。所謂文墨議論者耳。公乃讓美推能。謬爲引重。捧讀大疏。背汗心惶。故不敢擬廷議之旨。誠以蒙恩而後辭。不若先自寢閣之爲省事也。本兵方欲題覆。公之勳勞。自宜首叙。若諸文武將吏因人成事者。已經屢錄。恐難以盡優也。

### 答問卿陸五臺

愚子弟僥倖。凡在交知。賜賀者。俱不敢領。承盛儀。謹璧諸使者。幸惟原亮。承別楮。祇畏云云。深荷道誼同心之愛。僕自受事以來。日夕兢惕。凡事關宗社。生靈必齋心默告於上帝。二祖而後行。不敢告者。不敢爲也。誠以人臣之義。靖共匪懈。况僕今處多懼之地。當至重之任。敢不畏乎。再拜稽首。師公昌言。

## 與李大僕漸菴論治體

明興二百餘年矣。人樂於因循。事趨於苦窳。又近年以來。習尙尤靡。至使是非毀譽。紛紛無所歸究。牛驥以並駕。而俱疲。工拙以混吹。而莫辨。議論蠶興。實績罔效。所謂怠則張而相之之時也。况僕以草茅孤介。擁十齡幼主。立於天下。臣民之上。國威未振。人有侮心。若不稍加淬勵。舉祖宗故事。以覺寤迷蒙。針砭沉痼。則庶事日繁。奸宄窺間。後欲振之不可得矣。故自僕受事以來。一切付之於大公。虛心鑒物。正己肅下。法所宜加。貴近不宥。才有可用。孤遠不遺。務在強公室。杜私門。省議論。覈名實。以尊主庇民。率作興事。亦知繩墨不便於曲木。明鏡見憎於醜婦。然審時度勢。政固宜爾。且受恩深重。義當死報。雖怨誅有所弗恤也。乃朝夕進說於上前。則又惓惓以恭儉仁厚培植純一未鑿。

之良，卽帝鑑所載。及近日何宮允云云，可見其梗概。期以數年之後，上德旣成，治具畢張，乃收管鑰，舉綱維而歸之於上。稽首明辟，乞骨還山。此區區之微志也。而庸衆喜於委狗，奸宄憚其精覈。又有一種腐儒，動引末季事以搖亂國。是。不知本朝立國規模，與前代不同。本之威德並施，綱目兼舉，無論唐宋卽三代盛王，猶遠將讓焉。而宋時宰相，卑主立名，違道干譽之事，直僕之所薄而不爲者。頃辱華翰，深合鄙心。至於舉劾失實，及獎率科貢云云，俱於實政大有裨益。乃知庸衆之人，難與論尋常之外。識時務者謂之俊傑，今人且夕見僕行事者，猶不相知。而公乃冥契於千里之外，人之識見相越，豈不遠哉。人旋敢布區區。

答吳環洲

大疏已上，銓部且議題覆。公此後但宜默付之公論而已。爲國任事之臣，僕當與之同去就者。公第安心勿慮。

答吳道南

邊屯俱興，士得宿飽。公之功獨冠諸道，承以餘粒見遺，卽令家人炊之爲益一餐焉。

與殷石汀經略廣賊

諸良寶必死之寇。而各官乃易視之。其敗固宜。一撮許殘賊不能克。則諸山海逃伏之盜。必將乘勢再起。將來廣事。不可便謂無虞。大抵南賊譬之蔓草。剗盡還生。從古以來。經畧南方者。皆未能以一舉而收盪平之功。其勢然也。今當申嚴將令。調益生兵。大事芟除。見賊卽殺。勿復問其向背。諸文武將吏。有不用命者。宜照敕書。悉以軍法從事。斬首以徇。了此。則諸不逞之人。皆破膽而不敢旁睨矣。不惜一朝之費。而貽永世之安。惟公留意焉。初擬將屯事責之陳奎。今廣中士大夫皆云。渠敗衄之餘。氣阻力挫。恐難展布。姑從降調。已屬餘部另擇能者代之。然此雖該道之事。而督率驅策。則惟仗於公。非該道所能辦也。

答王敬所

圖說訓蒙語耳。乃辱公渙發佳思。冠以雄文。駑馬而先之以珙璧。魚目而盛之以華積。不乃爲忝乎。若其文辭之粹潔。意義之淵奧。則非淺陋所能揄揚也。仰感仰感。近報漕艘過淮已千餘。則今歲糧運。又當速達矣。深慰深慰。



與楚撫趙汝泉言嚴家範禁請託

小宅原擬賜金構一書舍耳。不意錦衣龐君。遂葺京師第宅。大事興作。費至不貲。屢屢垂念。給與頻蕃。旣乖本圖。復益罪過。赧忤之衷。口不能悉。此後更無煩存注。以重不肖之罪。老父高年。素懷坦率。家人僕輩。頗聞有憑勢凌爍鄉里。溷擾有司者。皆不能制。藉公之威。明示兩司及敝處守令諸君。但有如前所云者。幸卽爲擒治。其所請囑。無問於理可否。悉從停閣。有強梗不法者。解來僕面輸之。欲得而甘心焉。僕今待罪政府。兢兢自守。門戶舉動。皆諸差人所睹見。嚴之於官守。而縱之於家鄉。人其謂何。即諸君愛我。亦不宜用世俗相處也。僕平生耻爲矯飾。其所云者。悉出赤悃。萬惟垂亮。

與曾確菴計平都蠻善後事

都蠻自擅。不討之日久矣。豈知王師動於九天。從衽席上攫而取之乎。自冲聖嗣位以來。方內乂安。四夷嚮風。旃裘之君。厥角稽首。獻見恐後。海陬跋扈之儔。山徼陸梁之輩。天戈所向。殲殄無遺。此往籍所希聞。間代而一覩者也。僕以翦劣。謬司鼎軸。際茲盛會。竊以爲榮。可不謂大幸歟。功高賞薄。尙當有待。所示善後事宜。便屬所司覆行。更無異

議。

百三十八

答薊遼總督方金湖言任事

初鑑川內轉主上曾面詢誰可代者僕即以公對公之秉鉞上所簡也明興以來國有艱鉅之事衆所懼悞觀望而不敢承者率楚人當之願公勉旃酌恩報國蜚英騰茂在此行矣。

答殷石汀

前賞奏人回已具啓復頃巡按所奏林賊事情與公所報不同僕甚訝之已即示意部科言此事當一屬之於公不宜輕有指授其撫剿便宜願公詳計之兵機在呼吸之間便有變態安可預度然大率盜賊奸宄惟當懾吾之威罕能懷吾之德如機有可乘一鼓而殲之雖被虜坐鎮之人亦不足惜也撫賊聲不可傳遠宜以密用前喻嶺賊如藁草難以盡拔唯旋生旋除之耳。

答趙汝泉

辱華翰知道從年餘尙未回省大禹勤勞民事召伯周行阡陌不是過矣江漢之民庶

其有瘳乎。感仰感仰。僕自爲童子時。見撫臺守巡。巡行縣邑。荒僻咸至。而供億省約。民不告勞。故上無不究之澤。下無不達之情。今則不然。上官憚於巡行。而百姓苦於供費。失其職矣。君子爲政。固在先勞。然先之而不從。則亦不免繩之以法。不然。徒以一身勞之。無益也。今天子軫念元元。精覈吏治。諸守令回任。當別是一番作用。唯公加意振策之。水利次第脩舉。必有成效。

答總憲吳太恒

趙陵豎旗事。殆妖人以此惑衆耳。但宜以靜鎮之。不必紛紛搜索。保甲之法行。則奸人自無所容。第須著實嚴行。乃爲有益。毋徒取具彌文可也。中州重鎮。密邇畿輔。務農講武。足食足兵。乃今日所最急者。餘皆迂談也。唯公留意焉。

答太常殷秋溟

僕少耽沉寂。每有出世之想。不意中道爲時所羈縲。遂至於此。且欲暫了人間事。以酬俗緣。然於四方高流靜侶。未嘗不神交而冥契也。生平所聞士大夫稱公之高韻。恨不得一披晤焉。茲者暫借留寺。終期愜此素心。

答王敬所

近報漕艘過淮者多。計當不後於去歲。若中道更有阻滯。則責在河道矣。

答吳環洲

近事已有旨處分。朝廷用賢。三至而信之。愈篤。公亦如何爲報耶。頃督撫方公。聞有南疏。急使人來。留公甚懇。公亦宜作一書謝之。吳王二君。俱如所擬。加秩管事。

又

前以公大意。傳與督撫。方公昨有書來言事。有宜釐正者。當亟處之。其未能驟變者。次第措畫。要令毋失制虜之初而已。當局之人。責任艱重。幸公委心維助之。頃於某公處見來翰。謂功不必出於己。至哉。斯言非有道者孰能之。

答廣西撫院郭華溪

聞懷遠奏凱。無任喜慰。兵已深入。須盡殲之。毋使易種於斯土。又煩再舉也。

答翰學余同麓

辱華翰。知文從已至留都。無任欣慰。小兒昔荷陶鑄。叨舉鄉薦。終以寡陋。點額龍門。唯

垂念夙誼。時惠教督。是望。

答宗伯董潯陽

僕昔在詞林。隨公之後。淺薄碌碌。公所知也。不自意蹈躡鼎鉉。遂膺顧託之重。又不自量。強而肩之。日夕惴惴。惟虞顛仆。比辱翰示。獎許過情。譬彼孱夫。負千鈞之重。上太行之阪。勞有力者不憐而惜之。更爲耶許獎借。將令孱者不至絕臚。委頓不已也。惶媿惶媿。乃若主上之明聖。虛已純心。能使官府穆清。宦戚斤斤奉法。則誠書傳所希聞。當與海內簪紳。同心慶戴者也。

與王敬所言關防棍徒假借

近苦河路奸人。動稱寒家。賫送米物。誑騙騷擾。屢懲不止。僕今在旅寓。朝夕饗殮之費。悉以薄俸易之。旅易旅用。不能爲終歲之計。況家素貧困。老父母在堂。尙須微祿寄養。豈復有餘積給充宦資乎。凡言此者。悉妄也。顧不知者。難以戶曉。今僭刻一信牌。給付各往過緊要官司收執。以便詰驗。假公威重。照別紙所開諸處。分給禁約。取具收結繳查。如有犯者。仍望卽置之重法。以全僕曲廉小節。恃愛瑣瑣。統惟垂亮。

答河漕王敬所

辱示。知運艘已於三月十一日盡數過淮。無任忻慰。聞度江遇風。諒無大損。若前途通利。則額賦可以畢達。國儲日裕矣。今計太倉之粟。一千三百餘萬石。可支五六年。鄙意欲俟十年之上。當別有處分。今固未敢言也。

答蜀撫曾確菴

先後承翰示。俱一一具復。昨孫院有疏言。殘蠻未靖。不知其意所出。大剿之後。竄伏林谷者。豈能盡殲。要在從容綏定之耳。譬之人積病。雖除餘毒。尙在。良醫當此時。正宜消息。緩之則覺。孽復萌。急之則重傷。元氣不可不慎也。

答藩伯吳小江

頃者主上特發淵衷。舉行曠典。而公以卓行清望。爲天下舉首。自此海內多良吏矣。幸甚。今賴天地宗社之靈。中外頗稱寧謐。惟是黎元窮困。賦重差繁。邦本之虞。日夕在念。頃蒙天語叮嚀。亦以愛養百姓爲急。願公思所以奉宣德意。加意元元是望。

答銓部李石塘

惟公往在西臺。屢聞口口。比奉翰札。率多溢美之詞。豈僕德衰於昔。不足以來天下之善耶。抑公欲卑論儕俗。以取通顯耶。考功之缺。已屬銓曹調補。其人則太宰所自擇者也。

### 答總憲廖春泉

別諭三件領悉。靖州土兵。在廣右甚無紀律。入楚境。震公之威。又處置得宜。故斂手屏跡耳。此輩如毒藥猛虎。誠不宜輕用。敝族家人。雖頗知奉法。然小小擾瀾。未必盡無銜勒鈐制。不敢一日釋也。公知我之深者。幸惟留意。考成一事。前奉明旨。督責甚嚴。幸一一如期完報。有勢不能完者。不妨明奏改限。

### 答廣西巡按郭華溪

得報。知懷遠已定。旁有干紀者。皆殄滅無遺。欣慰。但兩廣之人。好爲議論。臺諫無識者。往往誤聽之。訛言屢興。賴聖明遠矚。三至不疑。若如昔時之政。則風波滿海內矣。粵地所患。不在盜賊。而在人心不公。是非不定。紀綱不振。法度不行。可恨。人旋草草。

### 答督撫劉百川

前有人言。公躬履河上。見沙淺難行。頗悔爲張僉憲所誤。欲罷其役。而嫌于自改。故以爲問。今計算久遠。果便于人。則曹子之言固可從也。已屬計部覆行。張齊賢云。自古疆場之患。非盡由夷狄。亦多邊吏擾而致之。頃墩軍襲殺屬夷。情甚可惡。宜卽梟首。以洩屬夷之忿。杜將來之患。今人口語。嘖嘖。咸云。南兵無紀律。專肆貪縱。今有此。又好事者之資也。其同惡之人。亦宜以軍法處之。烽火爲軍中耳目。最宜嚴謹。古之爲將者。鼓一鳴。卽前有湯火。不敢不赴。金一奏。卽見利可趨。不敢不退。今平時自爲出入。而管軍者不知。臨陣。何以號令之乎。戚總理。聞平日。馭軍甚嚴。今安得有此。

## 答保定巡撫孫立亭

導河事已下部議處。上議務在安靜。不擾四方。言利病者。非萬不得已。率皆報罷。故擬旨云。辱示小牌。俱已給發。深荷體諒厚意。

## 與荆南道府二公

承示三款。深於地方有裨。但近請權稅者。該部皆執不肯允。况先年議有廢府州糧銀。近百兩院。又奏留存積祿糧銀。目前尙可支措。俟明歲再議未晚。且僕於此。亦有小嫌。



今方修剏賜第。不知者得毋謂公欲惜公費以助私營乎。若後二款。則皆利民急務。僕卽明屬所可行之。無不可者。又昨王太常言。府中有積淤洲。公欲寒家人領。極知公厚意。但利之所在。人爭欲之。擅衆所利。則怨必叢積。家有薄田數畝。可免饑寒。老親高年子弟。鶩劣誠不願廣地積財以益其過也。纓纓之誠。惟公亮之。

### 答兩廣殷石汀

頃得閩臺劉凝齋書。言林賊遁出海洋。爲西南風阻。泊廣中。向僕固患其出海難制。今若此。殆天亡之矣。閩帥旣過境。計今想已成擒。了此則廣中可望寧定。忌者亦無所容其喙矣。

### 答巡撫張公守約

前承翰貺。去人竟未索書。謹謝。賤日有惠。概不敢當。輒用歸璧。極知公厚意。中心藏之。此後幸無煩差人於寒舍問遺。恐涉形跡。石汀督廣數年。勞苦而功高。然廣中士夫亦有不悅者。頃曾面奏。主上專任而責成之。聞公與之素雅。尤望同心共濟。計安地方。以道朝廷。南顧之憂。

## 答薊遼總督方金湖計處板升逆種

板升諸逆悉除。固爲可喜。但公此時只宜付之。不必通意。老酋恐獻以爲功。又費一番濫賞。且使反側者益堅。事虜之心矣。此輩正宜置之虜中。他日有用他處。不必招之來歸。歸亦無用。第時傳諭以銷兵務。農爲中國藩蔽。勿生歹心。若有歹心。卽傳語順義。縛汝獻功矣。然對虜使。却又云此輩背叛中華。我已置之度外。只著他耕田種穀。以供虜食。有犯法生歹心。任汝殺之。不必來告。以示無足輕重之意。此中大有計策。公宜默喻之。不可令那吉知也。

## 答中溪李尊師論禪

正昔在童年。獲奉教於門下。今不意遂已五旬。霜華飛滿鬚鬢。比之賢嗣上年所見。又不侔矣。意生分段之身。剎那移易遷變。人烏得而知之。可慨可慨。正以淺薄。謬肩重任。目前幸得方內又安。四夷嚮風。寔賴主上聖哲百官奉職所致。非正之寡昧。所能仰佐其萬一。過承翰獎。彌以爲媿。向者奉書。有衡湘太和之約。非復空言。正昔有一弘願。今所作未辦。且受先皇顧託之重。忍弗能去。期以二三年後。必當果此。可得仰叩毘盧閣。

究竟大事矣。三塔圖說披覽一過。不覺神馳。冗甚未能記。俟從容呈上。

答總憲李漸菴

方今言理財者。其說紛紛。皆未知設法以督完正供之爲便也。馬政大疏。已下部議覆。誠如實行之。不惟便民。且大裨於國計也。

答殷石汀

辱示林賊分踪遠遁。廣兵西追。閩兵東扼。計當爲釜魚矣。乃近報閩師已收還西防。則夾剿之功。又恐難必。然賊覬知閩師退。必走閩人。見賊入境。勢不容不急救。廣兵因而尾之。亦成擒之勢也。諒此時已盪定。姑縷縷及此。

答薊遼督撫吳環洲言虜情

修邊之議。舊督撫甚不以爲然。謂邊人連年修築。勞瘁已甚。宜少體之。乃方公則又銳意欲舉。揆之二議。方爲優焉。已下本兵議覆。近日虜情。大畧可見。彼之心。離。勢。渙。偷。活。苟安。我則政事修明。內外輯睦。盛衰之機。昭然可覩。故向者奉書。謂後不當議守。且當議戰。良有爲也。辱示云云。深慰鄙念。誠得敢戰之士。二萬人足辦吾事矣。然不宜輕示。

機。緘令人窺測。昨養廉地土事。已喻意陳道長以古人不問市租之意。頃疏至。處之甚優。爲將者亦宜戴恩圖報可也。

答殷石汀言宜終功名答知遇

先後奉手教。皆有釘封。捧讀數回。不勝於邑。竊謂古人居官。有解組棄印。浩然求去。咸以不獲知於主。志不得行。或其主雖知之。而爲當時執政者所排忌。或有碩畫妙算。而當事者不爲之主持。使其忠謀不售。則其去宜矣。僕自去歲。曾面奏主上。曰。今南北督撫諸臣。皆臣所選用。能爲國家盡忠任事者。主上宜加信任。勿聽浮言苛求。使不得展布。主上深以爲然。且獎諭云。先生公忠爲國。用人豈有不當者。故自公當事以來。一切許以便宜從事。雖毀言日至。而屬任日堅。然僕所以敢冒嫌違衆而不顧者。亦恃主上之見信耳。主上信僕。故亦信公。則公今之求去者。爲不獲於上乎。爲不合於執政乎。二者無之。而獨以浮忌之口。即欲引去。是忍於背君相之知。而重於犯庸衆之口也。願公勿復以爲言。了此殘寇。爲地方計慮久遠。悉力以圖之。彼中人此時雖不能盡諧。他日必有尸祝之者。此大丈夫不朽之鴻業也。他何足惜。俟廣事大定。亦必移公他處。以休

驥足。決不以嶺表爲公玉門也。鳳賊西遁不遂。又欲東奔。力屈智窮。情勢已見。但雲海茫茫。邀之何所。必須以計誘之。驅入羅網。乃可成擒。萬里指授。恐緩不及事。在公審圖之耳。僕料此賊若不獲。必走閩中。爲閩人所得。若爾公。卽宜歸功閩人。使之趨利而協力。乃勝筭也。林賊事若有確耗。幸惟密示。以慰懸懸。撫民願焚械歸籍。此卽古人賣劍買犢之化也。公威德遠洽。敬仰敬仰。所示善後諸款。皆大著數。容與本兵計處行之。人旋先此附復。餘容續裁。

### 與操江宋陽山

南畿根本重地。江洋盜賊縱橫。近來湖廣江西。已屢發矣。元末之事。可爲殷鑒。比來處分。實不得已。惟公亮之天下之事。以爲無足慮。則必有大可慮者。故古人詰戎治兵。當太平之世。尤兢兢焉。公有經國遠慮者。幸惟留意。

### 答方金湖

聞西市將完。欣慰欣慰。虜表宜與改定合式。乃可。其所請乞。亦酌量與之。大抵虜有求在彼。不必其盡從。而在我。尙求爲可繼。操縱之機。在公審之而已。刺麻僧來。曾備問彼。

中事。其板升諸逆。倡爲流言。殊爲可惡。公可因此機省諭順義。言此輩甚不樂貢市。利在搶掠。如有流言。宜以法處之。庶得永遠和好。丘昌原係叛賊。其子不可使爲頭目。恐致壞事。彼雖能。即廢之。然亦少。設難從之。請使彼常曲而我常直。彼或負約而我常守信。則亦制馭之一機也。山西撫臺病勢如此。豈可久留。嚴君遠在萬里。未能卒至。已改推鄭君洛代之。當令星馳赴任。此君在上谷久。素諳邊事。亦可爲公同心之助也。

### 答宣府吳撫宅

近督撫方公。亦報土蠻使人糾誘順義。而順義不從。具見其忠順之堅。青把都之說。決出於薊人之虛誑。蓋因渠今結婚東虜。故屬夷遂吠影虛傳以邀賞耳。然因此省諭一番。亦足以發東虜之謀。而孤其勢。薊人陰受其利。咸公之功也。今歲貢市愈爲安堵。所求鉄鍋。已屬所司允之。但須官給爲便。仍責令來歲以所壞抵換。蓋以塞書生之說。謂資寇兵也。近方公有書。亟稱公之忠猷。冠於三鎮。誠爲確論。鄙悰不勝幸甚。

### 答應天巡撫宋陽山論均糧足民

來翰謂蘇松田賦不均。侵欺拖欠云云。讀之使人扼腕。公以大智大勇。誠心任事。當英

主綜覈之始。不於此時剔刷宿弊。爲國家建經久之策。更待何人。諸凡謗議。皆所不恤。即僕近日舉措。亦有議其操切者。然僕籌之審矣。孔子爲政。先言足食。管子霸佐。亦言禮義生于富足。自嘉靖以來。當國者。政以賄成。吏媮民膏。以媚權門。而繼秉國者。又務一切姑息之政。爲逋負淵藪。以成兼井之私。私家日富。公室日貧。國匱民窮。病實在此。僕竊以爲賄政之弊。易治也。姑息之弊。難治也。何也。政之賄。惟懲貪而已。至於姑息之政。倚法爲私。割上肥己。卽如公言。豪家田至七萬頃。糧至二萬。又不以時納。夫古者大國公田三萬畝。而今且百倍於古。大國之數。能幾萬頃。而國不貧。故僕今約已。敦素。杜絕賄門。痛懲貪墨。所以救賄政之弊也。查刷宿弊。清理逋欠。嚴治侵漁。攬納之奸。所以砭姑息之政也。上損則下益。私門閉則公室強。故懲貪吏者。所以足民也。理逋負者。所以足國也。官民兩足。上下俱益。所以壯根本之圖。建安攘之策。倡節儉之風。興禮義之教。明天子垂拱而御之。假令仲尼爲相。由求佐之。恐亦無以踰此矣。今議者率曰。吹求太急。民且逃亡爲亂。凡此皆奸人鼓說以搖上。可以惑愚闇之人。不可以欺明達之士也。夫民之亡且亂者。咸以貪吏剝下。而上不加恤。豪強兼井。而民貧失所故也。今爲侵。

欺。隱。占。者。權。豪。也。非。細。民。也。而。吾。法。之。所。施。者。奸。人。也。非。良。民。也。清。影。占。則。小。民。免。包。賠。之。累。而。得。守。其。本。業。懲。貪。墨。則。閭。閻。無。剝。削。之。擾。而。得。以。安。其。田。里。如。是。民。且。將。尸。而。祝。之。何。以。逃。亡。爲。公。博。綜。載。籍。究。觀。古。今。治。亂。興。亡。之。故。曾。有。官。清。民。安。田。賦。均。平。而。致。亂。者。乎。故。凡。爲。此。言。者。皆。奸。人。鼓。說。以。搖。上。者。也。願。公。堅。持。初。意。毋。惑。流。言。異。時。宰相。不。爲。國。家。忠。慮。徇。情。容。私。甚。者。輦。千。萬。金。入。其。室。即。爲。人。穿。鼻。矣。今。主。上。幼。冲。僕。以。一。身。當。天。下。之。重。不。難。破。家。以。利。國。隕。首。以。求。濟。豈。區。區。浮。議。可。得。而。搖。奪。者。乎。公。第。任。法。行。之。有。敢。撓。公。法。傷。任。事。之。臣。者。國。典。具。存。必。不。容。貸。所。示。江。海。條。件。俱。當。事。理。疏。至。即。屬。所。司。覆。行。懋修曰如此言語急公而招怨耳

答薊鎮吳環洲料虜虛報誑賞

薊鎮之報。竟成烏有。皆屬夷誑賞之言。但彼中在事者。利害切身。一有所聞。輒行奏報。爲他日免罪之地。固未暇審其誠僞也。此等事。但觀廟堂處分何如。頃僕聞薊報。即戒彼中。以鎮靜持重。務以整暇。勿致張皇。而託公傳諭。西虜先事伐謀。乃是一冷著果。得其用。此不惟可以解目前之患。又有以銷未然之變也。因憶前隆慶庚午。宣大忽報西



虜犯薊。薊人偵探者。因遂稱見虜已西行。犯在旦夕。各路之兵。嬰牆擺守。京師亦爲之戒嚴。廟堂皇皇。即講守城之策。是時內江方幸虜之來。以信其言。典化不能主持。舉錯紛紛。皆極可笑。而虜終無影響。防守一月見罷。費以數十萬計。頃東報。杳至若如往日。舉動。則又成一笑柄矣。

### 答兩廣殷石汀

前奉手書。懇解解任。想未見近旨也。主上屬託甚重。排衆議。而用公。此恩似不可忘。且廣事十已八九。倘代者不能守公之策。致有懸兀。恐公之心亦有所不安也。俟求得代者。即爲公處。決不久淹。南溟曾轉示公所寄林賊事一冊。具悉賊情。今但當以治內爲急。二賊相機。徐徐圖之。不可以二豎子自困廟堂。自有主張。非浮言所能淆也。

### 答總憲劉紫山

佳貺屢頒。豈敢終拒。况公今已解任。而猶惓惓不遺。如此厚愛真切。亦不忍違。但僕於交際之禮。久已曠廢。往來公差。人所親見。又嚴飭族人子弟。毋敢輕受饋遺。故雖相知親舊有惠。亦概不敢當。非欲矯抗。沽譽實以當事。任重兢兢焉。務矜小節。以自完而已。

用是輒以厚惠仍璧諸來使。然心領雅情。固不藉于物也。

百五十四

答方金湖計服三衛屬夷

辱示屯政云云。俱於事理至當。願公堅定行之。屯政舉。則士得飽食。可以議戰矣。比者遼左之功。固爲奇特。朝廷賞功之典。亦極其隆厚。然僕於此蓄意甚深。謹密以告公。今九邊之地。薊門爲重。以其爲國之堂。與也。自嘉靖庚戌以來。虜禍日中於薊。至罷九邊之力。以奉之而內地亦且困敝。然所以釀此禍者。皆屬夷爲之也。國初棄大寧之地。與之。冀其爲吾藩屏。而今乃如此。故屬夷不處。則邊患無已。時然欲處之。非先加以威。彼固未肯頰首而服。從也。今西虜爲貢市所羈。必不敢動。獨土蠻一枝。力弱寡援。制之爲易。今擬于上谷。練得戰士二萬。遼東二萬。多備火器。却令薊人平時將內地各城堡。修令堅固。視三鎮士氣已振。度其可用。則屬夷來撫。賞者一切以正理處之。凡額外求討及捉軍要賞者。悉正以軍法。彼不遂。所欲必結。虜來犯我。則據臺以守。邊外使之一騎不入。在我。雖無所獲。而在彼。已爲失利。亦策之上也。如其賊衆潰墻而入。則亦勿遽爲倉惶。但令薊將歛各路之兵。四五萬人。屯扼要害。令諸縣邑村落皆清野。入保。

勿與之戰。而上谷遼左不必俟命。即各出萬人。遣驍將從邊外。將諸屬夷老小盡殲之。令大將領一萬人入關。不必衛京師。徑趨薊地。伏於賊所出路。彼賊雖已入內地。見我不動。必不敢散。捨不過四五日。虜氣衰矣。衰則必遁。然後令薊人整陣以逐之。而宣遼兩軍合而蹙擊。彼旣饑疲。又各護其獲。敗不相救。而吾以三鎮全力擊其惰歸。破之必矣。一戰而勝。則薊鎮士氣旣倍。倍土蘇。諸酋不敢復窺。而屬夷亦皆可脅而撫之。以爲我用。薊事舉。則西虜之貢市愈堅。而入援之兵可以漸減。九邊安枕無事矣。愚計如此。今先試之於遼左。蓋遼人素稱敢戰。而李將軍亦忠勇可用。故厚賞以勸之。懸利以待之。亦致士先從。隗始之意也。公視愚計。如以爲可用。則幸與雷帥密議。必得戰士二萬人。多備火器乃可。今各鎮巡標下及近處守兵。可得二萬否。雷帥膽畧可當此事否。聞白允中有才畧。可用爲奇兵之將否。此舉雖在一二年後。然其工夫須及早圖之。書生狂談。必爲智者所笑。謾以奉聞。佇俟裁教。

與南臺長言中不干外政

主上雖在冲年。天挺睿哲。宮府之事。無大無小。咸虛己而屬之於僕。中貴人無敢以一

毫干預。此公在北時所親見也。僕雖不肖。而入養君德。出理庶務。咸獨秉虛公以運之。中貴人無敢有一毫阻撓。此亦公在北時所親見也。奈何南中臺諫諸君。輕聽風聞。好爲激語。或曰某與中貴人相知。或曰某因中貴人得用。或曰某爲新鄭之黨。不宜留之。或曰某爲新鄭所進。不宜用之。紛紛藉藉。日引月長。甚無謂也。即如太宰之清貞簡靖。非時輩人也。僕與主上面相商榷。親奉御筆點用。僕卽叩頭賀曰。皇上聖明。不遺遐遠。如此爲人臣者。孰不思竭力以圖報乎。第以渠素未留心銓事。又值文選君迂暗而不達於事理。致有一二錯誤。然皆小事。於大節未有失也。而遂群起而攻之。使之不獲一展。又如臺長之古心卓行。處之總憲。最爲宜矣。乃近南中亦有物色之者。書曰無侮老成人。饜饜良士。膂力旣愆。我尙多有之。宓子賤治單父。孔子使人覘之。見與老者二十餘人議政。孔子喜曰。吾知不齊能辦單父矣。今以幼主當陽。而朝多長者。豈非盛事乎。而奈何務欲侮誑之也。張進本一火者耳。酒潑放肆。送內守備笞撻之。革其管事。法如是足矣。卽下之於理。亦不過問擬不應止耳。而紛紛論列。何爲者哉。且凡臺諫交章。必相與爭國家大事。關繫理亂安危者。今以一酒醉內官而南北臺諫。闐然並論。又何爲。

者。哉。隋珠。彈。雀。虎。捕。羊。殊。可。笑。也。乃。致。主。上。生。疑。盛。怒。而。諭。僕。以。人。爲。欺。已。嚴。旨。忽。傳。使。僕。措。手。不。及。本。欲。爭。體。面。反。以。致。君。疑。所。爭。何。有。智。者。固。如。是。乎。然。此。非。臺。諫。諸。君。之。過。也。聞。有。一。二。大。臣。覬。銓。臺。而。不。得。者。播。其。說。於。南。中。聽。者。不。察。輕。事。置。喙。而。不。知。僕。之。苦。於。調。維。也。煩。公。幸。明。語。諸。君。今。朝。廷。清。宴。中。外。又。安。倖。門。瑾。塞。百。官。奉。職。如。是。足。矣。僕。之。淺。薄。亦。僅。能。辦。此。耳。若。更。欲。求。過。於。數。者。之。外。則。僕。不。能。主。上。幼。冲。本。無。差。失。而。政。令。之。行。動。見。齟。齬。或。事。已。處。分。爭。勝。不。已。甚。至。挑。禍。起。釁。以。結。怨。於。中。人。一。且。上。下。相。疑。南。北。冰。炭。而。後。責。僕。以。維。持。周。全。之。僕。亦。不。能。辱。在。道。誼。素。知。敢。布。腹。心。幸。惟。裁。鑒。

答延鎮巡撫張太石

頃。面。奏。主。上。延。鎮。所。修。邊。工。與。常。不。同。公。杖。履。跋。涉。身。親。督。工。故。特。遣。兵。部。司。屬。往。勸。冀。獲。實。也。主。上。睿。明。事。事。覈。實。振。舉。邊。事。之。機。實。在。於。此。

答甘肅巡撫侯掖川

西。涼。重。鎮。必。仗。雄。才。辱。華。翰。知。已。履。任。視。事。無。任。欣。慰。頃。巡。按。所。報。賓。鬼。事。據。王。鑑。川。

公言。此俺酋之少子丙兔。寄居西海者。乃丙兔。非賓兔也。頃已傳諭俺酋。令其嚴加戒飭。然制虜之道。惟當視吾備之修否。服則懷之。叛則禦之。得其好言。不足喜。得其惡言。不足怒也。開市一節。望公熟計而審處之。竊以爲此地。見與番人爲市。何獨不可與虜爲市。前任廖君。執泥而不達於事變。其言不可爲市。不過推事避忌耳。非能爲國家忠慮者也。但彼既有不遜之言。在此時未可便許。且俟俺酋戒諭之後。果帖服無言。待其再乞。然後裁許。則綏懷之恩。出於朝廷。而非由於要索矣。巡按所云。不過據各將官傳報。亦未可便以爲實。且從旁議論。與當局者不同。朝廷以邊鎮之事。專任公等。其操縱機宜。公宜悉心經理。爲國家審圖主上英明。斷而行之。非浮言所能搖奪也。

## 答薊遼方金湖

辱教邊事虜情。誠爲高見遠識。今在廷之臣。能爲此言者。指不一二。屈信吾黨之有人也。敬服敬服。據鑑川言。甘肅求市者。乃俺酋之少子丙兔。寄居西海。非賓兔也。夫甘肅既可與番人爲市。何獨不可與虜爲市。前任廖子。執闇而不達於事。其言不可與市。不過推事避患耳。非能爲國家忠慮者也。頃已示意侯君。令其審處。但彼既有不遜之言。

此時未可便許。且令俺曾戒諭。令其悉心效款。待來歲再乞。然後許之。則綏懷出於朝廷。而非由於要脅矣。公亦可以此意密語順義。使之知所從事。又聞大同甚饑。來春不知何如。若果艱食。公亦宜爲之請賑。今邊倉頗有積穀。可以備賑。固不必索之帑儲也。苟可支持則已之。

答滇撫羅野亭

辱華翰領悉。泰東客死無後。天之報施善人何如哉。僕忝同榜。爲之經理後事。情理宜爾。何德之有。

與河道傅石川

近聞淮揚士大夫言。海口益淤。以故河流橫決四溢。今不治。則河且決而入於江。維揚之區。皆爲巨浸矣。又有言前議築遙堤爲不便者。其說皆信否。從未行此道。不知利害所歸。望公熟計其便。裁教幸甚。

答兩廣殷石汀計招海寇

辱示鳳賊事。前聞閩人招之。已入穀矣。近又有出洋之報。僕竊料此賊。目前恐未可得。

何者。閩廣之人。皆欲要以爲己功。爲閩人者。必將曰。汝無歸廣。廣中名爲招撫。實欲殺汝也。爲廣人者。亦必曰。汝無歸閩。閩中名爲招撫。實欲殺汝也。故賊疑而不決。歸漢歸楚。莫知適從。反使狡賊得以其間。而納吾接濟之人。求其必用之物。久之復開洋而去。何處覓蹤。是我以招撫誘賊。而賊亦以招撫陷我。非計之得也。僕願廣中勿以招撫爲名。但嚴兵以備之。禁海上人勿與接濟。今公在廣。料彼不敢輒肆。彼不得入廣。必走閩。却令閩人招之。或可得也。閩廣皆在疆域之內。但欲得賊耳。何必功出於己乎。且犄之。逐之。其功亦自有不容掩者。然僕所爲必責之閩者。蓋以此賊。舊只於廣中作賊。閩人未罹其毒。今使廣人得之。不殺。則無以洩地方之憤。殺之。則廣賊見聽招者。尙多。將令反側者不安。若閩人得之。則殺之。不爲失信。赦之。不爲失刑。且料賊之心。亦頗信閩。而不信廣也。惟公與金大叅密計之。此所謂以與爲取者也。梧州稅鹽。公事所處一一精當。已下所司議行。

又

西省通鹽。不惟於軍儲有濟。且府江一帶。咸有兵船往來。亦可以彈壓獠人。通蒼梧之



氣脉。誠百世之利也。今雖不用軍衛。舟中亦宜量貯火器。陰寓武備方可。大疏已下所司一一覆允。

答蜀撫曾確菴計都蠻善後事

都蠻未平之先。蜀中士大夫求免其毒害而不可得。今既克復。遂欲窺其土田而有之。此私情之難徇者也。衆蠻殘孽。當其降服之初。乘吾兵威。分北而散。遣之爲力。甚易。今已一年餘矣。彼旣戀其故土。又曾許以撫懷。乃一旦欲別處之。禍萌當自此生矣。仍宜懷之以恩義。久任劉顯。以彈壓之。數年之後。人情定帖。畏威懷惠。皆吾赤子矣。蜀人有倡爲餘黨未盡之說者。皆欲利其土地耳。公宜熟計其便。毋徇人言。坐墮前功。

答方金湖

西事前已示意侯君。想當有處。觀西鎮諸君書云云。則順義已經戒諭。諒無他虞。但諸君之告公固如此。而騰之章奏。寄諸部科者。往往不同。大抵皆預捏危言。以爲他日避罪之地耳。人臣懷二心以事君。非忠也。所示諸書。留以爲證。

答殷石汀

往府江之役。以未經勘覆。久稽論報。茲榮晉樞卿。薄言酬錄。未足以當功也。近報倭警。似非其時。且越惠潮而犯嶺西。亦非其地。恐別賊假託之也。向者欽川云云。適與此符。惟公熟籌之。

答傅后川議河道

辱示治河議。一一領悉。但據公所言。皆爲未定之論。海口既不可開。遙堤又不必築。開泃口則恐工鉅之難。疏草灣又慮安東之貽患。然則必如何而後爲便乎。願聞至當歸一之論。入告於上而行之。

答薊鎮王巡撫

長禿生擒。亦制長昂之一機。幸惟留意審處。務使之畏威懷德可也。薊中羽翼未就。未可高飛。此輩不得不羈縻而用之。但須審察順義之情。以爲制馭之術耳。

答薊鎮吳環洲

聞俺酋病甚。有如不起。則疆場之事。不免又費一番經理。黃酋近日窮居塞外。動靜何如。將來局面當作何狀。今宜預思所以處之之術。又屬夷長昂三貢不入。屢在邊外捉

人挾賞。昨薊人捕得其叔長禿。即欲斬以報功。僕聞即使人止之。令其借此以制伏長昂。若彼能服罪補貢。誓不再擾。亦即赦而弗誅。照舊撫賞。但長昂與青把都爲婚。幸公示意青酋。令其傳意長昂。輸誠效順。勿復作歹。自取滅亡。蓋薊鎮近日。撫賞視昔不同。皆僕爲之處。畫其段布諸物。皆美好堪用者。到即給賞。而邊吏亦畏法。賊情大小。必以上聞。得賊必殺。或啓覺端。須得諸夷守約。彼此相安。則薊患永紓。而西虜之貢市益堅矣。

### 答兩廣殷石汀

鯨鯢盡戮。地方救寧。公之功可能也。驅見在之兵。當猝然之變。在自戰之地。禦必死之賊。兵不別調。役不淹時。而全師奏捷。其功不可能也。廩賚之典。尙未足酬。簡在帝心。大畀有日。

### 答吳環洲

辱示薊鎮虜情。淵哉其言之也。已卽密語彼中當事諸公。俾知所從事。屬夷處置。適宜。則土虜之真情可得。而兩鎮之貢市愈堅。當今邊務莫要於此矣。公在上谷。內修戰守。

外探虜情。東制西懷。自有妙用。僕復何憂。

答少叅吳道南

頃者喬轉。僕雖不預知。然部意亦非薄也。願執事且戢翼卑栖。飜飛固自有日也。難將之說。數年以來實聞之。蓋以馬趙宿將。一則屏棄灞亭。一則抑鬱而死。咸謂意出於執事。區區竊以前用執事於上谷。固以二將奉託。豈謂反陷之耶。故雖言者屢至。終不信也。今事亦已矣。願努力建立。以副鄙望。

答薊鎮總督方金湖

夷酋既已悔罪乞哀。宜開其自新之路。公處之極當機宜。又因而稽覈撫賞一事。尤爲邊政實務。辱教領悉。

答河道總督王敬所

開河之策。議在必行。但以事體重大。且此中有言其費度七八百萬乃足者。豈其然乎。故請差科臣會勘。徒以息嗷嗷之口耳。此事先年諸臣亦知其便利。獨以艱大之任。憚於承肩。今公赤忠身任其責。更復何疑。願堅持初意。勿奪羣言。其中事體亦須詳慎。期

在萬全無害可也。俟差官行再當請教。

答兩廣總督殷石汀

別楮云云。其人亦素愛其才。故薦之於公。後乃知其狂躁險刻。矜已凌人。不可大用。故昨因其稱疾。遂決去之。然公自此更不必置之齒頰矣。廣右今已大定。聞西省自府江平復。道路開通。客旅無阻。梧州之鹽。方舟而下。南交通貢。貿遷有無。桂林遂爲樂土。此誰之功歟。蓋粵人今日始知公之不可一日去也。

答少叅吳道南

辱教款虜錄紀。獎借過實。且感且媿。別楮二將事。鄙懷久已洞然。往事不足深論也。此後願益務以善養人爲國惜才。以充其與物一體之量。則目前道路自然開通。虎狼夷狄無不可處。何至齟齬疑慮。若無地自容耶。

答應天巡撫宋陽山

辱華翰。一一領悉。里甲經催投靠優免四者。正吳人受病處。然所以養成此病。至沉痾而不可療者。實陳周二子爲之。今丈一旦砭之以精覈之石。投之以經制之劑。宜其苦。

口刺腸而不能堪也。然事極必變。勢窮斯通。吳中事勢已極。理必有變。今得丈稍稍振刷。使知朝廷法紀之不可干。上下分義之不可踰。汰其太甚而無至於踰。盤橫決而不可收拾。則吳尙宜尸祝公以報德。而可以爲怨乎。嬰兒不剃頭則腸痛。不剃瘞則浸疾。然剃頭擗瘞固不能止嬰兒之不啼也。近來彼中人不獨側目於丈。且推本於僕。造爲橫議。欲以搖撼國是。如昨南余云云。意皆有所由來。故不得不創之。今上意已定。正論不搖。丈宜自審畫。無爲山鬼所惑。陳乞云云。決不能遂。徒多一番舉動耳。史周文卷已解部。訪知其中頗有造作。皆舊時胡衷二子爲之。頃者邵君止據舒王二道查呈。而舒王亦不知爲贗也。然僕於此亦不敢刻意深求。今但有楮筆可據。即可藉手以爲解脫之地。況其人已死。比之見在盜公帑爲富翁者有間。自宜從寬以處之也。

## 答甘肅巡撫侯掖川

西涼重地。番虜雜居。措畫稍差。便成乖阻。往嘉靖初年。賴建菴晉溪二大老。經畧數年。而後定。近廖公以節士之概。當邊關之任。非其宜矣。比薦公於上。或有言公好以智自免。不肯任事者。茲奉翰教。措畫周詳。旨旨慷慨。用智者固如是乎。且今莫主御極。名實

之辨。較若黑白。闔外之議。悉假便宜。不從中制。智者不以此時取旂常。鍾鼎更復何俟。以是知談者之妄也。

### 寄石麓李相公

不奉瞻對。五易春秋。諒翁念我。亦如我之思翁也。別後無可奉聞者。唯平生所與共許。委身致主之義。則不敢有一毫有負于久要。獨此庶可少慰尊懷耳。但弟以菲薄。廻翔廊廟。而翁以重望。獨淹留林壑。揆之古人彈冠之誼。殊用歉然。賢郎以庭闈念切。特假一差省覲。便中草草附候。別具侑束。統惟鑒納。

### 答河漕舒按院

頃者議開泲河。特爲轉漕計耳。其於河政自有常規。民患何嘗忘念。淮揚士民。乃遂謂朝廷欲置黃河於度外。而不爲經理。豈其然乎。大疏已下部議覆。

### 答應天撫院王古林

巡撫一方。將盜是務。除而誘人爲盜。盜焉可弭。公職專整飾戎備。爲民除害。宜如鷹鷂之逐鳥雀。又何畏焉。況今朝廷大明當天。幽隱畢燭。流言浮謗。舉不能行。亦自無可畏。

也。賤日厚禮。概不敢當。統惟鑒亮。

答吳環洲

辱示虜情。宛若指掌。至謂虜酋假虛聲。以要賞。邊將信訛。傳以希功。二語深中。時弊。今人可與籌邊事者。獨公與金湖公而已。與他人言。頗似說夢。雖識或不逮。亦有裝呆撒奸者。昨奉嚴旨督責。當無所容矣。

答山西撫院鄭範溪

前有貴戚自晉中來言。礦賊事。僕得因面奏寢一大役。公又因之解散其黨。俾地方寧靖。事機禍福之變。安有常哉。辱華翰。知己履任。甚慰。

答浙撫謝松屏言防倭

浙無倭患久矣。一日聯舟突犯。必有勾引之奸。且地方安靜日久。驟尋干戈。恐無以待寇。幸激以忠義。鼓以賞罰。悉力一創之。庶將來不敢再窺。亟剿此寇。然後徐究其禍本而除之可也。浙人咸云謝公非用武才。恐不能了此事。僕曰不然。謝公沉毅有遠慮。賊不足平也。願公勉就勳庸。以副鄙望。



答應天撫院宋陽山言防倭

近年海寇息警。人心頗懈。僕竊以爲憂。故昨年擬旨申飭。賴公偉畧。起而振之。今果能一戰而勝之。不俟登岸。而遏之於外洋。功尤奇矣。天下事。豈不貴豫哉。慰甚。彼前鋒旣折。必不敢窺吳。禍當中於浙矣。黃副總乃僕武舉所取士。其人才志似亦可用。但負氣不能下文吏。若少假借而用之。或亦可當一面也。

答吳環洲論邊臣任事

適上論詰本兵虜情虛實之由。即日奉翰教。讀之。旨哉其言之也。上谷得公。隱然如長城。僕內奉宸扆。外憂邊境。一日之內。神遊九塞。蓋不啻一再至而已。奈何邊臣故套難改。鮮有爲國家忠慮者。而無識言官。動卽諫白。及與之論邊事。一似說夢。近有一科臣。聞遼虛報。遂欲防守京城。浚濠塹。掘戰坑。以禦虜者。虜在何處。而張皇如是。使人悶悶。此疏若行。豈不遠駭聽聞。取笑夷虜。已奏上。留中寢之。以混其迹。孤子一身。無可與計事者。故每得翰示。輒說懌竟日。非喜其說之同已也。喜其有助於昏昧也。然不敢舉以告人。恐忌者。遂側目于公。乃知大舜隱惡而揚善。亦有不可行於今者矣。人臣不忠。人

心不古。可歎。自今東西虜情。的有所聞。仍望密以見示。其中情變。無常。亦不必定。以今日所言。爲是。所聞。爲的也。僕求助之意。真切懇至。幸惟亮之。揭稿一紙寄覽。仍希擲還。近聞有瞽目愚術人。在邊瀾擾。訪有指稱假託者。幸即擒治之。仍明示諸將士。僕從來不薦達此輩。勿爲所誑也。

答陝西督撫石毅菴

沙麻之事。雖由於二將不和。軍心不一。然自古未有千里襲人。越險無繼。而能成功者。今其事已結。似難中止。然亦須沉機審發。期于萬全。固不必期效于旦夕也。今之時政。與先年異。公受分陝之寄。凡事當守便宜。謀定而後發。亦不必汲汲求解于群議也。

答三邊總督論番情

石公前爲宋御史所窘。急于圖功。以解群議。遂輕用弗詢之謀。遽爲掩襲之計。致損威傷重。殊可恨惋。大抵西之番族。廣之。猺。獞。事體。畧同。狐鼠。麤。鼯。潛伏。叢林。穴居。險阻。非可以力勝者也。制禦之法。惟當選任謀勇將士。修險阻。明烽燧。責成近邊。熟番。遠爲哨備。厚其賞。給約束。沿邊軍人。無容勾引番人。交易圖利。有警務先覺預備。奮勇追逐。必

令。挫。折。則。熟。番。皆。畏。威。懷。德。而。生。番。自。不。敢。犯。今。不。思。以。計。勝。之。而。輕。用。不。教。之。兵。深。入。險。阻。之。地。雖。微。二。將。之。隙。亦。鮮。有。不。敗。者。此。事。在。軍。門。爲。近。撫。臺。隔。遠。難。於。調。度。可。語。石。公。前。事。已。如。此。今。須。慎。重。審。發。不。可。以。嚴。旨。責。成。人。言。旁。指。遂。爾。惶。恐。復。爲。輕。動。目。今。天。暑。草。木。蒙。密。道。路。崎。嶇。恐。難。進。兵。總。兵。人。馬。亦。不。須。西。駐。枉。費。糧。餉。且。只。守。險。設。伏。以。待。不。虞。責。罪。熟。番。發。其。陰。私。誘。以。厚。賞。爲。我。哨。守。待。秋。冬。水。凍。林。疎。然。後。相。機。進。取。或。明。出。以。示。兵。威。或。掩。襲。以。攻。不。備。必。有。奇。道。乃。可。制。勝。然。但。一。創。之。以。洩。邊。人。之。憤。足。矣。固。不。能。草。薙。而。獸。獮。之。矣。聞。番。人。恃。茶。以。爲。命。須。嚴。土。人。通。番。之。禁。使。私。茶。不。得。出。則。我。得。制。其。死。命。至。於。番。功。之。賞。不。過。數。金。誠。爲。太。薄。今。宜。比。照。倭。功。例。稍。厚。其。賞。庶。人。肯。用。命。也。凡。此。皆。書。生。遙。度。之。言。未。知。果。當。機。宜。否。漫。附。以。備。採。擇。焉。

答按院陳公文衡覈事實

辱教其人乃前院論劾。今但當察其事之實否。不必問其曾得罪於何人也。諸葛孔明云。吾心如秤。不能爲人作輕重。僕亦非薄。謬膺重寄。事無大小。必默告於天地祖宗。列聖而後行。豈敢以己意爲輕重哉。

答少叅吳道南

以善養人。與物一體。皆執事所習聞者。衣中繫珠。不尋自獲。富家乞子。忽復來歸。滿中七寶。受用無量。在執事自取之耳。盟諸我不若自盟之爲切也。

答督撫張崐峯

往公以太君思歸。奉輿西返。僕所以不阻者。亦欲因此息忌者之喙耳。今公論已定。以素所負蓄。屬休明之會。不於此時取旂常鍾鼎。更復何俟。且棄瑕雪垢。不避嫌忌。而薦賢者。惟僕爲然。後之人或不如是之愚也已。大疏部已報寢。幸卽戒途。以需簡畀。

答石麓李相公

忝來辱翰。貺深荷雅情。及備詢起居萬福。復慰懸仰。弟自首事以來。於茲四稔。碌碌無以自效。所賴主德日明。官府清肅。百司奉職。邊陲少警。一二黠肆干紀者。咸就誅夷。仰惟宗社闡靈。孚佑聖主。而弟以淺薄。會逢其時。優游苟祿。竊餘榮以自被。殆有天幸焉。顧值休明之會。俾耆德碩望。遺置在野。不能引薦。深用媿慊耳。賢郎請告。謹遵命屬。所司覆行。別具侑束。統惟鑒存。

答閩撫劉凝齋

林賊既已入穀。果不出閩人得之之料。喜甚喜甚。但當其時。卽宜少出閩師以助之。夷情多變。死賊。圍久。或生他計。諒此時成敗已決矣。傾耳以俟捷音。

答雲南巡撫王毅菴

辱示。知旌節已入滇視事。欣慰。儂賊事既原無大故。自宜相機撫處。麇馳狐狽之區。得其地。不可耕。得其民。不可使。因俗爲制。使不爲大害而已。何爲輕動大衆。以事無益耶。簡靜行事。協和總戎。此二言者。望公終納之。前院舉劾殊可笑。該科亦有劾疏。通俟事寧併處也。

答督撫吳堯山

往奉別時。記公有不薄南遷之語。故以借重。然亦暫處耳。憶昔悠悠之談。若謂僕有所不足于君所者。今公視鄙心何如哉。大疏既不獲請。簡書有嚴。幸過發仙舟。以副輿望。答省中羅涇坡論士風

僕自受事以來。惓惓勸諭今士大夫。務以忠肝義膽事君。誠心直道相與。近雖稍變舊

習。而餘風未殄。執事謂外吏猶事趨諂。驚虛文。誠然。所示二縣令。已卽投之囊中矣。讀華翰。具見留心民事。詩曰。人之好我。示我周行。執事有焉。敬拜以受。

答河漕劉百川言開膠河

膠河之可開。凡有心於國家者皆知之。獨貴鄉人以爲不便。皆私己之言也。讀大疏。具見忘私徇國之忠。已奉旨允行。又承教鳳竹公肯身任之。尤爲難得。今卽以屬之。漸菴亦曾有書云。開加口不若疏膠河。故宜與之會同。且委用屬吏。量派夫役。亦必借其力以共濟也。至於一應疏鑿事宜。及工費多寡。俱俟鳳竹公親履其地。次第條奏。其河道官屬錢糧。俱不必與之干涉。以破其棄河不治之說。庶浮言不能興。大事可就也。

答河道徐鳳竹

膠河之可開。凡有心於國家者皆知之。乃竟爲浮議所阻者。其端有二。一則山東之人。畏興大役。有科派之擾。又恐漕渠一開。官民船隻。乘便別行。則臨清一帶。商販自稀。此昔年之說。一則恐漕渠旣開。糧運無阻。將輕視河患。而不爲之理。此近年之說也。凡此皆私己之言。非公天下之慮也。今當決計行之。無事再勦。僕嘗念此。惟以不得任事之

人爲慮。昨奉百川公書。公雅不辭勞。審爾大事濟矣。已卽面奏於上。特以屬公。前得山東撫臺李公書。謂開河口不如疏膠河。意與公合。故宜會同。且委用屬吏。量派夫役。亦必借其力以共濟也。諸疏鑿造船事宜。及工費多寡。俱俟公親履其地。一一條奏。其河道官屬錢糧等項。俱絕不與之干涉。以破其棄河不治之說。庶浮言不興。大工可就也。夫世必有非常之人。然後有非常之功。然又必遇非常之時。而後其功可成。故曰。非常之原。黎民惑焉。今主上英明天啓。志欲有爲。而公以非常之才。適遭此時。可不努力以建非常之業乎。大功克成。當虛揆席。以待。

答山東撫院李漸菴言吏治河漕

辱華翰。所示具盡事理。讀之無厭。竊聞致理之要在於安民。欲民之安。責在守令。今主上年雖冲幼。已知注心邦本。然而上澤未能下究。下隱未能上通者。則以吏治欠覈。而賦權撓法之豪。詭銜竊轡之奸。鯁乎其中。故耳。易卦頤中有物。必嚙之而後合。故今振舉綱維。精覈吏治。章之以雷電。懸之以象魏。要在嚙其物。去其鯁。使上澤得以下究。下隱得以上通而已。二州佐旣堪其任。何愛兩知縣而不以勸天下之能者。且提調學校。

特縣令下事耳。當此罷邑。民救死不贍。奚暇治禮義哉。況上有府佐。下有學官。歲時考校。亦自不妨也。鬻爵。誠爲弊政。昨計部稍去。太甚者。然未能盡拔根株。俟一二年後。將鹽法。屯田。經理。就緒。內外儲蓄。少充。當盡罷之。考成一事。行之數年。自可不加賦而上用。足。今計開納所入。歲不過四十萬。稍加劑量。致此固無難也。向承教膠河事。時方議鑿泲口。未遑論也。今泲口旣罷。劉徐二司空復議及此。適與公議合。故特屬之。望公協恭熟計。共濟此事。僕以淺薄。謬膺重寄。主上虛已而任之。自受事以來。晝作夜思。寢不寐。食不甘。以憂國家之事。三年於此矣。今朝廷大政。幸已畧舉。惟漕河宗室未得其理。宗室事鉅。不敢輕動。尙當有待。漕河則宜及今圖之。了此一二大事。僕即納筦鑰。稽首歸政。乞骸而去矣。千金之裘。非一狐之腋。所望海內英哲。共助不逮。

## 答薊鎮總督方金湖

順義饋馬。效順彌堅。眞朝廷之福也。書中言守邊五年。欲乞賞賚。似亦可從。俟其貢市畢。可爲之一請。僕所酬一如去歲例。俟其至邊與之。

## 答滇撫王毅菴論夷情戒多事



滇中自嘉靖以來屢嬰多故。其初皆起於甚微。而其禍乃至。于不可解。窮荒絕徼之外。得其地不可耕也。得其民不可使也。而空費財力。以事無益。使無辜之民。肝腦塗地。不仁哉。前人之所爲乎。今仗大畧撫定。造福于遠人多矣。此後惟一務安靜。嚴禁軍衛。有司毋貪小利。逞小怨。以騷動夷情。則可以高枕臥治矣。辱示曲盡彼中事理。嘆服。綿紙既可用。以題奏。何不可爲書柬乎。外雲南歲貢金。舊皆一次解進。今分兩次。似爲煩費。此後若辦足。仍作一次解進。何如。惟裁酌之。

### 答甘肅巡撫侯掖川

甘肅開市。已奉諭旨。悉如所議。其中有難遙度者。公自以便宜行之。務令事久邊境獲安而已。市場似宜稍西。去西寧太近。則啓竇兔壘斷之心。去我邊太遠。則迂邊民交易之路。春市虜馬瘦弱。強爲之市。終不便也。統惟裁酌。

### 答列卿楊本菴

向承以令先公隱銘見屬。媿不能文。又冗甚。故遷延至今。無創雖不足以發揚令先公之盛美。然道僕平生所與令先公同心許國之誼。則實無一字不出於肺腑也。百世之

下。考古尙論者。必將有徵于斯言。辱惠佳帳。祇領。餘不敢當。輒璧諸使者。

答山東巡撫李漸菴

膠河之議。非一日矣。咸以謀多築室。人鮮同心。故幾成而罷。今幸劉徐二公發端任事。公與商道長。協心爲國。底績之期。可以預必。乃知就大圖艱。固有時也。所示疏濬道里。宛在目前。若如陳君所呈。更爲徑易。不知按視何如。徐公有來期否。

答總督方金湖

順義酬幣。既不中格。謹領入聞。今歲各路貢市。比之昨年。尤爲歛戢。足徵虜效順之堅。公籌畧之遠也。慰甚。慰甚。陳子論張參議。詳其語意。似非至公。而銓部不待巡撫之疏。輒與題覆。亦非事體。故昨旨以議擬不合爲詞。下巡撫再勘。實駁之也。繼得華翰及鄭公疏。則多惜之之語。乃知再勘之旨。於事理允當。如有枉誣。宜與昭雪。明主懸衡以運天下。如日之照臨。是非賞罰。惟一付之。至公不宜依違兩可之詞也。

答河道徐鳳竹

承華翰。知道從已臨東土。無任欣慰。大疏下所司。一一覆允。此事甚鉅。費必不貲。今欲

爲國家建萬年之利。寧敢惜費。但齊魯之人。甚不樂興此役。以近旨嚴切。雖不敢明肆阻撓。乃其心則終不以爲然。故凡言此事。必幾萬幾十萬。而後可舉者。未可遽信之也。公宜與有心計誠心爲國者熟圖之。近來朝廷之上。事事精覈。凡有興作。比之先年。率費半。而功倍。則虛實不同。故耳。願公計慮審定。然後次第請旨行之。

答司馬王西石

張主簿人來。辱翰教。深慰遠懷。向者之處。惟欲曲遂高志。然於僕本願終違。蔽賢之罪。終不可逭也。學須到形不愧影。此聖門教人慎獨之功。此工夫最難。以公高明。自能徑造直詣。如僕淺劣。因公之教。亦益加深省也。陽山光明磊落。初時吳人甚不便之。近反感慕稱頌。蓋至誠未有不動者。遼左頃復報大捷。雖斬馘止二百有餘。然奔溺于河者甚衆。河水爲之不流。盡棄輜重而遁。所鹵獲駝馬器物不可勝計。足以紓邊人之憤。而寒旃裘之膽。眞大快也。諒公所欲聞者。謾以附及。講章先刻完者附覽。

答閩撫劉凝齋

屢辱翰示。及別楮所云。一一領悉。頃聞有貴恙。無任懷念。想勿藥矣。近據閩廣所報賊

形。皆潰亂奔竄之狀。鳳賊似不在其中。斃於呂宋之說。恐不虛也。果爾。皆閩人之功。若非遣諜行間。彼番人安肯殲之乎。今想已有的耗。傾耳以俟捷音之至。

答兩廣督撫凌洋山

辱華翰。知己榮代視事。無任欣慰。前閩中屢報鳳賊爲呂宋番人圍困。何得突犯廣中。據報賊形若潰亂奔歸者。鳳賊恐不在中。幸公細察之。若此賊果在其衆既散。必成擒矣。羅盤賊既已奏聞。勢不能已。但須審計熟圖之。昨部覆又推原題未盡之事。似亦可行。大約廣中武備不可一日弛。與內不同。振軍聲。伐不服。以鎮壓蠻夷之心。有不能一付之安靜者。惟公裁之。

寄趙大洲相公

賢郎謁選。辱華翰。深荷遠念。僕以僂弱。謬膺重任。每懷將伯之助。莫挽東山之轍。側身西望。惆悵而已。所幸主德日新。精勤問學。宮府清宴。方內乂安。此九域簪紳之侶。所共欣躍而稱慶者也。翁素抱忠耿。知在林里。未忘朝廷。故謾以奉聞。賢郎圖差歸省。便此附候。別具奏稿一部。圖說一部。及薄幣二端。侑東。統惟鑒原。

答劉虹川總憲

天下事有欲速而返遲。求得而顧失者。公是也。公昔在鄖臺有惠政。無端被誣。世所共惜。薦言屢至。召用有期。公乃急于求進。若不能須臾少竣者。異時撫臺有缺。僕即以公屬之銓衡。乃當事者對言。此公才信可用。獨無奈其竿牘頻仍。本部以是引嫌不敢用之。而僕自是亦默然慙阻。不敢復言公事矣。此非所謂欲速而返遲。求得而顧失者乎。方今明主在上。方博蒐賢儔。以興太平之治。僕之求士甚于士之求已。雖越在萬里。沉于下僚。或身蒙訾垢。衆所指嫉。其人果賢。亦皆剔滌而簡拔之。其爲賢者謀也。又工於自爲謀。公聞之往來之人。豈不誠然乎哉。胡乃不以賢者自處。以待僕之求。而用市道相與餽之以厚儀。要之以必從。又欲委之於私家。陷之以難却。則不知僕亦甚矣。古人言非其義而與之。如真之壑中。誠不意公之以僕爲壑也。以公夙所抱負。又當盛年。固時所當用者。此後闔門養重。靜以俟之。弓旌之召。將不求而自至。若必欲如流俗所爲。舍大道而由曲徑。棄道誼而用貨賄。僕不得已必將揚言于廷。以明己之無私。則僕既陷于薄德。而公亦永無嚮用之路矣。是彼此俱損也。恃在夙昔至契。敢直露其愚。惟公

亮而宥之幸甚。

百八十二

答督撫吳環洲言敬事後食之義

辱翰示。一一領悉。卽屬本兵爲之曲處。但有功必叙。有勞必酬者。朝廷厚下之仁。敬事後食。先勞後祿者。人臣自靖之義。若銖銖兩兩計功程勞。以責望于上。似非所謂懷仁義以事君者也。僕以菲薄。待罪政府。每日戴星而入。朝不遑食。夕不遑息。形神俱瘁。心力并竭。于國家無尺寸。然自受事以來。力辭四廕。獨守舊官。每一蒙恩。輒夔夔慄慄。不能自寧。非矯也。誠以國恩難報。而臣子雖鞠躬盡瘁。不過自盡其所當爲。本無功之可言也。公所欲爲諸君處者。自是鼓舞用人之道。而區區所云。似亦爲人臣之所當知也。冒昧吐瀝。惟高明采之。

答兩廣凌洋山

閩中撫接有書至。甚以廣議招撫爲非。此固一隅之論。然亦宜審觀賊勢何如。據前所報。鳳賊似未必在其中。若果係殘黨入境。又未肆殺掠。則招而分北之。事理當然。不爲失策。若賊首尚在。敢行侵掠。則宜與閩帥夾剿之。今不揣賊情強弱。向背而執言撫剿。

皆偏見也。今想已大定。人旋附布區區。

答薊鎮巡撫

頃遼左之功固奇。然本之以公密報土酋東犯的耗。僕因而傳示該鎮。潛形而預待之。故有此捷。論其發蹤之功。公宜首叙。顧僕于此不敢冒竊。遂使大功不彰也。

答隴右大叅李冀軒

辱華翰。得悉隴右事情。甚慰懸慮。番賊事不專在用兵。貴於善處。古人有以一介之使。當十萬之師者。當機故也。蘭州倉場稍弊。不獨寄貯民間。殆并民間所貯者亦爲虛數。官司積棍。與奸商相通。冒領官銀。並無糴易。每有調遣。則賄囑將官。量以布米等物。給軍。隨卽銷除。以一日爲二三日者。有之。以一千爲二三千者。有之。蓋其弊久矣。茲旣清查重處。乃振弊維新之會。凡有所當行者。計處已熟。可呈詳督撫題奏。庶該部便于議覆也。

答傅諫議

往者別時。曾以守己愛民四字相規。故屢辱厚惠。俱不敢受。蓋恐自背平日相規之言。

有虧執事守己之節。而執事乃屢却不已。愈至愈厚。豈以區區爲嫌少而加益耶。至於腰間之白。尤爲殊異。顧此寶物。何處得來。恐非縣令所宜有也。謹仍璧諸使者。若假之他人。可令返趙。執事從此亦宜思所以自勵焉。

## 答河道徐鳳竹

膠河已有成議。雖費亦不敢惜。其中疏濬事宜。及調用有司等項。俱聽便宜處畫。一毫不從中制。乃聞近爲臺議所苦。頗悔昔者建言之爲易。審爾則此事難以望其有成矣。僕聞疑事無功。疑行無名。明主方勵精圖治。詢事考成。豈直以未定之議。嘗試朝廷哉。神禹大智。猶必親乘四載。遍歷九土。至於手足胼胝。而後能成功。方其鑿龍門之時。民皆拾瓦礫以擊之。蓋衆庶之情。莫不欲苟安於無事。而保身自便者。孰肯淹留辛苦於泥塗。橫潦之中。此衆議之所。以紛紛也。願公主之以剛斷。持之以必行。心乎爲國。畢智竭忠。以成不朽之功。凡粘帶顧忌。調停人情之說。一切勿懷之於中。又親歷工所。揆慮相度。分任責成。若憚勞不親。細事徒寄耳。目於人。則紛紛之議。將日聞於耳。雖勉強圖之。亦具文而已。決不能濟也。幸公熟圖之。若果未能堅持初意。恐拂衆心。則亦宜明告。



於上。以謝昔建議之爲非。而後重負可釋耳。此國之大事。不敢不盡其愚。幸惟鑒宥。

### 答應天巡撫宋陽山

去歲海洋之捷。誠爲奇勳。榮晉一秩。未足爲酬。尙當有崇擢焉。辱示諸款。手讀數過。俱見鴻猷。驛遞一事。近例頗嚴。人似無敢犯者。大抵爲政必貴身先。頃小兒回籍。應舉自行。顧倩。昨冬遣僕歸。壽老親。身負儀物。策蹇而行。蓋不敢身自犯之也。目前民困已覺少甦。數年之後。積餘必多。用以糴穀備賑。誠善政也。織造事。值浙中亦有疏陳乞。故司空不敢減此益彼。姑以料價抵補。然此旣分四運。則目前已自足辦。一二年後。公私稍舒。了此似亦無難也。細觀別冊。向來夙弊。釐革殆盡。估價亦與近日言者迥異。足以見丈於諸事。靡不罄竭心力矣。優免核則投靠。自減投靠。減則賦役自均。數言已盡。查完停妥。宜即具題施行。水利之責御史。昨淩洋山始建此議。僕固以爲未便。乃渠則堅求必遂。故詎勉從之。今奉教。信爲冗設也。巡鹽之理。漕徒增文移煩擾。俟差官時酌損之。

### 答總兵戚南塘

適會本兵譚公。問足下與閱視大臣相見之禮。云宜如總理之見督府可也。竊意今日。

當以欽命爲重。不在兵銜之有無。謙以自處。見者自然悅而敬之。其差去郤公。當預爲足下先容。必加優禮。決不以庸衆相待也。

## 答閩撫劉凝齋

閩師千里赴難。雖無所獲。猶當論功。况斬馘黎丹。灼然耳目者乎。廣人欲來招撫之議。忘大德而逞小忿。曲有所歸矣。聖明遠見萬里。功罪賞罰。不爽秋毫。本兵已覆勘議。幸公勿以爲介。但鳳賊存亡。尙無的耗。仍望公之留意也。

## 答松谷陳相公

伏承台翰。腴貺捧讀再四。如坐春風。不知燕蜀遼闊也。備論起居清勝。身處雲林。望隆朝野。慰仰慰仰。不肖猥以淺劣。謬膺重任。顛蒙之見。竊以爲受國重託。宜以死報。故二三年間。諸所措畫。惟以振紀綱。剔瑕蠹爲務。以是見怪於流俗。本之德薄位尊。力小任重。其見詆誣。非不幸也。卽欲引決乞骸。以主恩深重。昔所許於先帝者。尙未克。酌故復。覲顏就列。屯難之際。思我同心。恨不卽弋冥鴻。招翔鳳。而致之廊廟也。

## 答奉常陸五臺論治體用剛

往丈起山中。不一歲而躋九列。僕日夜引領望丈之一至者。以丈素有超世之識。知僕所以肩鉅承艱之心。爲能疏附後先。以共濟艱危也。乃讀前後手翰。所以教僕者。則亦未越於衆人之見。而與僕之孤耿大謬也。丈前書謂僕處余懋學傳應禎爲太過。恐失士心。後書謂救劉臺爲盛德。至引文潞公之事以相比。今海內簪紳之侶。投東於僕者。十九爲此言也。然皆衆人也。豈意有超世之識。又知僕所以肩鉅承危之心。而所見乃亦止此乎。古之賢聖所遇之時不同。而處之之道亦異。易大過棟撓。彖曰剛過乎中。當大過之時。爲大過之事。未免有剛過之病。然不如是不足以定傾。而安國棟撓而本未弱矣。伊周當大過之時。爲大過之事。而商周之業賴之以存。雖剛而不失爲中也。僕以一豎儒。擁十餘齡幼主。立於天下。臣民之上。威德未建。人有玩心。況自隆慶以來。議論滋多。國是靡定。紀綱倒植。名實混淆。自僕當事。始布大公。彰大信。修明祖宗法度。開衆正之路。杜羣枉之門。一切以尊主庇民振舉頽廢爲務。天下始知有君也。而疾之者。乃倡爲異說。欲以抑損主威。搖亂朝政。故不得不重處二人。以定國。是以一人心。蓋所謂剛過乎中。處大過之時者也。而丈乃以爲失士心。誤矣。吾但欲安國家。定社稷耳。怨

仇何足恤乎。至於潞公之事，亦復不倫。蓋潞公所事者長君，而其出處去就未必繫宋室之安危。子方狂妄，後生獨持饋錦一事，以議論前輩，此其失在於不知賢耳。故潞公得以包容之，僕今所處何時也。主上舉艱鉅之任，付之於眇然之身，今權璫貴戚奉法遵令，俛首貼耳，而不敢肆狡夷強虜獻琛修貢，蹶角稽首，而惟恐後者，獨以僕攝持之耳。其出處去就，所繫豈淺淺哉。彼讒人者，不畏不愧，職爲亂階，且其蓄意甚深，爲謀甚狡，上不及主，上旁不及中，貴而獨刺刃於僕之身，又無所污，曠而獨曰專擅。專擅云云，欲以竦動幼主，陰間左右而疑我於上耳。賴天地宗廟之靈，默啓宸衷，益堅信任，不然天下之爭，豈不爲之寒心哉。自有此事，主上食不甘味，寢不安席，以痛恨於忌者，蓋大舜疾讒，說之殄行，孔子惡利口之覆邦，故去此人以安僕也。以安社稷也。離明允斷誠理，法之正而僕所以懇懇救之者，蓋以仰答聖恩，下明臣節耳。非欲爲沽名之事也。而丈乃以潞公見諷誤矣。僕一念爲國家爲士大夫之心，自省肫誠專一，其作用處，或有不合於流俗者，要之欲成吾爲國家爲士大夫之心耳。僕嘗有言，使吾爲劊子手，吾亦不離法場，而證善提。又一偈云：高崗、虎、方、怒、深、林、嶙、正、嗔、世、無、迷、路、客、終、是、不、傷、人、丈。

深於佛學者。豈不知此機乎。夫士屈於不知己。而伸於知己。今海內縉紳之侶。爲此言者甚衆。僕皆遜而謝之。乃於丈曉曉不已者。以丈有超世之見。知僕所以肩鉅承艱之心者也。讀禮有暇。試一思之。倘再會有緣。尙當刮目相待。

### 答河道吳自湖

惟公遵養林泉。望懸朝野。僕所欲推轂者屢矣。咸爲忌者所阻。今乃得遂初心。然猶恨其不早也。淮揚之民。歲苦昏墊。朝廷未嘗一日忘。顧莫有任其事者。茲讀大疏。明白洞徹。底績可期。夫治水之道。未有不下流者。年來但講治水。不求治海。雖費何益。但海口之淤。當必有因。似宜視水必趨之路。決其淤。疏其窒。雖棄地勿惜。碍衆勿顧。庶幾有成也。設官及留餉諸事。一一如教屬所司覆允。惟公堅定而審圖之。

### 答兩廣凌洋山計剿羅盤寇

羅盤潑水之事。石汀公在任不能處。乃諉難於後人。誠爲不恕。然此地不沾王化數十百年。義所當討。在公誠不容使之跳梁於臥榻之前也。但須審圖而後動。動而必勝。勝而無損。乃爲萬全。不然。又不。如姑置之。爲便也。

## 答河漕王敬所

人有自邊來者言公按行部中。簡靜清肅。邊人咸不知有命使之至。詩不云乎。蕭蕭馬鳴。悠悠旆旌。之子于征。有聞無聲。公之謂矣。慰仰慰仰。淮揚水患之旨。蓋欲激發吳公。使之殫力以從事也。朝廷方有事東方。而江淮之人。咸謂僕止以運道爲急。將視河害而不救。故以此默解之。自公振新漕政。萬艘飛渡。京庾充盈。卓哉偉績。孰得而掩之。豈以此一事未了爲恨哉。且功不必出於己。公所未就。而吳公成之。則亦公之功也。已辱教似未達。僕所以作勵時賢共熙帝載之意。故畧述其概以復。惟公裁亮焉。

## 答兩廣督撫計剿海賊

往者潮州主撫賊之議。閩人深有憾於金大參。科中遂加抨劾。僕竊以廣中之處。不爲失策。乃告銓部本兵。言金君必不可動。動則後來任事者。皆恫疑首鼠。而不敢爲矣。然林鳳之見創於呂宋。實閩人之謀。彼以大兵逐此敗殘餘黨。欲盡殲之海中以爲功。而廣中乃一舉而收之。其致憾固宜。今惟行廣人之策。收閩人之功。則處置適宜。彼此俱得矣。銓部本兵以僕之言爲然。遂用此意題覆。今讀大疏。詳觀前後事理。果如僕言。其

中措置皆極允當。蓋昔年撫賊。率要求善地安插。蜂屯蟻聚。列兵自衛。在我常有肘腋之虞。在賊常懷反側之意。養癰待決。誠非計也。今則隨地分北。解甲賣刀。因其求生之誠。解此三面之網。將使賊黨聞之。孰不懷我好音。變其佚志。故廣中之策是也。然觀金君所與閩人往來文移。頗覺動氣。楚固失之。而齊亦未可爲得。此氣質之小疵也。卽欲取此新績。復其舊官。但閩中勦功疏尙未至。若先處之。重激閩人之忿。故行並勦。幸促勦者速報。庶便處分也。羅旁事宜審定而後動。期於萬全乃可。貴屬司道有司賢否。訪據的實者。幸另開手書密示。

答雲南巡撫王凝菴

高金宸先已題奉欽依准襲矣。外嘉靖間曾聞雲南有積貯銀百萬兩。世宗欲取用。而方礪菴執言該省常有兵事宜以待用。不知此項銀何年存剩。今尙有否。卽查覈見示。餘不悉。

答應天巡撫論大政大典

辱別楮所云。一一領悉。安慶軍餉。及三府糧疏。俱下部覆允。馮蹇二君屬部優處。政府

入人言。惡吳中士夫賴糧之說。似別有所指。不爲丈也。異時每聞存翁言。其鄉人最無天理。及近時前後官於此土者。每呼爲鬼國。云他日天下有事。必此中倡之。蓋謂朝廷之政令不能行於此地。而人情狡詐。能忍人之所不能忍。爲人之所不敢爲。故也。此等言語。豈亦丈告之政府耶。願秉道自信。毋惑流言。以終令聞。丈向移駐句容。議者咸以爲多事。近更喜其安靜。蓋用度節則里甲無徵索之擾。稱謁省則驛遞無供億之繁。故上下自相安耳。喜甚。今驛遞一事。在東南不知何如。畿輔諸郡。十減六七。行旅初覺不便。近來亦頗相安。若小民歡呼歌誦。則不啻管絃之沸溢矣。且此項錢糧貯積甚多。將來裕國足民。更不外索。卽此一事。餘可類推。以今全盛之天下。爲國者肯一留意於此時。時修明祖宗法度。精覈吏治。能由此富國富民。興禮義。明教化。和撫四夷。以建萬世太平之業。誠反手耳。大抵僕今所爲。暫時雖若不便於流俗。而他日去位之後。必有思我者。蓋僕之愚。無有一毫爲己之心。故耳。祖墳事。嘉靖間王戶侍亦曾疏請。後竟以無據報罷。竊思此事。在聖祖時已屬茫昧。夫以聖祖之永孝。豈遽忘其先世。殆必有不

得於心者耳。今去二百餘年。復何所憑而修復之。且此事不在疑似之間。如以爲真。則



非有司少牢之禮所能享之。又豈可以社屬待之。如其非真。則此纍纍荒塚。祀之何爲。僕嘗以我聖祖之不冒世族。不深求先世窮冥之跡。不諱言身世艱窘之狀。皆神智達觀。度越前代帝王遠甚。今日之事。似只傳疑可也。鄙見如此。惟高明裁之。

答河道吳自湖

混江龍之制。昔曾聞之。近以河政廢弛。人不知用耳。頃屬所司題覆。通行河道衙門。一體製造。

答楚撫陳文峯

辱示公安諸邑。連歲昏墊。生理蕭疎。昨蒙加意賑恤。頓回春意。今民力雖困。猶賴父母孔邇。橫恩溢澤。亦不過徼於臺下也。郡侯才守俱優。向以初任。銳於有爲。頗失上官之意。今則久而愈孚。令聞休洽。昨已特懇之向院。諒在穀中矣。荊州二衛班軍。分番往戍。誠於守禦有裨。已下部覆允矣。非曾確菴來言公舊僚。意頗相左。大非所望。或意見不同耳。願公且恢涵之。

答王敬所

辱示邊務諸狀。皆切中機宜。事竣亦不妨條議上聞也。又承別諭云云。謹逐條手復。納還。記室不另具復。以示不敢泄。此後有要務。請手翰密示。口授非宜。

答河道潘印川

惟公雅望宏猷。久切傾嚮。昔者河上之事。鄙心獨知其枉。每與太宰公評臨海內。佚遣之賢。未嘗不以公爲舉首也。時屬休明之會。正宜乘時建立。用展素蓄。乃猶盤桓引却。殊乖所望。大疏已下銓部議贊。雅志恐不得遂。幸過發征塵。以慰興望。厚儀概不敢當。謹以璧諸使者。

答操江王少方

江洋獲盜。事關王印。自合上聞。鄙意以爲盜贓已獲。可從寬處。不意主上覽疏中縛王劫印語。赫然震怒。面諭重處。區區從容解譬。下部議覆。上意以部覆撫按。罰治爲輕。區區又委曲議擬。乃得薄譴。蓋主上恒以冲年惡人之欺已。故以失事爲可追。而以隱隱爲深。罪也。人旋草草附復。其詳容另悉。

答河道吳公桂芳

淮揚之民。方苦昏墊。披髮纓冠而救之。猶恐不及。豈能豫憂運道之難處耶。今且拯此一方之民。從容講求平江遺蹟。爲國家經久之圖。今內外儲積。幸已漸裕。法紀漸張。根本漸固。此等事。他日自有賢者任之。公毋慮也。

### 答總憲吳公

盜劫官銀於會城之外。本非細故。但人贓已獲大半。公亦參論無隱。自當請旨從寬。然諸未獲者。猶宜速爲詰捕。盜者必獲。獲而必誅。則人自不敢爲矣。

### 答廉憲胡公邦奇

辱別教云云。深荷至愛。前王操江亦曾以尊意告僕。而僕不以爲慮。蓋僕素以至誠待人。絕不虞人之傷己。至於近日之事。則反。嚙。出。於。門。墻。怨。敵。發。於。知。厚。又。適。出。常。理。之外。無所容於防也。古云。寧人負我。無我負人。况冤親平等。悉歸幻妄。今轉瞬之間。已成陳迹矣。何足掛之。懷抱乎。然感念厚意。中心藏之。

### 答操江王少方

四月二十六日五月二日二書。先後俱至。一一心會。不能悉答。滁州鎮江二事。部覆悉

如疏議。近來江防。外雖鋪設可觀。內却空疎無實。此言切中時弊。蓋不獨江防爲爾。然昨江西浙江二事。明旨森然。此後即欲推諉粉飾。恐亦難矣。安慶軍餉。部議執前已覆定。不肯再更。然陳君之意爲長也。陳君昨考察疏亦佳。區區素知君。後當優處。聞有馬驚。頃想全愈。曾司馬近亦小恙已痊。小魯乃翁訃音至矣。允兒頃歸。一役一馬。皆自行顧情。併未敢令有司知之。

### 答巡撫鄭範溪

辱示虜情。具得其真。今計惟當急圖自治。以觀其釁耳。張憲副之被論。人皆以爲枉。當時言者殆有所承望。彼時公似不宜與之會同。蓋是非之在人心。自有不容枉者。豈可徇人以爲毀譽哉。頃科中復有言者。要當請聖斷行之。

### 答應天按院舒念庭

辱示內廖守備事。已卽達之於內。言公治其違法之人。乃所以相成。而非所以相病也。其意良解。然以僕虛心論之。此輩在今日。比之先年。已爲斂戢。苟不至於太甚。似宜放寬一着。以養其爲善之意。可也。惟高明裁之。

### 答薊遼督方金湖

辱教領悉。近來東虜垂涎於貢市之利。陰與青酋交通。携市於宣府。而明擾遼左以求爲市。故宣府之馬歲增。而遼左之患日甚。職此故也。遼人素稱忠義。可用。然近亦罷敵。非用薊人助之。不能支也。顧薊鎮隔闕三衛。出塞不便。又迫近陵京。防禦爲急。必斥堠嚴明。偵探的實。知賊嚮往。乃可出他道。用奇以制之耳。此意前已屢語薊人。尙未得策。承教當再申做之。聞那吉給台吉俱親至邊。此來想彼亦有意。宜厚遇之。俺酋老矣。黃酋窮蹙無賴。虜中之勢。在此兩人。須常與之氣脉相通。乃可大約虜情。只要渙之。無令得合而已。

### 答鄭範溪

張少參之事。言者明係承望搜求。公爲之昭雪。乃是非之公在人心不容混者。奈銓部固執前說。又追論其平生。此其意不可知矣。僕欲請旨駁議。又思於該部體面大有所損。不得已詭勉從之。然僕心知張君之枉。今雖暫屈。後猶可伸也。公前雖與按院會論。而其語亦自不同。今奉旨再勘。豈得不據實具奏。但求是非之不在。何嫌前後之異詞。

哉。今朝廷之上。功罪賞罰。如鑑之虛。如衡之平。公但自信。此心秉公。任直紛紛之言。不足爲意。况朝廷又自有公論哉。

答遼東巡按沈鶴石

辱示領悉。順義所求。督府已傳鄙意止之矣。虜情不常。宜隨機應之。要當待以至誠。要以盟約。則貢市必可久而不變。安邊制禦之策。無踰於此。書生不達時務。難與言也。外貴院帶管學校。近給有新敕。宜令人領去。以便行事。

答薊遼總督楊疇川

庸將輕率寡謀。損威辱國。死不足惜。但古北口要地。素稱險峻。乃賊至。數十人踰垣而入。肆其侵掠。而守者不知。則置兵設險。俱屬無用矣。且賊初意止於侵盜。原非設伏誘我者。宗儒之出。從者百餘人。使人人致死。未必便爾覆敗。乃從者見賊先奔。遂致主帥陷沒。觀此舉措。將來之事。深屬可憂。轉盼秋防。僕寢不安席矣。今日先絕賊酋。撫賞諭令。縛獻首惡。如處王果。事從容相機而行。急則恐生他患。其守臺守口及棄將先奔軍人。宜以軍法重治。察其尤重者。戮數人以申軍令。薊門數年安靜。人心已懈。天其或者。

借此以示儆乎。若諸公當事者。扭於治安。不加戒備。則其患有不可勝言者矣。且南兵素稱敢戰。今未効一矢之力。見賊先奔。何以解於紛紛之議。惟公熟計之。

答南總憲吳堯山言法律章奏

南臺試職。奉教卽屬銓部覆允。但御史以原官試職。理刑蓋使之習於事。以待用也。近來居是官者。不知本職所在。舍其當務。而漫求他事。以塞責。居數月而考選。實授祇具文耳。一旦奉使觀風。乃不知法律爲何物。而反以吏爲師。祖宗命官責任之意。幾於淪失矣。近奉明旨。修復故事。而御史大夫陳公。卽以實舉行。甚稱上旨。試之日。坐於堂上。面加校閱。舊日易卷代書之弊。悉行釐革。僕取其試卷觀之。一一親批。其所殿最。咸以招擬爲準。不論章奏之通否。蓋章奏、議、論、人、人、能、之。若招、擬、刑、名。則非素究心於此者。不可以虛言飾也。賢哉大夫。可謂霜空之矯翰矣。南北臺諫。原無輕重。今旣新奉明例。似宜一體舉行。且以公之高明峻整。視陳大夫又奚讓焉。

答閩邊邵文川言戰守功闕

承別楮。所評隲一一精當。比者古北口之事。特欲借此以儆惕人心。其實薊鎮屬夷。捉

人要賞。乘間爲盜。自昔已然。昨日監子若不輕身出塞浪追。則亦無此喪敗矣。今四方所報殺官劫庫之事。無歲無之。中土且然。況邊境乎。薊帥昨蒙嚴旨切責。足以示懲。若舉全鎮防守之功。委無所損。數年以來。一矢不驚。內外安堵。此其功寧可誣乎。猶以辟鼠爲上品。山有虎豹。藜藿不採。又不以博噉爲能也。似當以公初擬爲當。若欲爲之委曲除豁。則可云。據近日鴉鶻屬夷之事。雖若防禦少疎。然舉一鎮修守却虜之勞。實於功名未損。以此意措詞。不知可否。惟高明裁之。大抵薊鎮之勢。與他鎮不同。其論功伐。亦當有異。蓋此地原非邊鎮。切近陵寢。故在他鎮以戰爲守。此地以守爲守。在他鎮以能殺賊爲功。而此地以賊不入爲功。其勢居然也。至於調用南兵一節。實出於萬不得已。蓋因往時議者。咸極言延寧邊兵入衛之苦。爲之罷滅四枝。薊鎮分區而守。罷一枝則一區失守。又不可棄地與賊。於是譚總督戚總兵乃建言。昔在浙中部曲尙多。素所練習者。可頂所罷之數。因以教練火器。整理車營。故不得已而用之。今若以爲虛費而無用。卽當罷之。則宜思戍守不可缺人。或仍復入衛邊兵。或於本鎮地方抽撥。不然。陵京重地。寧敢忽視之乎。此中事體。其說甚長。統俟面悉。



答總督楊晴川計處屬夷

辱示失守諸官軍。俱法當其罪。從此人心庶其有儆乎。屬夷原謀。止欲爲盜。庸將喪敗。實其自取。今彼既有畏誅之意。宜自從容處之。但嬖只之說。未可盡信。乃自解之詞耳。今仍宜厚結。嬖只以絕其援。盡革諸夷之賞。以孤其黨。虜貪而無親。他日必自相夷滅。炒蠻亦可縛而致也。若歸罪嬖只。是使之合其黨。以抗我。且啓西虜之釁矣。

答總督張心齋計戰守邊將

辱示虜情俱悉。公所以應之者。誠爲得策矣。今全虜之禍。咸中於遼。連歲彼雖被創。我之士馬。物故亦不少矣。彼既憤恥。必欲一逞。今秋之事。殊爲可虞。昨已屬意本兵。於貴鎮兵食。比他鎮尤當加意。臨期若的知虜賊所嚮。當令葡人助守寧前。使公等得專備東方。如犯寧前。則東西夾擊。再一創之。則彼破膽而不敢東窺矣。公幸時時諭意。李帥大將。貴能勇能怯。見可知。難乃可以建大功。勉之慎之。爲國任事之臣。僕視之如子弟。旣獎率之。又寶愛之。惟恐傷也。惟公垂亮焉。

答山西崔巡撫計納叛招降之策

叛人背華向夷。法當顯戮。以絕禍本。但所示二策。似俱未善。蓋今之虜情。與昔不同。昔未。臣服。故可用計。處今既爲一家。凡事又當待之。以信諭之。以理。向者歛貢曾與之約云。除板升徒衆既多。在虜已久。許令照舊耕牧外。自納貢以後。我不受彼之降虜。彼勿納我之叛人。今彼納叛。非約也。宜令曉事通役。明言索取之。云往年所與王約誓者云何。今聞有某人在彼。其言云云。凡此等人。皆吾中國犯罪當死。及貧困不能自活者。乃逃往彼中。以脫罪乞生耳。其云云者。皆妖言。不足聽也。往嘉靖年間。有蕭芹者。叛入虜中。自言有神術。呪人人輒死。喝城城即崩。俺答信之。令人押之於邊城。試令喝之。而其術無驗。當是時。俺答方就大同乞貢。中朝業已許之。會邊臣以此事聞。世廟惡之。遂不許貢。後蕭芹竟爲邏者所得。梟首邊關。此往事可鑒者也。今彼既與我一家。好惡同之。我之叛人。亦彼所惡。萬一此事聞之朝廷。必以彼王爲背盟約。納叛人。王雖欲輸誠。朝廷亦將不信。則兩家大事從此壞矣。王如曉事。宜將此人及其黨與。執送軍門。朝廷必鑒王之誠。歛和好益堅。賜賚愈厚。何爲納此無用之人。聽其妖妄之說。而壞已成之功。失永久之利哉。彼聞此言。勢必聽從。即彼不從。我常持此以責讓之。使曲在彼。則我

之威信亦無所失。量此么麼。幹得甚事。今板升之人如此輩者。何啻千萬。即索之而不得。亦惡足爲輕重乎。彼雖犬羊。亦不可欺。用術以求之。或未必得。而彼反持此以誑我矣。惟高明裁之。大抵虜情不能保其無變。今中國之人。親父子兄弟相約也。猶不能保其不負。況夷狄乎。在我。兢兢自治。常若待敵。小小變動。勿遂驚惶。勞攘但當耐煩處之。隨幾應之。期令無大失而已。若欲事事完全。人人守法。則是以中國之所不能者而責之。夷狄也。有是理哉。此事似宜與軍門熟計而行。萬惟留意。

與總督方金湖以奕諭處置邊事

近見山西巡按疏。中言邊人叛入虜中者甚衆。宣大巡按有書。言擺腰入市時伏甲於邊外。及黃酋遲延不肯就市。其意蓋謂虜情有變也。不知其中情狀何如。其云云者皆實否。幸惟明示。又得崔巡撫書。言索叛事。似爲未善。僕已復書。令其改圖。不知可否。亦曾聞此事否。今錄回書併崔原書奉覽。以便從事。然會崔母言得見其全。況經一番變動。得一番處置。而其事愈固。往時廟堂無定見。一聞浪語。即爲動搖。譬之低碁。隨敵嚮往。應手卽下。今則不然。吾審勢已定。窺敵觀變。或無事而自補。或棄子以求。先此今日。

之。局。面。也。諸。公。當。事。者。宜。審。計。焉。

答雲南撫院王毅菴

辱華翰領悉。前奉詢滇中積貯。以曾聞之礪菴云云。將謂彼中尙有此數。不意年來遂以解進。今所餘但令所司謹守之。以備緩急。一二年間。調停酌量。內帑漸充。加以北虜納款。邊費少省。僕朝夕所告於上者。諄諄惟以節用愛民爲急。此後搜括之令。或可免下。所以瑣瑣奉問者。惟欲知郡國財賦虛實之數耳。礦金之害。往大理李中溪先生亦曾言之。第以此項專供御用。宮中視爲額辦。未敢輕議停寢。稍俟機會。當有處也。續刻小疏一通奉覽。

答南臺諫

承諭欲以拙稿付梓。昨已致書王少方力止之。蓋此帙雖無造膝密勿之語。而其中亦多未發科抄布者。若梓傳四方。未免掩主德而炫己長。非入告出順之義也。至於求存翁序首云云。猶不敢當。存翁吾師也。翁昔以家國見託。今思昔所許者。尙未能力踐其一二。何敢以案牘糟粕之詞。致辱名筆哉。惟丈俯鑒愚悃。早爲停寢。僕此意發自丹懷。

絕無矯僞。若舍曰欲之而爲之詞。則穿窬之行。丈諒僕必不爲也。

答南列卿張嶠喙

惟公雅望厚蓄。昔被浮誣。今始昭雪。故暫借南寺以廻翔遵養焉。辱華翰遣謝。深以爲媿。前賤日蒙惠。概未敢領。仍宜查之主藏者。

答督府吳環洲

辱翰教領悉。炒蠻者。與西虜嬖只爲婚。昨遂嫁言爲盜者嬖只也。此薊人欲爲解罪之言。昨已責之彼中當事者。言初報爲盜者屬夷也。與西虜無與。朝廷所欲誅者炒蠻耳。此後勿得嫁禍於鄰。然僕料此事必借公力而後能之。公幸使人密說青黃諸酋。勿與惡人爲黨。嚼之以厚利。偵知炒酋所在。或誘之使復歸舊巢。則罪人或得也。已令薊人緩圖。公幸留意。

答山西崔巡撫

水泉之市。不知在何時。聞宣大互市。兩撫院皆親臨彈壓。故得無譁。水泉市日。亦欲煩公一臨。庶無他虞。又京師近緝獲一虜人。初稱黃台吉部下所使爲細者。後審是公昔

年所遣爲廖舉人僕者。及呼廖舉人面認之。良是。但不知公昔年何自得之也。幸具道其實。以便處分。當解送臺下。隨宜安插。若以爲奸細。恐因此遂生釁端也。

答楚按院向明臺

頃以二三大事。借留數月。故未題代。差期當在初冬矣。辱示江陵尹朱正色均差之議。其中綜理。精當詳密。此君初任。人皆以爲刻核。僕獨愛其明健。今觀其所建立。必爲良吏無疑矣。慰甚慰甚。一條編之法。近亦有稱其不便者。然僕以爲行法在人。又貴因地。此法在南方。頗便。旣與民宜。因之可也。但須得良有司行之耳。向所言棍徒艾姓者。後竟不知何以處之。寶慶生員毆死職官事。似宜正法以警刁頑。

答南臺長陳萊峯

海洋失事。非公言。朝廷豈得聞之。人臣之義。以不欺爲本。事有失誤。當具實以聞。至於恩威輕重。則主上明聖。自有裁處。必不有乖於情法之中也。

答總督方金湖

貢市三年論叙。與昨閱視舉劾。並於一時。雖若有防。然閱視以八事爲殿最。貢市以欺

虜爲勤勞。闔視優於要職。貢市遠於卑官。固自並行而不悖。本兵前已題定。自宜循例舉。但已加恩者。或不能過優耳。白帥賄李之說。前敬所已曾告之於僕。但追思當劉國被劾時。僕卽面問本兵譚公。此人若動。孰可以代之。譚卽應曰白可。又云。若論才力。則麻錦爲宜。獨恨其多方營求爲可惡耳。渠倉卒之間。卽以名應。似非有夙諾者。況旣惡麻之營求。又豈肯曲詢於白乎。云云之議。未必非劉麻構之。近來將官彼此相傾。甚於文職。此中隱情。亦宜徐察之也。奸細之事。誠如尊教。近所獲者皆未必眞。已隨宜處之矣。

### 答潘巡撫

寧州之賊。從來已久。事關兩省。宜約會夾剿之。庶可收功。固難以旦夕定也。新除兵憲。恐不足以辦此。銓部謾爾陞授。僕知而使敗之。則無及矣。公試觀之。若果不相應。當速奏調改。又公退居旣久。近來政令。或未盡知。宜查近年旨意。并題准事例。有與撫按相關者。籍記而時閱之。則自無廢格錯謬之虞矣。

### 答河道吳白湖言蠲積逋疏海口

頃獨豁舊逋。乃發自聖心。僕不過仰承之耳。然須得良有司悉心綜理。庶幾主澤得以下究。惟公留神。海口疏通。淮揚之間。歡聲雷動。從此人得平土而居。繫誰之力。與。以此知天下無不可爲之事。人存政舉。非虛語也。比者暫行薄賚。俟立圭旣告之日。仍當有殊錫焉。派磚事。江南撫按諸公。咸以爲難措。而司空又以近日工作浩繁。不肯爲之一處。惟公裁之。

### 答應天巡撫宋陽山

鹽徒執捕。海風覆舟。在往時誠爲常事。若一一責之。該道將領。人將何所措其手足。宜丈有不平之鳴也。但按操使者。見近日屢有嚴旨。惡人欺隱。故一有所聞。卽倉皇奏報。以爲他日脫罪之地。頃王少方有書來。亦言屢勸止之不從。蓋自爲之心重。故不暇爲人謀耳。要之主上睿明。揆度事理。衡鑒明允。其輕重予奪。必不有乖於情法之中。王大參僕欲大用之。何乃以小忿決不就。幸諭安之。

### 答總督楊疇川

賊夷犯順。仗義執言以討之。馘其渠魁。赦其脅從。理之正也。但賊旣畏威遠遁。獸駭鳥



舉。難躡其踪。而揚兵出塞之舉。竊恐薊人亦未能辦也。若賊酋果真心悔罪。執送爲逆頭目一二人。散夷數十人。歸其所掠。則姑宜宥之。徐爲後圖。吳瓌洲示強示弱之言是也。辱問草草。

### 答方金湖

六貢告成。邊圉寧謐。雖朝廷有道。守在四夷。而公經綸之略。安攘之勳。庸可掩乎。敬仰近聞虜酋與察罕搆隙日深。此正吾用奇之日。使之禍結而不可解。則薊遼之間。可以安枕。而西鎮之貢市愈堅矣。宜多方以間之。他日奇功偉績。必爲公所收矣。

### 答閩撫劉凝齋

鳳賊之敗潰。本之皆公謀也。頃部議但據報功之有迹者。覆請行賞。實未足以酌其什一也。然人臣事君。寧使功浮於食。况主上聖明。有功者雖微必錄。雖久不忘。尙當有大畀焉。

### 答遼東巡撫張心齋

連日不聞虜報。彼旣得利於海西。必且歸其所掠。未能復逞。但遼左之事。多在深冬。宜

加意防之。虜性惟論強弱。讐隙一構。報復不已。王台旣被襲。虜讐恨必深。彼素效順中國。父子俱蒙恩賚。其德我也亦厚。宜急以計結之。俾爲外援。則北虜之真情可得。而我之藩籬益固矣。惟公熟計而審圖焉。

## 答吳瓊洲

前辱示邊事。公高見遠識。甚合鄙意。膳房堡事。僕正恐觀風者輒行奏論。致駭聽聞。擬作書止之。不意大疏隨至。而沈君亦遂匆匆參劾將官。蓋渠惟懼以隱匿獲罪。勢難中止。又連及別事則過矣。夫疆場之間。小小破綻。未能全無要之於大計。未損若遇有事。即行處置。一番於大計反爲有益。顧君不察耳。今都邑之間。猶有白晝剽竊劫庫殺官者。况夷狄乎。薊門三衛。服屬二百餘年矣。捉人挾賞。猶不能一一盡詰。乃可責之驕悍。新附之虜乎。要在當事者隨宜處置。譬之於犬搖尾。則投之骨。狂吠。則擊之以箠。旣箠而復服。則復投之。投而復吠。則復擊之。而可與之較。曲直論法守乎。前有書與方公。方答書云。耐煩二字。邊臣宜書。諸紳誠然。昨部覆已明。只如公前議行之。然僕料虜已中餌。決不舍貢市之利。以理責問。必無不從者。

答雲南巡撫何萊山論夷情

道從已抵貴竹。慰甚。所示安酋事。具見高識遠猷。朝廷可道南顧之憂矣。追念安酋庚午之事。本守臣處置失宜所致。及釁端已搆。遂欲調三省之兵。捐數十萬之費以剿之。僕竊以爲非計。乃選用阮沙城巡撫。授以五章之約。阮公幸用吾策。不用一卒。不費斗糧。而黠酋稽顙繫組。納質請罪。此已事之明効也。夫土夷雜種。譬之狐鼠鼯鼯。據險爲固。得其地不可耕也。得其人不可使也。以國初兵力之強。高皇帝之威。豈不能畫野而郡。縣之。勢不可也。其種類忿爭相殺。固其性然。又非可盡以漢法繩也。究觀近年之事。皆起於不才武職貪黷。有司及四方無籍奸徒。竄入其中者。激而構煽之。星星之火。遂成燎原。守土者又不深惟地方長久之計。輕信偏辭。遽爲騰奏。小則構訟。大則用兵。驅無辜之民。置之鋒鏑。以爲夷狄報仇。幸而勝。兵罷財費。將吏冒賞。於國家無秋毫之益。不幸而敗。三軍暴骨。損威傷重。其禍又有不可勝言者。此已事可鑒也。故僕以爲制禦土夷之道。惟在謹修內治。廉察邊吏。毋令貪吏需索。結怨起釁。禁戢四方奸徒。毋令教唆播弄。致生嫌隙。鎮之以威。示之以信。毋以小術欺誘之。但令遵奉約束。不廢貢職。而

已此外不必過求。其中或有爭忿相訟者。兩是而俱存之。概行會勘。亦毋輕爲奏請。待其彼此相戕勝負已決。吾視其理直而爲衆所服者。因而撫之。理曲而爲衆所不悅者。因而除之。卽疆場定矣。何致紛紛勞民動衆。敝內以事外乎。南北夷虜之勢不同。其處之道亦異。管見如此。惟高明擇之。

答陝西學道李翼軒

近見關中錄文甚佳。多超曠之見。知必出於執事之手。爲之擊節者久之。所示西略。一領悉。春首之事。已成夢幻。不足復論。不穀於執事相與深淺。執事心知之。

答吳道南

承示辯揭。殊足發笑。是非混淆。一至於此。南疏必有嗾之。言者不察耳。先是部院訪單。其說尤多。大抵皆忌者之言。故銓部議欲從重。僕再三爲理。乃得量移。然被誣已厚矣。世味人情。不過如此。區區昔與執事有世緣。出世緣。今天下幸而無事。區區且欲解簪。被。從赤松子遊矣。覺與執事世緣已盡。再結出世緣耳。執事肯從我乎。

82

112337

張江陵書牘

(卷下)

# 張江陵書牘卷下

江陵 叔大張居正 著

## 答兩廣凌洋山

羅旁之役。聞已獲功萬餘。計所鹵獲。又當稱是。即有逸伏。諒亦無多。宜乘此勢。多方招徠。開其生路。隨宜處置。務絕後患。則一勞永逸之策也。事定後。稍用狼兵。更番屯守。諸善後事宜。次第以聞。

## 答總憲李漸菴言驛遞條編任怨

近來驛遞。因敝至極。主上赫然思以釐振之。明旨屢飭。不啻三令五申矣。而猶不信。承教謂外而方面。內而部屬以上。凡得遣牌行者。有司不敢不一一應付。若如近旨。但無勸合者。皆不應付。則可盡復祖宗之舊。甦罷困之民。夫有司。官卑。豈敢與大官相抗。所賴以行法。振弊者。全在撫按。耳。撫按官。狃於故常。牽於私意。而責有司。以奉法令。抗大官。勢不能也。朝廷欲法之。行。惟責之。撫按。不責之。有司。異日倘有犯者。或別有所聞。則

抗命之罪。必當有歸。昨決囚之事。可鑒也。條編之法。近旨已盡事理。其中言不便。十之二耳。法當宜。民政以人舉。民苟宜之。何分南北。白令訪其在官。素有善政。故特旨留之。大疏爲之辯雪。殊愜公論。惜公不倡言於朝廷。而獨以私示於僕也。天下至大。非一手一足之力。所能成。唐虞內有百揆。四岳外有十二牧。十亂同心。周業乃昌。僕今不難破家沈族。以殉公家之務。而一時士大夫。乃不爲之分。謗任怨。以圖共濟。亦將奈之何哉。計獨有力。竭而死已矣。以公知已。敢布區區。

李公冀  
君子哉

懋修謹按書語殊允。誹收怪乃先父及禍李公方爲正卿。兼用不隨人誣。誹雪憤而更有救拔之疏。

答河道吳自湖計河漕

高郵湖堤聞甚堅緻。一年之間。淮泗安流。土可作父。公雖不自以爲功。孰得而掩之哉。寶應堤工。便可次第修舉。玄圭告成。當有殊典矣。頃丹陽淺阻。當事諸公。畢智竭力。僅克有濟。懲前慮後。預爲先事之圖可也。昨見撥運陳道長建白。俱切事理。其言黃河故道。不知可復否。望公虛心一商之。如有定策。幸先以見教。今宇內之事。漸已修饒。庶幾小康。惟河漕恒往來於懷。而今之時。肯爲國家任事者絕少。不能不厚望於公也。



答河道潘巡撫

辱示江右金花銀。亦係已徵在官之數。不准抵補。伏奉聖慈特允免追。蓋上之至仁也。

答總憲李漸菴言人臣節儉之義

往者奉書。妄有所獻。誠有激於衷也。比辱華翰。不責其愚。深自引咎。其銳然有爲。確然不回之意。溢於詞表。讀之再三。無任獻仰。夫人不激。烏能有所樹乎。古之以道義相磨切者。義蓋如此。至謂今之財賦。不窘於國用之繁。而虧於士大夫之侈。縱誠膏肓之藥石也。即使國用果繁。爲士大夫亦當分任其咎。蓋以下奉上。臣民之分。而士大夫者。又朝廷所用以治民者也。今乃剗上剗下。以厚自奉。可勝嘆乎。顧積習沉病已久。非痛懲之不能挽也。語曰。得時無怠。裹糧躍馬。猶恐失時。今欲爲國家振久頹之習。建百世之利。茲其時矣。惟高明留意焉。

答閩撫龐惺菴

僕之傾向於左右。自公在臺時已然。此亦公所自知也。中更多故。不獲引置於雲霄。然鄙心未嘗忘。頃以閩臺虛席。乃得遂其夙心。然公困蹟久矣。今不引之康莊。而復頓之

畏途者。良以此中人情多變。借公威望彈而治之。而公因此亦大有所樹植。以塞忌者之口。則由此升、亨、衢。執鼎、鉉。其勢爲易。則僕之所以忠於爲國。而篤於薦賢者之赤心也。至於主持公是。擢抑浮枉。則年來廟堂之舉動。公旣聞之矣。又何慮焉。如有地方事宜。不妨一一垂示。

答織造許樞使

辱翰教。深荷雅情。頃見發下解進段疋等件。俱厚熟密緻。與近年所織。不啻霄壤。而價值乃與市估無異。且官無私弊。民不苦勞。嗟乎。使今之奉使者。俱如執事。則何事不可辦。何功不可成乎。敬仰敬仰。頃得皇上面加獎賞。生亦極力稱薦。執事將來大授之基。已培於此矣。願益堅雅操。以永終譽。

答總憲張嶠陳言用人

頃借公於上谷也。將有難鉅之託也。乃竟不得如願。令人悵恨久之。干霄之材。何患不登明堂。但僕謝事有期。不得托附於梓人。殊可恨耳。大君卹典。已屬所司。如例請允。別楮所薦諸賢。皆一時之俊。處吾夾袋中。寧止朝夕。雖未免各有所短。然堯舜在上。翕受。

敷施。取其所長。皆爲國器。若諸公。能不恃其長。刮磨微類。致其瑩美。則希世之寶矣。辱示敬。并及之。薄奠敬因使者。布之太君仙几。

答總憲葛與川論友道

今之隱退者。皆以通書政府爲嫌。僕竊所不取。夫古之君子。以道相與。出處語默。曾何間焉。況大臣。雖在吠畝。猶懷廊廟之慮。所爲居政府者。非其僚友。則其素相知也。其人賢耶。固當告之以四方幽隱。以贊其廟堂之慮。不賢耶。亦當匡救其闕。而教督其所不逮。俾無致疾於國。於民。斯古之君子所以篤交誼而不忘國家也。自翁歸。政府三奉教言。輒三嘆之。夫翁亦猶行古之道也。但所奉書詞。徒聞溢美。未領切磨。將行古之道。而未盡耶。毋其人之不足以莊語耶。

答翰林王弘齋

往事僕所深知。恨當時未陪國議之末。徒旁睨私憤。爲公竊置一喙。若如今日。則固已滌濯而致之青雲久矣。豈令公抱沉痛於衡門哉。辱華翰。感今追往。益用惋惜。堯舜在上。翁受敷施。期不使鄧林有一材之斷。願公靜以需會焉。

答滇撫王凝菴

六

前承厚賜。卽璧付令弟。以不穀之辱。愛於公。誠不宜例拒。但近年交際久廢。欲借告知厚者。以解於衆人耳。萬惟亮恕。諸所舉行。畧覽一過。鑿鑿皆有益於地方。造福於滇人。不淺。郵刑者。乃勸其說。以市恩。淺之爲夫也。憲綱一書。雖屢經申飭。而臺中竟不遵行。蓋惡其不便於己。幾欲去其籍。公之此刻。亦取忌之一端也。前撫鎮不和之說。蓋彼有懲於山右之事。故爲此先發制人之舉。自彼疏來後。撫鎮並無一言。安在其爲不和耶。此是以知其說之謬悠也。相處無幾。亦善遇之。

答宣大王巡撫言薊邊要務

宣薊唇齒之勢。異時兩鎮視如秦越。虜禍中於薊。則宣人安枕。雖得虜情。不以實告。今移公於宣者。所以爲薊也。撫鎮協和。文武輯睦。邊境之利也。而好事者反以此爲忌。往者南中之謗。未必不自此中啟之。去歲微聞閣視。君亦有此言。今去公於薊者。所以全公也。近日薊臺有缺。每從司道中進。以其習於薊事也。而好事者亦用此爲忌。每言薊中之任。皆取總兵所欲者而用之。昨見公移鎮。輒私語曰。代者必某人也。是總兵所喜

者也。斯言也。不惟不利於總兵。且不利於司道也。故出其不意而遠求於林下之人。乃陳公又僕素所援用者。其人達於事理。不吐不茹。蕭規曹隨。必獲同心之濟。故用陳公。則公雖去猶未去也。僕十餘年來經營薊事。心力俱竭。今一更置間。而其用意之深如此。他人安得知之。恃公至厚。故敢畧陳其概。新本兵雖頗不悅於薊人。然亦非故作異同者。況今大事皆僕面奉宸斷而行。渠安能逞其私意。輒有所更張乎。頃聞外間云云。僕卽以曉之。渠亦深省。恐彼中將吏未達此意。或懷疑懼。願公譬諭之也。近日俺答報土虜東犯。其言不虛。然此時尙熱。或就邊住牧。窺吾之隙。宜慎防之。人嘗笑南兵無用。徒糜厚餉。今若乘其入犯。一戰而勝。則羣喙自息。而虜亦寢謀。去歲曾屬戚總理以援遼之策。乃渠所以復於我者。其計甚迂。殊失鄙望。今虜若窺薊。則患在頭目。又非若於隣之震矣。願公以義激之。使僕藉手以告於上。且以杜讒謗之口。此機不可失也。

答徐太室言釋怨爲公

別楮領悉。但舊僚之疑。似猶未釋。僕非姑與解脫也。今春南說之興。其所由來。實與舊僚無干。僕平生遊於宦途。但願人解怨。不願人結怨。況本無怨之可釋乎。願公之自信。

而薄責於人也。沙市城議恐勞費難成。幸姑已之。

答薊遼總督

賊至數萬。則其患不在遼而在薊。蓋虜每入寇。亦必費本。遼左荒鹵。人畜蕭疎。羣數萬之衆。駐荒陋之墟。掠野則得不償失。攻城則非其所長。況當暑雨之辰。馬疲弓解。馳騁復難。虜之入犯。求鹵獲耳。以若所爲。求若所欲。雖至愚。其必不出於此矣。近來每於暑月。輒報十萬二十萬。旬日之間。復言出境。遼之守兵不過萬。賊若至二十萬。則各處墩堡。皆可踏平。彼復何畏而歛衆以退乎。凡此不達事理之言。僕所未解也。遼左數年。雖頗有獲。損失亦多。薊門十年以來。一矢不驚。軍民安堵。較其績效。孰少孰多。而論者於此。則百計摧抑之。於彼則多方掩護之。昨該鎮巡接遇虜。僅以身免。若令薊門有此事。則內外不知有多少劾疏矣。而彼中方盛張功伐。以掩其事。巡按亦破膽結舌。而不一言。如此。尙爲有公道乎。昨令本兵從公議行賞罰。以服人心之旨。蓋爲此也。遼薊皆公所轄。何親何疏。朝廷視之。亦何輕何重。但賞罰功罪。須至公。至平。人心乃服。人心服而後。可責其用命也。辱公至厚。故敢直披其愚。亦勿令薊門將士知之。恐生譎悍也。本兵

新任。頗惑於昔年南兵坐食之言。傳聞洶洶。遂謂將有所更置。僕知而譬曉之。彼乃深省。近來帖然無異。公與薊門將帥。但一一務實。修守以爲戰備。一切浮費繁文。悉從簡革。臺上戍卒。無事不許擅離尺寸。但能拒賊不入。卽爲大功。不必有所斬獲。紛紛之議。僕自爲之主。持無事疑慮。若空言無實。一旦僨事。則國法森嚴。區區亦不能終庇之。岳君已屬之銓部。如擬陞用。

答甘肅巡撫侯掖川計套虜

套虜當未納款時。不知曾往來內地否。若先曾往來。而今款順。反禁其往來。恐彼未肯服也。夷虜彼此。侵盜乃其常態。今彼雖款順。亦但能約其無爲邊患而已。若令縛其手足。不令西搶。恐彼亦未肯服也。順則撫之。逆則絕之。在各鎮自有機宜。不相牽制。昨宣府小酋作孽。已卽絕其貢賞。欲出師問罪。彼酋懼而罰治請贖。然後賞之。照舊許貢。此在宜大且然。況他鎮乎。今後彼若往來經由。邊臣卽宜收斂城守。使人問故。彼若以西搶爲詞。則與之約令速行。毋得戀住。恐傳聞不的。朝廷知之。以爲汝有他意。致壞貢市大事。彼若順從。則少加犒賞以懷之。若不聽約束。故行戀住。則申明盟約以驅之。驅之

不從。或又侵犯。則調兵以擣之。諒彼往來不過一二枝。衆亦不過數千。未必各部皆如是也。順者撫。逆者剿。逆而又順。則又撫之。順而又逆。則又剿之。臨機觀變。何常之有。至於虜衆經過。或小有侵擾。此雖內地官軍。猶不能一一遵守紀律。况夷性乎。且前已陪賞。不必過求矣。本兵前覆邢道長疏。言之已盡。頃大疏不過以邢有疏。恐他日責以不言耳。然部覆備矣。辱垂問。政布區區。

### 答滇撫何萊山

安氏事如公所措畫。彼必遵奉安插。未了之案可完結矣。得先後華翰。所論夷情。每與曾司馬深加嘆服。公之忠於任事。敏於剴割。僕所素知。然不謂其詳重停妥如此也。雖有吳干。必試而後知其利。信哉。望益懋勳庸。以需大受。

### 答少宰楊二山言條編

條編之法。有極言其便者。有極言其不便者。有言利害半者。僕思。政以人舉。法貴宜。民執此例。彼俱非。通論。故近擬旨。云。果宜於此。任從其便。如有不便。不必強行。朝廷之意。但欲愛養元元。使之省便耳。未嘗爲一切之政。以困民也。若如公言。徒利於士大夫。而



害於小民。是豈上所恤。下厚民者乎。公既灼知其不便。自宜告於撫按當事者。遵奉近旨罷之。若僕之於天下事。則不敢有一毫成心。可否興革。一順天下之公而已。

### 答河道吳自湖

高郵堤工。聞已告成。乃久未完報者。想以大工甫就。新水暴漲。慮有變態。欲俟其堅定。乃完報耳。但聞興泰之間。河塘潰決。復成巨浸。未審何以拯之。河流既自復故道。當無俟開濬。承教挽淮入河之策。甚善。考其信地。雖多屬河道衙門。然公欲爲國家萬年之計。救淮揚目前之急。想當視爲一家。同心共濟也。議定。幸卽疏聞。此旣關係來歲漕計。自不容不預圖也。年來方內乂安。庶幾小康。獨河漕一事。時往來於懷。而當事諸公。亦旣殫厥心力矣。乃竟不獲底於平成。豈所謂可能者人。不可能者天耶。奈河寶應湖工。亦宜次第修舉。

又

他人一聞行取之報。恨不能卽日釋去重負。而李君乃自願留任。以就湖工。其志量忠慮。不啻加人一等矣。卽如教屬銓部。暫留在任。不妨他日續選。且前題奉欽依。賢能有

司。在任年久。遇行取之日。超等選授。科即授左右給事中。道卽免其試職。徑與實授。此子果著有成績。當破格處之。以酬其勞。便中。或可諭以此意。俾得安意供事也。

### 答石麓李相公

去歲或傳云。老伯已捐館舍。然久之不見有請恩疏。心竊疑之。坐是久缺吊唁。歎甚。茲辱示大疏。卽屬所司覆允。視彝典有加焉。蓋上之篤念舊老。而推本所自如此。弟於是乃敢以生芻薄奠。因歸使而布之。仙几承以老伯隧碑見委。弟雖不文。素辱同氣之愛。敢不敬承。但嘉貺非所敢當。輒以璧諸使者。拙作俟秋冬間呈上也。近聞中玄疾甚。已成痿痺。可嘆。明年主上大婚。弟將告老矣。而翁又抱此大戚。宇宙茫茫。相見無日。感今悲昔。愴然爲懷。奈何奈何。

### 答總督張心齋

遼東素被虜患。公在兵間。勞苦久矣。僕無一日不往來於懷。欲少休驥足。顧未有間也。不敢忘。不敢忘。虜之欣艷貢市。其情近眞。但爲國家長慮。未可許之。公所以應之者。甚爲得策。然今虜禍方中於遼。遼以一鎮當全虜之勢。兵疲力寡。不可不亟爲之慮也。公

有良策。不妨披吐以聞。當別有指揮。

與張心齋計不許東虜款貢

西虜掩答之求貢。自嘉靖十六七年始矣。我畏之而不敢許。然當其時。廟堂失策。制禦乖方。雖許之固未如今日之款順也。比以那吉來降。歸之以禮。彼遂感恩慕義。執我叛人。復申前款。我乃因而許之。蓋機緣湊合。名義正大。故當時紛紛之議。皆以爲不可許。僕獨以爲可。皆以盟約爲不久。僕獨保其無他。蓋度彼旣感吾放寬之恩。而又適愜其平生之願。芳餌入口。不能自脫。夫事美成在久。惡成不及改。今東虜之於我。非有平生懇款之素也。非有那吉納降之事也。非有執叛謝過之誠也。侵盜我內地。虔劉我人民。其迫脅無禮如此。堂堂天朝。何畏於彼。而曲徇之乎。且西虜以求之懇。而後得之。故每自挾以爲重。今若輕許於東。則彼亦將忽而狎視之。他日且別有請乞。以厚要於我。啓釁渝盟。必自此始。是威褻於東。而惠竭於西也。故在今日。宜且故難之。以深釣其欲。而益堅西虜之心。異日者。東虜之敢大舉深入。以西虜爲之助也。今東虜有求而不獲。則西虜以我之重之也。亦挾厚賞。以自重。必不從東虜矣。虜不得西虜之助。則嫌隙愈搆。

而其勢愈孤。而吾以全力制之。縱彼侵盜。必不能爲大患。是我一舉而樹德於西。耀威於東。計無便於此者矣。昔人云。自非聖人。外寧必有內憂。今主上冲年。國家幸而無事。宴安鳩毒。將發於不虞。盍姑釋此。以爲外懼乎。僕懷此意。未敢語人。茲因詢及。敢略陳其概。雖然。遼人病矣。語曰。頭痛治頭。足痛治足。今虜禍方中於遼。遼以一鎮當全虜之勢。病在足之時矣。不急治之。且將爲一身憂。遼人素稱忠勇。但苦兵寡耳。然欲足兵。必先足食。兵食旣足。乃可言戰。一戰而勝。則東虜之氣挫。而西虜之好益堅。此數世之利也。願公熟慮之。

#### 答總憲董嵩河

僕生平所推轂保護天下賢士甚衆。然皆不令人知。昨所聞於左右者。非市德也。蓋欲公知天下公論未嘗盡泯。而益堅任事之心也。乃辱華翰。深用爲媿。關山議設專官事。已屬所司覆行矣。

#### 答河道吳自湖計分淮導河策

前奉華翰。報高郵工完。時已微聞維揚水患。不減去歲矣。夏已如此。秋當何如。今但保

高郵堤工不壞。猶足捍禦。灰石初合。卽經衝嚙。豈得無損。惟隨宜補葺。九堅一瑕。固不害爲成功也。聞縉紳之言。河旣從故道入海。淮又合於江。淮河分北而行。於地方亦甚便利。所可慮者。天妃以北。中間五六十里淺澗。有妨於運道。且鄙意謂。挽淮。逆上。其勢爲難。而上陽高寶之間。所不足者。非水也。若就淺處。別疏一道。或引水建閘。以爲運。艘由淮達河之路。而縱淮入江。以復乎孟氏之言。比之挽淮。爲力似易。其河。流自由。故道入海。宜因其勢。而益導之。使河。淮。永不相合。則淮安。從此可免昏墊。而於運道。亦無所妨。但僕自來。未經此地。不悉其曲折。獨以意度如此。謾呈以備採擇。黃僉憲告病。以楊二守代之。俱如尊諭。屬所司覆行。但黃昔以才望薦用。今未見成績。輒以病去。不能無托避之嫌。今旣以楊代。須委任責成。只使後人效之也。人臣旣已委職。受寄。宜思分義。所當盡者。若見可而進。知難而退。國家何賴焉。

答憲長周友山言弭盜非全在不欲

辱華翰。佳布之惠。深荷雅情。且諭憲從卽駐寧州。因以彈壓姦宄。拊綏善良。甚休甚休。蓋聞聖王殺以止殺。刑期無刑。不聞縱釋。有罪以爲仁也。苟子之不欲。雖賞之不竊。此

孔子箴病之言。是時魯失其政。寵賂滋彰。故言此以警之。若謂徒不欲可以弭之。無是理也。夫人之可以縱情恣意。有所欲而無不得者。莫踰於爲盜。而秉耒持鋤。力田疾作。束縛以禮法。世之所至苦也。安於其所。至苦無所懼。而自不爲非者。惟夷由。曾史爲然。今不曰吾嚴刑明法之可以制欲。禁奸也。而徒以不欲率之。使民皆釋其所樂而從其所。至苦。是天。下皆由夷。曾史而後可也。舜不欲之君也。皋陶不欲之相也。蠻夷猾夏。竊賊姦宄。猶不能無明刑作士以威之。況其餘乎。異日者。有司之不敢捕盜也。以盜獲而未必誅也。不誅則彼且剽刃於上。以毒其讐而合其黨。故盜賊愈多。犯者愈衆。今則不然。明天子振提綱維於上。而執政者持直墨而彈之。法在必行。姦無所赦。論者乃不惟舜臯之所以致理者。而獨用懦者姑息之說。衰季苟且之政。以撓之。其母乃達明詔而詭國法乎。執事當弭盜之任。而華翰所云。又似不徇俗以爲是非者。故敢畧陳區區。惟高明裁擇焉。

與藩伯曾陽栢

不穀猥以菲薄。謬膺重任。日夕惴惴焉。惟顛隕是虞。今賴天之靈。祖宗之佑。目前景象。

庶幾小康。實主上聖明。國家之福也。不穀何功之有焉。頃辱華翰。獎許過情。援引經義。證以古哲。皆非謬劣所能當也。愧謝。確菴高明沉毅。秀雅而文。他日必爲國家柱石。不穀於國。無所裨補。惟思推轂英儔。以共襄王事。然追念生平所拔舉。可託之久。要如確菴者。一人而已。旣以自慶。亦以爲公慶。豚兒寡學。濫竊科名。遠辱遣賀。兼拜珍貺。感戴莫喻。茲因鱗便。用布積懷。別具侑柬。統惟鑒存。

答樞使張容齋

別後各撫按諸君。咸有書來言。台從所經。禁止餽遺。節省供應。雖交際常禮。一切謝却。蓋縉紳大夫仰翁之賢。固非一日。乃今所見。又過於所聞。宜其稱揚頌說之不已也。慰仰慰仰。二南素被王化。而翁又悉心簡求。他日必有膺椒塗之選者。大疏至。即屬所司。整備奉送矣。人去草草附候。

答薊鎮巡撫楊晴川

辱示援遼之議。前說爲長。幸留意審畫。以俟一舉。但聞大議亦已質之本兵。本兵遂列之防秋疏中。以未定之說。爲廟授之算。殊可笑也。且此舉。本欲出奇制勝。以圖非常之。

功。非可歲歲徵調。以自疲其力也。用奇之道。疾如脫兔。若歲以爲常。又舉一鎮之人。儻前。那後接踵而移。此漕舟挨幫之規。非兵家握奇之算也。

答福建巡按商燕陽

劉凝齋以任事致謗。公論不平。非執事乘虛公行直道。孰肯爲之極力昭雪乎。非獨劉一人之感。將以持是非之衡。而作任事之氣。其有裨於世道不淺也。慰仰慰仰。

答河漕傅后川

河漕意見不同。此中亦聞之。竊謂河漕如左右手。當同心協力。以期共濟。如所見必不能合。亦宜各陳。以俟宸斷。不宜默默而已。國之大事。不妨公議。事君無隱。豈爲失忠厚之道耶。

答總憲陳我度

昔借公於蘇松。實出鄙意。乃執政者謂公有私於雲間也。遂有按劍之疑。是時讒慝盈朝。僕雖深知其枉。弗能救也。然於是恒以爲歉。茲幸英主御極。大明當空。振幽啓順。以興太平之治。僕乃敢以公進。然不徑登之廊廟而置之節鎮者。則以薊門要地。暫借重



望。以輯陸文武。計寧邊圉。共襄安攘之業耳。簡命渙頒。輿情胥慶。比聞旌節已至。尤慰鄙懷。

答應天巡撫胡雅齋言嚴治爲善愛

辱華翰及別楮。捧讀數過。不勝流慰。不勝敬仰。蓋吳中財賦之區。一向苦於賦役不均。豪右撓法。致使官民兩困。僕甚患之。往屬陽山公稍爲經理。而人心玩愒日久。一旦驟繩以法。人遂不堪。謗議四起。然僕終不爲動。任之愈力。今觀公所措畫。不吐不茹。式和厥中。積歲恃頑強梗。咸頽首祇奉約束。蓋至是吳人始知有法。而陽山公之經理於始者。賴卒成之矣。雖然。此吳人之福。而彼不知也。夫富者。怨之。府利者。禍之。胎而人所以能守其富。而衆莫之敢攘者。恃有朝廷之法。故耳。彼不以法自檢。乃怙其富勢。而放利以歛怨。則人亦將不畏公法。而挾怨以逞忿。是人也。在治世。則王法之所不宥。在亂世。則大盜之所先窺。烏能長有其富乎。今能奉公守法。出其百一之蓄。以完積年之逋。使追呼之吏。足絕於門巷。馴良之稱。見旌於官府。由是秉禮以持其勢。循法以守其富。雖有金粟如山。莫之敢窺。終身乘堅策肥。澤流苗裔。其爲利也。不亦厚乎。故僕以爲此吳

人之福。而彼不知也。夫嬰兒不剃首則腹痛。不搨瘞則寢疾。而慈母之於愛子。必剃且搨之者。忍於其所小苦。而成其所大快也。僕竊以彼中於執法之吏。當尸而祝之。而又何謗議爲哉。況今明主在上。是非審覈。即有流謗。適足以速禍而自斃耳。何能爲。何能爲。願公益堅初志。以永膚功。

### 答向臺長

近得家信。言執事有餽於寒舍甚厚。舍弟輩以夙有省戒。不敢承領。已即返諸來使。竊計執事榮代。不審趙璧之果完否也。唯幸查照。前屢承嘉惠。俱未敢當。不圖執事之終不見諒也。

### 答河道巡撫

孟瀆既開。練湖亦有次第。甚慰懸切。但聞下圖田庄俱已查革。而道墩一區。歸然獨存。人以爲法未盡行也。吳歛相闕。本部議欠妥當。時僕曾諭司徒。以此事經二百年。雖少偏累。而相沿已久。無可奈何。一旦更之。恐衆不服。而渠固求允議。今果有此。實自貽之憾。然關係地方大故。或至猖披。後難收拾。幸公責該道有司。委曲善處。消患於未萌可

也。奏對拙稿。隨時私刻。留傳後人耳。而偶以一冊寄之陽仙。不意渠遂鋟梓。今望公勿多傳。蓋其中密勿造膝之語。雖不盡載。而諸所論建。亦有留中不發者。顯以示人。非入告出順之義也。幸惟裁亮。

### 答宋陽山

徽州絲絹事。明旨處分已盡。撫按諸君奉而行之可也。此事雖由殷石汀議處欠當。然既奉欽依。則令由上出。乃不行申訴。輒糾衆鼓譟。是抗王法也。此而不懲。則海內效尤。漸不可長。當事者。動以激變爲言。挾衆勢。以脅朝廷。非所以佐天子。振紀綱。而齊海內也。且以北虜之強。南夷之獷。朝廷折箠而制之。皆反首繫頸。繫致闕下。彼素稱衣冠文物之區。渠敢反乎。有以待之。不足畏也。

### 答吳總憲

李總戎以死勤事。殊爲可憫。代者王君。以其久於粵西故用之。頃得家信。言公有餽於寒舍甚厚。舍弟輩以夙有省戒不敢領。卽以璧諸來使。謹以原帖納上。幸惟查照。往者屢辭嘉命。未蒙見諒。後若再及。不敢不以上聞。恐彼此俱弗便也。

## 答楚學道金省吾論學政

學翰示知道從已入楚。欣慰。楚中士習久敝。頃公一振之。士稍稍向方。然其志未定也。仗公之重。再加振飾。庶幾丕變。至注厝所宜。不外乎華翰遵敕諭三字而已。夫以孔子之聖。平生所志。惟在東周。生今反古。深用爲戒。老不得行其道。猶修春秋以存周典。此豈以周之法獨善於前代哉。蓋爲下之禮宜爾也。今世俗皆曰願學孔子。乃不務遵祖宗之典。以服官寡過。而好言上古久遠之事。以異趨爲高。動循衰世苟且之政。以徇情賈譽。此豈聖人所謂爲下不倍哉。惡在其爲遵孔氏也。不穀素無學術。謬膺重任。思所以鼓驚鈍。佐明主者。惟日取我祖宗之法。度修明之。然十猶未二三也。竊以爲今之教士。與士之爲學。皆如不穀之所以事上致理者。而後有得於遵孔之義。不識高明以爲何如。

## 答閩撫龐惺菴

辱華翰領悉。大疏俱屬所司。一一議覆。軍餉既有剩餘。如擬蠲負。以寬民力。然非前人任怨催併。則公庾安得贏餘。舊逋安得蠲免。諸葛孔明云。法行而後知恩。正此之謂。今

人不達於治理。動以姑息。疎縱爲德。及權於辟。然後從而罪之。是罔民也。僕秉政之初。人亦有以爲嚴急少恩者。然今數年之間。吏斤斤奉法循職。庶務修舉。賢者得以効其功。能不肖者亦免於罪戾。不蹈刑辟。其所成就者。幾何。安全者。幾何。故曰小仁大仁之賊也。子產鑄刑書。制田里。政尙威猛。而孔子稱之曰惠人也。然則聖賢之意。斷可識矣。以公之高明深識治體者。敢質此請教。錢法原以足民。非爲興利。然足國之道。亦不外此。蓋世間銀少銅多。公私之費。皆取足於銀。故常患不足。今化銅爲寶。則民用益饒。民用既饒。則上供易辦。故足民亦所以足國也。閩中錢法通利。此地方阜安之兆。可喜。幸公因其勢而導之。

答戶部王疎菴

僕平生無他行能。獨好推轂天下賢者。自在詞林。迨入政府。其所保護引拔。寧止數千百人。然以爲國非爲私也。乃僕以誠心求賢。而人不以誠心相與。若乃披肝膽。見情懷。一心奉公。不引嫌。不避怨。與吾共圖國家之事者。如公亦不多見。向以求歸懇切。不得已。暫遂高懷。別後惘然。如有所失。比聞太君康壽。道體安和。宿恙全愈。當此清明之會。

忍遂忘情於斯世乎。倘番然回轍。當虛一席以俟。豚犬寡學。濫竊科名。猥辱遺賈。彌用爲愧。厚貺概不敢當。輒附使歸璧。草草附謝。

答守備太監王函齋

辱華翰。知道從已入郢。欣慰。書中謂蒞事之初。未遑施措。惟有兢業。只此兢業二字。便是施爲之本。堯舜之所爲。聖者亦不外此。幸勉圖力踐。他日入筭內樞。建立駿業。垂名青史。可預卜矣。敬仰敬仰。門下未及下車。輒煩遣使存問老親。念此雅情。惟有銘感。此後但俯垂存念。即是惠及蓬廬。不煩惠禮。致累清德也。

答薊遼總督方金湖言俺酋西行不利

北虜貢議。公實始之。蓋八年於茲。而夷情愈順。邊鄙用寧。公今入朝。又克終其事矣。凡此大功。固宜銘之太常。垂之青史。豈特一時賴之而已乎。虜酋西行既決。難以挽留。邊人咸恐此酋既去。來年貢市。或不如初。不知虜人嗜利。觀其會三鎮之人。與之盟誓而去。彼蓋猶恐吾之有變。肯自渝負。以失大利乎。要在邊臣善加撫馭。毋自失信。以起釁可也。但僕料老酋此去。必不利。渠本無去意。但爲切盡所迫。黽勉從之。諸部亦不樂行。

衆心不齊。戰必不力。一也。自欺。貢以來。參糜於中國之服食。志驕氣惰。不足以當瓦刺。新銳之虜。二也。南畏中國。東畏土蠻。牽制內顧。勢力自分。三也。三者皆兵家所忌。故曰。必敗之道也。公試觀之。

### 答河道吳自湖

辱翰示。知淮已歸流。水勢漸退。慰甚。河患自古記之。有非人力所能勝者。但僕今謬當大任。一聞愁嘆哀號之聲。痛心疾首。雖智力短淺。濟時無策。然不忍坐視民之失所。而不思以振救之也。淮水既已會河。則導江之說。無煩再議。高郵堤加以木城。眞萬全之策。寶堤旣難舉。李尹留之無所事事。咨部赴選可也。

### 答巡撫高鳳翥

兩辱翰示。具悉同心之雅。感謝。前奉書謂宜止虜酋之西伐。猶未知彼有約三鎮訂盟之舉也。後見金湖疏。謂彼西行已決。僕亦以爲不可止矣。今觀答公書。則其意尙狐疑。僕前書所料固不謬也。然此酋不去則已。去則必敗。彼旣年老志偷。而其衆皆不欲行。又參糜於我之服食已久。無復曩時之颯疾。以驕惰不習之兵。當瓦刺新銳之虜。其勢

固不敵也。且南畏中國。東畏察罕。力分而勢渙。強行而衆疑。故曰必敗也。今既以書勸止之。已見公相爲之意。此後但宜任其去留。不必固止。彼去吾亦利。不去吾亦利也。

答四川總兵劉草塘

辱華翰。深荷雅情。厚惠概不敢當。輒璧諸使者。不穀素以薦賢爲心。又見近日武氣不振。故每作曲爲保護獎率。然以爲國。非以市德於左右也。頃向確菴公一言之。渠必以告。統惟鑒存。

答兩廣凌洋山計羅菊善後

羅菊之役。初意但恐宿寇初除。根株未盡。姑少遲建設。以俟人心之定。會新司馬亦以此爲言。遂從再議。近來彼中人來。皆言此地。在四府之中。素稱沃壤。與廣右邊徼不同。且遠近之民。願受塵者衆。不設官建治。何以統之。以是知再議之爲迂謬也。今既經理有緒。竚俟大疏至。即屬銓部選除矣。但聞願附籍者多係遠縣之民。其中或有來歷不明。流浪無根。或賊黨詭名僞姓。若但務招徠。不加審別。蘭棘並植。狼羊同飼。將復爲昔日之羅菊矣。竊以四府隣近之人。亦自有就招者。彼風土既習。版籍有據。環數百里之



內封壤相接。遷徙無難。且彼素被賊患。茹苦日久。今界之以沃土。與之以安樂。亦所以償之也。其中徭賦務從輕省。法令不宜煩苛。使人懷定居。遠邇爭赴。數年之後。可盡化爲樂國矣。夫戡亂非難。已亂爲難。當此重門再闢之時。即宜爲長治久安之計。惟高明擇焉。

答滇撫王凝齋

向奉書云云。恃在世講至愛。故敢直獻其愚。猥辱採納。地方之幸也。莽酋事昨羅大參來。問之。皆如察院言。且謂此酋有兵百萬。戰象萬餘。西南諸夷。盡爲所并。交趾亦半屬之。將來必爲滇人憂。其言不知何所據也。大抵修內治。飭武備。雖邊圉無虞。亦不可懈。豈視外夷強弱。以爲緩急乎。自今該道兵憲及州縣正官。宜慎選其人。俾加意整飭。使遠至邇安。則有備無患之道也。

答司寇王西石

張尹至。辱翰貺。深荷雅情。豚兒寡學。謬竊科名。其躋登上第。則出主上親拔。非僕庶幾所敢望也。茲辱獎諭。彌增其媿。老父頃患甚劇。今雖暫愈。然聞動履尙屬艱難。桑榆暮

景風燭可虞。顯擬主上大婚後。乃敢乞身。今定婚期於來歲三月。則陳情之舉。當在夏初矣。遙望此期。以日爲歲。奈何。太君之壽祉茂臻。我公朝夕歡養。誠人間希覯之事。其視僕等。媿歎無地矣。簡兒叨授一職。遣歸完娶。賢郎歸。已託致鄙悰。老母高年。內人又不知禮節。倘有不備。惟冀垂念夙雅。俯賜矜涵。非所望也。敢布腹心。

答藩伯張周田

惟公雅度宏才。昔在銓部。僕已切傾嚮。中罹排陷。至於垂翼。又竊爲惋惜。今當清明之會。羣才畢集。闈笥昭蘇。驂驪屬路。從此皆康莊矣。願懋建鴻鉅。以副所期。

答南司成屠平石論爲學

成均任重。宜借高賢。簡命渙頒。輿情胥慶。在僕素心。喜可知矣。雖然。亦有區區之愚。不敢不以告也。往聞公好譚理學。雅稱同志。意必實有所得。非空言者。顧僕奉教之日淺。未能仰窺精蘊。獨見公之督學浙中。秉公執憲。屹然不搖。則誠務躬行。不事空談者。故今日之舉。亦願公以浙事行之也。夫昔之爲同志者。僕亦嘗周旋其間。聽其議論矣。然窺其微處。則皆以聚黨買譽。行徑捷舉。所稱道德之說。虛而無當。莊子所謂其隘言者。

若哇。佛氏所謂蝦蟇禪耳。而其徒侶衆盛。異趨爲事。大者搖撼朝廷。爽亂名實。小者匿蔽醜穢。趨利逃名。嘉隆之間。深被其禍。今猶未殄。此主持世教者所深憂也。記曰。凡學官先事。士先志。士君子未遇時。則相與講明所以修己治人者。以需他日之用。及其服官有事。即以其事爲學。兢兢然求所以稱職免咎者。以共上之命。未有舍其本事。而別開一門以爲學者也。孔子周行不遇。不得所謂事與職者而行之。故與七十子之徒。切磋講究。其持論立言。亦各隨根器。循循善誘。固未嘗專揭一語。如近時所謂話頭者。概施之也。告魯哀公曰。政在節財。齊景公曰。君臣父子。在衛曰。正名。在楚曰。近悅遠來。亦未嘗獨揭一語。不度其勢之所宜者而強聒之也。究觀其經綸大畧。則惟憲章文武。志服東周。以生今反古爲戒。以爲下不倍爲準。老不行其道。猶取魯史以存周禮。故曰。志在春秋。其志何志也。志在從周而已。春秋所載。皆周官之典也。夫孔子殷人也。豈不欲行殷禮哉。周官之法。豈盡度越前代而不可易者哉。生周之世。爲周之臣。不敢倍也。假令孔子生今之時。爲國子司成。則必遵奉我聖祖學規以教胄。而不敢失墜。爲提學憲臣。則必遵奉皇上敕諭以造士。而不敢失墜。必不舍其本業。而別開一門。以自蹈於。

反。古。之。罪。也。今。世。談。學。者。皆。言。遵。孔。氏。乃。不。務。孔。氏。之。所。以。治。世。立。教。者。而。甘。蹈。於。反。古。之。罪。是。尙。謂。能。學。孔。矣。乎。明。興。二。百。餘。年。名。卿。碩。輔。勳。業。烜。赫。者。大。抵。皆。直。躬。勁。節。寡。言。慎。行。奉。公。守。法。之。人。而。講。學。者。每。詆。之。曰。彼。雖。有。建。立。然。不。知。學。皆。氣。質。用。事。耳。而。近。時。所。謂。知。學。爲。世。所。宗。仰。者。考。其。所。樹。立。又。遠。出。於。所。詆。之。下。將。令。後。生。小。子。何。所。師。法。耶。此。僕。所。未。解。也。僕。願。今。之。學。者。以。足。踏。實。地。爲。功。以。崇。尙。本。質。爲。行。以。遵。守。成。憲。爲。準。以。誠。心。順。上。爲。忠。免。魚。未。獲。無。舍。筌。蹄。家。當。未。完。毋。撤。藩。衛。毋。以。前。輩。爲。不。足。學。而。輕。事。詆。毀。毋。相。與。造。爲。虛。談。逞。其。胸。臆。以。撓。上。之。法。也。嗟。乎。斯。言。也。使。出。於。他。人。則。以。爲。謗。而。僕。固。素。有。志。於。學。者。也。其。所。以。言。此。必。有。慨。於。中。者。惟。高。明。裁。之。

## 答邊鎮巡撫

虜衆既敗於西。復挫於東。自此以後。奉約東當益謹。邊患可少紓矣。但在我猶當堅守恩信。益務以德懷之。蓋此虜雖弱。既已附屬。猶足爲我外藩。若使互刺生虜。得志非中國之利也。其所定約法。至爲簡當。彼即不果西行。亦可循而勿改。今邊鎮所急。惟在廣積貯。與屯利。畜壯勇。休士力。以待他日之變。其他皆虛文耳。惟公加意焉。

答總憲高鳳翥

不孝積愆累覺。遭此閔凶。疊辱吊唁。不勝哀感。比者屢瀝血誠。懇乞終制。不蒙俞允。更荷踰分之恩。在主上雖自爲國家計。而於孤之微情則有歉矣。嬰茲窮苦。無可奈何。乃有辭俸守制。預訂歸葬之請。誠不得已也。乃二三少年。不達皇上所以懇切勉留之意。又不白孤所以委曲順命之心。妄行瀆擾。遂致上干天怒。赫然震撼。傷動聖心。虧損國體。此又孤不幸中之大不幸也。傷痛之餘。加以震懼。形神俱瘁。病勢轉增。奈何奈何。辱示錢法並邊務諸款。雖未得細讀。然畧觀其措畫。皆經綸大着數也。幸即疏聞。即時整理。乃爲有濟。

答太宰王疎菴

前兵部差人去。孤方在苦塊間。荒迷未及奉書。想垂原亮。銓衡重任。非公不足以當之。此時孤方乞歸。然不敢以去國之故。而忘謀國之心。故敢以公進。然公之忠亮。實素簡於上心。故疏上卽荷俞允。非俟孤言以爲用舍也。簡命渙頒。輿情胥服。方翹首跂足。以望公之至。願遣發征屨。以慰鄙望。

## 答藩伯楊魏村

辱垂念年誼。吊唁勤惓。無任哀感。承諸年丈欲俯臨貺奠。極荷至情。但孤自召見視事之後。卽閉門守制。更不敢於私宅接賓受吊。四方相知奠儀。一切謝却。雖諸年丈辱在世誼。與衆不同。然亦不敢當也。謹錄奠章佳稿先寄回。宣之先人。樞側冥漠。有知必深。脚感。厚奠則再不煩貺及。便中草草附謝。仍希叱名於諸年丈。統容來歲南歸。一一踵謝。唯鑒原。

## 答河道吳自湖

孤自遭閔凶。兩辱感唁。無任哀感。厚奠概不敢當。謹璧諸使者。謝謝。維楊蠲賑事。大疏未至。已屬計曹題請。茲又取疏中未盡者。屬之再題矣。夫天道玄遠。災祥之應。皆未可知。孤嘗學此於天官氏矣。考其占驗。咸屬茫昧。民之飢溺。自當拯援。雖微星變。寧忍坐視。古之聖王。遇災而警。惟修人事。鎮靜以處之。不宜牽合事應。過爲驚惶。以致搖衆也。

## 答甘肅巡撫侯掖川

惟公任西陲。勞績茂著。頃者循例晉秩。未足爲酬。俺酋已報西行。渠近奉約甚謹。雖經貴鎮。諒無勞擾。望公戒約邊吏。謹守信地。以禮處之。如過有濶索。卽以孤意喻之。令其安靜守約。無壞大事。蓋彼數年在宣大。凡孤使人傳示。渠未嘗不服從也。

### 答吳環洲

承示虜王竟已西行。卽傳示西鎮。以禮處之。諒無騷擾。但此虜以遲暮之齡。當參飽之後。不宜遠事。忿爭若徒揚虛聲。中道而反。猶足以蓄銳示威。倘不量彼已。逞於一決。乃必敗之道也。在我乘此休暇。益修守備。以待彼之變。

### 答薊鎮巡撫陳我度言辭俸守制

唁脫再臨。又辱別諭云云。敢不敬承雅意。但孤暫留在此。實守制以備顧問耳。與奪情起復者不同。故上不食公家之祿。下不通四方交遺。惟赤條一條。一身光淨淨。一心以理國家之務。終顧命之托。而不敢有一毫自利之心。所謂或遠或近。或去或不去。歸潔其身而已。此孤之微志已。況昨承恩眷。特使廩人繼粟。庖人繼肉。數口之家。不啻足矣。若獨辭上祿。以沽名。又受私餽。以自潤。內欺其心。外欺其主。孤不敢也。至於公比者之起。

雖出孤意。然非敢市德於左右也。徒念薊門重鎮。撫臺要職。辱與公爲知己。故以仰托。冀有疏附後先之助耳。公第綏和將士。保固疆圉。卽所以酬聖恩。答相知。外此秋毫無所敢望也。再違寵命。恐公不達鄙意。而以孤爲疎外於左右。故敢直吐衷懷如此。語率無次。萬望矜原。其節間所惠。亦俱附璧來使。統希查照。

答陝西巡撫宋禮齋

近日曾有人言榆中築臺工急。軍人嗟怨者。孤竊以勞民動衆之事。誰肯樂從。惟謀國者。主持不惑。當事者。措畫有方。乃有望其底績耳。昔譚司馬在薊。建議築臺。其時人情洶洶。流言四起。忌者欲因此中以奇禍。政府諸公亦皆懼而求罷。獨孤一人力持不顧。乃克有成。數年以來。虜不敢窺薊者。實賴守險之力。若如當時之議。豈得有今日乎。今虜方欺貢。正宜及時爲備。諸言練兵除戎云者。悉虛文耳。惟修守一事。庶爲切實。且邊卒無荷戈死敵之苦。徒用其力。未足爲勞。但須寬其程限。示以勿亟。時一親閱。鼓以賞犒。則自樂於趨事矣。

答李石麓相公



不孝積愆累覺。遘茲閔凶。遠辱慰唁。兼拜厚奠。無任哀感。念先人昔得侍於年伯翁。投分不淺。翁之愛弟。有踰同氣。今年伯翁與先人相繼永逝。而翁與弟同抱懼憂。以此言哀。哀可知矣。顧翁謝政歸侍數年。養生送終。兩俱無憾。弟一別先人。十有九年。生不得侍養焉。沒不得視含焉。乃又爲時所羈紲。不得一申憑棺之情。抱恨終天。死不能贖。此則弟所遇之尤舛。情事之獨苦。而翁之所不知者也。天乎痛哉。誰則憐之。頃已面懇聖慈。俟大禮成後。當復申歸葬之請。想翁所垂念者。輒以奉聞。使旋草草附謝。嗣容顯裁。統希鑒亮。

答河道司空吳自湖言任人任事

治河之役。朝廷以付托於公者甚重。大疏所薦。一一俞允。且章劉諸君。孤皆素知其才。必有底績之効也。承示恐流言之搖惑。慮任事之致怨。古人臨事而懼。公今肩鉅任事。安得不爲兢兢。若夫流議怨謗。則願公勿慮焉。孤淺劣無他腸。唯一念任賢保善之心。則有植諸性而不可渝者。若誠賢者也。誠志於國家者也。必多方引薦。始終保全。雖因此。冒嫌蒙謗。亦無闕焉。願近一二當事者。其始未嘗不銳。至中路反爲人所搖。自乖其

說。或草率以塞責。或自鑒於垂成。此豈廟堂不爲主持。而流謗之果足爲害耶。子產曰。政如農功。日夜以思之。思其始而圖其終。行無越思。如農人之有畔。願公審固熟慮。集思廣益。計定而後發。發必期成。至於力排衆議。居中握算。則孤之責也。使孤得請而歸。後來之事。誠不可知。若猶未也。則公可無慮矣。

答河漕按院林雲源言爲事任怨

辱示練湖開復。奔牛建閘。及清查灘占。俱修舉水利實政。向來未有如執事之留心審處者也。仰甚慰甚。利於公者。必不利於私。怨讎之與理。所必有。顧明主在上。懸衡以運天上。功罪賞罰。奉天而行。雖有謗言。亦何足畏耶。孤數年以來。所結怨於天下者不少矣。憚夫惡黨。顯排陰嚇。何嘗一日忘於孤哉。念已旣忘家。狗國違恤。其他雖機穿滿。前衆鏃攢體。孤不畏也。以是能少有建立。願執事勉之。執事前所建論。皆已次第覆允。東南之民。受福不淺。明主何嘗不納忠言哉。誠有裨於實用。雖累千萬言。不爲多也。

答薊遼總督張心齋言東師報捷

得報知東師告捷。當嘉禮告成之日。有此奇功。真不覺展齒之折也。捷奏須言遼左將

士節荷聖恩破格鼓舞。增兵增餉。故人心思奮。蓋此數事。皆孤面承天語處分者。所謂戰勝於朝廷也。至於閣臣。前已奉旨。不得叙功。幸免齒及。

### 答凌洋山辭餽助

承教以孤辭祿守制。特捐俸以助不給。深荷厚情。但孤自念受事以來。四方餽遺。雖已概却。然於一二相知。間有量受者。今則雖至相知者。亦不敢領。非以自絕於長者也。念孤今日暫留。但以被君父非常之恩。艱鉅之託。不得不棄家捐軀。以圖報稱。非有利於天下也。故上不受公家之祿。下不受朋友之餽。惟赤條條一身。光淨淨一心。以圖國家之事。而不敢一毫有所希冀。庶於鄙心乃安耳。蓋聖人之行。或遠或近。或去或不去。歸潔其身而已矣。伊尹一介不取。故身犯天下之大不韙。而人不以爲非。諸葛孔明言。臣死之日。不使家有餘財。廩有餘粟。以負陛下。孤雖不肖。竊願爲之執鞭焉。若獨辭公祿。以沽名。而又受私餽。以自潤。上欺其主。內欺其心。孤不敢爲也。辱在心知。故直吐其愚。萬惟垂諒。

### 答宜都知縣許印峯

近訪知執事前在閩中。爲羣黨構陷。誠爲誣枉。昨已致書兩院。爲執事昭雪。今尹宜都之政。宜從薦錄。以雪沉誣。幸益堅雅操。以需大用。未可以暫蹶自阻也。遠祖孤塋。辱垂青掃拂。存沒不敢忘。便此附謝。

答翰學張陽和

不孝積愆累費。遭茲閔凶。過辱慰言勤憊。無任哀感。又承遣奠敝廬。尤切啣戢。但四方相知往吊者。俱已辭卻。雖諸公於孤有相知之雅。亦不敢當。諒小兒在家必已具書辭謝矣。人旋情事卒卒。不悉欲言。

答織造太監孫東瀛

近有旨停罷織造。實出聖母皇上軫念小民至恩。孤面奉聖諭行之者也。承示在今年已派上緊完解。則上供不致匱乏。民困亦可少蘇。慰甚。先君葬期在四月十六。孤擬候大禮告成。卽疏請歸葬矣。頃承翰貺。深荷雅情。人旋草草附謝。別具奏稿一冊。有近奉聖諭。謹附一覽。

答薊鎮總兵戚南塘計邊事

孤之此行。甚非獲已。君恩深重。寧敢亢違。到家事完。即星言赴闕矣。薊事已悉託之鳴泉公。渠乃孤之門生。最厚。諒不相負。自被總督新命。聽其議論。觀其意向。便視薊如家。士大夫有短足下者。即力爲辯釋。可以知其用意之厚矣。願足下自處。務從謙抑。凡事關利害。宜直披情襟。虛心商確。而行勿定。執己見。勿心口異同。與人爭體面。講閒氣。南北軍情。務須調適。法行一概。勿得偏重。凡浮蠹冗食之人。悉宜除汰。畜之無用。徒招物議。其處置屬吏一節。不可視爲細事。務宜恩威互用。使之知畏且懷。爲我外藩可也。邊疆事重。孤雖去。不敢須臾少忘。頃奉上諭。凡機密重務。許以不時奏聞。闔外之事。部署已定。幸足下倍加審慎。勿以孤之暫去。而遂易慮也。途中仍行奔喪禮。不見賓客。不敢煩勞旌節。鳥銃箭手。矯健用者五六人。錢佩不必相隨矣。往迴途中。亦不差人迎送。幸惟體諒。

答司空李義河

別後。十九日至邯鄲。七日之間。行千有餘里。雖星言夙駕。馳鶩風塵。然心以得歸爲快。殊不知勞。唯犬馬瞻戀闕庭之念。則不能頃刻忘耳。即日會會湖親家於官舍。款語移

時。殊愜闊懷。但匆匆遂別。終未罄所欲言也。計來月初間可抵敝廬。盛使回。草草附此。以報嚮往。

### 答周王

孤竊慕休聲久矣。茲以得請歸葬。道出淇澳。遙望清光。益深懸仰。荷辱睿情。差官遠送。兼賜珍貺。感戢之衷。言不能悉。念孤此行。啣哀奔赴。一切奠餽。毫不敢受。以睿情深重。又不敢例辭。謹拜珍食嘉菓。餘輒璧諸使者。匆匆附叩。容還朝之日。專啓修謝也。

### 答本兵方金湖言邊功宜詳覈

遼左之功。信爲奇特。伏奉聖諭俯詢。謹具奏如別揭。但細觀塘報。前項虜人有得罪土蠻。欲過河東住牧等語。雖其言未可盡信。然據報彼既擁七八百騎。詐謀入犯。必有準備。我偏師一出。卽望風奔潰。駢首就戮。曾未見有抗螳臂以當車轍者。其所獲牛羊等項。殆類住牧豎。當與入犯形勢不同。此中情狀。大有可疑。或實投奔之虜。邊將疑其有詐。不加詳審。遂從而殲之耳。今奉聖諭特獎。勢固難已。但功罪賞罰。勸懲所係。萬一所獲。非入犯之人。而冒得厚賞。將開邊將要功之隙。阻外夷向化之心。其所關係。非細故。

也。且李成梁節被寵賚。已不爲薄。異時邊將以功磨子。未有世襲者。而渠每磨必世。又皆三品以上大官。今再欲加厚。惟有封爵耳。祖宗舊例。武臣必身臨行陣。斬將搃旗。以功中率乃得封。今據所報。彼固未嘗領兵當敵。如往者戰平虜擒王杲也。昔唯賞磨。今乃加封。厚薄亦非其倫也。孤待罪政府。十年之間。措畫該鎮。頗殫心力。今奉溫綸。謬獎亦豈不欲掠此勳。闕以爲光寵。但其中實有未安於心者。故不敢披其愚。望公虛心再審。務求至當。以服人心。若果無可疑。則功懋懋。國家自有彝典。孤何敢強置一喙哉。統惟鑒裁。

居廬答豫所鳳盤乾菴瑤泉四相公

比者蒙恩賜假。蚤夜遄征。以月之四日抵舍。十六日幸克囊事。烏鳥微情。於是少遂。仰荷鼎力維持。獲如初願。行時辱厚情種種。頃兵部差官至。又承遣奠優渥。存歿均被。啣結未伸。中心藏之而已。老母入春多病。忽見游子歸來。箭懷頓解。強起加餐。然欲如嚴旨。以五月中旬扶輿趨命。則未能也。不得已再乞寬限。語具別揭中。更煩台重於面對。時曲爲一請。庶獲鄙願。惟公垂念焉。情事卒卒。不悉欲陳。統惟鑒亮。

答樞輔張容齋

四十二

比者蒙恩賜假歸葬。蚤夜遄征。以月之四日抵敝里。十六日奉先人柩歸窆。幸克襄事。仰賴鼎力維持。獲遂初願。行時又承遠送。厚情種種。言不能謝。中心藏之而已。老母入春多病。忽見孤歸。鬱懷頓解。強起加餐。卽欲遵旨力疾就道。長途暑月。遠涉未能。不得已再乞寬假。俟秋涼同發。仰賴台重於聖母皇上前。一達微情。倘蒙俞允。俾得遂迎養之願。孤一心奉公。死無憾矣。賫奏人去。草草附謝。不悉欲言。

答松谷陳相公

去歲長公至。辱翰貺。時正聞先人之訃。痛苦拂鬱。未能修謝。比得請歸葬。抵舍。又辱遣奠賜慰。哀感之衷。匪言所悉。中心藏之而已。不肖自罹大故。求歸未得。含荼茹毒。蒙垢忍辱。鬚髮皤然。已具足老狀矣。茲幸聖慈見憐。特允歸葬。終天之恨。始得少道焉。前於文華辭別。主上灑泣哽噎。再三諭囑。將母速來。今亦不敢再乞終制。獨以老母多病。暑月未能遠涉。不得已復請寬限。如不獲允。則不肖當先行趨命。留老母俟秋涼徐行耳。承垂念憐。使旋草草附謝。并告嚮往。別具粗帛。從俗禮也。餘容專啓。



答憲長周友山

孤之此行。本屬初意。今荷聖慈特允。獲遂夙心。所謂求仁而得仁也。他何知焉。茲奉翰示。戀之一字。純臣所不辭。今世人。臣名位一極。便各自好。自保。以固。享。用。至哉。斯言。學者。於此。能確然自信。服行。勿失。便可爲天地立心。生民立命。爲萬世開太平。非謬見。謬聞。所可鏡也。佛氏立位。聖果。以十信爲初地。直至超登果位。不過圓滿起初一信字。願執事於此。自信而已。

答甘肅巡撫董石坡

不肖孤得旨南歸。以四月四日抵舍。十六日幸克襄事。先後奉華翰四函。公所經畧。咸盡事理。但俺曾此行。非其本意。前在宣大。奉約束甚謹。不肖每有戒諭。未嘗不斤斤聽從。卽今西行。亦必無擾。若其部衆。或有不戢者。但以鄙意傳示之。無足虞也。

答應天巡撫胡雅齋言內府清汰鋪墊

不肖以六月望日抵闕下。仰荷主上隆禮殊恩。捐糜不足言報。忝在知己。輒以奉聞。辱示三府解布事。具悉。布之精粗。不在斤兩輕重。何必取足於三斤耶。先呈樣布。具題請

印。事理極當。但起解時。須官爲親驗。毋容奸徒攬解侵漁。則弊孔自除。况近日內庫諸關。皆已清汰。庫夫積滯。皆已枷斃。諸鋪墊等費。率省十三。奸人亦難盡以藉口矣。

答河道巡撫潘印川計淮黃開塞策

前在途中得治河大議。比至都。司空言此大事宜速請旨。以便舉事。此時初至。酬應匆匆。未及廣詢。且意公議已審。不宜更作異同。以撓大計。逐一覆允。乃近日得一相知書。論河上事。如高家堰之當築。河淮之當合。皆畧與大疏同。惟言崔鎮口不宜塞。遙堤未易成。則不肖亦不能無疑焉。夫避下而趨虛者。水之性也。聞河身已高。勢若建瓴。今欲以數丈之堤束之。萬一有蟻穴之漏。數寸之瑕。一處潰決。則數百里之堤。皆屬無用。所謂攻瑕則堅者瑕矣。此其可慮者一也。異時河強淮弱。故淮避而溢於高寶。決於黃浦。自崔鎮決後。河勢少殺。淮乃得以安流。高家堰乃可修築。今老河之議既寢。崔鎮又欲議塞。將恐河勢復強。直衝淮口。天妃闌以。南復有橫決之患。而高堰亦終不可保。此其可慮者二也。前傳后川在河上。與吳自湖議。大相矛盾。今在事諸君。多主傳議而非吳言。然天下之事。唯其當而已矣。必此之是而彼之非乎。不肖於此二端。不得於心。謹

此奉聞。幸虛心詳議見教。果皆無足慮。言者云云。皆無足採。則堅執前議可也。若將來之患。未可逆觀。捐此八十萬之費。而無益於利害之數。則及今亦宜慎圖之。如嫌於自變。其說但密以見教。俟臺諫建言可也。適望留神。以便措畫。

答憲長林碧潭

辱華翰。深荷雅情。承教河上事宜。捧讀再四。敬服經濟宏猷。崔鎮驟塞。他日必有二水交鬪之患。卽高堰雖築。恐亦不久。昨已密書印川公。令其再加詳議。圖惟永終。然不敢謂其言出於公也。

答憲使張周田

蘇松要地。特借重望。非以資進者也。榮代後幸卽赴任。過家不必淹留。際此清時。惟懋樹勳庸。以需大畀。實所望也。

答潘印川

前奉書以河事請問。辱翰示條析事理。明白洞悉。鄙心乃無所惑。然籌畫固貴預定。興作當有次第。今俟潦落之時。且急築高堰。以拯淮揚之溺。徐觀淮流入海之勢。乃議塞

崔鎮。至於蕭縣以北上流之工。又當俟河淮安流。乃可舉事。蓋此大役。不獨措理經費之難。且輿動。大衆頻年不解。其中亦有隱憂。元季之事。可爲大鑒。今之進言者。喜生事而無遠圖。又每持此以歸咎廟堂。坐視民患。不爲拯救。不知當軸者之苦心深慮也。百凡幸惟慎重審處。以副鄙願。

答憲長張敬齋

奉聞保安賊殺人於道。據差人親見。橫尸路隅。此時據報有兩處。今該道再三查審。止稱一處。或差人妄報未的。耶。禦人于貨。與庫藏被劫有間。但隱匿不報。則違近日明旨。其罪有難辭者。安大參剛毅廉正。昨孤已開送銓部。可備巡撫之選。此一事豈足累之。但係該道信地。恐難道責。唯叅語宜從輕耳。承詢及。敢盡區區。幸惟裁擇。

答宣大巡撫吳環洲

辱華翰領悉。近日薊鎮報。長昂董忽力。阻截各部貢馬。要求增賞。此必混同西虜。易馬上谷。已獲重利。故不樂就喜峰之貢也。如此。宣府市馬。安得不多。將來東虜既不許貢。則宣府市馬。必當有處。不然。恐難獨支也。又報青曾與土蠻結謀入犯。有屬虛妄。月初

青酋尙在宣府爲市。何嘗東行。比得大疏。言此酋市畢將西赴俺答。衆疑始釋。方金湖公於東偏事。不甚闇習。昨聞薊衆即欲稱兵討罪。孤亟止之。言此事不足煩大兵。可以計取也。故擬旨付彼中督撫處置。蓋此等事。大有關繫。着數。須是寬鬆。乃有轉身地。太緊。則難於取捨矣。青酋若有西行的信。望即示知。俺答部中近有人回否。

答薊遼總督梁鳴泉計處市馬

辱華翰。并別楮云云。俱悉。長昂事。前奉書未至。適蒙翰示。不知近已得要領否。一酋作祟非一日。然其諸部仰給於我久矣。豈肯捨其厚利。而從彼爲逆乎。頃所以能惑之者。以彼近於宣府。雜在青酋部中市馬。獲厚利。頗爲饜飽。必誑其衆曰。貢馬一也。何爲東西定價懸殊。我等今年且不貢。求加添賞賜。若不加賞。待土蠻青酋糾衆入犯。我等爲之嚮導。縱是薊鎮絕了撫賞。我等自去宣府賣馬。何賴於薊耶。犬羊愚計。必出於此。以爲朝廷畏之。當曲從其請耳。然彼諸部久靡參養。今雖暫爲所劫。終亦不能背。爲公計者。當先之以文告曉諭。諸部言爲逆者。獨彼二人。汝等素受國恩。豈可一旦從彼作歹。自失厚利。今朝廷聞汝等不貢。將絕其撫賞。舉兵加誅。又行文宣府。此後西虜入市。須

一、一盤詰不許夾帶土蠻及屬夷人。若訪有長昂董忽力在彼。即便縛來。薊鎮連年築臺練兵。正無試處。遼東人馬。不過十餘萬。猶能將土蠻殺得七殘八敗。況我薊鎮雄兵有三十萬。車騎連雲。火器如山。土蠻入犯。卻是送死。我先將土蠻殺敗了。然後將汝等屬夷頭目。盡行誅戮。追了敕書。盡行驅逐出塞。那時汝等悔之無及。彼中聞此言。未有不懼者。然後計圖二酋。或潛兵掩取。或重賞以購致之。無難也。若二酋能悔禍服罪。自致塞下。亦可待以不死。不必深治矣。昨本兵覆奏。頗涉張皇。故擬旨從公等處置。此在公與戚帥密圖之而已。

答棘卿劉小魯言止遼山勝事

不肖孤還朝後。三奉翰教。厚情繾綣。中心藏之。老母舟行。仗庇粗安。已過洪入閘。計九月初可到矣。辱垂念感謝。承示買田玉泉事。初發此意。爲他日歸來。往來尋勝駐足地耳。今身羈塵鞅。歸期未卜。即便得歸。亦不過芒鞋竹杖。與閒雲野鶴。徜徉於煙霞水石間。何至買山結廬。爲深公所笑耶。當陽厚意。媿不敢當。據其圖樣。結構不小。費當不下千金。一縣豈能辦。渠必申請上司。按撫諸公聞之。亦必動支公帑。紛紛多事。徒增煩擾。

且孤近日嚴禁各處糊造書院。聚徒冗食。乃身犯之。何以率人。煩爲謝胡令。亟爲停止。庶於鄙心爲安也。承教直吐其愚。幸惟垂諒。

答總兵戚南塘

承令弟厚意。所寄錦帳。祇領。用爲母壽。餘輒璧諸來使。再此申謝。外寄督府梁公書稿奉覽。以便審畫。

答吳道南

自去歲罹先人之變。海內相知。無不爲孤痛惻者。自於門下投分不淺。乃竟無一字。以爲必相忘矣。茲奉手書。乃知其故。復以自解。往公在邊。晉人結恨甚深。而蒲州相公乃獨鑒獎。謂公臨別時曾投書與之。具有經濟之略。深加歎服。此亦公論之不能泯也。倘未即忘世。宜乘時鶻起。以懋建勳庸。奏對稿略載近事。便附一覽。語惟鑿存。

答應天巡撫

毛二守被劾甚重。上覽之。發下重擬。孤即對言。若所劾果實。誠宜重處。但恐有枉耳。及出見太宰。云所劾虛實固未可知。然其人素亦不滿於公論。遂從提究。頃奉華翰。不勝

恨恨。會崔道長人去。卽爲之申理。渠若肯虛心。不執初見。自爲昭雪。甚善。不然。姑且置之。以俟後人可也。今後凡任事。任怨之人。宜預將護。俾得展布。待其被劾。而後拯之。則無及矣。

答陝西學道李翼軒

前承疏揭。已屬之禮曹覆行。會宗伯與儀司俱初任。部務叢集。未能排擊。遂淹至冬初。乃得題覆。頃亦聞關中人以執事爲太嚴者。然不如是。不足以見執事之能以師道自任也。幸益堅雅志。以副所期。

答兩廣劉凝齋

頃林賊復回廣東。彼中無素備。其文武將吏又皆庸鶩。竟令縱洋而去。殊可恨也。以公昔在閩中。當留意於此。而閩人又皆樂爲公用。故特借重一行。且廣中吏治偷窳。近稍稍振刷。而積習未殄。望公之留意也。然以公重望。乃不引置於廊廟。而復令徊翔於遠徼。區區又有蔽賢之咎矣。

答三邊總督鄒文川



承華翰，知已入關視事。欣慰。虜酋西行，堅守約束。西鎮所以撫處之者，亦中機宜。此邊圉之福也。頃已託宣大軍門諭彼早回。渠方窘困，聞孤之言，欣然奉命。此酋歸後，西鎮安枕無事矣。

答憲長周友山明講學

承華翰及公移一通，俱見公學問得力處。所謂實際也。敬服。今人妄謂孤不喜講學者，實爲大謬。孤今所以上佐明主者，何有一語一事，背於堯舜周孔之道。但孤所爲，皆欲身體力行，以是虛談者，無容耳。頃借楚侗開府閩中，亦欲驗其學之分際，不知能副所期否。

答甘肅巡撫侯掖川

虜王乞番僧追貢事，已屬本兵議處。渠既係烏思藏一種，自難却謝。但止可照西番圍化諸王例。若欲如北虜貢馬，則不可許也。順義前在宣大，亦曾餽孤以馬疋弓矢。彼時止託督撫諸公以書謝之。量與回答。蓋孤職在密邇，義不得與外夷相通。今承寄渠書，亦如宣大例。煩公爲孤作一書答之。中間略說渠西行勞苦，旣得見佛，宜遵守其訓。學

好戒殺。竭忠盡力。爲朝廷謹守疆場。享壽考。太平之福。不宜聽後生妄爲。自生苦惱。所言番人追貢事。此種僧人。久失朝貢。本當絕之。茲因渠之請乞。特爲允許。但止可照西番例。從陝西入貢。若欲如虜王諸部落貢馬等項。則不可也。明春可卽回巢住牧。自渠行後。西邊部落。俱兢兢奉法。惟青把都一種。稍覺參差。以是渠宜早回。約束諸部。堅守約束。以終前功。亦不辜區區數年懷柔撫綏之意也。渠每年賞賜段匹等物。內庫俱一、一、送與孤看過。然後發行。渠安得知之。書中亦可略及此意。外仍希處蟒衣二疋。綵絲二疋。茶百斤。米麵下程一分。以犒勞之。見渠書已到也。有便乞將寄去書稿。并索渠收過禮物回文見教。餘匆匆不悉。

答司空雷古和叙知己

不肖昔於門下。有忘年之契。今遇英主御極。正宜簡求耆碩。共佐昇平。而翁乃遁跡煙霞。高謝軒冕。俾經綸終卷。膏澤自腴。皆不肖蔽賢之咎也。惶愧惶愧。不肖猥以淺薄。謬膺重任。竊見嘉隆以來。紀綱頽墜。法度陵夷。駸駸宋元之弊。輒自以親承顧命之重。幸逢英明之主。不揣綿力。欲一舉而振之。乃以此致恨於羣小。流言不啻於三至矣。然禮

義之不愆。何恤於人言。聖賢之學。有舉世不見知而無悔者。况高明超曠如翁者。猶有取焉。則雖不見知於世。固無悶也。兩承翰教。深荷雅情。賢郎端雅有志。器堪大受。當爲翁有子賀。人便草草附謝。并布腹心。

答南司成許海嶽

南中士習偷窳久矣。往屠公銳意振刷。雖若少驟。然其意未爲不善。公承其後。補苴潤色。加以素望先聲。自有不動而變者。事干典制。或須題請。其餘則皆司成所得專者。惟在歸躬端範。積久以格之耳。辱華翰垂問。深荷雅情。別楮云云。深合鄙意。蓋忠臣雖在遐遠。不忘君。惓惓之義也。敬服敬服。

答宣大巡撫吳環洲

辱示邊情。一一領悉。虜酋盡糾諸部而西。此其意誠不可測。但土蠻與之睽離已久。一旦舉十萬之衆。與之同往。彼以何道而能驅使之耶。若果有此。必青酋所爲。然亦未必能辦十萬也。此酋近日情狀可惡。仍宜嚴切諭之。孤竊料順義此行。縱有諸部之助。亦必取敗。夷狄相攻。在我爲利。但不如勸彼回巢。維持貢市。更爲完善也。長昂事。尊諭謂

處之不可苛責太過以激變。尤不宜招來太早以起玩。公策之甚善。前已示意彼中督撫。但廣布文告以携其黨。而勿遽爾稱兵。以致不可收拾。嚴爲之備。徐觀其勢而處之。犬羊嗜利畏威。終當入笠。鳴泉公亦有方畧者。諒不致損威起侮也。承教當再爲囑之。

## 答王鑑川

別來一歲中奔命驅馳。憂瘁萬狀。重蒙聖主垂念烏鳥私情。老母入京。又荷兩宮聖母慰問勤倦。賜賚優渥。夫士感知已之分。一飯之恩。猶欲以死酬報。况如不肖者。將何以仰答聖恩於萬一乎。自是當永肩一心。矢死靡他。雖舉世非我。亦有所不暇顧矣。辱華翰。深荷垂念。厚惠概不敢領。輒璧諸使者。草草附謝。別具奏對稿一部。頗具近事本末。附塵覽。

## 答邊鎮督撫

向者南歸。奉聖諭遼東大捷。命孤議擬恩賞。此時心竊疑之。曾以請教。隨具一密疏入告。及孤入朝。則業已處分矣。近得安道長一書。據其所訪。則與小疏一一符合。何當事諸公之不審處一至於此也。今大賚已行。固難追論。但賞罰勸懲所繫。乖謬如此。殊爲

可恨。謹錄疏稿及安君書奉覽。幸惟秘存。

答少宰楊二山

遠辱華翰。獎許過情。無任感荷。夫聖人之行。或遠或近。或去或不去。歸潔其身而已。不肯身當重任。誼不得不棄家以爲國。忘身而徇主。悠悠之談。豈遑顧恤。但所自信者。耿耿丹衷。實無一毫自利之心也。恃在知己。敢一吐其愚。

答二邊總督鄒文川

頃者三承華翰。深荷雅情。外甘肅陳總兵忽饋我以厚禮。無因至前。殊爲可訝。但彼以問遣老母爲辭。不忍麾拒。但婉辭以卻之。未與回答。然恐鱗翼或有差池也。且聞彼於他處皆有厚餽。往年鑽刺之風。殆將復作。借重一戒諭之。今朝廷聖明。功罪賞罰。一秉至公。營求打點。皆爲無用。惟竭忠盡力。以圖報稱可也。人旋草草附此。謹將原帖奉覽。幸惟鑒存。

答遼東周巡撫

李帥用奇出擣。使賊狼狽而返。乃孫臑走大梁之計。比前長定之捷。殺降以要功者。不

俸矣。功懋懋賞。國家自有彝典。諸公連籌決勝。功豈容泯。少選當請旨加恩。不敢蔽也。但李帥去年曾餽我以厚禮。雖當即謝卻。然恐鱗翼或有差池。且不肖於渠。獎提愛護。意固不爲不厚。然以爲國家。非敢有一毫市德望報之心也。渠誠以國士自待。唯當殫忠竭力。以報國家。卽所以酬知己。不在禮文交際之間也。渠不知鄙意。以爲有所疎外。會間幸一覽曉之。以安其心。堅其志。便中草草。

## 答滇中王巡撫

比疊奉翰。皆已具復。茲不敢贅。外沐總兵前屢次書來。俱有厚餽。其人見孤門巷閭寂。竟不敢投入。然亦不索報書。竊恐爲差人所沒。會間借重一謝之。並道所以。萬萬。

## 答兩廣劉凝齋

竊聞志士不違時而赴功。忠臣不擇地而求效。頃者借重粵中。實以遠地爲歎。茲奉華翰。欣然以王忠肅諸公自期待。此忠臣智士所以乘時而自奮者也。以公宏抱。其所建立。王馬諸公。豈足方駕哉。浣慰浣慰。辱示諸疏。尤極仰服。夫捕盜之令。布之天下。非不申熟也。而惟江右奉行之不後。江右司道。奉公之令。非不申熟也。而惟二道舉行之有

效。以此見法。無常。良行之在人耳。公今治粵。亦豈有異道哉。任人責實。信賞必罰而已。

答遼東安巡按

去歲承示長定事。鄙意以其事已成。可置勿論矣。不意該科又有此疏。已奉旨併勸。今惟當據實分別真僞。以俟宸斷。量其虛實大小。以爲予奪厚薄。明主懸衡鑑以裁照。決不致有枉抑也。辱示事情。一一領悉。去歲之事。不穀到京聞人言嘖嘖。不獨執事言之。今雖欲曲隱。而人之耳目。可盡塗乎。近日彼中督撫書來。又言執事云。見不穀奏對稿中有投降等語。不敢具覈冊。須使人密探而後行者。此必執事畏諸人之怨恨。而託之不穀以自解也。然執事有糾察之責。爲朝廷明功罪。慎賞罰。何嫌何畏。惟當覈實作速勘明。則公論自昭。人心自定矣。究竟此事。養善之捷。李帥之功。揭諸日月。懋賞重賚。不待言矣。長定卽全屬虛妄。朝廷亦必以功疑宥之。不加深治。諸公胡爲嘵嘵如是耶。此後密帖。手書爲便。字之工拙不計也。

答兩廣劉凝齋條略海寇四事

伴來。知已榮代。入粵有期。欣慰。別具廣事數件。以公雄略。固所優爲。然不肖有四方之

慮。不敢不叮嚀於下執事也。仰惟鑒存。

一廣中防禦山盜。聞已略備。惟海防甚疎。昨林道乾以喪敗羣寇。倏忽河渡。使該道有人。武備稍豫。縛而致之易耳。乃竟無一兵一船。使之從容揚帆而去。可恨可恨。今亡羊而補牢。亦未晚也。

一林賊前已入穀。以閩廣兩處購之。彼此爭功。遂致敗謀。而閩人去者皆被荼毒。殊爲可恨。頃已將此事密付之呼帥。公舊在閩中首事。呼帥又意所推轂者。必爲効死。今仍宜付之密圖。在廣人唯當多方設備。張羅以待鳥而已。

一南粵設將。本公昔所建白。乃近多言其不便者。此必廣人憚於遠戍。又苦閩中牽制耳。然論事勢。守堂輿者。必於門外據險。扼要乃爲得策。此地實海中要害。昨林道乾一來。徑泊海岸。使此地兵將有備。渠敢越乎。公虛心審計。果於防守有益。幸爲之規畫久遠。措處兵食。使人有樂居之意。則不强之而自從。偷無大關係。則亦不嫌於前後。異議也。

一廣中數年多盜。非民之好亂。本於吏治不清。貪官爲害耳。夫官貪。則良民不懷。奸民



不畏而盜賊利。足以。嗜之。威足以。懾之。何憚而不爲盜。今朝廷法紀稍振。貪風稍戢。盜亦漸少。然習未盡變也。最可患者。與閩接壤。彼中人潔廉者少。又黨與衆盛。朋比爲奸。法令難行。不得不借惠文冠彈治。故今日治廣。武備固當振飾。然節財用。察吏治。安民生。乃其要著也。幸惟留神。

答鄭藩伯

孤之推轂執事。非有平生之素。左右之容也。實本一念好賢之真。有不自知其所以然者。不意別後。執事遂橫擢口語。鏤羽卑棲。使孤愛護雖殷。力無所及。歎甚歎甚。雖然。此損益進退之關。不可忽也。辱華翰。謂勉修三事。除其近名近利之心。此語最爲切實。孤竊窺執事近利之心。固知必無。近名之念。似未盡克。然此念不除。雖苦心白首。畢竟但成一聞人。不能爲聖賢。佛氏所謂到老只得一把茅蓋頭。若今之談學者。則利而已矣。烏足道哉。

答南列卿陳我度

比聞公不樂南行。謂孤聽譖言。有所疎外於執事者。此過疑也。孤雖不肖。其於人之賢。

否。畧窺一斑。內不敢任愛憎之私。外不輕信毀譽之說。自當事以來。鑒前人之失首。皇極之論。以開悟上心。消彌偏黨。與士大夫相接。公言之外。不交一語。雖有譖言。何自而入。且昔者起公於林下。誠獨任鄙見。非有左右之容也。向不因人譽而推轂於岑寂之時。今乃因人毀而阻抑於顯拔之後。揆之事理。殆不其然。敢布腹心。幸惟俯諒。天衢廣闊。鴻漸之儀。豈有量哉。

答操江胡玉吾

承示狂犯之獄。不勝駭異。詐傳詔旨。律有明條。彼自罹於辟。誰得而貰之。但詳其僞疏之意。不過以海君爲世望人。故託之以陰鼓異類。窺竊虛名。而不自知先陷於大辟之罪。所謂噴血以自污。求名而不得。可惡也。亦可哀也。近年以來。人心不正。邪說橫行。包藏禍心。欲傷善害正者何限。特斯人不幸而敗露耳。大疏一上。主上必且震怒。根求黨與。其所芟除。將恐不止斯人。雖群小自作之孽。無所歸咎。然於宇宙太和之氣。得拯少損乎。吾聞國君不仇匹夫。蟻螽之流。殺之不武。公若不以告我。死生性命。不敢與聞。今旣已知之。則願以解網之仁。乞之於左右。大疏特令差人停進。唯高明裁之。

答貴州巡撫何萊山

藏僧求貢事。誠制馭虜酋之一機。承示卽入告主上。已荷俞允。其回賜諸物。皆命內庫送不穀閱過乃發。聖德柔遠之仁。可謂併包無外矣。闡化求封一節。禮部謂彼中見有闡化王。嘉隆間皆曾入貢。與復封之說相左。恐有詐冒。不得不一行查。可遣使同順義一人。至藏中一查之。當得其要領也。其所遣不穀者。雖不可峻拒。宜奏知聖主而後受之。託掖川公量爲酬答。以慰其意。仍希以鄙意傳諭順義。促之早歸。建寺一節。似亦可從。俟宣大軍門有疏。卽爲請行。此酋歸則貢市愈堅。而西鎮可安枕矣。若將賓鬼一枝。携之來歸尤妙。不知彼肯從否。

又

侯掖川公處置番虜。咸中機宜。邊方重賴。況今俺酋在西。一切撫慰經畧。非此公不可。但昨以子馳驛事被累革職。主上方留心驛傳。法在必行。譴罰不貸。恐渠自懷疑畏。或於展布有妨。望公以善慰之。小肯不足病大美。俟有機會時。仍當復其錄廢。決不令久抑也。敢布腹心。

答甘肅巡撫侯掖川

六十二

答藏僧鎖南堅叅。遍金紵絲二端。雲紵絲二端。此外仍加茶百斤。及細布等物。或再欲從厚。則加一數念珠子。去人不便多費。煩卽於撫賞銀內處給。可入查盤也。仍乞代爲傳示。謝其遠意。通貢一節。已奏知主上。俞允。今且先授禪師之號。後若化虜有功。次第加進。決不憚惜。此後中華番虜。合爲一家。永享太平。垂名萬世矣。其順義先已傳諭。今不審當再諭否。望公以便宜行之。如欲遣以食物。亦卽撫賞內處給亦可。

又

疊辱翰示處置番虜機宜。具見雄略。重鎮得人。朝廷可道西顧之憂也。在鄙心尤切敬仰。比者主上方加意驛傳。而怪有司之不奉法。適會有糾舉之疏。遂觸上怒。不肖雖極力調停。猶不免有近日處分。然此乃公差遣不得人。非賢郎之過。且公在鎮。功勞自當勦之。旂常一畫。不足相掩也。俟後有機會。仍當爲公光復廕典。恐執事者不達朝廷所。以重令之意。而過爲疑畏。或於展布有妨。故道其本末如此。肝膽之要。唯公諒原。

答宣大巡撫吳環洲

虜酋既失利於西。勢必歸巢。今欲建寺迎藏僧來。蓋藉此以掩其敗也。歸之遲速。亦任彼意。不必加意促之。使得借以爲重。

### 答豫所呂相公

伏承華翰。知台從已返仙里。仕宦而至將相。衣錦而歸故鄉。古人所羨。豈易觀哉。數年共事政府。荷道誼同心之雅。以不肖之淺薄。所以能竭駑策塞。效忠於國家者。非公其孰能成之。功在天下而人不知。斯可謂至德也已矣。別來倏忽改歲。遐想高踪。既深歎挹。追惟夙誼。復愴離襟。使旋附候。厚惠不敢當。輒以璧諸使者。統惟鑒原。

### 答南司成許海嶽

辱華翰領悉。方今急務。惟在正人心。明學術。使人知尊君親上之義。若其科。條。規。畫。可因者。因之。不必屑屑苛擾也。胄監錢糧。原不入查盤。此中亦未有疏。似在可已。

### 答河道潘印川

去歲積雪凝寒。發春未改。竊以爲憂。高堰黃浦工恐難就。茲奉教。知大患已除。兩工底績。遙堤湖堤次第將竣。真爲之喜而不寐。公平成之績。寧獨一時賴之乎。仰甚。流移初

復。理宜優恤。大疏即屬所司議覆。舊逋悉行蠲免。但七年以後。須再加查勘。乃可定議。據所開被害州縣。未必皆同。施恩自當有等。卽一縣之中。恐亦難以例論也。被患甚者。雖蠲三年不爲多。否則卽一二年不爲少。若地處高阜。水患未及者。又當照舊徵輸。難以概從蠲免。高明酌之。今且宜大播告言。宣示德意。俾復業之人。知朝廷保民。眞如赤子。堅其旋定安集之心也。

### 答楚按院郭龍渠

承示鼓鑄事。仰見導利足民之意。鑄行新錢。有碍舊錢。此在原行錢地方有之。若敝府則事在創始。民間惟以得錢爲便。無擇於新舊也。緝獲妖犯。解赴貴州審質。誠便。但彼中渠魁已決。無與質證。獨卷案存耳。恐亦無以明正其罪也。揚仲魁卽曾光之說。似未必然。且彼既認傳書一事。則亦知情藏隱之人。不必論其妖書之有無也。若今日。卽以爲曾光而誅之。萬一後獲。眞犯何所歸罪。惟公愼之。

### 答福建巡撫耿楚侗言治術

道從入閩。兩奉翰教。深悉遠情。閩素稱難治。賴劉龐二公先後經理。其俗稍易。然猶未

能翕然丕變也。殷之頑民。更三后而後理。閩俗之變。惟凝齋克慎厥始。惺菴克和厥中。來諭求二公行之已試而盡美者。修飾之。其行之雖善而未盡美者。調潤之。斯公之所。以克成厥終也。人物品流亦無定論。惟在試之而責其成功。毋徇虛名。毋求高調。則行能別矣。韓信驅市人而用之。卒以成功。賞罰明。信任當其才也。猥辱俯詢。敢獻狂瞽。唯高明採焉。

### 答楚學道金省吾

承華翰領悉。分道帶管。原以道里遼遠。難於歲歷。故採言官之議。比照陝西宣大事例。分管責成。且近來干進者。往往借口督學不歲考。以致儒童上進無階。今割遠方十一。以省涉歷之勞。得以從容校閱。干進者無以借口。所割郡縣。又皆人才稀少之地。竊謂於貴道事權原未損也。承示兼管事宜。有部議未悉者。呈詳兩院題請議行。公若自奏。恐生彼此之嫌。

### 答棘卿劉小魯

徂冬及春。兩奉翰教。極荷不忙。承以太翁太君隧銘見委。自邁先人之變。公私儻卒。苦

情鬱抱。公所深憫。坐是久稽嚴命。諒不重譴也。茲得小間。且漸近潭除。將尋楮公管子而從事焉。使者先歸。期以夏間呈覽。老母去冬小苦。旋仗平復。入春眠食。比舊差健。辱垂問。兼承尊夫人厚貺。深荷雅情。唯惠不肖者則不敢當。輒以璧語使者。統惟鑒原。

答甘肅巡撫侯掖川

藏僧通貢授官給賞事。前啓已悉。僧衣圖書等項。俱付差人贖上矣。俺酋折北於西伐。從此能卷銳以俟再舉。策之上也。乃逞忿報復。以致部衆離心。勢窮力蹙。必致一敗塗地而後已。此天將亡胡之徵也。請和。西番斷不可許。回巢。建寺一節。亦止。可量助物料。工完。賜以名額。豈有堂堂天朝。特爲建寺。而勸之回巢者乎。凡此皆挾中國以爲重。而示威於瓦剌。不可從也。自今勸令回巢之言。亦不必太急。彼旣喪敗。勢不得歸。然亦必歸。今在西海。不免爲貴鎮擾。公且耐煩處之。撫賞費用。已屬本兵議處。諒彼亦自不能久也。

答浙江巡撫言馭將

前有人言執事日飲不事事者。故急以奉聞。其書乃不穀手筆。何久不至耶。將鱗翼或



有差池耶。幸惟查照朝廷體統紀綱。文武共守。浙中總兵不以主將自居。叅將不執偏裨之禮。如此而謂之沿習舊套。不穀不敢以爲然也。假令兩司官於撫按。不以爲統率。撫按肯相安耶。近來將官卑靡。已甚。祖宗之制。恐不如此。當事者。但樂其柔和。爲將者。亦競爲趨承。一有風塵之警。誰則當之。此國家之憂也。執事高明。當有味於愚言。

答宣大王巡撫

前承教用過馬價。已屬所司。如數開除。兩辱翰示。虜勢披離如此。誠中國之利。但犬羊之性。不羞困辱。強則忽然。弱則屈服。雖身爲奴隸而不耻。順義。旣失利於西部衆散。叛青酋。失恃。不足以支土蠻之彊。今雖遘釁。終當爲之。臣虜土蠻。若以勢驅之。脅以夾帶。馬。彼必不能違也。鄙意謂今歲市。在我仍宜示之以強。不可曲徇其情。舊額之外。一馬不增。如違。卽閉關謝之。走告俺酋。責以違約。彼旣敗。方歸命於我。必能約屬青酋。受吾羈絡。如此。而后貢市可久。不然。東虜方強。青酋不支。他日之禍。且中於上谷矣。唯高明裁之。

答河道潘印川論河道就功

比聞黃浦已塞。堤工漸竣。自南來者。皆極稱工堅費省。數年沮洳。一旦膏壤。公之功不在禹下矣。仰睇南雲。曷勝欣躍。追憶尼事之初。言者譏起。妬功倖敗者。旁搖陰煽。蓋不啻築室道謀而已。仰賴聖明英斷。俯納瞽言。一舉而裁河道。使事權不分。再舉而逮王揚。使冥頑褫魄。三舉而詘林道之妄言。仆異譏之赤幟。使無稽之徒。無所關其說。然後公得以展其宏猷。底於成績。皆主上明斷。屬任忠賢之所致也。公乃舉而歸之不穀。曷勝惶愧。河道舉劾疏。例不可少。已下部覆行。

## 答吳瓊洲

前上谷王公偵報虜情。言青酋爲土蠻所掠。勢益衰弱。今歲市馬。必不踰額。不穀卽復書言。犬羊之性。惟論強弱。不差卑辱。強則忿然。弱則屈服。雖身爲奴隸而不耻。今順義旣失利於西。青酋失勢。土蠻以力驅之。彼必不敢不從。則上谷之憂。方始。未可遂爲安枕也。今聞青酋果卑詞厚禮。以求解於土蠻。此輩庸鶩。安能自立。將來反覆。其情叵測。須順義歸而約束之。故今日之勢。仍當懷來順義。以制土酋。未可因其喪敗而遂棄之也。

答總憲吳近溪

辱華翰。知台從已履任視事。欣慰。近來海上多妄報汛警。冒功要賞。將來或生他變。不肖深以爲慮。故前擬旨戒諭。茲奉來致。已洞見其弊矣。賞罰明當。乃足勸懲。未有無功倖賞。而可以鼓舞人心者。此皆將官欺罔之言。不足信也。近日遼左虛冒功級。雖督撫大將已降之恩。皆追奪。況此輩乎。

答邊鎮張巡撫

長昂近不得貢。必乘我撤防之時。踵其故習。誘執邊人。要求所欲。據報近實。但謂其有精兵千餘。此虛言也。辱示總理布置。已得勝算。然彼覬知有備。亦不敢入。諒已解散矣。

答遼東安巡按

勘疏至。部議殊相左。覆語仍爲兩可之詞。又造爲危言以相恐。請給軍士半賞。不穀皆未之從。然舊恩方寢。新恩旋降。朝廷於督撫諸君。厚耶薄耶。前承手翰。以事未定。故久稽酌答。茲略謝區區。幸惟鑒亮。

答雲南巡按劉九澤

所示條約。咸當事理。切時宜。非空言也。敬仰。李中溪老先生書。祇領。八旬老翁。每書手筆細字。殆非塵寰中人也。方藩伯清真孤介。平生不求人知。而人鮮有知者。惟不穀引薦之。以至於今。誠宜量處。以勵有位。近來交際之禮。曠然俱絕。故雖知厚如執事。亦不敢領。惟垂亮之。

答陝西學道李翼軒

頃有人以執事爲太嚴者。然不如是。焉能振頹綱。而正士習乎。世俗之所非議。不穀之所深喜也。願益堅雅操。以副鄙望。

答甘肅侯巡撫

辱華翰。并所示虜情。一一領悉。老酋喪敗之餘。不思知難而退。蓄威養銳。以俟再舉。乃爲套虜所誤。空國以逞。忿以動衆。衆心不齊。未有能勝者。此不一敗塗地不已也。今惟有早歸故巢。撫有東部。乃爲上策。一切撫處事宜。知公心力俱竭矣。

答三邊總督邵文川

辱示虜情領悉。東西任彼攻殺。在我惟撫處不失。自治有備。長策無出於此矣。順義者

矣。喪敗之餘。部衆離散。勢必不久。此酋死。套虜必當有變。公計它日有當經略者。願及今圖之。延鎮主餉缺乏。實因先年奏報脫誤。茲奉教。已屬計曹議處。

### 答兩廣劉凝齋

承示羅旁善後水寨兵防事。捧讀再四。深服宏略。粵東海防疎懈。誠如尊論。今宜以造船練兵爲急。但行須以漸。多方鼓舞。使人人思奮可也。根本切要在精察吏治。使百姓平日有樂生之心。則臨變可作其敵。懾之氣。惟高明圖之。

### 答福建巡撫耿楚侗談王霸之辯

辱華翰。并所梓綸簡彙編。惓惓以奉行德意。安民生。飭軍政爲急。仰見公之高明。深達治體。識時務者也。憶昔僕初入政府。欲舉行一二事。吳旺湖與人言曰。吾輩謂張公柄用。當行帝王之道。今觀其議論。不過富國強兵而已。殊使人失望。僕聞而笑曰。旺湖過譽我矣。吾安能使國富兵強哉。孔子論政。開口便說足食足兵。舜命十二牧曰。食哉。惟時。周公立政。其克詰爾戎兵。何嘗不欲國之富且強哉。後世學術不明。高談無實。剽竊仁義。謂之王道。纔涉富強。便云霸術。不知王霸之辯。義利之間。在心不在跡。奚必仁義。

之。爲王富強之爲。霸也。僕自秉政以來。除密勿敷陳。培養冲德外。其播之命令者。豈不  
外此二事。今已七八年矣。而閭里愁歎之聲。尙猶未息。倉卒意外之變。尙或難支。焉在  
其爲富且強哉。公今不以僕爲卑陋。而留心於此。誠生民之福也。第須一一覈實。考成  
乃可有。效。若徒騰之文告而已。實意且化爲虛文矣。何如。議留入覲正官及澄汰縣令  
二疏。俱屬所司覆行。丈田一事。揆之人情。必云不便。但此中未聞有阻議者。或有之。亦  
不敢聞於僕之耳。苟利社稷。死生以之。僕比來。唯守此二言。雖以此蒙垢致怨。而於國  
家。寔爲少裨。願公之自信。而無畏於浮言也。

答進鮮樞使言進奉騷擾

近年進鮮舡隻。沿途騷擾。每處索冰錢二三十兩。夫役至百餘名。地方被其毒害。不敢  
聲言。以進鮮事重也。今年有李進者。暴橫尤甚。毆死賀御史之僕。此中臺諫皆爲不平。  
有欲言者。生力止之。謹以告之門下。竊意進鮮重事。固不敢減省。然亦宜裁其虛冒。舡  
隻革其附載私物。定以限期治其違犯之罪。仍選差謹慎小心者。勿令多帶積糈棍徒。  
庶奉使者知警。而地方官民亦戴公之德無窮矣。近內府諸衙門積弊。賴雙林馮公加

意釐革。天下蒙福。公若肯留意於此。即馮公不得專美。且樹芳名。需大受。亦在於此。唯高明圖之。

答邊鎮賈巡撫

近聞順義已歸。七八月可到。又將麻喇僧盡行殺戮。必忿其敗而逞怒於西僧也。老酋舉動乃爾。不知的否。幸差人偵實。仍思撫馭之策。

答兩廣劉凝齋言賊情軍情民情

羅旁自擅。不討之日久矣。往大征之舉。擒斬以數萬計。不可謂之無功。但此中猺賊。不能爲害。爲害者狼賊耳。猺山而蠡。狼流來無根。黠而好亂。大兵一臨。猺先走於狼。即竄穴中。嚙木抄。官兵搜而殲之。無敢抗臂。故所殺者皆猺賊也。山深菁密。逸刀漏網者。安得盡無。及大兵旣退。下令招降。則狼賊又聽招而來。或詐作流戶。願受一廛。或託言亡命。懼而歸死。有司不察。概行容納。彼乃嘯其徒侶。繕其故巢。又知我防守單弱。大役難再。逞其故態。擾我新民。故今日之爲亂者。蓋狼賊非猺賊也。此賊情之大較也。至於浙福之兵。皆浮募。無籍之徒。利於征。剽於防。守征。剽則有。鹵獲之利。功成。有。陞賞之榮。

而賊衆又弱而易攻。非南倭北虜。以血戰而得之者。故官兵無不樂於用。兵賊平之後。株守窮荒。升斗之粟。不足以餬口。一有失事。罪且不測。故防守之兵。無不利於人之爲盜。甚者。身自爲賊矣。鳥盡弓藏。兔死犬饑。故諸將士多張大賊勢者。亦未可盡以爲然也。此軍情之大較也。夫天下未有一舉百當。絕無後艱者。譬彼芟草銛鋤。既過根芽再萌。惟旋生旋除之耳。嘉隆之間。廣中處處皆盜。議者謂嶺表非我版圖矣。不穀違衆而用殷司徒凌司馬。數年之間。稍覺寧定。然二公承大亂之後。闢除草萊。開通徑路。急在除賊救民而已。其中寧無有缺而不備。粗而不精者。今日正賴補苴塞漏。以終成其功爾。殷之頑民。以衣冠之舊族。處畿邑之近地。猶世歷三紀。人更三哲。而後能變。况蠻荒榛菁之區。猿狖鼯鼯之類。可責之一旦服吾之教令哉。甲冑之士。喜言征討。閭閻之間。又苦調發。惟公熟計而審圖之。五嶺以南。盡以付公。不從中制。或以威服。或以德懷。在公必有勝算。敢獻警言。惟高明擇焉。

## 答南守備許樞使

士大夫宦南中者。稱公之賢。如出一口。夫人有賈譽於一時。而愈節於後日。等下成文。



也。惟公令聞旁達，久而愈孚。此豈可以聲音笑貌僞爲之者哉。惟益堅雅志，以副厥終是望。

### 答河漕姜按院

河工善後大疏，深中事理。卽屬所司覆行。張國用查係三月初間，已屬順天府差長解押發。乃至今尙未到。此必中途賄逃矣。頃已令該府捕長解家屬監候。又行逐程挨查於何處脫逃。務見下落。事係考成期限已迫。若此時尙未到。執事亦宜上疏自白。請旨緝拿。務令得獲正罪。庶足示懲。若已到則照在京例盡法處之。不可縱也。

### 答錢按院

膠萊之議。王憲副原未題請。但以己意經營。已什七成矣。王以憂去。不終其事。後來議者以爲奇功。張大其事。計費以百萬。而東人又憚於勞費。故屢議屢阻。今不另設官。不大動衆。惟責成巡撫該道。以終王憲副之功。需以歲月。必可奏績。但須爲撫臺者。肯以身任之事。乃可集。若按院不過建議而已。議者一人。行者一人。復爲道謀耳。

### 答應天巡撫伸遺論收遺才

宋陽山個儻高明之士。小節疎畧有之。然不如言者所云也。不穀與之同年最厚。今也蒙垢以歿。殊爲怛然。承示欲爲具題。此厚道也。公論難泯。諒無人言。生徒告遺才。昨部覆科疏。新奉欽依。恐難曲從。竊意諸生不過欲准考耳。如專屬提學。容其續考。稍從寬取。勿使有遺。則士子之願遂矣。何必按院收之而後爲當哉。舊時經按院收考。首數名多中式者。故諸生之喧告有以也。然亦私矣。唯高明裁之。

## 答雲南巡撫

先後手札。示滇中東西夷情。惟因俗以治。斯一言蔽之矣。至謂率循舊撫之政。不必另頒條約。尤見虛襟雅量。此正流俗之所不及。安可謂之無能也。安素儀過繼安樂。今已五年。一旦欲逐之他求。其勢必不能。且夷情惟論強弱。不循理法。其勢不足。以統馭。雖仇讐亦將甘心。頽首而歸。戴焉不然。雖以顏閔之賢。彼不服也。安樂旣爲彼中所歸。何必強奪。此係地方安危甚重。何嫌何疑。而遷延不決耶。且勘合終須完銷。但以尊裁處之。勿復致疑。

## 答吳總憲

辱華翰，深荷雅情。大惠概不敢當。輒璧諸使者。若係取之屬郡，仍望查歸主藏。庶後來查盤，僕得以自雪也。水災疏下，計曹議覆。俟勘至，當請於主上，特加優恤。

### 答宣大巡撫吳環洲言虜搆覺之機

九貢告成，國威遠讐。威公之功，閱視覈實，必有懋賞矣。市事諒亦不出此月可竣。昨語代者，姑緩其行。俾公得收全美。披對之期，當在冬初。今歲增賞，數亦不多。已語該部酌從其請。辱示間阻，恰台吉絕婚，土蠻激勸青酋，陰爲合從，俱爲奇策。但得二虜搆覺，則在，我可以坐制。此等機括，不惟時輩不知，即本兵素嫻邊事者，亦未可深語也。

### 答應天巡撫胡雅齋

前報吳中水災，大疏先至。已奉旨下部議覆。後見水利疏，有惡黨聚衆搶奪事，竊謂逆亂之萌，亟宜早折。故不及下部。徑擬旨嚴禁。公徒見水利旨先發，謂疏贖人後期，實不然也。天災流行，國家代有。朝廷亦何嘗坐視不爲拯救。頗奈吳俗輕狡，動爲捏造。家居者謂公督賦嚴急，見災不報。宦京者謂不必行動。徑宜蠲免。而兩都臺諫，遂有以此爲言者。不穀惟鎮之以靜，紛紛之論，一切請罷不行。會少師馬虛席，卽用公陪推。而羣議

始息。公堅定初心。無搖浮說。主上明聖。國是久定期。不令任事之臣見鑠於衆口也。

答憲長周友山講學

辱華翰領悉。吾所惡者。惡紫之奪朱也。莠之亂苗也。鄭聲之亂雅也。作僞之亂學也。夫學。乃吾人本分內事。不可須臾離者。言喜道學者。妄也。言不喜者。亦妄也。於中橫計去取。言不宜有不喜道學者之名。又妄之妄也。以指喻指之非指。不若以非指喻指之非指也。以馬喻馬之非馬。不若以非馬喻馬之非馬也。言不宜不喜道學之爲學。不若離是非。絕取舍。而直認本真之爲學也。孔子自言。人不如己之好學。三千之徒。日聞其論說。而獨以好學歸之顏子。今不穀亦妄自稱曰。凡今之人。不如正之實好學者矣。承教。敢直吐其愚。幸惟鑒亮。

答河道潘印川

賤恙遠辱垂問。深荷雅情。蒲柳之質。望秋先萎。入夏以來。眼患口瘡。牙痛纏綿。本旣脆弱。加以百責攸萃。晝作夜思。救過不給。故未老先衰也。年來所患。莫大於河。今仗公鴻猷。平成奏績。不穀因得藉手。以少效於萬一。一年內。庶幾可納筭鑰謝去矣。諗伏秋已

過諸工無恙。秋杪冬初。可告成事。第前行各撫臺勘議上流堤工。事克未聞奏報何耶。  
答宣大張巡撫

長昂黠虜。不臣久矣。朝廷本欲聲罪致討。但以禽獸畜之。故每事包容。今若悔罪真切。輸誠效款。亦許自新。貢馬不必勒令盡補舊逋。蓋虜之所利者。賞我之所重者。非貢也。若情在要挾。無悔懼之實。則閉關以絕之。嚴兵以伺其間。出奇以擣之。威行而後可用。恩也。惟審圖之。

答南兵部凌洋山言水災

吳中水災異常。皆執政非人。上千天和。惶媿。頃已三奉特旨優卹。俟勘至當有處也。進鮮內臣沿途生事。從來已久。棍徒倚勢妄爲。亦不盡內臣之咎。頃內守備喬誠齋自任處分。不穀遂獎而勗之。大疏一上。似攻其短。難以相處矣。不如勿上。庶不激而事濟。乃爲善也。

答福建巡撫耿楚侗

林賊前逃東埔。曾屬劉凝齋賂寨目蘇姓者圖之。業已就矣。會廣人爭功謀泄。賊逃而

塞目被髡。差人遇害。今蘇姓者幸復用。而讐此賊甚深。圖之必力。可再用前計擒也。所獻牙蜡。宜受而厚賚之。以堅其意。番憲副頃爲閩人所陷。謗議盈篋。非不穀極力保全。則削藉久矣。今始脫出火坑。留之恐終不免。乃銓部又謂代沈植者亦素有幹局。必勝所任。故此二事皆不能從命。然人之才具亦不甚相遠。唯賞罰明而信任篤。則人皆可使也。

### 答宣大巡撫

青酋今歲市馬數減。諸部效順。皆公制馭之功。敬服。二酋伏罪。順義與青酋之忠順。誠宜獎賞。但數年以來。東鎮每報青酋部衆。從土蠻犯遼。而環洲公堅謂無此事。不穀亦每以環洲公之言。報本兵臺諫。昭貢虜之無他。今若有此。則東鎮數年所報皆實。而環洲之言。似爲虜酋強解者。貢市從此釁端生矣。且二酋皆青把都部衆。如不能約束其衆。亦與有罪焉。今者罰處。屢能自贖。未見有功也。幸與環洲公熟討之。或將所罰頭畜。盡以給部衆之良善者。青酋自以公意量給服物以犒之。順義俟回日。另行賞勞可也。犬羊之性。唯在獲賞。必不問其所從來。且公專闢外。有利於疆場。便宜從事。可也。原虜

詞二帛納還。

答張巡撫

武廬龍者。各巡按皆力薦其賢。惟銓宰謂其善趨承以躡虛譽。爲驩虞以誑愚民。昔太平爲宰。知之甚真。已欲劣處。不穀止之。以有近日之轉。然不知此公之誠且僞也。大疏保留。於民心順矣。奈與銓部意左。恐未必覆允。惟公裁之。

答陝西提學李翼軒

承示查改書院併田糧事。一一明悉。必如是。而後爲芟草除根。他日亦不得議復矣。但軍屯難以招買。只宜募軍佃種納糧。幸惟裁之。比審學政精明。風標峻整。且夕部議公平。必當爲舉首矣。慰甚。令弟高掇。小兒得附榜末。通家世誼。益契深矣。何幸如之。

答應天巡撫胡雅齋

吳中蠲卹。部覆雖不能盡如所請。然比之嘉靖甲寅辛酉。已爲優矣。但踰格之恩。宜從上出。皇明祖制。凡優免稅糧。當內定於心。臨期便決。勿使人先知。要名於外。良亦爲此。乃聞公以議蠲分數。遂傳布於民間。彼中士民。方蒿目以望。而朝廷又不能盡從其請。

則恩出於下。怨歸於上矣。今宜如部議。宣布上德意。從實舉行。

答藩伯徐公學古

別楮云云。誠有之。不穀不俟見教。月前已馳書南中臺諫。爲公營解。傅子乃不穀門生。諒不相違矣。平生所薦達保天下賢者甚衆。皆不使人知。茲因示及。謾爾奉聞。亦以釋公之疑也。

答河道巡撫

膠萊通渠。先年王憲副泐之。工已強半。今但尋其遺跡。續其前功。以通商爲名。責之該道。假以歲月。可無大費而辦。要之。商通而漕亦利矣。奈何近年議者。開張太過。東人憚於勞費。百方阻撓。以故旋議旋罷。承教極盡事理。但欲動支錢糧。必經題請。而代公者又未知能任其事否。俟公入京面議。

答大同巡撫賈春宇計遼薊協爲聲援

辱示老酋回巢。宜加賞犒。及准青酋續市。俱制虜要機。雲中墩牆。俱用磚包。誠一勞永逸之計。但六百里邊牆。取之於班軍口糧。能辦否。幸與新督撫計之。先報土蠻大舉犯



邊。卽馳語該鎮戒備。堅壁清野。李帥持重勿出。使戚帥選銳出關應援。而自以重兵駐一片石。伺間出奇邀擊。近報賊犯寧前。見我兵雲集。卽望風而遁。然非大舉賊也。承勅允合機宜。自此遼薊聲援相通。二將協和。勢若常蛇。不穀於此。頗殫心力。但時人未必知耳。

### 答兩廣劉凝齋

鬱林獲功。在公建牙之始。先聲震疊。軍威丕振矣。薄賚未足以酬。尙有待焉。但聞推官劉子麒。先被賊執。今報病故。豈卽歿於賊中耶。抑脫賊而後亡也。廣右議征八寨。此或不容已者。已屬本兵從其請矣。廣中軍令素弛。募兵爲賊。今一切以法繩之。須行之以漸。而又有以待其變。乃可唯審圖之。昨據閩中報。東埔寨主言。林賊雖投入暹羅。尙往來攻彼寨。寨中蘇姓者。與之深仇。必欲擒之。此卽公撫閩時用計購致者。昨已密屬耿楚侗及呼帥良朋。仍循公前策。使蘇姓圖之。此賊若往東埔。公不必再遣間。恐爭功漏泄。如昔年之事。若在暹羅。則可用計亟圖。以杜後患。

### 答保定巡撫張濟東

林知府被盜。此中一月前已知之。近京地方仕宦遇盜。豈容掩乎。邑令之掩匿。蓋亦愚矣。又九月初間有人言。保定地方礦賊竊發。官軍逐之。致傷十餘人。久之亦未見奏聞。不知其事實否。附此一問。

答南司馬凌洋山

辱示議處馬快缸疏。切中事理。已屬兵部覆行。前得龔道長手書。極稱羅旁盪定之功。而深以劉凝齋之翻前案爲失策。且言前誤用司道之言。率爾題請。征剿後。親巡羅旁舊巢。始知不必用兵。惟當從容處畫。以終前人之功。固未嘗有一語搜求。承示謂蓄有機括。恐未然也。近日擬旨及覆凝齋書。咸用其意。謹錄奉覽。

答兩廣劉凝齋論嚴取與

八寨之征。在兩鎮似不容已。本兵已覆從其請。鹽利事。自隆慶五年建議。今十年。所積寧止五萬。已擬旨下部稽查。往日浪費之弊。雖不可返。庶可救於將來耳。監司撫按。取受不嚴。交際太多。費用太泛。皆嘉隆以來積習之弊。各省大抵皆然。而廣中爲甚。自不穀待罪政府。以至於今。所却兩廣諸公之餽。寧止萬金。若只照常領納。亦可作富家翁。

矣。若此類者。不取之民。而執辦耶。夫以肉驅蠅。蠅愈至。何者。以致之之道。驅之也。司道之取。與不嚴。欲有司之從令。不可得矣。督府之取。與不嚴。欲司道之從令。不可得矣。尊示謂稽察吏治。貴清其本源。誠爲要論。顧積習之弊。亦有難變者。一方之本。在撫按。天下之本。在政府。不穀當事以來。私宅不見一客。非公事。不通私書。門巷闕然。殆如僧舍。雖親戚故舊交際常禮。一切屏絕。此四方之人所共見聞。非矯僞也。屢擬嚴旨。獎廉抑貪。欲庶幾以身帥衆。共成羔羊素絲之風。而終不可易。乃苞苴之使。未常絕也。鑽刺之門。未嘗墜也。雖殮荼茹壘。徒自苦耳。何裨於治理耶。雖然。不穀固不敢以人之難化。而遂懈其帥之之心也。早夜檢點。惟以正己格物之道。有所未盡。是懼。亦望公俯同此心。堅持雅操。積誠以動之。有頑冥弗率。重懲勿貸。至於中傷毀排。則朝廷自有公論。可勿恤矣。張帥已饜飽。難以驅策。代者似可用。幸少優假。以鼓勵之。諸惟鑒亮。

答藩伯周友山論學

不穀生平於學。未有聞。惟是信心、任真、求本、元一念。則誠自信而不疑者。將謂世莫我知矣。屢辱華翰。謬爲許可。孰謂世無知己者乎。以代公雖去。猶未去也。君令臣恭。古今

通義。如其不善。固不可強人以必從。如其善而莫之違也。不亦善乎。今人乃務抗上令。以爲名。不知慢令。方命。孔子以爲惡德。堯舜之所不容也。近見江右二司入京者。語及常推事。猶是常而非公。乃南中臺諫。亦遂有物色之者。不穀已極力曉示之矣。新直指出。仍當詳語之。然公既有取於不穀之學。則世俗之橫議。亦勿恤可也。

答三邊總督鄧文川

順義東歸。終始守約。欸順彌堅。皆公之鴻略也。至欲從寧夏內邊經行一節。鄙意切謂當力阻之。然計其時從違已定。故亦不及矣。寧延二鎮。已免擾費。又因以杜謠虜往來之費。疆圉之利也。張臣調用以張傑代之。俱如教屬本兵議行。甘肅侯公處虜功多。須請旨特與一廕。其前廕則不可復也。餘領悉。

答陝西學道李翼軒

頃者部議評執事卓然異等。望實愈茂。賜環有日矣。不穀愛賢一念。實出至誠。辱遣謝彌以爲媿。

答兩廣劉凝齋計處海賊

辱示羅旁兩山漸次平定。慰甚。龍川河源撫賊。旣冥頑不悛。法當芟除。且粵中安插各撫民。將視此爲向背。除去此種。餘卽破膽矣。聞林賊近已爲暹羅招致。或可因而圖之。頃已寄語閩中當事者。言此賊在東埔。則屬之閩人。廣中不必措意。在暹羅。則屬之廣人。閩中不必爲謀。恐兩處爭功如昔年也。

答河道江心源言棍徒假借。

近來各處盜防稍弛。故借淮事以警之。非苛求於左右也。猥辱遣謝。深以爲媿。承示管河諸君。但宜責成久任。俟勘官奏至。悉如所擬留用也。近訪有棍徒假名張梅。稱爲不穀家人。於江南北一帶貿易。聞公亦爲所誑。給與牌票。悉免關稅。又擅乘驛船。有所求索。昨小兒嗣修已拏獲。付之於理矣。小兒居家。閉門誦讀。卽敝郡有司。亦罕與接見。四方相知有惠。毫不敢領。豈復差人遠事貿易乎。此後再有奸人假稱不穀族姓家人者。不論真僞。卽置之重法。如公不忍加刑。希差人拏解來京。願得而甘心焉。仍乞通行責屬。嚴加緝訪。有縱令脫逃者。將官吏提究。庶奸人無所假借。地方亦免擾害。往王、敬、所、督、漕。曾有詐稱、舍、子、弟、者。卽時捶殺。不穀至今感之。諒公愛我。又當厚於敬所也。敢

布腹心。又聞前如江令有令弟名一鯤者與焉。信否。法紀所在。恐不得以親撓也。

答福建巡撫耿楚侗

貴屬諸君才品。公評騰精當。俱貯之囊中。次第用之。沈二等昨以才望擢用。公論素許。劉豈能中之。丈地畝。清浮糧。爲閩人立經久計。須詳審精覈。不宜草草。各經委正官朝覲畢。即促之赴任。林賊旣入暹羅。已專令廣人圖之。閩中不必措意。恐語泄復蹈前日之轍。若於東埔仍有往來。則結江黃以爲聲援。亦一策也。鄧令弭盜之功甚奇。雖不必奏績。而其功宜紀錄。

答薊鎮巡撫張峴來

虜酋帥衆掠史車二酋。原因盜馬索賞耳。夷虜彼此侵盜。乃其常態。諒無他虞。但史車二酋。每每挑釁於各部。及其來攻。又急控我。謂其侵犯。且求庇援。不從。則彼謂我不足恃。而有離心。從之。則各部又謂我曲庇有罪。而竊爲口實。要在辯其曲直。從公處之。頃直指倉惶來報。已詳示以此中委曲。令聽督撫處分也。

答南守備樞使喬誠齋言治差役騷擾

南中差遣。公所措畫。已極嚴密。自今奉差者。恪守約束。必無事矣。驛遞積猾。與各官跟隨棍徒。通同爲奸。侵欺破冒。而內臣爲其蒙蔽。事發乃獨任咎。弊誠有之。奉教。卽示各衙門。嚴加禁治。

### 答殷石汀

小兒嗣修。懋修。曾從汪南明公學古文詞。昨懋修場中五策。似欲步趨其一二者。今附二冊。煩爲轉寄呈覽。以謝其指教厚意。然嬰兒學語。殊未成音。聊以博一笑云爾。

### 答兩廣巡鹽

官運廣鹽。改復商販。誠爲省便。但殷石汀以古田初復。戍兵額餉。取給於此。原議三運。後乃漸滯。殆轉輸造船之法。有未周悉。似難盡咎於官運也。今擬兩路并行。似於官民俱便。人之趨利。如水就下。旣開此竅。路近而利大。將來廣右之運。必至盡廢。古田軍餉。將安所出。不可不深長思也。更望熟計其便。

### 答陝西學道李翼軒

華翰領悉。諭榮滿期迫。以執事風望。目下便宜喬轉。今既有欲盡之情。當暫停以俟奏

最也。

九十

答雲南饒巡撫

別楮云云。前已具復。想道遠尙未徹記室也。廣右鑄錢。議欲採銅滇中。乃場屋經生之譚。原未題請。寧可遂行。承示剖析已悉。不穀得據此以謝妄議。

答邊鎮巡撫高鳳渚

正月承翰示。未及具復。茲又示神利二堡工完。及陽方口邊垣奏報疏。卽下所司議覆矣。盤道之工。一向以爲難成。皆據道旁之言。卽該道亦非親履其地。故雖修築。止具文耳。公一行親歷。而膠土水泉。應時而出。豈鬼神所輸耶。則今昔之虛實較然矣。公開府一方。事有利於邊防者。得以便行事。况二工原經奏請者。斟酌贏縮。一任尊裁。公雖不自言功。自有不容掩者。

答山西巡按趙用吾

礦盜事。卽屬所司議覆。此事初起原微。撫臺倉皇奏報。致厯聖問。奉旨查叅。又不作速具奉。此傳公之過也。大疏勤報已明。諒無回護。



答兩廣劉凝齋

承示林賊入暹羅。在廣中圖之爲易。時閩人亦有獻結束埔合從之策者。僕已止之。專屬廣中。以便從事。但暹羅既被其迫挾而受之。則此賊尙彊。恐暹羅不能獨制林賊。亦必深防我。圖之閩使至彼。少泄其事。則謀敗矣。此中須別有奇策。乃可奏功。公言此賊決了在今歲。僕固未敢以爲然也。羅定兩山已定。幸責該道有司。加意撫綏。恩威並用。俟人心既定。法令得行。自可化浮移爲土著。卽編爲排年可也。劉推亡事已悉。

答司成張宏陽

承華翰。知公有卜夏之痛。得許司成書。極言公苦悰。殊爲懸念。頃方欲借重南院。旣歸志已切。不可強留。卽屬銓部覆允。用途高致。然乘此遵養。大畀固有日也。

答劉凝齋

八寨兵已奏捷。諒此時竣事矣。武弁遊民私買賊緞。乃廣中沉痾之病。今得力祛此弊。則功賞皆實。但先年有旨。凡大舉征剿。皆憲臣親臨紀功。今不知紀功是何司道官。紀功得人。積弊乃可革也。黃總戎頗有志向。不安下流。但微負氣。將官負氣。正可駕馭而。

用之固愈於頽靡。熱剝削以事結納者也。俟到任信至。如尊諭戒諭之。舊例二司領敕行事。有地方責者俱不進賀。近來往往有之。實非事體。至如進表官嚴限回任。又奉有明旨。而惠潮二道。乃經年不行赴任。殊爲違抗。俟有間。但擬自行查。此等事。全在撫按綜覈。違者必據法處之。則人自知儆。萬里之外。朝廷安得盡知。卽部中皆難一一查覈也。

答宣大鄭範溪言省扈蹕惠程

承示順義貢物已進上。大疏屬所司覆行。竝有一事。預爲告陳。先年聖駕謁陵。宣大軍門移駐塗道。扈從閣臣。皆饋送下陳。殊爲煩擾。今次斷不敢當。頃告之司禮諸君。諸君亦以爲然。望公俯亮。概行停辦。若備而不受。爲費多矣。內閣中貴。旣免他處。自可悉停。亦以少紓民力。由中之言。萬惟鑒允。餘俟另復不一。

答甘肅巡撫侯掖川

承示廕典以令孫承之法之正也。第公愛子情深。辱在知契。亦宜仰體。但須懇疏乞恩。下部議覆。乃爲穩便。不宜以咨行也。因憶徐存翁長郎官生名璠者。初亦以科場事革

廕。後在閣考滿。廕子中書舍人。例以次子及孫承廕。存翁具疏乞恩。蒙世廟特允。仍以播廕。此係輔臣特恩。雖不可援以爲例。然公久勞邊鎮。賢郎昔以幼冲爲人所誤。情有可原者。若引罪哀懇。聖慈或亦軫念也。敢布腹心。惟高明裁之。

答翰學黃葵陽

禫除承俯念。兼之貺儀。深荷雅意。所惠概不敢當。輒以璧諸使者。謝謝。小兒敬修。懋修。夙承教迪。茲並捷於南宮。敢忘所自。但不穀德薄享厚。弱息又俱點仕籍。殊爲慄慄耳。

與浙江撫院

承示拾遺鄭袁州。物議甚重。不能存之。龍宗武。陳一飭。部擬罷斥。不穀違衆議而薄謫之。龍出不穀門下。素知其有才。若陳則止憐其爲新甲科。不忍遽棄。固未知節行之高如此也。調官後。曾至朝房。一見。問其姓名。亦訥。不能言。宜其不悅於流俗也。今旣在降調之列。他日尙可澡滌擢用。承教已處之囊中矣。外小兒嗣修書來言。執事辱賜厚禮。概不敢當。已璧諸使者。未知得歸主藏否。此後無煩再及。庶小兒得道不恭之罪。在臺下亦省差遣之煩也。便中附謝。并布區區。幸惟原諒。

答按院王公壽

鎮江以數百惡少。攘臂橫行。非有潢池弄兵。閭左揭竿之變也。當時兩御史親臨其地。衣繡持斧。兵衛森列。能擒治首惡數人。卽衆皆披靡。鳥獸散矣。乃坐視其橫肆。不爲之所。反爲之發官帑。弛柵欄。以苟幸無事。獨歸咎於府佐。將令稔惡者益無憚耳。如聞江北諸郡。皆有此風。故借此一警之。來教謂宜重治首惡。撫恤良善。嚴禁私錢。俱於事理切當。已屬所司行之。

答雲南巡撫言沐鎮守安土司事

疊辱翰貺。深荷雅情。厚貺終不敢當。謹領眼掠。及催生杯二事。用承遠意。餘璧諸使者。催生杯。不知何物所造。何所用之。便中示之。以廣異聞。外霑益事情。既經所司摘叅。理須完結。司道避嫌。深屬淺見。今朝廷之上。公道昭然。是非可否。一以理法爲斷。何嫌之有。卽如沐氏事。自嘉靖以至萬歷。十有餘年。人皆避嫌。莫爲之處。朝受其賄。暮卽參之。欲以滅其納賂之迹。而事愈不可解。自僕當事。明目張膽。爲之排解。十餘年成案。一朝削除。於是沐氏始得有其爵祿。而朝廷法紀亦彰。使僕當時少有避嫌之心。則其事至。

今不結。昔也。受賄之人。皆袖手捲舌。莫一言爲之辯釋。乃僕水米無交之人耳。故知凡避嫌者。皆內不足也。如謂許其繼嗣。恐安國亨與者繼榮。或生事端。則安樂者之入霑益。四五。年矣。不聞國亨與繼榮。有言何至今。乃生事端乎。繼榮小醜也。不能爲害。國亨雖悍。近乃遵僕五章之約。奉職惟謹。貴州巡撫方欲爲之題請。復其冠帶。彼又安敢復啟釁端。自取褫奪乎。今但當據霑益部衆所推戴保立者爲之題請。了此勘合。他日若有變動。再處未晚。其王易世者。似不必早爲辨豁。待此事處明。其罪自應未減。并莫州守亦并申理。今卽先釋易世之罪。亦不能完銷勘合也。疏已令人寢之。迺西事誠如翰示。公移各件。俱見遠畧。諸惟鑒存。

答賈春宇

僕久握大柄。天道忌盈。理須退休。以明臣節。况當典禮告成之日。正息肩稅駕之時。抗疏乞休。甚非得已。迺聖恩留諭再三。未忍固求私便。輒復就列。徐俟再圖。辱華翰。勉以大義。具悉爲國至忠。兒輩寡學。並竊科名。猥辱華翰。尤深感切。

答憲長徐中台

不穀比者抗疏乞歸。羣情驚惑。不知鄙意固有在也。夫不得決去於宅。憂之時而乃乞骸於即吉之後。此豈尋常大臣所爲進退者耶。顧此意不敢以告人。而世亦無知我者。玆承華翰。深獲我心。但獎借過情。殊用爲愧耳。老母誕辰。猥辱記憶。小兒冒竊高第。實出御筆親題。不穀德薄享厚。日夕兢兢。又辱華箋賜賀。不勝感戢。

答宗伯董潯陽

僕之菲陋。僂弱。往厠詞林。得隨長者後。徒幸簪筆荷橐。可供文墨而已。不自意徵時厚幸。致位台司。謬膺顧託之重。力輕於鴻毛。任重於泰山。受事以來。惴惴如臨淵谷。恐一旦顛蹶。以貽知己羞。茲賴主上聖明。中外又安。苟幸無事。乃敢抗疏乞歸。冀得完軀以去。誠陳力就列。非敢賈譽於退休也。雖奉諄諄懇留。暫爾復出。然惶懼之懷。終不能釋。頃賢郎至。辱華翰獎借。爛然盈楮。不匡其所不及。而假其所不能。讀之使人汗流浹衣也。兒曹寡學。幸附令孫驥尾。階致青雲。僕之奉教於門下有年矣。於賢郎謬有一日之雅。今兒曹又在世講末。僕之於翁。相契豈有量哉。辱惠厚儀。不宜抗拒。但比來交際久廢。輒敢璧諸使者。草草附謝。并布區區。

壽陳松谷相公

恭惟台師。願重丘園。望隆朝野。日者長公太史。乞恩歸覲。仰感聖懷。念舊學之忠勞。嘉仙齡之增衍。特頒異數。用介壽筵。誠曠世之希逢。熙朝之盛典也。至於橋梓傳經。繼升講幄。啣恩策駟。耀寵庭闈。又詞林未見者。載之史冊。以爲侈談。矧正夙荷甄陶。親逢盛美。其爲慶幸。萬倍恒情也。正猥以菲劣。謬膺重任。夙夜兢兢。若臨淵谷。頃扈從山陵還。懇疏乞骸。冀以少休。奮力。獲免顛躋。乃不蒙俞允。致履聖母慈諭。申命諄切。不得已輒復視事。以俟徐圖。然力竭而馳驅不止。將不知其所終矣。辱在門墻。幸有以教。不腆薄幣。階長公而布之台座。少致岡陵之祝。惟鑒其誠悃。曲賜塵存。幸甚。

答潘伯賀澹菴言得國士

別楮一一領悉。夫人才難知。知人固未易也。不穀平日無他長。惟不以毀譽爲用。舍其所拔。識或出於杯酒談笑。或望其手神意態。或平生未識。一面徒察其行事而得之。皆虛心獨鑒。匪借人言。故有已躋通顯。而其人終身不知者。如公所言。咸冀援於衆力。借譽於先容。若而人者。焉足以得國士而士。亦孰肯爲之用哉。辱示略陳所以。自是誠宜。

忘言矣。

九十八

寄有道李中溪言求歸未遂

一歲中兩奉手翰。坐冗且無南翼。久失裁謝。死罪。正少無世韻。宿有道緣。不意爲時羈縻。遭逢明主。備位台司。十餘年間。負重剖繁。備極辛楚。然遵道之志。未敢少衰也。頃者賴天之靈。中外又安。國家無事。乃稽首歸政。懇疏乞骸。亦欲逃慕留侯。庶幾得棄人間事矣。乃蒙聖諭諄切。朝議懇留。不得已輒復視事。以俟徐圖。但恐世纏日錮。歸宿無期。缺悵缺悵。劉道長九澤書至。具言道履康吉。仙齡增衍。欲建坊表閭。以昭盛世人瑞。誠觀風者之事也。承差旋肅此附候。奏對拙稿一部。中有乞歸本末。謹寄呈一覽。別有專啟。付令嗣中書君處。想當覓便以達左右。萬里緘書。不勝馳慕。

答兩廣劉凝齋料擒海賊

廣中舊將。唯陳璘獨存。羅旁餘孽未靖。尙須經理。未奉教之先。已屬本兵議覆。戴罪立功自贖。承教。蓋先得我心之同矣。林賊事。竊謂公旣密圖。不宜又騰之章奏。致有漏泄。方欲寢奏。而差人已投進矣。賊甚狡。而廣人貪功寡謀。向以敗亡餘卒數十百人。直泊



近澳。竟無有睥睨之者。公謂諸番之計不成。彼無所容。必復反於廣。反則擒之。僕固未敢以爲然也。廣西官鹽事領悉。

答周宗侯西亭言春秋辯疑

兒曹忝竊。猥辱遣賀。深荷雅情。厚惠概不敢當。謹領紗鏡及佳刻三種。用承遠意。餘輒璧諸使者。幸惟原亮。春秋本魯史舊文。仲尼稍加筆削。蓋據事直書。而美惡自見。非有意於褒貶也。自三傳啟穿鑿之門。世儒襲見聞之陋。聖人記事之意。漫以弗存。所謂以小人之心。度君子之心。僕嘗欲論著其說而未暇。今讀睿製辯疑。則多與鄙見相符。蓋僕至是可無言已。敬服敬服。

答河道潘印川

兩奉翰教。領悉。河工效勞諸君。奉旨加恩。銓部以冗。遂忘題覆。茲面促之。始全據具題請。加級陞補。一切從優。如五州同。三爲實行。二爲吏員。部擬三司首領。僕皆特與府判。他俱類此。蓋不如是。不足以勸有功。而勵任事之臣也。書言人之有爲有守。汝則念之。僕嘗以此入告主上。言國家爵祿。以待有功。有功之人。不但宜加以爵祿。還須時時在。

念不可忘也。恃愛具道所以游君。卽加銜代陳大參督催。爲大界地。運同缺先已推補曹鏞。俟兩淮有缺卽用之。

答福建巡撫耿楚侗言致理安民

丈田賑饑驛傳諸議。讀之再三。心快然如有所獲。蓋治理之道。莫要於安民。究觀前代。孰不以百姓安樂而阜康。閭閻愁苦而危亂者。當嘉靖中年。商賈在位。貨財上流。百姓嗷嗷。莫必其命。此時景象。曾有異於漢唐之末世乎。幸賴祖宗德澤深厚。民心愛戴已久。僅免危亡耳。隆慶間。仕路稍清。民始帖席。而紀綱不振。弊習尙存。虛文日繁。實惠益寡。天啓聖明。雖在幼冲。留心治理。僕每思本朝立國規模。章程法度。盡善盡美。遠過漢唐。至於宋之懦弱牽制。尤難並語。今不必復有紛更。惟仰法我高皇帝懷保小民一念。用以對越上帝。奠安國本耳。故自受事以來。凡朝夕之所入告。教令之所敷布。惓惓以是爲務。鋤強戮凶。剔姦蠶革。有不得已而用威者。惟欲以安民而已。姦人不便於己。猥昔時政苛猛。以搖惑衆聽。而迂闊虛談之士。動引晚宋衰亂之政。以抑損上德。矯扞文罔。不知我祖宗神威聖德。元與宋不同。哺糟拾餘。無裨實用。徒以惠奸宄。賊良民耳。世

儒、達、治、者、黜、雖、勉、違、上、令、而、實、未、得、於、心、所、以、宣、上、達、下、者、苟、以、文、具、規、免、罪、責、而、已、比、見、諸、公、所、條、布、訓、辭、雖、若、嚴、整、而、肫、肫、愛、民、之、意、藹、然、於、言、外、以、是、服、公、之、高、識、宏、抱、非、世、儒、所、能、及、也、願、益、自、信、而、堅、持、之、監、軍、道、裁、革、爲、便、彭、湖、賊、未、必、卽、是、真、倭、且、嚴、備、以、待、之、不、必、勤、於、遠、也、人、旋、附、復、拙、稿、末、卷、有、歸、政、本、末、謹、附、一、覽、

#### 與楚布政馮修吾

兒曹忝竊前已承厚惠。茲不敢重冒。謹用返璧。幸惟鑒原。外黃州問革舉人瞿九思。長小兒鄉同年也。素以才高見忌鄉曲。以政陷於文罔。非其罪也。惟仁人酌宥之。餘不悉及。

#### 與楚撫院王見峯

黃州問革舉人瞿九思。長小兒鄉同年也。初以衆毆父母官。爲向道長劾奏。問發口外爲民。此時行法之初。見其情重。遂從所擬。後廉知其爲鄉曲所忌嫉。坐以重罪。殊爲誣枉。且其人乃瞿憲副之子。文學甚優。其子亦有奇童之稱。母老子少。身當遠涉。僕聞而憐之。渠有辯疏。聞憲司咸知其枉。欲爲未減。按院朱君亦將允之。但事關兩院會行。而

公以其事奉旨。特難於翻案。竊謂法行而當。人心乃服。一夫不獲。時予之辜。若果冤枉。宜從辯豁。僕亦不敢固執前旨。致令天下有冤民也。幸會按院審處之。餘惟鑒亮。

答甘肅巡撫侯掖川

賢郎廕典事。銓部據例執奏。奉特旨允從。乃異恩也。夫上之注念於邊臣如此。諸公抑何、以、仰、答、乎。

答兩廣劉凝齋

八賽奏捷。西鎮將士。不爲無功。但其敍錄稍泛。承教謂近日邀功希旨者。宜漸約之。深合鄙意。科中以奏報異同。疏請行查。議者遂謂公啣巡撫之不候會本。輒先入奏。故有卻。殆以私意相窺也。暹羅夷使所呈林賊事三件。渠來中國數年。職爲通事。非彼中要人所言。未必得其要領。但言其用事者姓名。及甘波蔗云云。似有可採者。謾附以備。筆之。萬一非以爲奇也。

答保定巡撫張濟東

亡弟南歸。辱給勸合。謹繳納。禁例申嚴。頃有頑僕。擅行飛票。騎坐官馬。卽擒送錦衣。榜

之至百。其同行者。俱發原籍官司重究矣。仰惟皇上子惠窮民。加意驛傳。前遣皇親。於武當祈嗣。亦不敢乘傳往來。皆宿食旅舍。蓋上之約已厚民如此。僕忝在執政。欲爲朝廷行法。不敢不以身先之。小兒去歲歸試。一毫不敢驚擾有司。此臺下所親見。卽亡弟歸。亦皆厚給募資。不意又煩垂憐也。此後望俯諒鄙愚。家人往來。有妄意干澤者。卽爲擒治。仍乞示知。以便查處。勿曲徇其請。以重僕違法之罪也。前奉旨查朝覲官遣牌馳驛者。久不聞奏報。辱在知厚。敢以直告。

### 答河道潘印川

辱示進鮮船隻。誠於築壩有碍。惟早行則兩不相妨。已屬司空議覆。但事干內官。動以遲誤進鮮爲詞。必不得已。先選舟數隻。停泊壩外。以待盤剝可也。武職陞級事。已屬本兵議處矣。

### 答臺長邵梅墩

辱示行取各官考語。具服精鑒。常君者。固僉憲昔誠以訊盜事控之於我。方詆其短。復訪常之所執爲眞。故徵用不遺。今奉教。自當置之妙選也。

## 答承天守備樞使王涵齋

陵工告成。費省工堅。地方受福不淺。此雖在事諸公之功。然就中調停處畫。公之功多矣。頃於皇極門閱視新工。司禮馮公、張公、及工部諸公咸在。語及顯陵事。不穀因舉平日所言。公與楊君、節省忠勤。成此大事。費不當先年之什二者。對衆昌言之。馮、張亦亟爲嘆服。且云。昨已奏之聖母皇上矣。內外在事諸君。咸嘖嘖稱之不已。惟公英聲茂實。騰於朝著。敬服敬服。前奏陵府校尉。卽屬本兵議留。

## 答宣府總督鄭範溪

辱示虜情。一一領悉。順義病旣狼狽。豈能復起。土蠻素無遠畧。且與西部不睦。豈肯爲之勤兵報怨。切盡之情。亦必不能成。虜勢窮蹙。可見矣。順義一故。變態百出。顧吾所以應之何如。此事當勞公經畫。然拓土開疆。安邊服遠。亦在於此。今宜事事設備。預爲之圖。以待其變。可也。鄧兵憲有才畧。習邊事。俟有缺卽補。不別推也。鎮口堡開礦事。公所諭咸中機宜。但利之所在。人爭趨之。且虜人不知所謂礦。皆板升之徒導之。板升之人雖得礦。亦不知煎取之法。又內地之人導之。以中國法度之嚴。人猶以死犯禁。况邊徼

之外。犬羊之類乎。如此推之。雖能暫戢於今日。亦難厲禁於將來。尙煩公之籌慮。人旋草草。番文三番。仍附納備查。統惟鑒存。

答江西巡撫王又池

逋盜就擒。足消地方隱禍。石僉憲昔守寧州。屢獲巨盜。故卽畀以該道之重。今其效乃爾。天下之事。豈不在用人。哉。秦和盜發於公未任之前。今愆期未獲。似亦用非其任耳。

答石麓李相公

弟違遠光儀。於茲十載矣。以綿力負戴之不暇。無能時時修問左右。以自罹於疎薄。無所逃罪。翁不加督過。已爲厚幸。乃辱尋舊盟。懷之以好音。臨之以重使。豚兒忝竊。又承厚情遺纒。珍貺駢蕃。益彰弟之不德也。愧感愧感。弟以謏劣。謬肩重任。恒恐中道顛蹶。有負夙昔期許之心。茲幸主德日新。國家無事。弟乃以其間乞身而歸。未蒙俞允。付屬愈重。早夜兢兢。誠不知死所矣。翁素憐我。何以策之。俾獲全於末路乎。使旋草草附謝鄙情。薄敬肅具別楮。統惟鑒存。

答楚撫院王見峯

張江陵書牘 卷下

頃者陵工告竣。仰仗鴻猷。費省工堅。功高賞薄。尙當有待也。承教示。一一領悉。謹欸復如別幅。統惟鑒存。

一五開之事。實林維喬寡謀以激之。若使當劉應被刺時。佯爲查處行刺之人。而徐徐撫定之。亦必無事矣。今該道旣認能處。姑待之可也。

一德安藩宮災事。前偶有所聞。故直以奉告。今從寬盡法。在公自有鑒裁。但事已隔歲。久而不決。將來恐他人發之。今似宜速了。且主上睿聖。若其中有隙。亦難逃於日月之明也。

一楊安誠旣有華容例。具題相應。

一屯田道事簡。併之驛傳。誠爲省便。沈君有缺。卽補。必不久淹。若俸資已及。他轉亦可。一留守司。卽進表一員。可裁也。

答順天張巡撫

兩承翰示。一一領悉。前奉明旨所查。惟朝覲遣牌馳驛者。卽所參苑寺太原二人。亦足以應詔矣。若概及其他。恐干連人衆。所傷者多。今姑爲隱。涵。後若再犯。卽達官顯貴。亦



不能少貸矣。舊染頹俗。久難驟變。彼頑梗玩肆之人。以爲法。雖如是。未必行也。今量處數人。以示大信於天下。庶幾有所憚。而不敢犯乎。然惟在各撫按以實奉行。不致廢格詔令可耳。今臺諫諸君。屢奉嚴旨詰責。常慮無以塞明詔。苟搜得一事。如獲奇寶。一經指摘。聲價頗損。故願諸公之母。舍己以徇人也。至於三司官在本省地方。夫馬廩餼。用之自不爲過。惟出境則不可。若宣大之於薊遼。則地隔兩鎮。各有軍門統屬。自難以相通。若奉敕者。則不在此例矣。辱垂詢。謹復。

#### 答宣府張巡撫

辱手翰。貢馬已入。虜情馴服。慰甚。去年青酋亦未赴邊。不來亦省事。不必責其親赴也。張剛留任。別選獨石。俱屬本兵議處。近得西部消息。言順義病已沉錮。部下酋長。各自爲心。此酋死。虜中當大亂。恐土酋將乘其敝。諸制禦方略。願公預圖之。務練兵積食。密求自治。以待其變耳。

#### 答憲副吳道南

前承翰貺。已具復。所璧厚惠。仍希查存。竝手翰一一領悉。順天撫按。奉旨查覈遣牌馳

驛者十餘人。而公與焉。不穀知之。委曲多所涵宥。惟量用數人。以應明詔。然公昔別時。謂自行雇募。不煩有司矣。乃又挂時議何耶。朝廷法在必行。後宜慎之。恃厚以告。幸惟鑒原。

答司寇王西石

兒曹寡學。冒竊非望。猥辱翰脫。深荷盛情。兒懋修。前過貴縣。得望見下風。即承鑒獎。以館閣期之。今果冒忝至此。伯樂一顧。遂成駿品。感謝。弟德薄享厚。日夕慄慄。懼顛躋之遄及耳。頃者乞歸。寔揣分虞危。萬非得已。且欲因而啟。主上以新政期君臣。於有終。乃不克如願。而委任愈篤。負戴愈重。僂弱之軀。終不知所稅駕矣。奈何。佯來。諭慈闈多慶。福祉日臻。翁聚順承顏。起居休暢。慰甚。人旋附謝。別楮侑柬薄物。統冀塵存。

答河道潘印川

兩承翰教。領悉。比者平成奏績。公之膚功。固不待言。然亦藉督漕同心之助。況河漕歸併。已有成命。則今之代江者。亦即以代公。不可不慎也。反覆思之。莫如洋山公爲宜。此公虛豁洞達。昔在廣中。僕妄有指授。渠一一取其意而行之。動有成功。則今日必能因

襲舊畫。以終公之功。一善也。官尊權重。足以鎮壓。二善也。留京參贊重任也。朝廷加意河漕。特遣重臣以行。則在事諸臣。誰不奮厲。三善也。南中道近。聞命即行。不煩候代。則漕事不致妨廢。且得數月與公周旋。同心計處。何事不辦。四善也。公卽旦夕回京。亦不過添注管事。駢枝閭位。何所用之。不如卽代洋山。是身不離南中。可以鎮異議。屬人心。此中八座虛席。一轉移間。又無妨於他日之柄用。於公亦有利。五善也。有此五善。慮之已審。故違部議而請上行之。恐公不達鄙意。敢布腹心。

#### 答宣大巡撫鄭範溪

承示哈酋東行已止。深慰懸慮。頃者奉書。謂欲止其行。須得真情。曉以利害。乃中機括。今其本情。乃順義左右欲借事遠之故。公一爲點破。而彼心遂悟。所謂咫尺之書。賢於十萬之師也。仰甚。然細查虜情。順義部衆已離。邊圉自此日多事矣。願公之留意而熟圖之也。

#### 答山西徐巡撫

太原守投揭部院。自辯馳驛非其本意。悉由相知者差人護送。都臺卽欲據揭併參。不

穀喻之乃止。原揭奉覽。蓋聞智者不先人而後已也。仁者不危身以邀恩也。夫各撫按司道之公。背明旨。而以傳驛徇人也。冀以避怨而施德也。今既不見德於人。而又有累於已。豈不兩失之乎。仁智者不爲也。公嘗告我曰。今內之紀綱政事。已覺振肅。而外之吏治民風。尙未不變。則諸大吏不以實奉行之故也。不穀深韙其言。今若此。非可謂之奉法也。以公之高、明、彊、毅。而猶若此。況其他乎。已矣乎。吾無望於人。已。恃在知厚。直獻其愚。詩云。他山之石。可以攻玉。幸惟原亮。

### 答太僕羅聞野

向承示牧地事。即一一擬旨舉行。趙卿已該督府疏留。銓部覆允矣。乃又以乘傳被糾。不得已爲請恩於上。薄譴留用。渠果能終其事。而有功。自不防於他日之顯擢。不然。將來、寧、無、議、其、後、者、乎。須示以朝廷之意。令其加意策勵可也。更置罔屬疏。已屬所司議覆。

### 答南兵兼河道凌洋山

向承教粵中經理。不辭再勞。具見公忘身徇國。不勝敬仰。後思彼中事體。近已略定。好

議喜事者。知鄙意有在。亦自歛戢。而不敢復興事端。今若無故易置。反覺多事。且瘴癘之鄉。亦不忍再煩也。河漕虛席。因憶公鴻猷偉畧。優游留省。無以騁才。而河漕重任。比之東粵。尤爲緊要。先朝嘗特遣重臣經理。且二三年間。僕力主印川公治河之策。幸有成。今仍須素有威望者繼之。庶可以行僕之意。而終潘之功。博求中外。無如公者。故暫借經理。他日此中八座或虛。一轉移間。其勢又甚易也。恐公不達所以借重之意。而有外於左右。故略布區區。萬望鑒亮。查減會用夫馬疏。大有裨於民生。已屬所司議覆矣。

### 答湖廣巡按朱謹吾辭建亭

承示欲爲不穀作三詔亭。以彰天眷。垂有永意。甚厚。但數年以來。建坊營作。損上儲。勞鄉民。日夜念之。寢食弗寧。今幸諸務已就。庶幾疲民少得休息。乃無端又興此大役。是重困鄉人。益吾不德也。且古之所稱不朽者。二若夫恩寵之隆。闕闕之盛。乃流俗之所。豔非不朽之大業也。吾平生學在師心。不靳人知。不但一時之毀譽。不關於慮。卽萬世之是非。亦所弗計也。况欲侈恩席寵。以誇耀流俗乎。張文忠近時所稱賢相。然其聲施

於後世者。亦不因三詔亭而後顯也。不穀雖不德。然其自許。似不在文忠之列。使後世誠有知我者。則所爲不朽。固自有在。豈藉建亭而後傳乎。露臺白金之費。中人十家之產。漢帝猶且惜之。況千金百家之產乎。當此歲饑民貧之時。計一金可活一人。千金當活千人矣。何爲舉百家之產。千人之命。棄之道傍。爲官使往來游憩之所乎。且盛衰榮瘁。理之常也。時異勢殊。陵谷遷變。高臺傾曲池平。雖吾宅第。且不能守。何有於亭。數十年後。此不過十里舖前一接官亭耳。烏覩所謂三詔者乎。此舉比之建坊表宅。尤爲無益。已寄書敬修兒達憲府官。卽檄已行。工作已興。亦必罷之。萬望俯諒。

答兩廣劉凝齋

近得閩中信。林賊去年十二月十五日。與暹羅相疑。掠其船五隻。走八佛丑海嶼。在彼造船。此時東浦寨與暹羅合謀圖之。欲擒此賊以獻。不知的否。果爾。公但以靜待之。不必又差人往圖。致生得失也。

答福建巡撫耿楚侗

借重閩中。已及三載。擬將簡置內臺。覬以助僕之淺薄。忽聞令先公之訃。無任切悵。且

二三年間。僕將復有明農之請。不能爲國家早進賢俊。置之周行。即死有餘憾矣。惟公罹此大痛。不審體中何如。幸割懷以禮自遣。人旋草草附唁。并以薄奠。布之令先公几前。統惟鑒亮。

答保定巡撫張濟東

辱翰示領悉。聞堡茂等衛。有站馬軍。深爲民害。今驛傳既清。則此項事似在可省。幸查明疏請。亦可推之畿輔諸郡也。

答司空陸五台

前沈翰撰至。辱手翰。情欵藹然。令人遐想。春間扈從山陵歸。乞骸骨。乃不獲如願。而屬任愈重。閣束老特。策鞅不休。誠不知所終矣。兒曹寡學。冒竊非望。伏承嘉問。彌切愧悚。厚惠概不敢當。并前沈君所將。俱璧諸使者。拙稿未有乞歸本末。謾附一覽。

又

今歲傳蘆小兒。卽少時妄對隱士絕無才者也。公當盛漢之隆。而龍螭蟻屈。不一建立於時。得無爲兒曹所誚乎。一笑。懋修謹按隱士無才謔語。乃是懋修童子時侍業師高士及五台年伯於坐業師出對。示懋修曰。書生宜立志。乃卽對曰。隱士絕無才業師不

噴也。但改無字爲多字。故一坐盡大笑也。

答宣大巡撫鄭範溪

馴夷之道。譬之蓄狗。馴則飼之。驚則箠之。箠之而馴。則又飼之。上谷虜情。微與雲中有間。向來每從優假。以致桀驁若竟從姑息。則狂獩無知。便謂我畏之。而益肆矣。今該鎮此處。極爲得策。足以折其亂萌。挫其狂逞。且有裨於貢市不小。皆受公之成算也。承示不勝仰慰。人旋草草附復。總戎原帖納上。

答三邊總督

辱示虜情。一一領悉。套虜與雲中上谷。微爲有間。欸貢之議。始於順義。故事每優假。套虜初求貢甚急。我固未之許也。後以順義爲之懇乞。睨勉從之。然一切約束。賜與皆與順義不同。而彼亦不敢厚望。蓋方以得請爲幸。而無復橫覲於望外耳。乃自順義西行。見我厚撫而優遇之。豔於求索之利。遂萌覬覦之心。昨延鎮即欲比例求陞官加賞。其意望漸除。端不可開也。夫套虜之求貢。不獨利賞。賜關市也。方其未貢時。延寧之間。搗巢。趕馬。無歲無之。彼牧畜不得蕃息。老弱不得安養。又北備五刺。南防中國。其苦甚矣。



自欺。貢以來。內無搗巢之患。外有關市之利。得以其餘力從事於瓦刺。則貢市事利於彼。乎利於我。乎。即使請求不獲。亦不敢釋重利而結怨於我。況其精兵健馬。消耗過半。東借助於順義。不獲。西修怨於瓦刺。不能其衰。弱無能爲之狀。亦見矣。故在今日。西鎮諸公。惟當堅持初約。稍事羈縻。而厲兵秣馬。以待其變。不宜曲徇其額外之請。以自敝也。惟高明裁之。又前語薛憲副。乃牧地事。非屯田也。近仗公措畫。俱已周悉。趙卿被論破格。賞之。凡以爲此。惟公策勵之。期有實効而已。外具別幅。統惟鑒存。

答總兵戚南塘授擊土蠻之策

前順義部下酋長。密報土蠻入犯消息。即馳語薊遼軍門戒備。數日以來。警息沓至。西酋所報不虛矣。不穀料此賊必闕灤東。今日之事。但當以拒守爲主。賊不得入。即爲上功。薊門無事。則足下之事已畢。援遼非其所急也。賊若得入。則合諸路之兵。堅壁以待之。毋輕與戰。我兵不動。賊亦不敢開營散搶。待之數日。賊氣衰墮。然後微示利。以誘之。乘其亂而擊之。庶萬全而有功。足下經營薊事十年。今乃得一當單于。勉之。勉之。辱示以破虜爲己任。具見許國之忠。但古之論戰者。亦不全恃甲兵精銳。尤貴將士輯和。

則一可當百。不和雖有衆，弗能用也。竊聞北人積憤於南兵久矣。今見敵則必推之使先勝，則欲分其功；敗則必不相救。是足下之士能戰者無幾耳。軍情乖離，人自爲心。鼓之而弗進，禁之而弗止。雖有嚴刑峻法，將安所施？羊羹之事，可爲明戒。足下宜深思之。時時查軍情，向背布大公昭，大信毋信讒言，毋徇私情，毋以喜行賞，毋以怒用罰。部署諸將，宜令食多而養厚者當先，毋令失職。怨望者當劇處，虛心受善，慎毋偏聽。察軍中如有隱鬱，亟與宣達。平日號令如有未妥，不妨改圖。士卒毋分南北一體，煦育而拊循之。與最下者同甘苦，務使指臂相使，萬衆一心，知愛護主將，如衛頭目，則不待兩軍相遇而決勝之機在我矣。如是乃可以一戰望成功也。惟足下預圖之，不穀平生料事，往往幸中凡所與足下言者，須旬旬體認，不可忽也。懋修曾記破家時有一部堂說諷曰：汝先大夫何爲莫非反狀乎？用修答曰：邊烽警急，宰相或不得堅臥，不省部堂，意阻今觀先公與戚書留神若此，宜人之致疑也。然戚播廢歿後，朝議猶以名將稱之，錄用其子，於是見公道非私比矣。

答藩伯徐中台

承示大監聖公橫索驛遞。今內官勳臣小有違犯，動被繩治，而聖公所過，百姓如避虜賊，有司亦莫之誰何，以其爲先聖之後也。夫聖人秉禮爲教，志在從周，假令生今之時，

亦必斤斤守朝廷之法。不可踰越。况其後裔乎。後若再行騷擾。亦宜一體參究。庶爲持法之公也。

答南京守備樞使喬誠齋

辱華翰。深荷雅情。別揭所言。驛傳宿弊。可謂曲盡。大疏卽屬本兵議覆。必痛加釐革。而後積蠹可除。地方蒙利也。公事事留心。具見忠猷。不穀忝辱素愛。不勝欣仰。

答藩伯賀澹菴

辱示領悉。六合之事。撫按俱有行。未必盡撫君意也。昨奉明旨。止用迎送一節。爲邑令罪。並不深究。所迎送馳驛之人。凡以爲執事也。况領敕官自合乘傳。於例何違。承示追尋往事。似屬過疑。宦海茫茫。萍踪遇。或順而交。合或逆而相。撞亦適。然耳。久之。皆成烏有矣。何足爲欣戚乎。君子履。信思順。平心率物而已。其於世。有合與否。命也。若如執事。追往慮來。冰炭滿腹。宇宙雖大。何以自容。向者晉中貢士。黜者已三人。不穀爲執事慮。故急以奉告。此自出不穀相爲之衷。亦絕無所聞也。楚中後望已久。幸過發征。屢以慰引領。無事盤桓。原勘合奉納。諸惟鑒存。

答浙江吳巡撫

百十八

公起郡守。用治行異等。二三年即拜中丞。列於九卿。開府兩浙。此主上之殊恩也。未有勳庸以報知遇。卽納履而去。忠義之士。固如是乎。古人有官守者。不得其職則去。朝廷舉數千里膏沃之地。畀之於公。言必行。計必用。何事不可爲。何功不可就。而必欲去之。以爲潔。豈朝廷有負於公耶。或曰。公昔以舉刺勞方伯事致郤。今見勞亦大用。內不自安。故去者。此又非大人之弘度也。廉藺寇賈。亦居將相。勢不相容。猶先公後仇。以濟國事。昔公與勞徒爭禮讓微節。非有宿怨深讐。不可解之釁也。今公處浙。勞處閩。壤地懸隔。畫疆而治。又非有同居並位不相容之勢也。萍浮江湖。一撞而去。卽隨風分泊矣。何嫌何疑。而必欲相避耶。明主在上。方翁受敷施。循名覈實。以興太平之治。願勉旃。毋自損。以孤輿望。公之簡用。僕所薦也。竊恐執事者。不究於忠義之節。而湛於世俗之見。以扞當時之文罔。則僕亦將有連坐之累焉。書陳。惟執事圖之。

答宗伯董潯陽

賢郎春元至。再辱台翰。詞旨愉溫。意義甚厚。執禮愈下。垂獎愈隆。甚非淺薄所能堪也。

捧讀再三。感作兼抱。兒曹徼時厚幸。並登仕版。而懋修又躡居文孫之首。簸揚糠粃。殊爲慙汗。聞之申相公云。翁年踰七秩。鬢髮如漆。精神步履。新銳少年弗逮也。何得天之厚如是哉。顧經綸之業。掩於當年。則以付之賢耶。令孫矣。承惠謹領。白粲佳綿。餘輒歸之主藏。推食飽德。挾纊懷恩。何以爲報。賢耶旋附謝。別具侑束。統惟鑒存。

答南學院李公言得失毀譽

陳道長差人至。辱華翰。領悉。秉公執法。乃不穀所望於執事者。欲稱厥職。但力行此四字。足矣。至於浮言私議。人情必不能免。雖然。不容何病。不容然。後見君子。不穀棄家忘軀。以狗國家之事。而議者猶或非之。然不穀持之愈力。畧不少回。故得少有建立。得失毀譽。關頭若打不破。天下事無一可爲者。願吾賢勉之而已。

答臺長陳楚石

差人至。辱手諭。一一領悉。巡檢官職。雖卑。關繫甚重。此官若得其職。則詰盜察姦。功居地方。有司之半。非淺鮮也。况近奉旨清查路引。嚴謹關隘。則此官尤當加意者。亟宜題請修復。餘具別楮。統惟鑒存。

答審決江南帥御史

百二十

承問新舊強犯應決應辯者。遵旨從事。無容別議。惟中間人非善良。而賍屬影響。事起株連者。誠難便決。宜再加詳鞫。另作一疏。開其可生可死之跡。欲殺不忍之狀。請旨裁奪。或照恤刑例。饒死充軍。或姑照舊監候。以俟日久。或得真情云云。則積年重辟。可以開銷。然亦不可多也。鄙見如此。幸惟裁亮。

答大同巡撫賈春宇

僕平生好推轂天下賢者。及待罪政府。有進賢之責。而勢又易以引人。故所推轂尤衆。有拔自沉淪小吏。登諸八座。比肩事主者。不可勝數。然皆不使人知。不望其報。何公之惓惓於僕也哉。夫士爲知己者用。女爲悅己者容。僕之於公。非敢僭謂知己也。而公之知己待僕。夫使公誠以僕爲知己也。則古人之所以酬知己者。固必有道矣。腆貺終不敢當。仍璧諸主藏。幸惟鑒原。

又

黃曾桀驁。殊爲可惡。然聞此曾素狂躁無禮。倏喜忽怒。彼見其父病中與之修好。遂魚

然妄言。然非有謀畫素定也。但安靜以馭之。嚴備以待之。毋輕狗其請。毋激致其怒。彼計阻氣衰。將自歛矣。近聞已就羈縲。入市有日。未知究竟何如。

答宣大巡撫鄭範溪

兩奉華翰。一言順義求討。一言黃曾桀驁。詳觀來文。與公回諭。悉與鄙見懸合。敬服。黃曾狂躁。反覆不常。乃其故態。其言作反。未必實有此謀。但虛嚇耳。惟安靜以處之。嚴備以待之。久之計阻氣衰。伎倆已盡。自當入笠矣。彼不來市。我亦省費。不必責其來。但移書順義。責以負約。使屈在彼。彼敢來犯。即簡銳擊之。若不來犯。亦不必往討也。又聞王把總者。頗非忠信。陰陽其間。以規重利。其所言亦難盡信也。今想已就羈縲。得勝市不知何時可竣。

答張巡撫處濱言士稱知己

僕生平好推轂天下賢者。及待罪政府。有進賢之責。而勢又易以引人。故所推轂尤衆。有拔自沉淪小吏。登諸八座。比肩事主者矣。然皆不使人知。不望其報。蓋薦賢本以爲國。非欲市德於人也。乃今爲僕所引拔者。往往用餽遺相報。却之則自疑曰。何疎我也。

及不能殫乃心。任乃事。被譴責。則又曰。何不終庇我也。凡此皆流俗之見。非大雅之物也。夫士爲知己者。用女爲悅己者容。僕於天下賢者。非敢妄爲知己也。而人謬以知己相待。嗟乎。使誠以僕爲知己也。則古之義士。所以酌知己者。蓋必有道矣。豈在區區禮文之間哉。且聖賢論人。與其進而不與其退。蕭相國以韓信爲賢。則追之。後見賁。漢則除之。凡以爲公而已。豈一經薦拔。遂盡保其平生哉。承華翰云云。類以僕爲知己者。其所自期。皆古大賢烈士鴻抱。非流俗人所可望也。僕不勝欣服。故敢冒陳其區區。惟執事者覽擇焉。

## 答兩廣劉凝齋

承示林賊復自暹羅逸去。據彼國報。雖已喪敗。然猶能據島造船。爲入倭之計。則其勢尙強也。瑗山去彼不百里。踪跡易知。將坐待而擒之乎。抑出奇以致之乎。去歲承教。謂不出今年。必縛此賊。在公必有勝算。僕不敢遙度也。

## 答大同巡撫賈春宇

辱示順義并哈曾番書。領悉。黃曾孤窮之虜。無馬可市。但肆言恐嚇。欲白騙耳。今旣稍



有所獲。來市恐未有期。其市不市亦無足爲輕重。不必固要之。中彼要挾之計。然此虜輕躁寡謀。驕盈已極。若以計圖之。亦可獲也。薊中近來防禦甚嚴。昨承教。又已申戒之。時已迫冬。尙無結聚之形。或不能大舉。然微備無時敢忘。辱教謝謝。人旋附此。諸番文三件納還。

答薊遼總督張崐疎

辱手翰領悉。諭節鉞臨邊。衷情安妥。慰甚。黃酋近聞已赴西市。惟鎮靜以處之。彼之伎倆有盡。終當入笠也。差人回。渠有何說。若只尋常誑賞之言。惟付之不聞耳。土酋已入遼左。薊門亦甚戒嚴。西酋諸部皆有隨行者。聞順義宿疾又發。冬春之間。恐難起也。

答陳松谷相公

往者肅幣奉祝。殊愧不虔。乃辱台翰遠貽。深用爲歉。謝疏已如命封進。旋奉宸綸眷譽。書之史冊。焜耀百禩矣。正猥以疎庸。謬肩艱鉅。恒有顛仆之虞。又久握魁柄。日夕兢兢。向者乞骸之請。萬非得已。今奉聖諭。暫爾羈留。明歲將復尋初志焉。辱在門牆。敢罄私曲。

答翰學陳玉壘

伴至、辱華翰。深荷雅情。諸所獎許。雖極爲過情。讀之愧汗。然於不穀惓惓許國之丹。則可謂獨觀其深矣。他年願乞言銘吾墓焉。感謝感謝。詢之來使。知我師翁福履茂綏。神理愈王。耄期之壽。勿問可知。公昔者親承天寵。奉尙方之朋錫。萬里歸歡。乃人間稀觀之盛事。寧親之心。已無不罄矣。簡書有嚴。尙當過發征麾。還事講幄。勿復依依久戀庭闈也。懋修謹按玉壘起服歷至拜相不肖當尊先公預訂銘墓之遺言以乞文於相國可也而家翁踪危且恐以嫌疑累相國遂不敢也然相國久已騎箕掛劍之義附之冥漠而已

答旨大巡撫鄭範溪

辱華翰。領悉。近聞青把都。白洪大。俱遣其心腹人於順義處議事。不知所議何事也。幸差人密偵見教。餘冗不悉。

與旨大巡撫鄭範溪傳備邊

正月初五日。上齋宿於文華殿。是日大風。黃塵蔽天。上遣文書傳諭云。今日風氣不祥。恐有邊事。與先生說。可申飭邊臣。加意儆備。欽此。謹傳示左右。幸欽遵施行。

答旨大巡撫鄭範溪傳備邊

青酋等見順義。本爲己事。其言屬夷盜馬云云。僕前書奉啓。因料其爲託詞也。公所以應之。極爲得策。仰甚。黃酋部衆作賊。我所擒者。係彼至親。諒所欲得者。且勿輕與之。待順義罰處如約。另立誓詞。將往年橫索等項。一一改圖。然後遣之。前奉聖諭。方以邊事爲念。會華翰至。卽封上御覽。以見公籌邊之功。此後如有重大虜情。密示於僕者。宜具銜稟報。當卽以原帖封奏也。若十分要緊事情。卽手書無妨。惟鑒亮。

答薊遼總督張曙崧

青酋見順義。原爲己事。乃索我通事。託言屬夷。殊可惡也。如再來纏擾。只以禮拒之。毋曲徇其情。致墮奸夷之計。來諭謂戰可恃。而後和可堅。最爲得策。惟公着實行之。不徒爲目前支吾之計。邊圉幸甚。青酋東行祭神。亦往年常事。但載甲以行。委屬可疑。已行該鎮防備。北路缺。未奉命之先。本兵已推董一元。此人亦可用也。

答宣大巡撫

前據薊報。滿五大等。往屬夷營祭神。到卽入犯。其來甚速。蓋掩我不備也。青酋狡詐多端。與東虜合從。情狀已實。但其身未親行。故往往用以自解。宜時偵其嚮往。以便防

禦。未可遂信其無他也。聞去年黃酋欲作賊。問於順義。順義亦答云。宣大是貢市地方。不可輕動。他處我不管。推此言之。則雖順義亦不能盡縛諸酋手足也。宣帥已屬本兵。留用。此君論才可用。若素行。誠爲欠端。賄求鑽刺。皆有實跡。先後開府。未有不中其餌者。今但取其才耳。然後亦須奮勵自檢。以保晚節。此時宣大無警。爲將者。亦不專取勇敢。撫綏士卒。繕甲治兵。必廉而愛人者。乃能得士心。備緩急。若徒以其剝下媚人。諂諛。鑽刺。猥云有才。緩急寧足賴乎。恃公知厚。幸惟秘諒。

## 答薊遼總督張嶠

青酋既認二弟東犯。亦見畏順。俟其回巢。罰處爲當。然此酋與東虜合從。不獨今歲爲然。今雖罰懲。恐亦不能終禁。此後但責令探得東虜作賊的耗。卽飛報我。知使我得預備。亦足以明彼心跡。卽去秋土蠻入遼左。其中亦豈無貢巾之夷。幸大同山西於市場上偵得消息。密以告僕。卽夙戒薊遼整旅以待。故無大失。然亦未曾深究西虜也。番文奉返。諸惟鑒存。

## 答南科吳公瑄

張真人事，委爲過舉。初時發自慈闈，不穀未敢驟諫。比因大疏至，乃從容爲上言之。即荷俯從。追回差去內臣。然不欲以疏寢命，別擬旨行。其實蓋從諫官之言也。此真盛德事。亦宜令宣之以彰聖德。餘惟鑒存。

答薊遼總督張曙昧

辱示青酋既有罰處二弟之意。宜就機告於順義處之。黃酋之不直，東虜豈是忠。心。彼蓋亦欲効東虜所爲。爲順義所制，不得肆。見東虜東掠西市，兩利並獲。故不平於心。耳。渠去秋在雲中，亦曾明告順義。言欲作賊。順義答之云。宣大是我買賣地方。汝不可胡做。別處我亦不管。觀此，則其心豈不欲爲東虜所爲者耶。公所諭其來使。詞嚴義正。足以尊朝廷之體。消逆亂之萌。湏着落順義處之。彼雖老。素爲諸部所畏也。鄙意初謂不必奏聞。後思其事關係頗重。似非諸公所能自了者。待計畫已定。期於必遂。乃以上聞可也。然犬羊無信。惟利是趨。卽經此處分。他日亦不能縛其手足。此後宜責令偵得東部約從消息。前飛報我知。在彼得陽明其心跡。在我得陰爲之備。卽今秋土蠻糾衆犯遼。其中亦有西虜。幸賈大同、高山西於貢市時得些消息。走報於我。卽夙儆該鎮預爲

之備。故虜雖衆而在我無失。比者寧前虜原不多。而在我反有損折。此其豫與不豫相遠矣。近得鄭公書。只云青酋部衆東犯之事。未否虛的。此言過矣。夫虜犬羊也。能保其不變乎。薊鎮屬夷。歲歲入貢。亦歲歲作賊。遼人不能歸咎於薊鎮。豈能責望於宣大乎。夷情多變。惟在隨宜審處之耳。

答藩伯金省吾

惟公雅望宏抱。正宜及時樹立。以副夙昔期許。乃欲爲高蹈。非所聞也。

答三邊總督鄒文川

承示三鎮侵欺各犯。俱屬計曹一如所擬題覆。賊俱免追。內有應決數人。亦從末減。數十年癰疽。一朝潰決。懲奸之義。赦罪之仁。斯爲兩得。公之造福於西人。德澤深矣。

答司成姜鳳阿

昔在詞林。宿承休問。中見青繩點璧。每切不平。雖曾屬意臺臣。力爲雪滌。然不能招遣賢於邁軸。致逸足於衢遠。斯孔子所謂知柳下之賢而不可立者與。愧歎。兄曹寡學。幸與哲嗣同登。奕世之交。殆亦非偶。伏承翰貺。感今懷昔。益用悵然。迫冗久稽。裁謝。茲公

子錦旋。附致區區。厚惠先已歸璧。統此申謝。諸惟鑒原。

答翰長公東塘

比者計吏。忽聞浮議紛如。莫知其所由興。不得已有此處分。茲辱翰示。不勝歉恨。然詞林前輩。蹶而復振者。不可縷數。願且戢翼卑棲。鸞飛固有日也。

答宣大巡撫

兩承翰示。一一領悉。青匱事。得順義罰處。而中國之體自尊。古稱虜之難制者。以其遷徙。鳥舉居處。飲食不與人同也。今乃服吾服。食吾食。城郭以居。是自敝之道也。夫車決不可從。或量助以物料。以少慰其意可也。公曉諭三書。皆中機宜。具服偉畧。番文納上。統惟鑒存。

答兩廣總督劉凝齋

有或言羅旁東西三縣墾田。原題三年起科。但連歲多事。耕牧尙鮮。承佃者又多隔郡之人。若必照原議。恐力不能辦。昔蜀中九絲平後。亦未有三年即徵稅也。似宜調停少寬之。庶招來之民。得有定居。其言似亦可採。惟尊裁之。林賊近來消息何如。恐又成烏

有也。

答大同巡撫賈春宇

辱示虜情。謹密示東鎮。預爲之備。東西、夷、人。原是一家。犬羊之性。惟利是視。安能縛其手足。使不東行。惟知之速。備之嚴。使人而無利。則雖驅之。亦不肯從矣。今三衛之夷。朝入貢而暮犯搶。朝廷未能一一詰治之也。而欲責之於新欸之虜。能乎。順義築城。是自敵之道。其所求人夫車輜。固決不可許。若物料。量助之以慰其心可也。允公所密示札。皆藏之於心。一語不可泄也。

答薊鎮巡撫周樂軒

李帥出塞之功甚奇。又值大閱之時。戎車未踰於闐闐。皇威已震乎遐陬。慰甚。本兵方按故事論功。必有顯陟矣。近每偵得西鎮虜情。卽馳報督府。夙有戒備。遠不及一一奉達。昨議處兵餉等事。部中猶執成說。吝於出納。特奉俞旨。兩河官軍。感恩圖報。當有激於衷矣。承示大察無根之談。不知所自。隨已消滅。不足芥蒂也。前與督府書。偶因他事言及。不意遂聞於左右。僕所推轂保全天下士甚衆。安能一一使知之乎。



答應天張按院

辱示運官被劫事。頃蘇松按院已直將本官論劾。若不得大疏存此說。則覆盆之寃。誰與雪之。該府素善隱匿盜情。陷人於死。而規脫已責。有人心者不爲也。撫按地方。凡事當一秉虛心。不宜有所偏私。致乖理法。近日順德府唐山盜情。與德安王宮失火。皆以地方官欲避罪責。致使數十人破家亡軀。皆不穀知之。力與申雪。始獲生全。大畧與此事相同。今當並行漕運衙門。虛心勘問。庶無枉縱也。

答應天巡撫孫小溪

辱手翰領悉。伏諭令望日隆。羣情帖服。慰甚。聞丹陽運官被劫。訪之輿論。咸以爲實。而地方官避失事之罪。徑坐運官以侵欺。原該府素善隱匿盜情。僕已久聞之。然規脫已罪。而陷人於死。仁者弗爲也。願公虛心秉公。密加體訪。毋使覆盆之下。致有遺照。

答宣大巡撫鄭範溪

辱示哈酋東行已止。黃酋病革。皆邊疆之利。公所處畫。悉中機宜。人旋草附。

答巡撫劉公國光

前大疏首列竊盜三犯六名。比附律條四名。後開竊盜總數云一十名。是並比附者爲十也。及開撒數有連招二名。適符疏首六名之數。而止云四名。故旨云總撒參錯不明者以此。非謂少四起二字也。聖明在上。庶事精覈。故僕不敢隱辭。然公本欲了積年成案。勵精職業。此不過文移小失。所謂觀過斯知仁矣。卽如薊州武職。以撫賞官銀事被誣永戍。旣以辦雪。乃沉埋七八年不與題奏。亦至公始與完結。此僕所深敬也。恐公不詳所以。或半疑慮。敢布腹心。

## 答周府宗侯西亭

疊辱翰貺。深荷雅情。謝謝高廟聖典。紀錄詳備。便非宋二氏所及。卽付史館採錄。顧不穀原題。止據訓錄所載。方敢進覽。他書雖傳信者亦不敢入。則門下此書。固無妨於獨行也。承惠李氏易解舊本。謹珍藏之。餘輒附使歸璧。

## 答翰長張公程

昔三小兒書來。深念職事謫遷屈辱。亟屬銓部引實留曹。不意再罹宿謗。恨隔遠無能預爲消弭。茲承翰示。不勝悒悒。願且順時自遣。翻飛固有日也。

答盧鳳按院陳公用賓

鳳陽火事已從寬宥。官銀被盜。誣指廠官侵匿。坐令賠償。若非眞盜擒獲。則覆盆之下。豈無遺照乎。宋伯華之罪不可宥也。近聞江淮多盜。有司隱情。積習牢不可破。如運官李焜被劫事。人皆以爲實。而誣以侵欺。寘之重典。規脫己罪。陷人於死。忍亦甚矣。撫按以精覈吏治。摘發隱伏爲職。朝廷明見萬里。儻於他處發之。則當事者無所遁咎矣。辱在知己。輒爾直陳。統惟鑒亮。

答按院張公簡

手教領悉。近聞大江南北。盜賊縱橫。有司皆匿不以聞。鎮江之事。遠近皆知。且聞南郡已獲眞賊。而撫按官亦竟置之不聞。丹陽運官被劫。而以侵欺之罪。坐於運官。寘之重典。此習不祛。將來盜賊愈滋。官司莫之敢詰。必釀成元末大患。此區區所深憂也。又近來江防稍覺廢弛。盜賊之多。蓋有由矣。

答鄭範溪

辱示老酋既有悔改之意。宜相機撫處。渠有妻喪。亦當吊慰。一操一縱。在公自有勝算。

矣。番僧失給欽命圖書差誤。皆須奏啟。夷情不得承訛襲誤。致失綏懷之道。

答宣府張巡撫

辱示夷情具悉。青酋既自認罰處。因而收之。甚善。但順義亦須與之會議。蓋彼爲諸部之長。雖老而衆心歸之。若一屬之。青酋則彼以我爲外之。從而陰陽其間。或至差池。但密許青酋以收其心。而仍令歸結。則兩得之矣。承示馬價謹悉。前所開三君。他日皆可用。昌州未請邊事。僕初無意用之。公何所聞。人旋草復。

答撫院辛公應乾

承示贗書。不勝駭異。僕從來不以私干人。內親中亦無所謂李應龍者。此必京師棍徒。局騙木商者也。乞將投書人重箠枷號。仍嚴提木商人等鞠審來歷。照例問擬。具招見教。庶便尋究除根也。近來奸徒詐冒愚父子者甚多。相知諸公。雖諗知其僞。竟從寬宥。又不以告我。致使奸僞縱橫。白受汚玷。鄙心深以爲恨。茲承照察垂示。此公相信之深也。感戢。但此書文理乖謬。圖書字跡迥不如式。乃奸人之最拙者。辨之猶易耳。尙有巧詐亂真。疑似而難辨者。更望審察。惟諒僕平生經經之節。於人絕無私語。絕無干託。則

奸人自無所售其詐矣。原書納上。草草附謝。

答薊遼總督鄭範溪

兩奉翰示。知老曾深悔前非。其意甚善。彼既有遷改之誠。自不必深求矣。虜性貪利。一時乞求不遂。頓發惡言。然彼豈能棄重餌而食前言乎。况衰病侵尋。意在偷安旦夕耳。亦何能爲。公馭之操縱張弛。極爲得策。

答應天巡撫孫小溪

辱手翰。以忠耿自誓。無任竦服。先朝名臣。所以銘旂常垂竹素者。不過奉公守法。潔已愛民而已。願公懋之。鎮江賊情。乃去秋事。九月間。南都獲巨盜蔡朋等。供係劫賀氏賊。已發蘇州府審認。僕從去年即知之。而云發於十月。此該府欺公也。前屢奉明旨。寬捕盜之限。又許以別起抵數。立法未嘗不寬。惟是隱匿者必從重治。惡人臣之欺也。奈何此習牢不可破。而該府爲甚。但欲規避罪責。遂縱賊不捕。故至今不獲一賊。殊可恨也。如此不禁。將使盜賊益無所憚。被盜者不敢聲言。以致釀成元末大患。皆有司避罪一念。爲之也。奈何。視爲細故哉。又聞旬容亦有越獄事。逸囚已獲否。統惟查示。

答南臺長郭熙字

辱示大疏。所刺殊快公論。即屬所司議覆矣。

答翰長公東塘

辱華翰。領悉。今雖暫抑。翻飛固自有時。詞林前輩。蹶而復振者。不可勝數。即宜詣闕聽補。無事徘徊也。人旋草附。

答山東巡撫何來山

清丈之議。在小民實被其惠。而於宦豪之家。殊爲未便。况齊俗最稱頑梗。今仗公威重。業已就緒。但恐代者或意見不同。搖於衆論。則良法終不可行。有初無終。殊可惜也。今雖借重冬曹。願公少需。以畢此舉。慰主上子惠元元之心。

答河漕凌洋山

近聞淮鳳民饑。主上覽南科疏。惻然興念。急發南儲以賑之。并及江南。以廣布上德也。行後。聞南中二麥有收。歲以無侵。慰甚。安東仍舊。未爲不可。大疏即屬所司覆議。頃得河南撫臺揭帖。言宿州賊情。謹封附一覽。此地古來多盜。若如來揭所稱。殊爲可駭。宜

及早撲滅。勿致滋蔓。李焜事彼中撫按皆堅執以爲烏有。必不拏賊。殊可笑也。虛心體訪。久當自明。惟公留意焉。

答河道巡撫褚愛所

承示所刺屬吏。大抵皆房河東論劾者。想感於陝西牛希尹之事。慮人以爲隱蔽也。竊以爲事理不同。難以概論。前牛希尹與督撫同居一城。敢行貪肆。陝西二司乃不以其贓跡開之本管督撫。而遠開之於隔省巡鹽。故旨中一詰問之。今房河東差滿例行舉劾。與前特疏論列者不同。又無河南二司開揭之跡。何嫌於不發乎。以理揆之。本省撫按於屬吏爲親。其賢否知之爲確。巡鹽等差兼轄者。訪之未必實。如有虧枉。在本管撫按。猶宜爲之申雪。若彼此約會。務爲雷同。則特立獨行之士。寧不爲衆毀所鑠乎。又近旨申明先審後劾之例。望着實奉行。此後吏治當益精覈矣。大疏以中州逋賦請恩蠲貸。計曹題覆未能盡從。頃面奏主上。惻然興念。渙發德音。悉行豁免。并大疏所不敢請者。亦破例蠲恤。此主上浩蕩之恩也。永城賊情事。殊爲可駭。頃即移書淮揚撫按。亟爲協捕。此地古來多盜。不早撲滅。將至滋蔓。不可不慮也。

## 答官大巡撫賈春宇

前參宗室出城疏。即屬都臺議處。會科中亦有疏論。擬俟其入京。當盡法重治之。然料其故作聲勢。爲挾詐之計。無意越奏也。今果中道而返。竊思彼旣已喙兌。難盡從越關之例。止可將爲首者重懲。餘姑末減。而行查教唆主使之入。以伐其隱奸。斯亦足以示儆矣。凡今朝廷旨意。一字一言。皆有含蓄。有關繫。非謾言者。撫按諸公。肯細玩而力行之。何事不辦哉。徭役冊謹領。

## 答鄖陽巡撫楊本菴

承示欲爲僕築坊表宅。深荷雅情。但數年以來。愚父子表坊以六七座。僕無德於鄉人。而損公儲。勞民力。日夜念之。寢食靡寧。今諸役已就。冀少寬民力。若又興此役。是重僕不德也。况諸所應有者。已橫溢。無少欠缺。何事濫予以病民乎。萬望俯量愚衷。亟行停寢。得遂所辭。踰於百朋之惠矣。已寄示敬兒。卽台檄已行。大工已舉。亦懇請已之。使旋附此陳控。并謝盛愛。統冀亮原。

## 答總督張岨來計虜酋鈴束其支屬



賤眷小兒至京。猥辱垂問。深荷雅情。馬王大二酋橫索事。前偶有聞。卽以奉詢。茲承示始知其詳。中言自甘罰處云云。此不服順義。青酋鈐束也。然青酋乃一枝之長。順義又諸部之長。青酋云兄弟。順義親則叔也。尊則王也。可不受命乎。朝廷。殿下以大制小。以尊臨卑。若與其卑小者交關行事。則尊大者無權。不能領衆。天下日益多事。而朝廷體統亦甚。褻矣。華夷之體。寧可亂乎。願公熟計之。麻帥素稱智勇。若能擒此虜。當以斬馘之功賞之。但須祕圖。不可輕動也。

答河漕凌洋山言賑濟捕盜

前主上偶聞南科疏。惻然憫念。遂下賑濟之令。如戶曹所擬。南部所發。惠豈能周。承示惟查災重而麥又無收者。方與賑恤。則仁有所先。而全活者衆。幸甚。李憲副篤實君子。但以久病乏嗣。每懷歸念。故假金紫以榮之。幸公爲之題請。獲遂所願。外新陞徐州同知丁景芳。雖出身刀筆。而有異才。極善捕盜。前在江西擒花園巨盜。陞寧州判官。又有功。昨起復赴部。會宿州地方多盜。僕屬銓部。卽陞補宿州。乃大宰誤聽。以宿州爲徐州。遂陞徐州同知。用違其才。矣。公視其果可用。不妨改處也。

答應天巡撫孫小溪言捕盜

百四十

承俯詢奏報賊情事。謂別處不報。而獨責之江南。似以朝廷爲多事煩苛者。是未細釋前旨也。夫奏之與報。事體不同。奏謂奏聞朝廷。報謂申報上司。詳前旨云。撫按嚴督兵備等官。整飭武備。時常體訪。如有盜賊生發。務要即時從實申報。重大者奏聞。寬限設法緝捕。夫謂如有盜發。即時申報。則不問城內外。皆當申報上司矣。謂重大者奏聞。則非重大者。雖城內亦不必奏聞矣。然盜發。雖有遠近。賊情雖有大小。撫按皆當一體嚴督。有司設法緝捕者。此旨意也。昨鎮江之事。朝廷原未責其不奏。但惡其不報。及報不以實耳。賀氏之賊。發於去秋。而今歲三月間。撫按始知之。是曾申報否乎。南都已獲蔡朋。行該府緝捕夥盜。而該府不認。以爲烏有。是曾失事否乎。范良呂袁漳等家被盜。皆以未嘗失財爲解。乃其贓固獲於浙中也。其所報實乎否也。江南以隱匿盜情爲常事。數年之間。一發於揚州。再發於太平。今三發於鎮江。至使失主被傷。而不敢承。大盜公行。而莫之問。則法紀蕩然矣。別處曾有是乎。朝廷以四方之耳目爲耳目。今地方官挾同欺罔。撫按耳目已盡爲所塗。乃朝廷別有所聞。一行詰究。遂以爲多事。爲實苛。是次

使。欺。隱。之。弊。馴。至。如。秦。元。之。末。季。而。後。已。也。承。問。敢。直。陳。其。愚。幸。惟。鑒。原。

答薊遼吳環洲

辱。示。虜。情。一。一。領。悉。遼。左。黠。夷。橫。索。法。不。可。縱。須。熟。計。而。審。圖。之。昔。年。王。杲。事。動。出。萬。全。故。至。今。虜。衆。帖。服。昨。得。周。巡。撫。書。其。言。迂。緩。而。無。當。幸。密。授。李。帥。計。處。前。遼。陽。事。損。吾。士。馬。甚。衆。今。亟。宜。措。畫。以。備。秋。防。若。曹。簞。之。輕。躁。寡。謀。免。死。爲。幸。亦。宜。重。懲。勿。事。姑。息。也。

答兩廣劉凝齋

承。示。羅。旁。新。縣。稅。糧。事。始。知。其。中。委。悉。當。時。措。畫。草。率。惟。務。墾。地。起。科。之。名。不。爲。經。久。之。慮。那。借。湊。補。徒。支。吾。目。前。何。以。善。其。後。耶。似。宜。明。言。其。弊。定。爲。長。計。也。

答宣大巡撫賈春宇言邊事

承。示。順。義。諸。酋。表。貢。已。入。夷。情。益。加。恭。順。慰。甚。早。市。因。懲。於。昨。年。之。失。利。但。恐。別。有。隱。情。亦。望。密。偵。見。教。五。月。末。旬。京。師。連。朝。甘。雨。塞。下。不。知。何。如。前。承。教。梅。憲。副。別。轉。欲。以。王。郎。代。之。甚。善。奈。餘。部。已。別。有。推。用。難。以。再。更。王。君。當。處。之。囊。中。俟。從。容。簡。拔。也。邊。缺。

不能停久。此後公有欲推轂者。宜預期見教。俟有缺而後圖之。晚矣。蕭上谷邀過貴鎮。面訂邊事。甚善。事有當密議者。不妨先以見示。然僕凡處事。初無一毫成心理之所在。舍己從人。亦無一毫係吝。况邊事關繫甚重。須彼此虛心商量。又不可謂事出鄙見。勉相從。不復質論也。

答四川巡撫張濂濱

承華翰。及頒布條約。一一領悉。但導民以行。不以言。孫子云。約束不明。申令不熟。將之過也。約束已明。申令已熟。而士不用命。則士之過也。殺之無赦。故能使婦人女子。皆赴湯火。冒白刃而不避。今治吏亦然。科條既布。以身先之。有不。如令者。姑令之。申令已熟。則不問官職崇卑。出身資格。一體懲之。必罪無赦。如是。即欲今之爲吏者。皆龔黃卓魯可也。若徒以言語教詔之。雖口破唇焦。畢竟何益。且昔之治蜀者。皆以嚴效。遠則諸葛孔明。張乖崖。近則王浚。川語曰。不習爲吏。視已成事。狂瞽之見。惟高明擇焉。

答巡撫辛慎軒

辱示知畿輔饑民。已蒙賑恤。慰甚。頃甘澤已沛。未知露足否。礦洞事。前偶以參將所控。

附聞。以俟鑿訪。非敢有所庇。如其事果實。自當追論。但免其提究足矣。且殺傷官軍。聲勢不細。亦宜奏聞。不可隱也。

### 答王西石

賤日猥辱垂念。貺以厚儀。不敢例辭。輒用登領。謝謝。年來賤體日就衰憊。望六之齡。理固宜爾。兼之力微任重。求釋不得。譬馬力已竭。強策鞭於修途。誠不知其所終矣。緬懷高蹈逸踪。豈勝嘆羨。老母仗庇粗安。雖時有小疾。療攝旋愈。但日夜思歸。每談及太老夫人福履遐齡。庭闈樂聚。嘖嘖欣慕。恨僕不如公之孝養深篤也。賤眷小兒四月抵都。小孫重潤。近覺稍壯。舊患漸除。但力弱。尙未能行立耳。遠辱垂念。深荷雅情。使旋附謝。別楮侑柬。殊媿菲藝。統惟鑒存。

### 答宣大巡撫鄭範溪

頃兩奉翰示。虜情一一領悉。此事順義既認罰處。庶可結局。但青滿二酋。終非馴物。在上谷須時加儆備。尋常撫賞。無失恩信。但來作賊。即執而戮之。彼欺順得利。而作賊有害。自然帖服矣。五臺布施之請。自方金湖在鎮時已言之。僕皆不允。恐虜人內地啓釁。

端也。今聞彼不差頭目。但差喇嘛僧二人來。此亦或可勉從。但須不帶一虜乃可。然且未可輕許。若已阻之則已。如再以為懇。可婉諭之。此事我邊臣不敢擅專。當啓聞政府某公。面奏聖上。奉有俞旨。乃可如議。差人來也。

### 答山東巡撫何來山

辱華翰。知東土歲豐民安。無任欣慰。清丈事。實百年曠舉。宜及僕在位。務爲一了百當。若但草草了事。可惜此時。徒爲虛文耳。已屬該部科。有違限者。俱不查參。使諸公得便宜從事。昨楊二山公書。謂此事只宜論當否。不必論遲速。誠格言也。大蠲之舉。僕日夜以爲念。俟各處清丈俱完。或另有一正大題目。然後請旨行之。差役文冊。畧覽一過。具見經理之密。中間處分孔氏朝貢一節。極爲得中。然僕竊以爲今親王俱不朝賀。孔氏何必親行。朝廷亦不必借此以爲重。渠每歲一行。族人佃戶。科派騷擾。不勝勞苦。沿途生事百端。軍民避之。無異夷虜。及至京師。淹留數月。待私貨賣盡。然後啓行。此豈爲觀光修貢者耶。竊以爲宜如王府例。每歲只差人進馬。入賀不必親行。或當朝覲之年。預期奏請。得旨而後行。亦爲簡便。公如以爲然。可疏請之。若今歲則彼聽勸未結。自不宜

來矣。

答宣大巡撫鄭範溪

承詢各酋貢馬既陸續俱至。即宜照節年事例進貢。滿酋一枝。須候順義。罰處。明白。請旨。赦宥。然後許其補貢。庶不失中之體。番酋原無貢馬事例。貢市既完。量行賞賚。以示羈縻。出自特恩。未可遂爲年例也。擺酋另敕。事理亦可從者。上谷夷情。與雲中稍異。蓋虜歛之初。西部求貢甚懇。惟老把都陰持兩端。把都既死。其妻哈屯主事。其子青把都爲長。當事者不免委曲遷就。以成貢事。偏手之說。信有之也。時滿酋尙幼。不與其事。今見其兄獨專厚利。故比例橫索耳。然今昔異時。我所以應之。亦當隨機變。昔貢市未定。虜情叵測。用間投餌。有不得不然者。今勢已大定。又當謹守韜鈴。爲長久計。不宜苟幸目前而已。承示謂訓練鎮兵。振揚聲勢。最爲自治長策。當環洲在鎮時。僕即以此告之。不意至今尙未成軍也。願公乘暇留神。疆場幸甚。

答蘇松巡按曾公士楚言撫按職掌不同

手翰領悉。吳素稱難治。比來直指使者。能舉其職者鮮矣。執事以望選。宜勉旃。竊謂撫

按、職、掌、不、同。政、體、亦、異。振、舉、綱、維。察、舉、姦、弊。摘、發、幽、隱。繩、糾、貪、殘。如、疾、風、迅、雷。一、過、而、不、留、者。巡、按、之、職、也。措、處、錢、糧。調、停、賦、役。整、飭、武、備。撫、安、軍、民。如、高、山、大、河。奠、潤、一、方、而、無、壅、者。巡、撫、之、職、也。近、來、撫、按、諸、君。不、思、各、舉、其、職。每、致、混、雜。下、司、觀、望。不、知、所、守。以、故、實、惠、不、流。至、於、直、指、使、者。往、往、舍、其、本、職。而、侵、越、巡、撫、之、事。違、道、以、干、譽。狗、情、以、養、交。此、大、謬、也。因、憶、嘉、靖、間、有、周、如、斗、者。巡、按、蘇、松。信、豪、宦、之、言。博、流、俗、之、譽。將、應、徵、錢、糧。概、請、停、免。士、民、悅、之。爲、建、生、祠。奏、留、再、歷。遂、超、陟、蘇、松、巡、撫。及、爲、巡、撫。則、錢、糧、徵、發。百、責、攸、萃。不、復、能、行、其、寬、貸、之、政。將、以、前、免、停、逋、賦。復、行、徵、派。於、是、士、民、怨、之。毀、其、生、祠。刊、布、謗、書。向、之、稱、頌、德、美、者。轉、而、爲、怨、懟、忿、恨、矣。何、則、驪、虞、之、術。易、窮、衆、庶、之、欲。難、厭、也。况、此、中、人、情、叵、測。衆、庶、難、調。惟、一、以、大、公、至、正、行、之。庶、得、無、咎、無、譽、耳。辱、俯、詢、敢、以、職、掌、爲、告。幸、裁、擇、焉。

## 答宣府巡撫張峒來言虜情

中路夷情。疏已下部議覆。北路想亦完結矣。頃又思夷情變態。不常在我處。之亦不宜定爲一例。貴隨機應變。操縱適宜可也。先年打喇明安事。順義不候督責。卽盡法罰處。



朝廷嘉其忠順。故以所罰頭畜盡數給之。而作歹夷人。亦縱釋弗誅。此後遂以爲例。昨西鎮丙兎事。亦卽做此。竊以爲善奕者。局面屢變。朝廷恩威當使人不測。乃爲勝算。今北路事。不知作何處分。聊獻瞽言。以備採擇。惟高明裁之。

答巡按龔公懋賢

手教一二領悉。李公博大寬簡。聞望素著。從兩司授分陝之任。當時以爲得人。乃去歲無端爲人所指。今春臺諫論拾。煩言益滋。或云議始於舊茶馬之不協。果爾。却非公論也。頃科疏下部。鄙意徑欲留用。乃銓部謂疏中既有未明錢糧。宜與一勘。待其心迹昭雪。用之未晚。故黽勉從之。公今旣灼知其誣。幸速與勘明。旋即推用。不然。竊銖之疑。終身爲累。後人將復用爲口實矣。往時劉凝齋在福建。爲南科指摘。亦解任聽勘。賴商道長爲之勘明。隨即起用。今爲兩廣總督。而於言者亦無所傷。近二司以至州縣長佐鄉貢雜流。勘明復用者。不可縷數。况九卿大僚乎。牛希尹。幸一體勘雪。宜君華州疏。俱屬所司議覆。人旋病不能手書。口授不悉。統惟鑒存。

答薊遼總督張岨來

中路罰處事。部覆已上。前因聖壽。故少遲耳。北路事。必從順義處分。乃爲妥當。各酋久處塞外。不得入市。彼亦自緊。我但嚴備以俟之。終當入笠也。東犯消息。出於哈酋之口。必爲真的。已密報該鎮。夙爲戒備矣。若有緊切的耗。幸一面見教。一面卽報環洲公知之。

### 答薊遼總督吳環洲

前得上谷虜情。卽屬本兵奏報矣。近得張嶠來書。通官自哈不愼營回。稱東虜果差人來會話。哈不愼言。今年占卜東行不利。本酋或不親去。其衆必有去者。灑以東並須戒備也。礦徒今已擒獲。卽宜具奏。

### 答山東巡撫何來山言均田糧覈吏治

先後得華翰。並手札二函。一一領悉。清丈事。極其妥當。糧不增加。而輕重適均。將來國賦既易辦納。小民如獲更生。公爲東人造福不淺。卽有豪右少稱不便。乃其良心亦自不容混者。事定之後。羣喙自息矣。諸有勞長吏。卽屬銓部紀錄。皆作正薦。後必有以償之也。岳君清介而性褊。不諳於衆。薦之允宜。但係聽調人數。不知各省亦曾薦有此

類否。青州二守。昔錢道長亦亟稱其賢。處吾囊中矣。膠守昔宰盧韶。聲望烜赫。去歲銓部品題各長吏。僕已批定行取矣。乃銓部又詆其矯飾不實。遂止擬陞。想其人露才揚己。故所如見忌。據單開穢跡。寧止褫官。非公預行訪勘。則覆盆之誣。誰與伸之。以此。知前旨。先勘問。而後論劾。最甄別。糾繩之。要。但撫按諸君。不能着實遵行耳。然此官雖蒙昭雪。而誣善之人。亦宜究處。若托人廉訪。亦當追究。開單之人。庶頑讒知警。善類獲全。也。整飭武備疏。人名差錯。已令差人於通政司取出。改正封進矣。人旋附此。良晤伊邇。諸不具陳。統惟鑒亮。

答宣府張峴來

青滿諸酋。狡詐異常。罰處一節。必不能盡奉順義約束。故欲俟哈酋回而混賴了事耳。待旨而後許市。誠爲後時。但恐彼之罰處未能如約。則我亦不可遽爾許之。竊料衷情。久或致變。公宜亟整頓士馬。爲虛聲以伐其謀。如彼果有不測。則我亦有以待之。此所謂先聲而後實者也。

答江西巡撫王又池

辱翰示，并擲還原啟。俱領悉。臨川丈田事，偶有聞，即以告。今事已竣，法無阻滯。則其人亦不必深究矣。此舉實均天下大政。然積弊叢之，餘非精覈詳審，未能妥當。諸公宜及僕在位，做箇一了百當。不宜草草速完也。前已屬該科老成查叅，將此件不必入叅。正欲其從容求精耳。江右事已就理。獨五縣未完。諒數月之內，即可了結。俟通完之後，再奏未晚。人旋賤恙，尙未全愈。力此草草，統惟鑒存。

答宣府張瞻來

承示虜情，入犯消息，出於虜婦之口，必爲真確。已馳報該鎮嚴備矣。滿酋罰處事，遷延不了。哈酋豈能久待耶。近聞俺答僭宰生，與東部構隙，其事竟何如。幸差人偵實見示，餘不具悉。

答司馬王鑑川言抱恙勉留

令甥張叅軍來，辱華翰，深荷不忘。賤體入夏卽病，荏苒數月，殊覺委頓。今雖眠食稍復，然病根未除。緣弱質謏才，久肩重任，筋力旣竭，而鞭策不已，遂致竭蹶耳。頃欲藉此乞骸，乃主上先覺此意，頻遣中使薦賜寵問，又促令早出視事，使僕無所啓齒，不得已，

從趨朝。擬俟來年皇儲誕慶。當果比願耳。蜀翁夏間亦小重和。計今已勿藥矣。賢郎南行之便。草草附候。

答薊鎮鄭範溪

承示得勝市已竣。上谷罰處滿酋。亦已就緒。則三鎮歲事畢舉矣。慰甚。順義使恰酋。處置上谷罰處甚力。此順義之忠也。乃滿酋兄弟。不聽其令。而罵恰台吉。亦順義之辱也。便中宜遣使一謝之。一激之。以爲後來。張本。

答宣府張嶠來

辱示滿酋既甘罰處。宜從寬宥。此番操縱。悉中機宜。虜伎倆已盡見。以後恩威互用。予奪迭施。在我自有勝算矣。麻帥力量擔當。足稱專閫之寄。會間宜一獎之。俾益威奮。劉守道久處吾囊中者。市畢宜轉叙也。疏屬本兵速覆。以便從事。

答薊遼總督吳環洲

辱手翰。并擲還原扎。一一領悉。屬夷作歹。不止一次。當事者預爲彌縫。私自贖取。以致黠夷得計。愈肆狼狂。此薊鎮從來沉痾之疾。辱示石塘趕鬼事。公處之極爲得策。目下

不必具題。且只咨部，盡革此會之賞。待其送還守口官，認罪罰處事定。候年終類題可也。

答耿楚侗

辱翰示，知卹典已舉。即吉有日，無任欣慰。承嘉貺，深切感懷。別示云云，一一領悉。賤體以勞致病，入夏至今，尙未全愈。乞歸不得，益覺委頓。擬來歲皇儲誕後，當決計乞骸。或得與公相從於衡湘煙水間也。

答翰長公東塘

辱示知車從已至近關，不得一披晤。深用爲歉。在外聞命，不必入城，速宜赴任。非久當有處也。

答山東巡撫楊本菴

承詢陽武優免事。查律功臣家除撥賜公田外，但有田土，盡數報官納糧當差。是功臣田土係欽賜者，糧且不納。而況於差。錫之土田，恩數已渥。豈文武官論品優免者可比。若自置田土，自當與齊民一體辦納糧差。不在優免之數也。近據南直隸冊開諸勳臣

地土除賜田外其餘盡數查出。不准優免。似與律意相合。幸惟尊裁。

答廣西憲副吳道南

伴至辱華翰。佳葛之惠。深荷雅情。登衡拙稿。一時漫興耳。何足災梓。若北虜通貢本末。則關繫邊事。不可無紀。往曾託相知者爲一紀載。殊不稱意。今公所錄。事覈詞暢。雖其中隱謀祕計。有未盡述者。而首尾措畫。大都悉備。緣公當時親覩。不穀經畫此事。故記述精詳如此。至於大製序傳。於不穀平生心事。發摭殆盡。但以譴劣比擬古哲。殊爲媿耳。已令兒輩各藏一帙。用備家乘。感謝。賤體近日始覺漸愈。十年之間。晝作夜思。從少至今。所爲翕聚貯積者。日張施於外。遂成貧子。要欲及今齒髮尙健。早棄人間事。從吾初服。非自愛幻軀。蓋盈虛消息。天道固宜爾也。

答四川巡撫張濬濱

承示烏蒙事。謹悉。大都土夷挾仇訐奏。乃其常態。其中隱情。亦多難察。久之彼當自定。不必一一審覈也。前言情可貞者。偶有所聞。卽以奉告。求得是非之實耳。不意料中卽有言者。所言亦卽前揭中語。似皆得之於蜀宦也。今公不必置辨。但付之按君。虛心覈

實。如貪跡果實。秉公斥之。如有枉抑。亦宜明白聲言。勿以成心處之也。

答應天巡撫孫小溪

蠲除宿逋。責完新賦。僕久有此意。擬俟皇儲大慶。覃恩海內。今皇女生。則事不果矣。大疏即屬所司議處。亦可推之各省也。清丈事。聞已有次第。頃朱蘇州以查過優免。開揭見教。其中但有查革總數。而無革過戶名。安知其不詳覈於卑官。雜流而曲庇於宦族豪右乎。其視曹京兆所開。不逮遠矣。

答三邊總督鄭範溪

承示虜王病篤。今番恐不能起矣。頃報套虜西搶者。知虜王病。亦皆洵洵。况板升之人。素依老酋爲主。老酋死。那吉弱。不能附其衆。加以荒旱。諸夷思亂。虜中自此多事矣。那吉忿老酋之分其衆。即欲西牧。其智略可知矣。此虜初降。吾撫之甚厚。今當急收之。使與哈酋同心協力。以爲外藩。一應貢市事宜。悉如老酋在時所行。黃酋病不死。必且譸張爲患。公宜乘時勦兵秣馬。厚撫戰士。爲自固之計。老酋若死。虜中有變。隨機應策。在我。自有餘力矣。尊札亦即封呈上覽。



答巡撫吳公定

近報順義已故。虜中無主。西掠之衆。恐不能悉遵約束。宜謹備之。粟已允其養病。代者王君。必堪其職。李商秦有清操。果於任事。但性氣欠平。多怒少容。故所至僚友屬吏。無不怨恨之。如云貪酷。恐未然也。幸虛心加察。

答大同巡撫賈春宇計俺酋死言邊事

奉翰示。料度虜情。一一中的。敬服。今日之事。惟當鎮靜處之。隨機應之。勿過爲張皇。輕意舉動。致令衆情惶惑。興起事端也。昨督撫欲條議。僕卽力止之。俺酋未死數年之前。僕已逆慮及此。諸公但審偵虜情。有當處者。亟以見教。聖明在上。自有主斷也。虜中無主。方畏我之閉關拒絕。而敢有他變。但爭王爭印。必有一番擾亂。在我。惟當沈機處靜。以俟其自定。有來控者。悉撫以好語。使人人皆以孟嘗君爲覩。已然後視其勝者。因而與之。不宜強爲主持。致滋仇怨也。前示丈地均糧查革冒免二事。極其精覈。至於處豁應州民田。尤爲妥當。已屬所司議覆優獎矣。

答大同巡撫賈春宇

兩奉翰。知虜情寧帖。甚慰懸念。板升投降之人。此時斷不可納。順義郵典。已致書鄭公。屬其據番文題請。至於加封一節。中國郡爵無之。此不可從也。諸凡撫馭之術。不出前書所云矣。人旋草草附復。番書二件納上。

## 壽司寇王西石

傳稱老萊子。身年七十餘。以事耄耄之親。日戲綵於庭前。爲嬰兒匍匐之狀。其親悅之。翁今壽登七秩。太夫人垂及百齡。而以八座之尊。承歡膝下。三錫之服。絢爛庭前。又榮備尊養之隆。身繫朝野之望。其所以自壽壽親者至矣。彼田夫逸老之樂。又烏足道哉。僕忝在葭莩。欣逢盛事。不獲側列末賓。奉觴稱慶。謹使布幣而獻諸左右。惟下執事塵存之。

## 答諫議蕭公廩

承示帶徵逋賦。苦累有司。僕亦久知之。目下方欲面奏。請恩蠲豁。不必具疏矣。龔道長書來。言其病狀甚苦。暫准請告。大用尙有日也。牧地事。公既身在地方。但宜從公議處。卽先後意見不同。固亦無妨。何嫌可避。而又欲屬之他人乎。

答大同巡撫賈春宇

節奉翰示。冗未及答。罪歎。所值虜情領悉。閱視科臣尙未具題。臨行當別有委囑也。哈酋與諸部議論不合。虜中亦須有此情狀。乃可施言操縱之術。今且不可合解之。至於虜婦守孝三年之說。此必不能行者。俟諸酋既集。議論已定。彼一婦人。終當爲強者所得耳。何能爲乎。順義郵典。下部議覆。仍當從旨中加厚。以示天恩。

答三邊總督鄭範溪計順義襲封事

辱示虜情及諭扯力良夷使云云。悉中機宜。具服雄畧。襲王之事。大都屬之黃酋。但須將今年貢市事早早料理。以見表誠悃。而後可爲之請封。諺云。若將容易得。便作等閒看。務令大柄在我。使之覬望懇切。而後得之。乃可經久。然虜情多變。亦難預設。聞近日恰酋與虜婦及諸酋議論不合。頗爲失歡。若果有此。且任其參差變態。乃可施吾操縱之術也。順義郵典。屬部議覆。仍當於旨中從厚。以示天恩。

答宗伯何震川

不穀久司政柄。無補國家。叨冒殊恩。日夕兢兢。重辱翰獎。彌切悚慙。別後又聞令弟之

變。公懼此痛割。當何爲懷。惟望抑情以理自遣。數年以來。共事講筵。所欲推轂於公者。公自知之。不圖遂有數年之別。而賤體年來病甚。早晚且欲乞骸。比公卽吉之時。未知得果前願否耳。

答巡撫蕭雲峰

辱示市本缺乏。欲動客餉。亦事勢之不容已者。即屬計部議處。安兔吉無知。戕我旗牌。掠我頭畜。此等事。往亦常有。但此虜王新歿者。在我當申嚴舊約之時。而彼酋乃敢咆哮如此。不一懲之。釁端起矣。旣寅酋之子。宜即責黃酋處之。彼方覲承封爵。若其子不能制。他日安能統大衆乎。此亦制馭之一機也。幸惟審圖之。

答遼東巡撫周樂軒

承示土酋求貢。諒無詐僞。彼蓋斃於西虜貢市之利。乘俺酋死。故申前請耳。但遼左地形事勢。錢糧虜情。俱與宣大不同。且俺酋自嘉靖中季。連年求貢。彼時廟謨靡定。迄未之許。至隆慶間。會有那吉來降之事。而彼又執我叛人。違我約束。因而許之。彼旣愜其素志。又嗜吾厚利。故奉令惟謹。今以土酋之事。揆之。其情異矣。遽爾許之。和必不久。徒

弛我邊備。俟一二年後。觀其事機何如。乃可處之。馬價。俟疏至當爲曲處。

寄山東巡撫楊本菴言祀事乃告終之兆

賤恙一向不以瘳治。遷延十有餘年。故病日深。近訪得一明醫。仰蒙聖恩賜假治療。乃得拔去病根。今病雖除。而血氣虧損已甚。脾胃虛弱。不思飲食。四肢無力。寸步難移。揆之生理。尙屬艱難。前夢皇上使僕持雙節往祀一女神。蓋欲籲神以祈祐云。竊思女神之貴者。莫如秦安之仙妃。今遣小兒賞香帛往祀焉。恐執事不知其由。敢敬以聞。

答上師相徐存齋并附與諸公書

其一

不肖受知於老師也。天下莫不聞。老師以家國之事託之於不肖也。天下亦莫不聞。丙寅之事。老師手扶日月。照臨寰宇。沉幾密謀。相與圖議於帷幄者。不肖一人而已。旣而獲被末光。濫蒙援拔。不肖亦自以爲不世之遇。日夜思所以報主恩酬知己者。後悟人事不齊。世局屢變。使老師經綸匡濟之業。未獲盡紓。不肖感激圖報之心。竟成隔闕。故昨都門一別。淚箴箴而不能止。非爲別也。歎始圖之弗就。慨鄙意之未伸也。天實爲之。

謂之何哉。大丈夫。既以身許國家。許知己。惟鞠躬盡瘁而已。他復何言。

二

客有自江南來者。嘗恭詢起居。云比之在朝。倍增康勝。無任欣慰。顧綠野之居雖適。而蒼生之望方殷。清泉白石。恐不能終戀耳。今歲秋防無警。朝野寧謐。皆老師之所遺也。竊祿優優。敢忘所自。班吏劉果送父之任。便此申候。外具不腆侑緘。統惟台亮。

又

近來世局幾更易矣。流俗之見。睹朝野無慮。便謂太平景象。不知隱機伏禍。深有可慮。不肖揣時度力。屢欲乞歸。徒以身荷國恩。未能報塞。惓惓之愚。每欲候一旦之會。開寤明主。迎姬旦於周郊。起潞公於洛下。俾國事有託。康濟有人。然後可以旋返初服。長往無慮耳。日夕念之。力未從心。徒切耿耿。別來不覺改歲。薄劣動定。想亦老師所欲聞者。故敢纒纒及此。仰惟鑒存。

三

正月間。班吏劉果送其父鹽大使赴任。曾肅啓。并別柬二通馳候。茲奉台翰。前啓似未

微覽。劉吏亦未回京。此書不知竟落何處矣。繼齋兄至。備論起居萬福。神理勝常。殆天相吾師。以重國家也。比來時事。想所悉聞。古人在江湖則憂其君。況我師以身繫天下安危。知必不能忘情於宗社矣。正望輕德薄。碌碌伴食。秋毫無能裨補。既違鄙願。深負夙心。慚恨而已。

四

仰惟老師道侔姬呂。望重華夷。身雖暫閒於林壑。而溥海內外。罔不詢其起居安否。以卜安危。茲者岳且載逢。仙齡茂衍。恭聞台動萬福。繁祉倍綏。誠宗社之洪庥。蒼生之厚幸也。正忝在門牆。限以修阻。不得奉一觴爲壽。謹肅使。敬將薄幣奉獻。少伸微悃。伏冀俯鑒下忱。特賜磨納。不勝瞻仰慶祝之至。

又

喬中書人至。承諭誨勸。上爲社稷憂。下爲不肖慮。蓋忠臣雖在吠畝。不忘君之盛心也。感戢之私。洞於心膂。便此附謝。統惟台鑒。

與符卿徐仰齋

喬中翰使至。辱翰貺。深荷遠情。近來人情風俗。誠爲可愕。俟海公人至。當作一書善譬之。太翁老師年高。恐不能堪此。望公朝夕保護。事有可了者。宜卽自了之。勿致貽戚可也。恃在通家。敢爾妄及。諸容續裁不悉。

五

伏承翰教諄切。嘉貺駢蕃。感鏤肺腑。此中勢情。前啓已備。當艱難之會。不自度德量力。欲以藐然之軀。負天下之重。誠爲至愚。但以君父恩深。知己義重。故不敢爲自全之計。拊心自誓。糜竭爲期。若其濟否。則有命矣。

答奉常徐雲巖

疊辱翰貺。深荷雅情。此中事勢。前已備具。僕在此。君家之事。萬無慮者。但多病之軀。其去留亦不能自必耳。太翁尊師高年。宜朝夕奉進甘毳。娛悅其意。母以世慮嬰懷。

答應天巡撫朱東園

存齋老先生以故相家居。近聞中翁再相。意頗不安。願公一慰藉之。至於海剛峯之在吳。其施爲雖若過當。而心則出於爲民。霜雪之後。少加和煦。人即懷眷。亦不必盡變其。



法。以狗人也。惟公虛心劑量之。地方幸甚。

答岡卿徐敬吾

舍親劉太常使至。傳華翰。俱悉見念至情。中玄再相未及下車。區區卽以忘怨布公之說告之。幸此翁雅相敬信。近來舉動甚愜輿情。區區在位一日。當爲善類保全。一日但其中人心不同。而區區去留亦不能自必也。公遵養已久。宜夙戒征期。以副鄙望。

六

恭喜嶽日載臨。仙齡茂衍。忝在門墻。倍深欣忭。願以道遠不得伸其慶頌之忱。惟東望海門。瞻禮台光。九頓三祝而已。伏惟尊師身處林泉。望懸朝野。爲兩朝之柱石。繫四海之安危。願願齊天和。以綏繁祉。不腆之幣。敬因便布之臺下。仰冀靡存。不勝慶忭。

七

捧讀台翰。涕泗交零。以不肖之淺薄。猥辱老師甄陶引拔。致有今日。恩重於丘山。報微於毫末。元年之事。選愼中立。不能昌言以樹正幟。一罪也。及讒言外闕。中人內搆。不能剖心以明老師之誠節。二罪也。公且遠避流言。於今三年。不能以一語悟主。使金滕久

閉。郊禮不行。三罪也。今日之事。惟以道積慝而釋大慝耳。其視古人所以報知已何如哉。翰教遠貽。彌以爲媿。計自今以往。世局又當一新矣。冥鴻跡遠。繪繳安施。惟強飯自持。以慰耿耿。

答奉常徐仰齋

疊辱翰貺。深荷雅情。僕受太翁老師厚恩。未有以報。凡力所能爲者。自不待囑矣。使旋草草附謝。冗甚不及再悉。

答符卿徐繼齋

別後時事種種可駭。僕不量淺薄。委曲幹旋其間。幸俱消弭。僕受太翁老師厚恩。未有以報。乃辱遣謝。彌切慙惶。使旋附此。冗甚不悉。統惟鑒原。

八

犬馬齒今四十有七矣。苟生竊祿。無所建明。觸事感時。撫然自失。乃荷老師記憶。歲領嘉貺。愈久愈親。寢隆寢重。非淺薄所能當也。深惟淺薄。無可云報。惟當以向後餘生。矢竭丹誠。求無負於老師家國之託云爾。餘具別楮。統冀台原。

答符卿徐繼齋

賤日遠辱記存。深荷雅念。所惠至腆。媿不敢當。謹領茶甌一事。用承遠意。餘輒璧諸使者。別諭一一領悉。僕在此諸可無慮也。

九

元年之秋九月二十日。幸從諸公奉壽觴於左右。今忽忽已歷四秋。每當此日。但東望斗台所矚。一翹首以寄其慶祝之誠而已。感今懷往。可任依依。不敢走介。畏行多露。敬因朱使之便。百拜奉幣門下。少將微忱。伏冀鑒納。鄙懷種種。亦噤不敢言。臨楮惆悵而已。統惟台原。

答松江兵憲蔡春臺

諱國照

惟公昔在姑蘇有惠政。士民所仰。故再借憲節以臨之。乃近聞之道路云。存翁相公家居三子。皆被重逮。且云吳中上司揣知中玄相公有憾於徐。故爲之甘心焉。此非義所宜出也。夫古人敵惠敵怨。不及其子。中玄公光明正大。宅心平恕。僕素所深諒。即有怨於人。可一言立解。且中玄公曾有手書奉公。乃其由中之語。必不藏怒蓄恨。而過爲己

甚之事者也。且存翁以故相終老。未有顯過聞於天下。而使其子皆駢首就逮。脫不幸有傷霧露之疾。至於顛隕。其無乃虧朝廷所以優禮舊臣之意乎。亦非中玄公所樂聞也。僕上惜國家體面。下欲爲朋友消怨業。知公有道君子也。故敢以聞。惟執事其審圖之。

答河南巡撫梁鳴泉

松江事。高老先生業已寢之。似不必深究。仲尼不爲己甚。報怨亦自有當。牽牛以蹊人之田而奪之牛。蹊者固有罪矣。而奪之牛無乃過乎。今全吳亦所以愛鄭也。公有道者。故敢以此言告。幸惟裁之。

答應天撫院

往者奉書云云。蓋推玄翁之意以告公也。辱回示。業已施行。自難停寢。但望明示寬假。使問官不敢深求。早與歸結。則訟端從此可絕。而存老之體面。玄翁之美意。兩得之矣。僕於此亦有微嫌。然而不敢避者。所謂老婆心切也。望公亮之。辱教有欲告我者。此僕之所樂聞也。傾耳以承。幸勿終靳。

十

恭惟老師壽登七秩。朝野士民。孰不矯首頓足。遙祝稱慶。不肖鄙樸不文。亦宜歌扶。頌頌盛德。以爲觴侑。奈新肩重任。日無寧刻。欲搆一言不能也。謹百拜肅下。走布幣於臺下。用致千千之祝。今天子尊賢敬老。方當舉乞言之曠典。賁束帛於丘園。惟老師崇齋天和。以需寵命。

答符卿徐繼齋

伴至。辱華翰。具悉。勘合事。諒不久便當歸結。容促當事者速了之。今公家惠怨。玄黃已判。風浪漸平。惟益加歛戢。以綏遐祉。忝在通家。敢獻狂瞽。惟高明採擇。

十一

王別駕令甥喬生及班吏劉果至。三奉教言。諭台候萬福。鷹犬潛形。無任欣慰。前所奉良訓。謹當一一奉以周旋。王子回任附復。惟益加珍攝。以胥篤祉。

答陳節推

王別駕至。辱華翰。深悉雅情。今周道寧夷。是非明覈。執事宜勉自樹立。勿有它慮。存翁

相公。數年爲群小窘辱。執事幸加意焉。冗不多及。

十二

令孫及洪生至。疊承翰教。一一感悉。二兄三兄光復未久。慙乞休沐。得自處之道。但三兄已曾告展一次。難以再請。頃屬所司覆奏。促其復任。雅志恐難終遂也。盛使持部檄回。先此具復。

十三

先後拜台翰珍貺。俯憶賤辰。此乃卑幼之所以事尊長。懷德者之所以報有恩也。而老師一切倒施之。將使不肖何所用其辭報耶。感媿。時下喜聖學日進。朝政頗清。不肖亦惟奉老師所以教督者。兢兢不敢失墜。但力微任重。未知終能勝之否耳。遠惟台履迪吉。壽祉益綏。海內相知。所共欣仰。秋間當聽令孫泥金之報。實人間盛事也。預慶。使旋冗甚。犬馬之私。嗣容專上。

十四

恭惟老師台壽。今年始踰七十。比張蒼佐漢之事。甫爲強半。視尙父興周之歲。未逮九

齡。側聞台候聰明。步履強健。蓋天佑國家。留柱石之佐。永奠乾坤。故逸之於煙霞泉石之間。以綏福祉而候天和也。頃不肖以所輯帝鑑圖說進講。至漢明帝幸學養老事。上意欣然慕之。第令今日欲舉行盛朝曠典。憲大老以乞言。則舍吾師將奚之焉。不肖誠不勝慶忭。茲以壽筵宏啓。不得偕諸兄輩稱觴左右。恪具不腆。少將微忱。惟宥其褻瀆而垂納焉。幸甚。

十五

恭惟老師功存社稷。澤洽黎元。誕發祥於文孫。早克繩乎祖武。信龍圖昌後之有驗。徵天道福善之不誣。凡在簪紳。舉同欣慶。況不肖夙蒙陶鑄。誼忝通家。喜躍之懷。實萬恒品。所恨愚子弟以寡學見點。不得附致青雲。託於世講之末耳。茲因去使。敬展賀私。并申微悃。伏望崇願台履。益迓鴻庥。不宣。

十六

古之待國老者。或養之學宮而乞言焉。或徵之而問道焉。或就之而詢籌策焉。老師今年七十有三矣。道德愈高。聰明愈勝。殆天佑國家。而遺之以大老也。天子方欲修盛王

故事。如前三物者。博觀海內。惟老師足以當之。正將拭目而觀禮焉。茲佩萸之候。安東啓筵。敬獻一觴。用伸遙祝。深懼不腆。仰冀靡存。

## 十七

比以冗沓。束脩之敬。不供於函丈久矣。誠知薄惡無所逃罪。首事於今四年。碌碌無以自效。所賴主德日明。宮府清穆。百司蒸蒸奉職。西北陲少警。一二黠肆不逞之夷。咸就誅。仰惟宗社闡靈。李佑聖主。而正以淺薄。會逢其適。優游苟竊餘榮。殆有天幸焉。顧值不世出之主。俾耆德遺逸在野。而以庸鶩司鼎鉉。深以自慙耳。壽躋躋秋。牛斗之間。燁燁有瑞氣。敬以便鴻。修其常獻。南望台垣。百拜致祝。

## 十八論大政

比者兩奉台教。一爲陸氏事。一蒙俯憐。正爲國任怨任勞。而慨今之人不能相體。意諒情深。讀之使人澈衷次骨。感悵無已。陸氏之事。原當事者之意。實欲緣此中禍於師翁。其徒每倡言曰。陸氏家累鉅萬。死之日。數姍家欺其子之幼。遂分而有之。今惟刑辟其子。使之取償於所親。則可不加賦而國用足。其言如此。藉令當事者。至今猶在。則禍誠



不知所終矣。頃幸天啓聖衷。俯納愚言。開湯網以釋淹禁。俾陸武惠之功得明。而師翁見陵之恥亦因以雪。此主上之明也。正寧有秋。毫得效於左右乎。猥蒙遣謝。彌以爲媿。正以淺薄。謬膺重寄。自受事以來。且作夜思。食不甘。寢不寐。以憂公家之事。四年於茲矣。中所措畫。要以尊主威定國。是振紀綱。別瑕蠹。爲務有力。排羣議。明犯衆忌。而不顧者。豈誠不知自愛。而故以其身爲怨府哉。竊伏思之。語曰。挈瓶之智。守不失器。主上冲年。舉天下之重。而委之於屨弱之身。今不務爲秉公滅私。振廢起墜。而避流俗之非議。以取悅一時。有如異日者。主上明習國事。親攬庶政。或有所廢缺而不修。陵替而不振者。必將曰。吾以天下事付若。而今乃至此。則正雖伏隴畝。填溝壑。有餘僂矣。故違衆之罪。小負國之罪。大一時之謗。輕異日之譴。重也。台諫謂人猶有不相體者。正亦且奈之何哉。惟自殫厥心而已。昔辱師翁引手。固謂家國之事。一以相屬。正奉以周旋。死不敢負。因諗及敢布腹心。惟師翁裁教焉。

十九

語曰。愚者闇於成事。明者覩於未然。豈不信哉。往奉台翰。憐不肖之愚忠。教以防微杜

覺。慎自持愛。竊以爲事惟任理。似不爲過。曲爲之防。有所未暇。今果有遼左之事。中外駭異。以爲事出理外。而不知老師已預覩於數月之前。顛蒙之見。果於自信。但知竭忠捐軀。可以報國。更不思身雖不肖。謬肩重任。其進死退生。關繫非小。乃議不返顧。計不旋踵。虞羅在前。冥行直蹈。猶賴主上明聖。左右素相敬信。故三至不疑。眷倚轉篤。不然。天下事豈不可爲寒心哉。以是不惟感老師愛念之深。又自愧知量尙未足以窺宮牆之萬一也。謹當服膺台訓。益竭孤忠。博求同德。以固君子之交。慎察衆情。以換陰邪之黨。一二年後。主上聖志大定。嘉禮告成。乃乞骸明農。納筮鑰而去。庶可以終受託之事耳。未知有此福分否。二兄差歸。肅啓上謝。并告不敏。

## 二十

不肖謬以菲薄。濫竽台司。近年以來。諸所措畫。悉奉老師夙昔之教。不敢踰越。幸際聖明之主。中外寧乂。庶幾小康。皆教庇所及也。伏惟老師。昔以道匡扶世廟。翊戴穆皇。環瑋光明之業。旣已震赫寰區。炳耀史冊矣。晚偕赤松尋黃石。以其餘緒付之居正。用以佐明主興太平。昔人謂其精以治身。土直以治天下。殆謂是乎。以是知老師之壽。培嵩

等華。不可筭數。今天下陰受其賜。而邁功於老師者。又不獨不肖一人而已。南極宵暉。西池使至。謹獻一觴。南望九頓。肅章布幣。恭上壽筵焉。不勝忭祝之至。

二十一

前以台壽之辰。肅啓。附曹雲山投諸記室。聞去人行緩。度已後期。惶恐。三兄來。奉台翰。獎許過情。保慮周至。捧讀再三。感深以涕。古云。存我以厚。蒼生。老師保愛不肖者。厚天下也。顧不肖知昧於知人。機闇於自衛。信心任理。直道而行。機辟在前。曾莫之避。望吾師父母。時加提迪。俾得保終。至於在野。同心之招。尤不肖所樂聞者。願老師之明詔之也。豚兒寡學。謬點賢書。猥承遺賀。彌以爲媿。

二十二

三兄面送到台翰。開緘捧讀。不勝感涕。已復恭置書案。暇卽取讀。三復三嘆。何老師爲不肖慮周計審如此。然老師雖以愛不肖。實以厚國家也。大人君子之有益於世道也。豈必當位親爲之哉。顧愚昧不足以寄忠懇。當厚愛。謹百拜肅啟以謝。縷縷之愚。具在另幅。統惟台原。

恭惟師翁願神清淨。脫屣塵凡。心與造物者游。道通有形之外。故能茂綏景福。並衍仙齡。茲當九華注算之辰。正值萬寶告成之候。夏夷之望逾重。朝野之慶攸同。正夙荷栽培。倍深欣躍。奉觴膝下。不獲隨子姓之行。翹首天南。敢後封人之祝。敬修尺素。用抒微丹。伏冀鑒存。不勝幸願。

## 二十四

不肖孤精愆累釁。遭茲閔凶。聞訃後。卽荷師翁手書垂慰。茲乃遠辱奠章。跪而讀之。涕泗橫流。謹寄宣先人几側。冥漠有知。啣結爲報也。夫人大事莫甚於親喪。不肖孤不覩先人之面十九年矣。一旦見背。抱恨終天。已不勝痛割矣。乃乞歸未允。反被惡言。進不。成報國之忠。退莫展奔喪之禮。內憂外患。交集於身。今雖勉強應召而出。然精神困憊。形容摧朽。宇宙間悲苦蘊結。至極而難堪者。無如不肖孤矣。自非生成培植。恩深義重。誰則憐之。今擬大婚禮成。卽申前請。俟將發之日。馳使以報。祈有指誨也。不肖感戢恩慈。言不能喻。惟對來使。匍匐稽顙。奉書以謝。情悰苦鬱。語無倫次。統惟台亮。

二十五

恭惟弧辰屆節。壽躔增輝。天上神仙。身久留於寰世。山中宰相。望益重於華夷。實品類所共欣。在愚生而更切。緣羈職務。不獲趨承。謹薦微儀。庸申虔祝。

不肖自還朝之後。薦被隆恩。視昔更倍。捐軀碎首。難報聖恩也。伏承台教。敢不益竭。驚鈍。以副宿昔期許之盛心。仲公請告。銓部不允題覆。明春便可復任矣。使旋。敬候台居。

二十六

比者賴天地之靈。國家無事。主德日明。內外清晏。正猥以菲庸。謬膺重任。得免愆尤。竊  
老師教庇所及。酌水知源。敢忘啣結。老母暮齡。暫承上意。迎養京師。然北土苦寒。終非  
老人所宜。一二年間。國事少閒。尙當乞骸歸侍。并得伸補先人廬次之日也。令孫長公  
差回。敬候。聞令孫大兄錦旋。有娶婦之喜。計一二年後。老師又見玄孫矣。古來名相。福  
澤深長。如我師者。寧多見哉。不肖昨夏至。今亦連得三孫。目下尙有就婉者。老母高年。  
粗足自慰。諒台念所注。敢以奉聞。承教許道長忠信端雅。不肖心嘗器之。茲老師獎鑒。  
倍增光價矣。偶病不能書。口占達上。重陽屆節。爲師翁嶽降之辰。不肖門生。不得與於

諸兄獻觴之末。謹修歲事。寄獻壽筵。不腆之儀。附令孫致上。天增歲。人增壽。益添海屋之籌。年彌高。德彌邵。茂錫天申之福。

## 二十七

恒雨爲災。下民墊溺。皆執政非人。積怨干和所致也。明主循漢家故事。策免大臣。以消災沴。則不肖必首當汰黜矣。捧誦台翰。不勝媿悚。先是撫按疏至。上覽之痛惻。已兩奉特旨議處。乃蠲恤之令。猶屯膏未沛者。以故事必勘明而後可定分數耳。茲奉台教。會地曹覆顧掌科疏上。謹再擬旨。申仁主子惠之意。慰黎民仰望之心。埃勘至卽按嘉靖三十四年及四十年例。破格蠲貸。竝不敢徒用蠲免存留虛文塞責。以重得罪於元元也。謹謝台教。并陳不職之罪。唯師翁憐而宥之。

## 二十八

去秋及今。四奉台教。以公私多故。久稽裁候。中間以典成乞休。闕出處大節。且妄心誠陋。師心獨任。不預請先生長者之明訓。率爾行之。罪死罪死。正膺重任。九年於茲。恒恐不保首領。以辱國家。茲幸主德日清。內外寧謐。諸大典禮皆已竣事。乃以其間乞不肖

之身。歸伏隴畝。以明進退之節。不得已也。重蒙主上暨聖母誨諭諄諄。恩禮申篤。正誠迫於大義。不敢自愛其死。復黽勉就列。然自是羈縻愈堅。憂危愈重矣。吾師何以教之。二長兄錦旋。肅此上復。

仰惟椿靈之算。始七十有八。聞侍御者言。聰明步履。視昔益健。新壯少年不及也。逆觀載籍。當國家全盛。宇宙太和。必有純德平格之老。特膺壽祺。以爲世瑞。故居正不獨爲師翁慶。爲國家慶也。南極星輝。西池會集。謹修歲事。因二長兄肅幣預祝於門下。仰冀麾納幸甚。

二十九

入秋至今。三奉台翰。兀沓未圖。鱗翼以復。罪矣。吳中連歲水災。宜破格優恤。乃撫按勸報分數有限。而令孫長公於部覆之後。始以老師台翰來。不及預爲之圖。獨貧恐猶未遍也。執政非人。上千天和。災沴薦臻。民陷饑溺。死有餘責矣。令侄參軍圖南。敬此上復。

三十

正久司政柄。無補秋毫。頃當四考之期。自知無績可紀。逡巡不敢以例請。或云國家常

憲不可廢。且有幽當黜。亦不宜避。遂覩顏從事。果致厯聖心。載加殊眷。牢辭不獲。万切悚懼。乃蒙台慈獎藉。愈深兢惕。凡正今日之所蒙被。孰匪師翁教育所及。飲水知源。敢忘所自。愧薄劣不能仰酬於萬一也。

三十一

恭惟老師壽登八秩。福兆千齡。身居泉石。而台鼎重望。遠震乎華夷。年涉期頤。而龍馬精神。有踰於少壯。乃天佑國家。壽茲平格之老也。正忝在門墻。不勝慶忭。謹肅幣布之左右。仰乞鑒存。外副啓二摺。存問題稿一件。

賤恙寔痔也。一向不以痔治之。蹉跎至今。近得貴府醫官趙裕治之。果拔其根。但衰老之人。痔根雖去。元氣大損。脾胃虛弱。不能飲食。幾於不起。日來漸次平復。今秋定爲乞骸計矣。門墻夙愛。敢告嚮往。

遣官禮問。主上特恩也。差官到後。即宜具疏馳謝。伏惟台裁。

答高中立相公先附與諸公書以存交誼始末

答司空曹傅川



疊辱華翰。具悉雅情。誥命乃例所當得。部中已題允矣。中翁再相。諸凡舉措。甚愜輿情。僕素忝知心。尤切慶抃。諒尊懷所注。輒用附聞。

答司馬王鑑川

比者屢奉翰教。一一領悉。屬有立翁之事。既憊鄙懷。又費措畫。故未及裁答。言者謬妄。至波及令甥鳳馨。尤爲可惡。方事起時。僕卽具揭入告於主上。爲立翁伸理。幸聖明過聽。僕言。信之愈篤。而言者被遣不恤。此主上之明也。翰教益謙寔容云云。誠爲藥石之言。立老若肯留意。豈惟縉紳賴之。將宗社生靈。寔受其福也。

答少司馬曹傳川

兩奉華翰。具悉邊境輯寧。華夷闡燿。誠國家之慶。公更鎮之以靜。綏之以恩。內愈固。外愈安矣。比兩得立翁手書。頗以往事爲悔。此中近益帖然。無足慮也。冗甚草草奉答。諸惟鑒存。

答張操江

辱教遠嫌防伺之說。深荷道誼知己。今國家之事。無巨無細。皆必面奉意旨而行。緣主

上日御便殿。得以造膝從容。盡其誠款。專擅之嫌。庶幾可免。但僕以綿薄。受顧託之重。今內外所倚。惟僕一人。誼當以死報國。遠嫌避怨。心有不忍。惟不敢以一毫已私與焉。爾頃奸人挾刃入內。誣指新鄭所使。上自兩宮主上。下自閭閻細民。一聞此語。咸以爲信。而抵隙者遂欲甘心焉。中外洶洶。幾成大獄。僕切心知其不然。未有以明也。乃面奏主上。斯事關繫重大。竊恐濫及無辜。又委曲開導。以國法甚嚴。人臣不敢萌此念。請得姑緩其獄。務求真的。乃可正法。荷主上面允。而左右中貴人。亦皆雅相尊信。深諒鄙心。不敢肆其鉤鉅之巧。伏念六七日。至於旬時。果得真情。新鄭之誣。始從辯釋。國家元氣。乃得無損。不然。此公之禍。固不待言。而株連蔓引。流毒縉紳。今不知作何狀矣。嗟乎。如僕苦心。誰則知之。日來爲此。形神俱瘁。鬚髮頓白。啜茶茹蘖。又誰與憐之。耿耿丹心。祇自憐耳。丈初聞此。必重驚駭。恐遠不詳其顛末。特以奉聞。南中士大夫有欲知者。亦可略示其概。俾得安意無恐。外奏對近稿奉覽。

## 答中立高相公其一

春間承翰教。以舍弟小兒叨領鄉薦。重辱遣賀。仰荷厚情。擬附入覲。令弟修謝。比令弟

行。以冗沓忽忘之。至今爲歉。茲令親張尙寶人便。專此啓謝。薄物不足爲酬。幸爲磨納。僕以淺薄。謬肩重任。孤立無助。日夕遑遑。今當始衰之齡。老態盡出。霜華滿鬢。此後相見恐不相識也。冗中鄙懷不能盡陳。統容專啓。

其二

不孝積愆累釁。搆茲閔凶。前小兒南歸。方伏在苫塊。情緒荒迷。不遑啓報。比辱遣弔。勤惓。又承厚奠。不勝哀感。小兒途中書來。言翁推夙愛。引入內舍。欺語移時。垂泣而別。孤方在哀苦之中。感念厚誼。涕泗橫流。所謂悲者不可象吁也。貴恙想已勿藥。孤近尊諭。旨勉強稽留。待經理大婚事。計來歲春夏間乃得乞歸。擬過梓里。當作一日淹留。今預盼此期。真以日爲歲也。

三

相違六載。祇於夢中相見。比得良晤。已復又若夢中也。別後歸奔。於初四日抵舍。重辱遺奠。深荷至情。存歿啣感。言不能喻。使旋草草附謝。苦悰慟切。不悉欲言。還朝再圖一披對也。

## 四

比過仙里。兩奉晤言。殊慰夙昔。但積懷未能盡吐耳。承教二事。謹俱祇領。翁第專精神。厚自持。身外之事。不足縈懷抱也。初抵京。酬應匆匆。未悉鄙悰。統容專致。

## 答參軍高梅菴

三十年生死之交。一旦遂成永隔。刺心裂肝。痛何可言。猶幸比者天假其便。再奉晤言。使孤契闊之際。得以少布。而令兄翁亦遂長逝而無憾也。今嗣繼既定。吾契且忍痛抑哀。料理家事。至於郵、典、諸事。須稍從容。俟孤於內人多方調處。俾上意解釋。孤乃具疏以請。且夕有便。當告之。貴省撫按託其具奏報也。後有陳乞。令盛使高第來。人旋草復。

## 與參軍高梅菴

薄奠。敬煩從者布之靈几。表生藹之意耳。前聞訃後。竟不見使至。比已調解於內。似有可挽之機。須令嫂夫人自上一疏乞恩。孤當爲面奏陳請也。舍弟去。匆匆附此。

## 答司寇曹傳川

前過中州。東望仙廬。不勝馳想。比遠辱華翰。獎許過情。感忤兼抱。立老長逝。可甚悼痛。

前過新鄭。再奉晤言。比時病甚。語不可了。但相與痛哭而已。追惟平昔。期許蕭曹丙魏。今一旦遂成永訣。每一念之。涕泗盈襟。卹典一節。前已心許。今雖啓齒大難。然不敢背。已爲之調解於內。俟渠夫人有疏。當爲面奏代懇也。厚惠概不敢當。謹璧諸使者。

答參軍高梅菴

頃舍弟回。曾附薄奠。布之立老靈几。並言卹典事。許令嫂夫人具名奏乞。孤當爲之幹旋於內。公限假已滿。然立老初捐館。家事匆匆。恐公未能便舍而從仕也。轉假既有近例。不妨再奏。

答參軍高梅菴

辱華翰。領悉。立翁卹典。甚費心力。僅乃得之。然贈諡。尙未敢瀆望。歿再圖之。過此一番。應得之例。則後來續請。根基定於此矣。揭稿二通付覽。

又

請告大疏。已屬銓部覆請。太宰公云。前徐氏只以劄行。不必覆也。僕與立老交深。平生行履。知之甚真。固願爲之創傳。以垂來世。墓銘一事。雖微委命。亦所不辭。謹操筆以塗。

行狀當屬之曹傳川可也。請文佳惠祇領。餘不敢當。輒附使歸璧。外荆室有薄物奉令嫂夫人。幸爲轉致。

答參軍高梅菴

古語云。死者復生。生者不媿。比者但求不媿於此心耳。非欲市德於公家也。猥辱遣謝。深以爲媿。薄具致尊嫂夫人。幸爲轉納。

答司馬曹傳川

辱教立老行狀。事核詞工。足垂不朽。不穀不過詮次其語。附以銘詞耳。高六回。草草附復。餘具別楮。

又

不穀與立老爲生死交。所以疏附後先。雖子弟父兄。未能過也。叵奈中遭。儉人交。搆其間。使之致疑於我。又波及於丈。悠悠之談。誠難戶曉。惟借重一出。則羣喙自息。況此乃區區推轂素心。敬聞命矣。冗甚。不悉鄙懷。統惟鑒亮。

與河南周巡撫

故相中立公。今尙未葬。聞恩卹葬。價有司未能時給。此仁人之所隱也。不揣溷冒。敢微惠於下執事。惟公哀憐之。冗不及悉。統惟鑒存。

報知已顧東橋李長白與諸公書

與南學院吳初泉

弟以淺薄。叨附榜末。夙於門下。投分至深。數年多病乞歸。踪跡靡定。自外於賢者。然所嚮慕天下長者。未有先公者也。伏審振鐸南郡。多士嚮應。公輸操墨。則楠梓呈材。良樂控銜。則驕驕騁足。才品士風。繫於公之身者。豈其微哉。欣仰欣仰。茲有冒瀆。弟家世寒賤。爲童子時。遇先刑部尙書東橋顧公。其撫楚時。拔正於毀齒之時。稱爲神童。其實正靡有異才。如古融粲勃泌。足以驚人者。而顧公又當代名流。文章宗匠。乃一見卽呼爲小友。解束帶贈之。臨別又出其幼子見囑曰。他日以吾子孫相託。乃正微時厚幸。以有今日。皆顧公賜也。深惟古人一飯之誼。竊慕豫讓國士之報。而力不副心。又顧公歿後。頗罹橫議。家世遂微。有孫二人。今隸應天府學。其志行固有家風。追惟疇昔期許之言。而二子又幸廁門弟子之數。弟不於此時。借公垂盼優錄。以少效犬馬。恐一日溘先朝。

露。卽弟終已有負德之恨。無以見東橋公於冥漠矣。知門下肅教端範。絕跡請託。而弟抱此區區。干冒清嚴。觀過知仁。諒不深罪。孤女竊照於鄰姬。僂夫賈勇於烏獲。偷蒙垂念。則弟犬馬之誠。實借公以報顧。又感顧以報公矣。仰賜尊裁。惶恐惶恐。

### 與文選李石塘

張甌山來。奉翰教。以扈駕山陵。未及裁答。甚歉。昔公養重丘園。望隆朝野。今清明之會。裒然彙征。展布平生。以答群望。在此時矣。輒有奉瀆。僕自童稚時。受知於東橋顧公。以子孫見託。公所知也。其惠政湖湘。宣勞陵寢。清節偉績。亦公所知也。今聖皇御極。恩被幽隱。若此公者。雖不與大禮大獄同科。然其行誼端方。文學醞藉。固江左偉人。先朝耆碩也。而歷歲久遠。人罕知者。故郵典未及。公評惜焉。幸該科有再舉之議。僕冒昧作一書。託之少魯提學。爲之表揚。附於公舉之末。煩公轉致之。倘面會少魯。致詳鄙意。又大快也。

### 與南學院周少魯

自公簡畀學使。清譽藉甚。楚侗先驅。公爲後繼。可稱二美。浣慰鄙情。奉瀆。顧東橋先生



璘者。撫楚大有惠政。陵寢又効勤勞。僕昔在童稚。辱此公國士之知。別時以子孫見託。僕驚碌至今。未有報也。聖皇御極。惠及幽隱。如此公。雖不可與大禮大獄同科。而人品文章。昭代偉人也。後裔式微。不能自列。而郵典缺焉。公評甚惜。幸該科有再錄之疏。望公俯賜表揚。入公舉之末。使得沾曠蕩之恩。是在公義舉。足以樹風。在僕酬知。亦明雅道矣。恃在桑梓。敢冒掠美。其撫臺念堂公。察院馮公。均借鼎力。尤所懇也。

答姜巡撫言李公郵典事

屢承揭示。差人竟不索報。遂失裁答爲歉。茲有冒瀆。李長白公諱士翱者。昔守荆南。甚有政績。至今荆人俎豆之。敷歷中外。咸著嘉聲。清德令名。終身無玷。獨以後裔式微。人鮮知者。郵典缺焉。今該科有再錄之議。倘荷垂慈。特加表薦。不惟李公結效於冥壤。而區區亦得借報於乞鄰矣。草率冒干。統惟鑒亮。右李公卽初守荆試先父爲神童者後至戶部尙書

答應天巡撫

前冒瀆東橋老先生郵議。科已無及矣。乃荷垂念。特爲疏請。不惟橋翁感德於泉壤。而僕亦借報於乞鄰矣。啣戢之私。非言可旣。

與南列卿王公

百八十八

東橋顧老先生。昔以其少子名峻者見託。今欲爲之求一功名。久之未有因也。且令歸以俟時。其家貧甚。幸念薄分。一垂盼焉。餘不敢及。

與南掌院趙麟陽

僕昔年十三。大司寇東橋顧公。時爲敝省巡撫。一見卽許以國士。呼爲小友。每與藩臬諸君言。此子將相才也。昔張燕公識李鄴侯於童稚。吾庶幾云云。又解束帶以相贈曰。子他日不束此。聊以表呂虔意耳。一日留僕共飯。出其少子今名峻者。指示之曰。此荊州張秀才也。他年當樞要。汝可往見之。必念其爲故人子也。懋修曰東橋先生不惟知先父又知其幼子峻不自致青雲必待見故人乃得功名此等神識若有前定數以主乎其間前輩神識殆不可及僕自以童幼。豈敢妄意今日。然心感公之知。思以死報。中心藏之。未嘗敢忘。前年顧峻來見。僕因追憶公言。不覺嘔唏流涕。念無以厚之。欲以鄙衷控之皇上。辭免當得廕子。移之於顧。以報知己。會楊虞坡太宰知之。爲僕謀曰。東橋昔督工顯陵。有勞宜廕。爲當路所阻。當時先後在工者皆廕。而公獨無。此可援例陳乞。且公海內名流。補與一廕。豈得爲過。後於工部查公果未霑恩。遂令峻生具疏自乞。蒙

恩逾允。此朝廷錄舊之恩。而僕報知已贊成之義也。今聞其侄輩咸起戶爭。言峻是三房。倫序不宜。投揭留都法司。欲行爭奪。彼蓋不知乃祖見託之言。僕報知已之意。但知錄廕常例相競耳。且已奉明旨。孰得而易之。乞公明示以大義。給峻生一執照。庶不爲強圉所陵。而僕區區之義。亦可報東橋公於冥漠矣。縷縷聒聽。統惟鑒原。

與操江王少方

頃辱華翰。舍人回已具復。茲顧東橋老先生乃郎赴京謁選。其期尙遠。告回搬取家眷。欲邀惠於執事。求一站舡載行。其中夫役。不穀已捐俸助之。一舟之外。更無所覲。亦不敢求大舟。但少異於民舡可也。此子之得廕。執事所知。昨小兒往來途中。皆不敢乘官馬。乃獨厚於故人之子。情不得已也。然執事但如不穀所求者與之。一毫勿有加。加則傷惠也。又案事體。統惟裁鑒。

懋修曰。余編次先公書至此。不覺涕淚沾襟。蓋其感激高義。不昧心期。咸在歿身之後圖之。不一而足。愈久愈殷。是以可痛也。先公側在仕途。推轂海內名賢衆矣。而歿身之後。三紀於茲。未聞有温言美意。一及後人者。馬伏波之薏苡。朱勃焉逢。任西華

之葛衣。孝標誰作。雖其特義不敢比跡。顧公亦良由德薄名溷。漸漬嫌疑。由來有基矣。爲之三歎。

答廉憲王鳳洲

曩辱華翰。深荷雅情。惟丈儻才卓行。冠冕人倫。沉抑數年。輿情共惜。然不困厄。烏能有激乎。清明之世。與天下賢士。裒然彙征。紆先世之積憤。展平生之所懷。在此時矣。幸努力自愛。辱惠佳書。寶若彞鼎。兼之珍幣。豈所敢當。重違尊意。謹領佳絹二端。餘附使歸璧。勿勿附謝。另具侑柬。統惟鑒存。

其二

才人見忌。自古已然。奉首浮議之興。良亦繇此。公論在人。其可混乎。僕雖不肖。竊敢自附於祁奚之誼。乃汪伯玉遂以告公。若將有移德於人者。非僕本指也。吳干越鉤。輕用必折。匣而韜之。其精乃全。公讀禮之餘。闔扉養重。亦天所以韜其光而厚其蓄也。願公自重毋忽。雅惠不敢例辭。輒用登領。附謝。別具侑柬。統惟鑒存。

其三

今歲當賓興。楚人聞見甚陋。誠願得公大雅之作。以爲程式。幸過發征塵。趣赴盛會。惟公以鴻漸之儀。困於燕雀。茲當聖明之隆。衆賢彙進。銘太常。勒燕然。皆所優爲者。外臺執憲。直暫借耳。使旋草草附復。

附答楚按舒念庭

重承華翰。深荷雅情。銘心之感。言不能悉。新任王廉憲鳳洲。嫻於文詞。委以程試之作。必能代勞。有裨盛典。差旋敢謾附此。諸惟鑒存。

其四爲楚憲長時

繳憑人至。知道從己至楚。入鎖院主文衡。今歲程式。必將爲海內冠矣。以下國之荒陋。何幸得聞雲和之聲。覩瓊璋之寶哉。憲長例當入覲。汪伯玉言公雅不樂行。且循資量移晉右轄。且夕便可爲內轉之階。倉卒不及爲公擇地。但借資耳。諸惟原亮。

其五自太僕卿轉郎院時

前令弟送公河上。其中所言。具見經濟弘猷。一一領悉。承差至。知道從己入楚視事。無任欣慰。人旋草草附復。

## 其六鄖院時

前老父誕辰。已承偉製。茲老母七秩。復拜雄篇。天孫之錦。後先相映。昭華之寶。璀璨盈庭。珍重感切。誠不能喻之於言也。

## 其七鄖院時

辱示數議。俟大疏至。當屬所司覆行。前歲遣三司馬閱邊。惟汪伯玉所注措強人意耳。乃忌者反用此誣詆之。殊爲可訝。今已息喙矣。奉別札云云。昨大察時並未聞有議者。似不必自生疑慮也。

## 其八大理卿時

鄖臺僻處。非展驥之地。而巖廊又無虛席。故暫移留棘以需次焉。僕先世單寒。非闕闕衣冠之舊。老父不揣。妄干名筆。是何等人地。而辱王謝大家之垂盼乎。高文尙未拜觀。

## 其九

自借鄖臺。而忌者日以伺公之釁。重之以先朝之事。而令弟解近侍矣。操之以舉刺之例。而科疏糾冒濫矣。或云僕有不足於君所。或云公有所怨滯於周南。衆口之鑠。有自

來矣。故橫發於南。疏蓋亦積漬漸潤使然。非獨言者之過也。如聞輿人之言。此舉不中。且復有繼者。不得已暫解見任。以息群喙。旋當復公舊氈。滌雪以需大畀焉。然蔽賢之罪。首當在僕。無所歸咎。伏承翰教。深以爲媿。餘具別楮。統惟鑒存。

其十

孤自遷先人之變。卽荷厚情。遠垂唁慰。茲又辱奠貺。今同年中有孤所引援。見居要路。漠然不一賜問者。乃公獨用情優渥至此。令人哀感。媿死無地矣。厚貺概不敢當。謹領尊章。先寄宣先人柩側。用承公兄弟通家至情。冥漠有知。必效脚結。餘輒璧諸使者。

其十一

孤之此行。本屬初意。茲蒙俞允。獲遂夙心。所謂求仁而得仁也。他何知焉。月之四日抵舍。十六日幸克襄事。卽欲奉老母匍匐就道。奈天暑不能遠涉。不得已再乞展限。如不獲命。則孤星馳先發矣。疊辱慰奠。深荷至情。但厚惠概不敢當。仍璧諸使者。草草附謝不悉。

其十二

南歸疊承華翰。吊慰慙慙。感戢雅情。言不能悉。中心藏之而已。還朝後。又奉華札。并初夏所寄俱至。益深懷感。家君在時。曾以祠碑。讀求名筆。荷蒙不棄。既以鴻篇。此時不肖未得見也。昨歸於家。窮處取而讀之。其文詞之粹嫩。固不待言。乃其意義淵奧。寄託宏遠。直逼古匠。公平生之文。可傳於後者。固難悉數。然而如此作。恐亦不多得也。卽以勒植祠中。永爲家寶。茲因使者。一伸感仰之私。并具不腆。少伸謝悃。鄙懷固非楮筆所能盡也。

## 答藩伯王麟洲

不肖以六月望日抵都。仰荷宸情忻豫。殊錫駢蕃。誠非捐糜所能報稱也。遠辱翰貺。并初夏所寄俱至。賢昆仲敦念宿誼。垂詢不遺。曷勝感戢。今大道旣夷。公論昭揭。自此已往。皆驂騮騁足之日矣。願益堅雅操。以需崇界。

## 其十三起京兆時

向者推轂不遂。反憎多口。致公再辱。歉恨殊深。比承華翰。益增其怏怏也。不穀徼時厚幸。久玷機衡。幸主德日明。百司奉職。頹綱墜紀。漸次振興。內外之治。庶幾小康。一二年



後。可以納筭。鑰謝事矣。獨念海內遺賢。未盡登庸。多在邁軸。不可招者。此不穀所以死不忘。惓惓也。遠辱華翰。深荷雅情。使旋謹此謝復。

其十四

令弟至。拜翰貺。極感注存。兄曹寡學。並捷南宮。老母高年。足慰朝夕。但德薄而享厚。可懼耳。令弟旋附復。別具侑臧另楮。統惟鑒存。

別諭領悉。令弟入覲。亦輒引疾。再三強之。乃復出。借重齊魯督學。又辭不拜。人情世路。誠爲嶮巇。而昆仲之畏懼。亦已甚矣。閒雲出岫。倦翼投林。何容心於意必乎。不穀羈縻一身。惟有因之羨慨而已。惠子知我。固不悉言。統惟鑒存。

答陝西學道王麟洲

兒曹寡學。冒竊非望。遠辱遣賀。彌切兢慙。厚惠概不敢當。輒附使者歸璧。幸惟原亮。近已借重督學關西。念資俸已越。不宜仍淹外服。而三秦重地。學憲要秩。非假重望。不足以當之。竢閱歷愈深。不次當有崇敘耳。

其十五

曾見藏真絹本千文。或云楮本者更佳。於鄴架借觀之。辱不吝專遺。寄示驪珠顆顆。璀璨奪目。絹本雖晚筆。神彩要不逮也。天球瓌瑋。小有空缺。何妨代寶。文君用時筆補之。更爲續貂。公謂是虎賁之似。似爲溢美也。寓目自足。何必奪爲已有。展玩畢即以歸之。煩好爲將護。以囑來使矣。而使信至三。堅以見遺。因思神物恐爲風雨所妒。什襲而藏之。即不佞亦慙爲禿師主此物耳。

## 示季子懋修

汝幼而穎異。初學作文。便知門路。吾常以汝爲千里駒。卽相知諸公見者。亦皆動色相賀曰。公之諸郎。此最先鳴者也。乃自癸酉科舉之後。忽染一種狂氣。不量力而慕古。好矜已而自足。頓失邯鄲之步。遂至匍匐而歸。丙子之春。吾本不欲求試。乃汝諸兄咸來勸我。謂不宜挫汝銳氣。不得已。勉從之。竟致顛蹶。藝本不佳。於人何尤。然吾竊自幸曰。天其或者欲厚積而鉅發之也。又意汝必懲再敗之耻。而頰首以就桀藥也。豈知一年之中。愈作愈退。愈激愈頹。以汝爲質不敏耶。固未有少而了了。長乃懵懵者。以汝行不力耶。固聞汝終日閉門。手不釋卷。乃其所造爾爾。是必志騫於高遠。而力疲於兼涉。

所謂之楚而北行也。欲圖進取。豈不難哉。夫欲求古匠之芳躅。又合當世之軌轍。惟有絕世之才能之。明興以來。亦不多見。吾昔童稚登科。冒竊盛名。妄謂屈宋班馬。了不異人。區區一第。唾手可得。乃棄其本業。而馳騫古典。比及三年。新功未完。舊業已蕪。今追憶當時所爲。適足以發笑而自點耳。甲辰下第。然後揣己量力。復尋前轍。晝作夜思。殫精畢力。幸而藝成。然亦僅得一第止耳。猶未能掉鞅文場。奪標藝苑也。今汝之才。未能勝余。乃不俯尋吾之所得。而復蹈吾之所失。豈不謬哉。吾家以詩書發跡。平生苦志勵行。所以貽則於後人者。自謂不敢後於古之世家名德。固望汝等繼志繩武。益加大。與伊巫之儔。並垂史冊耳。豈欲但竊一第。以大吾宗哉。吾誠愛汝之深。望汝之切。不意汝妄自菲薄。而甘爲轅下駒也。今汝既欲我置汝不問。吾自是亦不敢厚責於汝矣。但汝宜加深思。毋甘自棄。假令才質鶩下。分不可強。乃才可爲而不爲。誰之咎與。已則乖謬。而徒諉之命耶。惑之甚矣。且如寫字一節。吾畷畷諄諄者幾年矣。而潦倒差訛。畧不少變。斯亦命爲之耶。區區小藝。豈磨以歲乃能工耶。吾言止此矣。汝其思之。

附錄翰林時書牘

謝病別徐存齋相公

百九十八

居正惶恐頓首再拜上書師相閣下。居正少不自慎。被狗馬病。伏蒙台慈得諒其愚。即日南發。遠隔門牆。未一奉徽音。徘徊瞻望。竊念正自寒士。非闕闕衣冠之族。乏金張左右之容。弱冠登朝。賴相公甄拔。廁在下弟子。深蒙鑒獎。雖仲舉知深於徐孺。中郎倒屣於仲宣。未爲過也。知己之恩。每懷國士之報。假令相公與周召之業。使如正者束帶立朝。參制作之任。或拾遺左右。備九九之數。雖不能使惡言不至。門人加親。然進奮短翮。飛翔之用。退效杞梁一介之死。正雖至愚。敢不勉乎。小人命薄。分過災生。蒲柳之質。一旦溘先朝露。則終已無以報知獎之恩。死有餘恨。竊不自諒。有惓惓之愚。秋毫少效於萬一。惟相公裁察焉。相公雅量古心。自在詞林。即負重望。三十餘年。及登揆席。益允物情。內無瑣瑣姻婭之私。門無交關請謁之釁。此天下士傾心而延佇也。然自爰立以來。今且二稔。中間淵謀默運。固非讜識可窺。然綱紀風俗。宏模巨典。猶未見使天下改觀而易聽者。相公豈欲委順以俟時乎。語曰。日中必昃。操刀必割。竊見向者張文隱公。剛直之氣。毅然以天下爲己任。然不逾年遽以病歿。近歐陽公人倫冠冕。嚮用方殷。亦奄。

然長逝。二公者皆自以神智妙用和光。遵養然二三年間相繼彫謝。何則。方圓之施異。用。慍結之懷難堪也。相公於兩賢意氣久要。何圖一旦奄喪。誰當與相公共功者。況今榮進之路。險於榛棘。惡直醜正。實繁有徒。相公內抱不羣。外欲渾跡。將以俟時。不亦難乎。盍若披腹心。見情素。伸獨斷之明計。捐流俗之顧慮。慨然一決其平生。若天啓其衷。忠能悟主。卽竹帛之名可期也。吾道竟阻。休泰無期。即抗浮雲之志。遺世獨往。亦一快也。孰與鬱鬱頽頽而竊歎也。夫宰相者。天子所重也。身不重則言不行。近年以來。主臣之情日隔。朝廷大政。有古匹夫可高論於天子之前者。而今之宰相。不敢出一言。何則。顧忌之情勝也。然其失在象廐。人主之爵祿不能以道自重。而求言之動人主。必不可幾矣。願相公高視立覽。抗志塵埃之外。其於爵祿也。量而後受。寵至不驚。皎然不利之心。上信乎。主下孚於衆。則身重於太山。言信於著龜。進則爲龍爲光。退則爲鴻爲冥。豈不綽有餘裕哉。公孫弘有言。人主病不廣大。人臣病不節儉。身爲漢相。脫粟布被。良史稱之。夫京師四方之極。大臣庶民之表也。自頃內外用竭。習尙侈靡。貧者襦褐不完。而在位者。或婢妾衣紈綺。百姓藜藿不飽。而在位者。或廝養厭。梁肉此損。下益上之尤者。

也。誠宜倡之以儉。視之以禮。弘晏子狐裘之節。覽詩人羔羊之詠。庶儀刑百辟。易移侈俗也。夫天子有諍臣。士有諍友。故能動不失則。故石猶生我。美疾滋毒也。端人直士。藥石也。令色孔壬。美疾也。然端直勁而難親。僉壬柔而易狎。傾佞之人。未語而唯。唯未言而諾。諾較德則擬於臯伊。論功則卑乎管晏。足使人志滿情逸。受其面謾。此高允所以深疾。閔湛謂其所營尺寸之間。而貽崔浩無窮之害者也。願相公擇士之端諒者。使在左右。資其匡輔。聞其讜言。亦鴻業之一助也。夫士習者。人才之關也。自頃士氣頹靡。廉耻道喪。苞苴顯於贅雉。倖孔多於亡羊。乞溫逐臭。相煽成風。豈可令明主在上。相公在位。而習弊至此。夫爵祿賞鑒。所以磨世也。廉耻節義。所以建標也。爵祿賞鑒。不足以激上。才止可以勸中人耳。然上才百一中。才者多。令爵祿賞鑒常歸之。廉耻節義。則中才者望標而趨矣。迨夫清議已行。士氣已振。然後相公振之以無名之樸醢。以醇和之氣。即大化薰蒸風俗。長厚矣。此相公今日所得爲者。若夫格天之業。致王之功。固非末士所與。且愚蒙未諳。故不敢言也。夫翳蒼之翔。叵以論九蒼之高。蹄涔之遊。無以測四溟之深。相公德冠宇宙。知兼衆哲。而下走欲以管窺之見。仰裨高深。不狂則愚。且以下

亦干非其分。不知者以爲預結於左右也。然自惟受恩深重。苟有效于涓埃。卽剖肝裂膚。士所不辭。況恤其他乎。古人之言曰。近而不言爲諂。遠而不言爲怨。今將遠矣。不勝感激瞻望之懷。臨發潸然。詞不宣心。仰惟相公清閑之燕。垂察狂狷之言。幸甚幸甚。

啟聶司馬雙江

近時論學者。或言行頗不相覆。僕便謂其言盡不足信。是以孤子迄於無聞。竊謂學欲信心冥解。若但從人歌哭。直釋氏所謂闕盡他寶。終非己分耳。昨者伏承高明指未發之中。退而思之。此心有躍如者。往時薛君采先生亦有此段議論。先生復推明之。乃知人心有妙萬物者。爲天下之大本。無事安排。此先天無極之旨也。夫虛者道之所居也。涵養於不睹不聞。所以致此虛也。心虛則寂感而遂通。故明鏡不憚於屢照。其體寂也。虛谷不疲於傳響。其中竅也。今不於其居無事者求之。而欲事事物物求其當然之則。愈勞愈敝也矣。瞽見如此。惟高明指示焉。

答中丞孫槐溪

得儀真書。已報得九月七日書。知洞兵遂大破賊。可喜。大丈夫遭艱難之運。棄家忘身。

以殉國家之急。固已難矣。又以數千之兵。抗盈萬之衆。策羈旅之師。當積年之寇。片帆一指。樓櫓星馳。長戟纔交。鯨鯢電掃。自非忠勇所激。天人助順。孰得勝算奇功若斯之盛乎。然古人云。成功非難。處成功尤難。今茲度彼中事。猶有五慮。爲臺下獻焉。我兵新勝。賊已破膽。宜乘破竹之勢。搗其巢穴。殄其醜類。而當事者或不能同心趨便。但多張首虜。以幸功級。令殘夷得便以成反覆。可慮者一也。狃於一勝。防禦必疏。猾賊盡力以窺伺我。若遺燼復然。貽禍未已。可慮者二也。東南招募。已及數年。師老財匱。効無尺寸。今公以數千土兵。決勝一旦。功名之際。誰肯推助。可慮者三也。狼處吳等兵。斬首虜雖多。而摧鋒陷堅。則永順似宜首論。若但校捕斬之功。不揣難易先後之勢。則夷人怨憤。必不用命。責以後効。恐難收功。可慮者四也。克敵之後。議論必煩。若功賞不明。事體齟齬。則人心不勸。或致他虞。可慮者五也。夫銳始者必圖其終。成功者先計於始。杞人過計。聊復覩縷。惟知已採焉。荆人望公。如霖雨之思。公且冀早旋旌。以慰氓黎。

## 答劉白川

楊州二守日者。馮生先後奉小啟馳候。弟數年之中。沉疴未解。引退者再。去就無恒。然



懷知戀侶未一日去左右也。辱諭羅劻之故。基自怨家。蔓於衆口。卽年兄不言。人固已喻之者矣。自弟通籍已來。竊見宦途通塞。咸有嘿嘿者以尸之。或擲而反遂。或引而更類。或理宜鬯遂。或運屬乖違。揆之人事。自有相反者。飄風能隕葉於將脫。而不能使勁幹立枯。呪師能乘算於宜絕。而不能使修齡轉促。向之議兄者。森至蠶起。簞鼓噉啗。或剗刃而徂擊。或挺戈而當先。卒不能動兄一毛。而望實愈茂。則倚伏之料。昭然可睹矣。夫士有一定之論。女有不易之行。自信於己。任運推移。惟吾道之興廢。又何計於怨讐乎。必行有所召。斯臧倉之詬得行。倘德在予矣。卽向鱗之難何懼。若乃齊窳親於平等。並恩怨於兩忘。海馬先機。虛舟隨汎。斯又上士立同之軌也。今天下之勢。莫亟於東南。海波未靖。內奸伺隙。廟堂宵旰以憂之。所賴一二鉅公。畢慮紓忱。弭此大患。所願勉就功名。以答羣望。詩云。靖共爾位。正直是與。神之聽之。式穀予女。紛紛之談。未足爲帶劑也。千里緘問。不當用常語相聒。故敢獻其區區。高明裁納焉。

與司成馬孟河

振鐸南雍。士方嚮往。不謂東山泉石。更挂冲襟。夫遺世拔俗者。逸民之所操。明道濟物

者。大賢之弘量也。公遺情纓被。結意煙霞。蟬脫於穢。素心獨往。得已。然律以至人。立同之軌。揆以孔門兼善之抱。無乃得其一。未得其二乎。弟以淺陋。幸附驥尾。日夕循省。尸素是虞。昔匡鼎說詩。都講爲之避席。南能卓錫。印宗退而北面。以弟之愚。誠得高宿如公者而遜之。所謂辱夫負千鈞上太行。得烏獲而畀之。有餘力矣。願公幡然易慮。迴肥遯之轍。躋同人之軌。母使青衿之子。徒有白駒之歎。幸甚。

## 與邊鎮巡撫王西石

辱翰教具悉。丈體國之忠。任事之勇。經理之畧。東北一面。可無虞矣。昔李抱真初在澤潞。勝兵不滿萬。抱真勵以忠義。省財用。閱軍實。數年遂爲強鎮。河北諸藩懾懼。不敢越河爲寇。抱真力也。以此見天下無不可爲之事。艱難困憊。忠智實由以表見也。顧近來疆場之臣。大抵選懷觀望。飾虛言。張首虜。爲旦夕計。非有長慮却顧。爲地方至計也。因仍成風。邊事大壞。夫仕宦。至於巡撫。受國恩。不爲不厚。功名。不爲不顯矣。事有關。係宜以死生去就決之。乃謬認然求便其身圖。此亦不忠不智甚矣。今者廟堂頗亦厭此。苟苴不行。功實漸覈。吾丈素懷忠赤。當一面之寄。此千載一時也。事有易置者。不妨先達

本兵次第舉行。詢於有衆。事求實。又本之以誠。慤持之以堅。忍慮定而後動。鮮不濟矣。弟望丈之重。敬丈之深。故敢肆其狂瞽。以丈位隆望重。稱休光頌盛德者。當不乏人。固無事弟喋喋也。遼東地圖備悉者。幸見教一帙。

與吳川樓給諫

僕忝在桑梓。與門下投分不淺。後僕抱文園之疾。公亦被曾參之疑。羽翼旣乖。遂成疎逖。去春都門一會。會便成別。離合一移。感慨隨之矣。公儁才逸氣。鋒穎秀拔。不惟脫穎全楚。實亦絕塵海內。然坐是頗爲累矣。夫素絲易污。嫫顏蒙垢。士之負瑰璋而坎壈者。不可數計。豈必盡世人之過哉。毛嬙西施。天下之至麗也。鳥見之高翔。魚見之深入。况無容於前。有伺於側。同室並御。爭妍競憐。斯楚姬班女。所爲招剽而興悲也。彼才人者。不知含光葆真。內晦其美。乃嫣然姣服。靚粧沾沾自喜。以此求容。將無難乎。孫登之言曰。火有光而不用其光。人有才而不用其才。光在於得薪。用在於識真。嗟乎。假令屈賈之儔。少留意於此。則泊羅無不返之魂。長沙無賦鵬之感矣。僕才不逮公。而邀時厚幸。早獵青華。自省十餘年來。性簡疎傲。理足招尤。然公也缺而僕也完。公也躓而僕也免。

則有幸不幸耳。今而後從事於至人之學。庶幾乎立同之軌。頃辱翰教。蓋亦有追往懲蹶之意焉。此天啟高明。綏之以方來之祉也。不憚愚陋。妄有所獻。惟垂聽納焉。

答西夏直指耿楚侗

別去條經霜雪。同心之懷。良不可任。辱諭謂比來涉事日深。知虛見空談之無益。具見丈近日造詣精實處。區區所欲獻于高明者。正在于此。但此中靈明。雖緣涉事而見。不因涉事而有。倘能含懾寂照之根。融通內外之境。知此心之妙。所以成變化而行鬼神者。初非由于外得矣。長安蒼扃屢變。江南羽檄翫午。京師十里之外。大盜十百爲羣。貪風不止。民怨日深。倘有奸人。乘一旦之釁。則不可勝諱矣。非得磊落奇偉之士。大破常格。掃除廓清。不足以弭天下之患。顧世雖有此人。未必知。卽知之。未必用。此可爲慨歎也。懋修曰。雖在清散抱負已定矣。中懷鬱鬱。無所發舒。聊爲知己一吐。不足爲他人道也。西夏風土如何。邊事尙可支持否。隴西北地。故多豪傑。今有其人否。風便頻頻寄言。迺見愛迪。

答胡劍西太史

陰陽人來。言兄吏事精覈。不類濫譎者。弟爲年兄慮者。正恐未透此關耳。果爾。復何言。

哉。易所謂困亨者。非以困能亨人。蓋處困而不失其宜。乃可亨耳。弟甚喜楊誠齋易傳。座中置一帙。常玩之。竊以爲六經所載。無非格言。至聖人涉世妙用。全在此書。自起居言動之微。至經綸天下之大。無一事不有微權妙用。無一事不可至命窮神。乃其妙。卽白首不能殫也。卽聖人不能盡也。誠得一二。亦可以超世拔俗矣。兄固深于易者。暇時更取一觀之。脫去訓詁之習。獨觀昭曠之原。當復有得力處也。

答羅近溪宛陵尹

比來同類寥落。和者甚稀。楚侗南都。廬山西蜀。公在宛陵。知己星散。僕以孤蹶。耿耿于迅颺之中。未知故我何似。聞公政致刑措。不言民從。蓋皇農之再見。所治是信心任理。不顧流俗之是非。此固羅近溪本來面目。然同志數君子。往來倡導。使人咸知有仁義道德。則所以助公道緣爲不少也。學問既知。頭腦須窺實際。欲見實際。非至瑣細至猥俗。至紛糾處。不得穩貼。如火力猛迫。金體乃現。僕每自恨優游散局。不會得做外官。今于人情物理。雖妄謂本覺可以照了。然終是紗窗裡看花。不如公等只從花中看也。聖人能以天下爲一家。中國爲一人。非意之也。必洞于其情。辟于其義。明于其分。達于其。

患。然後能爲之。人情物理不悉。便是學問不透。孔子云。道不遠人。今之以虛見爲默證者。僕不信也。

寄徐太學國式

執事雅操端潔。造詣閎博。寔僕畏友。未敢屈季通于坐側也。兒曹魯鈍。幸荷甄陶。數月之間。便覺開悟。志不在溫飽。顧代者非人。別後情態畢露。全無啟迪之功。欲更易之。倉卒又難其人。使諸兒舊日萌芽。有退無進。良可惜也。以此懷想執事高誼。愈覺惓惓。令婿回。附寄小詩并詩扇三柄納上。欲見無期。臨楮悵惘。懋修曰。先師徐國式諱一。正仕至太守。弟方在童年。卽教以志不在溫飽。而先父雅重之。今爲父者。每忽童子之師。以爲記書認字足已。不知根基一定。遂不可移。余謂舉業之師。傳文藝。猶爲易得。蒙童之師。鑄人品。百中難得一也。故曰蒙以養正。聖功也。

寄高孝廉元谷三首

沈子來。知已縱觀太和之勝。煙霞心賞。恨不同之。頃緣多病。歸思已積。而事乃有大不  
如人意者。便差不可得。俟明春長往耳。世慮嬰懷。宦情寥落。吾兄視不肖。豈不然哉。區  
區鄙願。竟不獲遂。乃知行止當有數也。江干花鳥。恐復笑人。言念此期。以日爲歲。比者  
中州盜起。道里阻絕。大河南北。榛莽蕭蕭。恐喪亂未已。天下事足可寒心。携手之歡。知

在何日矣。向欲卜居城東。得果此緣不。日來所得想復倍進。如弟則荒陋如昨。遠道之懷。書豈能殫。努力心期。以俟良晤。

入冬偵北來消息。不謂江魚萊彩。竟戀庭闈。念茲契闊。豈勝悵惘。昔馬祖欲上京就選。有禪師示之。不求選佛。乃求選官。吾丈冲襟高志。固非一第所能榮也。楚中連年水患。民困艱食。弟既無道相援。又無拯溺之責。每念及此。若己推之。薄田不入。非所慮也。別來改歲。同心之契。無時可忘。此行雖勉強涉世。乖其本圖。近日靜中悟得心體。原是妙明圓淨。一毫無染。其有塵勞諸相。皆由是自纏。識得此體。則一切可轉。識爲智。無非本覺。妙用。故不起淨心。不起垢心。不起著心。不起厭心。包羅世界。非物所能礙。恨不得與兄論之。近日舉業何如。將試不必多作文。但凝神養氣。曹孟德臨敵。思意安閑。如不欲戰。亦可以武喻文。

答貴陽開府霽岩吳老師

辱台翰不遺。先駟之璧。何以遠過。師翁絕才冠世。卓行範俗。當路且欲虛揆席以待。貴陽開府。只暫借耳。比奉手教。乃有東山之懷。豈羣情所望乎。胡正伯縮篆詞林。汪伯玉

建牙閩粵。殷正甫青宮翊贊。陸與繩持銓東省。韓明仲督學關西。五君子者。清才雅望。砥勵明時。論者謂門下得人。於斯爲盛。班倕司匠。門無棄材。雖樛散如正者。亦側諸賢之末。效染栢之用。然揣分度力。未嘗不自慚于周任也。不審師翁何以策之。

答閩中開府汪南溟

公夙抱奇瓊。膺茲特簡。命下之日。皆爲朝廷得人賀。况弟素稱莫逆者哉。譚公當閩人厭亂之秋。有良將帑儲之助。因緣際會。遂得成功。遂以墨綬解職。已事過歸。可謂善刀而藏之矣。公鋒刃乃新發於硎。蠹茲小醜。魍魎蟻蝨。何足當其剗割乎。但閩中久困戎馬。師之所在。荆棘生焉。弟則以爲今日扞禦之後。綏懷爲急。如苦劑。逐病必時。顧其本根。策駟取途。又惡殫其餘力。非痛自省節。加意拊摩。恐未足以起凋瘵而躋之康阜也。迂腐之見。惟高明採之。

答周鶴川鄉丈論禪

費生至。辱翰教。以值秋試。僕雖久辭却。猶遠嫌卻掃。故諸生至者。皆不敢迫。至九月始得。發函讀之。遠道之懷。出世之想。啟我愚蒙。中世以後。大雄之法。分爲宗教二門。凡今



吾輩之所講研窮究。言語印證。吾教也。若夫宗門之旨。非略象忘詮。真超玄詣。詎可易言。然宗由頓契。教可依通。譬之法雨普霑。隨根領受。而今之學者。皆舍教言宗。妄意揣量。執之爲是。纔欲畧象。而不知已涉於象。意在忘詮。而不知已墜於詮。此豎拳喝棒狗子。矢橛之徒。所以紛紛於世也。狂瞽之談。伏惟裁教。費生志向甚佳。足以占門下高風之所振起也。

答閩中開府汪南溟

去冬聞海壘有警。公在勸攘中。不忘記詢。感戢。但獎藉踰實。非所敢當。昔人謂心相憐。馬首圓。非虛語也。烏孽未盡。頃聞廣中之議。欲委責於閩。廟堂知之。故以威帥兼領惠潮。夫以鄰爲壑。君子之所不取。今天下一家。人臣比翼協力以事天子。何鄰之可壑乎。近見楚蜀相鬩不已。功欲已。擅罪則誰歸。此非君子兼濟之心。忠臣不欺之節也。老伯壽章。久稽宿諾。適誌事甫完。復有講筵之冗。再假數月。乃得呈教。暫此奉復。

答蜀中開府譚二華

正不肖於世無所比數。然好慕天下長者。意所嚮往。恒恐不得托交焉。如門下高標淵

識。卓行異能。則平生尤所欽挹也。然不敢竿牘求通。乃辱先施。降接。感慰。方今周道寧夷。夔龍之侶。雲集於廟堂。羔羊之風。漸被於朝野。惟是邊境潢池。未漸聖化。故煩鷹揚之老。秉鉞鎮之。不然。以門下之宏抱。固宜入秉鈞軸矣。何久勞於行間乎。蜀地巖鄰。番其民獷悍易動。大抵綏之則靖。擾之則亂。怠則頓綱。詭衛。急則鳥驚魚駭。故不可以內地之治治之也。無論往事。即如近者龍州支羅及妖民誑亂。其初或以操切太過。或以處置失宜。幾微不審。釀成大患。至動大眾。蜀中人言此三事。編戶良民死者以十餘萬計。非細故也。今亂民既誅。地方再定。宜示休靜。以綏衆心。治大烹鮮。老氏至訓。淵魚不察。定遠良籌。在門下加之意焉。奉翰教。謂厚生善俗。禁奸伐謀。則安攘大計。門下固已預籌之。豈復安所置喙哉。平生聞譚公胸中數萬甲兵。所至風驅電掃。今治蜀顧如此。乃知宏才不器。無適非宜。哲士達權。隨時善變也。敬復。冒昧瞽言。無所逃罪。惟高明垂亮焉。

附錄陳六事疏

臣聞帝王之治天下。有大本。有急務。正心修身。建極以爲臣民之表率者。圖治之大本也。審幾度勢。更化宜民者。救時之急務也。大本雖立。而不能更化以善治。譬之琴瑟不調。不解而更張之。不可鼓也。恭惟我皇上踐祚以來。正身修德。講學勤政。惓惓以敬天法祖爲心。以節財愛民爲務。圖治之大本。旣以立矣。但近來風俗人情。積習生弊。有頹靡不振之漸。有亟重難反之幾。若不稍加改易。恐無以新天下之耳目。一天下之心志。臣不揣愚陋。日夜思惟。謹就今時之所宜者。條爲六事。開款上請。用備聖明採擇。臣又自惟。幸得以經術遭逢聖主。備位輔弼。朝夕與同事諸臣。寅恭諧協。凡有所見。自可隨事納忠。似不必更有建白。但臣之愚昧。竊見皇上有必爲之志。而淵衷靜默。臣下莫能仰窺。天下有願治之心。而舊習因仍。趨向未知所適。故敢不避形迹。披瀝上陳。期於宣昭主德。而齊一衆志。非有他也。伏乞聖慈垂鑒。俯賜施行。天下幸甚。臣愚幸甚。

計開

一省議論。臣聞天下之事。慮之貴詳。行之貴力。謀在於衆。斷在於獨。漢臣申公云。爲治

不在多言。顧力行何如耳。臣竊見頃年以來。朝廷之間。議論太多。或一事而甲可乙否。或一人而朝由暮跖。或前後不覺背馳。或毀譽自爲矛盾。是非淆於唇吻。用舍決於愛憎。政多紛更。事無統紀。又每見督撫等官。初到地方。卽例有條陳一疏。或漫言數事。或更置數官。文藻競工。覽者每爲所眩。不曰此人有才。卽曰此人任事。其實蒞任之始。地方利病。豈盡周知。屬官賢否。豈能洞察。不過探聽於衆口耳。讀其詞。雖若爛然。究其指歸。茫未有效。比其久也。或并其自言者而忘之矣。卽如昨年皇上以虜賊內犯。特敕廷臣集議防虜之策。當其時。衆言盈庭。羣策畢舉。今又將一年矣。其所言者果盡舉行否乎。其所行者果有實效否乎。又如薊鎮之事。初建議者曰。吾欲云云。當事者亦曰。吾欲云云。曾無幾何。而將不相能。士譁於伍。異論繁興。訛言踵至。於是議罷練兵者。又紛紛矣。臣竊以爲事無全利。亦無全害。人有所長。亦有所短。要在權利害之多寡。酌長短之所宜。委任責成。庶克有濟。今始則計慮未詳。旣以人言而遽行。終則執守靡定。又以人言而遽止。加之愛惡交攻。意見橫出。讒言微中。飛語流傳。尋之莫究其端。聽者不勝其眩。是以人懷疑貳。動見譸張。虛曠歲時。成功難睹。語曰。多指亂視。多言亂聽。此最當今

大患也。伏望皇上自今以後。勵精治理。主宰化機。掃無用之虛詞。求躬行之實效。欲爲一事。須審之於初。務求停當。及計慮已審。即斷而行之。如唐憲宗之討淮蔡。雖百方阻之。而終不爲之搖。欲用一人。須慎之於始。務求相應。既得其人。則信而任之。如魏文侯之用樂羊。雖謗書盈篋。而終不爲之動。再乞天語叮嚀。部院等衙門。今後各宜仰體朝廷省事尙實之意。一切章奏。務從簡切。是非可否。明白直陳。毋得彼此推諉。徒託空言。其大小臣工。亦各宜秉公持正。以誠心直道相與。以勉修職業爲務。反薄歸厚。尙質省文。庶治理可興。而風俗可變也。伏乞聖裁。

一振。紀綱。臣聞人主以一身而居乎兆民之上。臨制四海之廣。所以能使天下皆服。從其教令。整齊而不亂者。紀綱而已。綱如網之有繩。紀如絲之有總。詩曰。勉勉我王。綱紀四方。此人主太阿之柄。不可一日而倒持者也。臣竊見近年以來。紀綱不肅。法度不行。上下務爲姑息。百事悉從委狗。以模稜兩可。謂之調停。以委曲遷就。謂之善處。法之所加。唯在於微賤。而強梗者。雖壞法干紀。而莫之誰何。禮之所制。反在於朝廷。而爲下者。或越理犯分。而恬不知畏。陵替之風漸成。指臂之勢難使。賈誼所謂踈鑿者。深可慮也。

然人情習玩已久。驟一振之。必將曰此拂人之情者也。又將曰此務爲操切者也。臣請有以解之。夫徇情之與順情。名雖同而實則異。振作之與操切。事若近而用則殊。蓋順情者。因人情之所同欲者而施之。大學所謂民之所好好之。民之所惡惡之者也。若徇情則不顧理之是非。事之可否。而惟人情之是便而已。振作者。謂整齊嚴肅。懸法以示民。而使之不敢犯。孔子所謂道之以德。齊之以禮者也。若操切則爲嚴刑峻法。虐使其民而已。故情可順而不可徇。法宜嚴而不宜猛。伏望皇上奮乾剛之斷。普離照之明。張法紀以肅羣工。攬權綱而貞百度。刑賞予奪。一歸之公道。而不必曲徇乎私情。政教號令。必斷於宸衷。而毋致紛更於浮議。法所當加。雖貴近不宥。事有所枉。雖疎賤必申。仍乞敕下都察院。查照嘉靖初年所定憲綱事理。再加申飭。秉持公論。振揚風紀。以佐皇上明作勵精之治。庶體統正。朝廷尊。而下有法守矣。伏乞聖裁。

一重詔令。臣聞君者主令者也。臣者行君之令而致之民者也。君不主令。則無威。臣不行君之令而致之民。則無法。斯大亂之道也。臣看得舊規。凡各衙門章奏。奉旨有某部看了來說者。必是緊關事情。重大機務。有某部知道者。雖若稍緩。亦必合行事務。或關

係各地方民情利病。該衙門自宜參酌緩急。次第題覆。至於發自聖衷。特降敕諭者。又與泛常不同。尤宜上緊奉行。事乃無壅。蓋天子之號令。譬之風靈。若風不能動。而靈不能擊。則造化之機。滯而乾坤之用息矣。臣竊見近日以來。朝廷詔旨。多廢格不行。抄到各部。概從停閣。或已題奉欽依。一切視爲故紙。禁之不止。令之不從。至於應勘應報。奉旨行下者。各地方官尤屬遲慢。有查勘一事而十數年不完者。文卷委積。多致沉埋。干證之人。半在鬼錄。年月既遠。事多失真。遂使漏網終逃。國有不伸之法。覆盆自苦。人懷不白之冤。是非何由而明。賞罰何由而當。伏望敕下部院等衙門。凡大小事務。既奉明旨。須數日之內。卽行題覆。若事理了然。明白易見者。卽宜據理剖斷。毋但諉之。撫按議處。以致耽延。其有合行議勘。問奏者。亦要酌量事情緩急。道里遠近。嚴立限期。責令上緊奏報。該部置立號簿。登記註銷。如有違限不行。奏報者。從實查參。坐以違制之罪。吏部卽以此考其勤惰。以爲賢否。然後人思盡職而事無壅滯也。伏乞聖裁。

一覈名實。臣聞人主之所以馭其臣者。賞罰用舍而已。欲用舍賞罰之當。在於綜覈名實而已。臣每見朝廷欲用一人。當事者輒有乏才之嘆。竊以爲古今人才。不甚相遠。人

主操。用舍。予奪。之權。以奔走天下之士。何求而不得。而曰。世無才焉。臣不信也。惟名實之。不覈。揀擇之。不精。所用。非其所急。所取。非其所求。則上之爵賞。不重。而人懷僥倖之心。牛驥。以並駕。而俱疲。工拙。以混淆。而莫辨。才惡得而不乏。事惡得而有濟哉。臣請畧言其概。夫器。必試而後知其利鈍。馬。必駕而後知其騫良。今用人。則不然。稱人之才。不必試之。以事任之。以事不必更考其成。及至饋事之時。又未必明正其罪。惟魯少文者。以無用見譏。而大言無當者。以虛聲竊譽。倜儻。伉直者。以忤時難合而脂韋逢迎者。以巧宦易容。其才雖可用也。或以卑微而輕忽之。其才本無取也。或以名高而尊禮之。或因一事之善。而終身借之。以爲資。或以一動之差。而衆口訾之。以爲病。加以官不久任。事不責成。更調太繁。遷轉太驟。資格太拘。毀譽失實。且近來。又有一種風尚。士大夫。務爲聲稱。舍其職業。而出位。是思建白條。陳連編累牘。至覈其本等職業。反屬茫昧。主錢穀者。不對出納之數。司刑名者。未諳律例之文。官守既失。事何由舉。凡此皆所謂名與實爽者也。如此。則眞才實能之士。何由得進。而百官有司之職。何由得舉哉。故臣妄以爲。世不患無才。患無用之之道。如得其道。則舉天下之士。唯上之所欲爲。無不應者。臣




願皇上慎重名器。愛惜爵賞。用人必考其終。授任必求其當。有功於國家。即千金之賞。通侯之印。亦不宜吝。無功國家。雖頓笑之微。敝袴之賤。亦勿輕予。仍乞敕下吏部。嚴考課之法。審名實之歸。遵照祖宗舊制。凡京官及外官三六年考滿。毋得概引復職。濫給恩典。須明白開具稱職。平常。不稱職。以爲殿最。若其功過未大顯著。未可遽行黜陟者。乞將誥敕勳階等項。酌量裁與。稍加差等。以示激勸。至於用舍進退。一以功實爲準。毋徒眩於聲名。毋盡拘於資格。毋搖之以毀譽。毋雜之以愛憎。毋以一事概其平生。毋以一眚掩其大節。在京各衙門佐貳官。須量其才器之所宜者授之。平居則使之講究職業。贊佐長官。如長官有缺。即以佐貳代之。不必另索其屬官有諳練故事。盡心官守者。九年任滿。亦照吏部陞授京職。高者即轉本衙門堂上官。小九卿堂官品級相同者。不必更相調用。各處巡撫官。果於地方相宜久者。或就彼加秩。不必又遷他省。布按二司官。如參議久者。即可陞參政。僉事久者。即可陞副使。不必互轉數易。以滋勞擾。如此。則人有專職。事可責成。而人才亦不患其缺乏矣。此外如臣言有未盡者。亦乞敕下該部。悉心講求。條列具奏。伏乞聖裁。

一固邦本。臣聞帝王之治。欲攘外者必先安內。書曰。民爲邦本。本固邦寧。自古雖極治之時。不能無夷狄盜賊之患。唯百姓安樂。家給人足。則雖有外患。而邦本深固。自可無虞。唯是百姓愁苦思亂。民不聊生。然後夷狄盜賊乘之而起。蓋安民可與行義。而危民易與爲非。其勢然也。恭惟皇上嗣登大寶。首下蠲卹之詔。黎元忻忻。方切更生。獨昨歲以元年蠲賦一半。國用不足。又邊費重大。內帑空乏。不得已差四御史分道督賦。三都御史清理屯鹽。皆一時權宜。以佐國用之急。而人遂有苦其搜括者。臣近日訪之外論。皆稱不便。緣各御史差出。目覩百姓窮苦。亦無別法清查。止將官庫所儲。盡行催解。以致各省庫藏空虛。水旱災傷。視民之死而不能賑。兩廣用兵。供餉百出而不能支。是國用未充。而元氣已耗矣。臣竊以爲天之生財。在官在民。止有此數。譬之於人。稟賦強弱。自有定分。善養生者。唯撙節愛惜。不以嗜欲戕之。亦皆足以却病而延壽。昔漢昭帝承武帝多事之後。海內虛耗。霍光佐之。節儉省用。與民休息。行之數年。百姓阜安。國用遂足。然則與其設法征求。索之於有限之數。以病民。孰若加意省儉。取之於自足之中。以厚下乎。仰惟皇上即位以來。凡諸齋醮土木淫侈之費。悉行停革。雖大禹之克勤克儉。

不是過矣。然臣竊以爲矯枉者必過其正。當民窮財盡之時。若不痛加省節。恐不能救也。伏望皇上軫念民窮。加惠邦本。於凡不急工程。無益徵辦。一切停免。敦尚儉素。以爲天下先。仍乞敕下吏部。慎選良吏。牧養小民。其守令賢否殿最。惟以守已端潔。實心愛民。乃與上考。稱職。不次擢用。若但善事上官。幹理簿書。而無實政。及於百姓者。雖有才能幹局。止與中考。其貪污顯著者。嚴限追贓。押發各邊。自行輸納。完日發遣發落。不但懲貪。亦可以爲實邊之一助。再乞敕下戶部。悉心講求財用之所以日匱者。其弊何在。今欲措理。其道何由。今風俗侈靡。官民服舍。俱無限制。外之豪強。兼并。賦役不均。花分。詭寄。恃頑不納。田糧偏累。小民內之。官府造作。侵欺冒破。奸徒罔利。有名無實。各衙門在。官錢糧漫無稽查。假公濟私。官吏滋弊。凡此皆耗財病民之大者。若求其害財者而去之。則亦何必索之於窮困之民。以自耗國家之元氣乎。前項催督御史。事完之後。宜即令回京。此後不必再差。重爲地方之病。其屯鹽各差都御史。應否取回別用。但責成於該管撫按。使之悉心清理。亦乞敕下該部。從長計議。具奏定奪。以後上下。唯務清心省事。安靜不擾。庶民生可遂。而邦本獲寧也。伏乞聖裁。

一飭武備。臣惟當今之事。其可慮者。莫重於邊防。廟堂之上。所當日夜圖畫者。亦莫急於邊防。邇年以來。虜患日深。邊事久廢。比者屢蒙聖諭。嚴飭邊臣。人心思奮。一時督撫將領等官。頗稱得人。目前守禦。似亦畧備矣。然臣以爲虜如禽獸。然不一創之。其患不止。但戰乃危事。未可易言。須從容審圖以計勝之耳。今之上策。莫如自治。而其機要在。惟在皇上赫然奮發。先定聖志。聖志定而懷忠蘊謀之士。得效於前矣。今譚者皆曰。吾兵不多。食不足。將帥不得其人。臣以爲此三者皆不足患也。夫兵不患少而患弱。今軍伍雖缺。而糧籍具存。若能按籍徵求。清查影占。隨宜募補。著實訓練。何患無兵。捐無用不急之費。併其財力。以撫養戰鬪之士。何患無財。懸重賞以勸有功。寬文法以伸將權。則忠勇之夫。孰不思奮。又何患於無將。臣之所患。獨患中國無奮勵激發之志。因循怠玩。姑務偷安。則雖有兵食。良將亦恐不能有爲耳。故臣願皇上急先自治之圖。堅定必爲之志。屬任謀臣。修舉實政。不求近功。不忘有事。熟計而審行之。不出五年。虜可圖矣。至於目前自守之策。莫要於選擇邊吏。團練鄉兵。併守墩堡。令民收保。時簡精銳。出其空虛以制之。虜即入犯。亦可不至大失。此數者昨雖已經閣部議行。臣愚猶恐人心

玩愒日久。尙以虛文塞責。伏乞敕下兵部。申飭各邊督撫。務將前事着實舉行。俟秋防畢日。嚴查有無實效。大行賞罰。庶沿邊諸郡。在在有備。而虜不敢窺也。再照祖宗時。京營之兵數十萬。今雖不足。尙可得八九萬人。若使訓練有方。亦豈盡皆無用。但士習驕惰。法令難行。雖春秋操練。徒具文耳。臣考之古禮。及我祖宗故事。俱有大閱之禮。以習武事而戒不虞。今京城內外。守備單弱。臣常以爲憂。伏乞敕下戎政大臣。申嚴軍政。設法訓練。每歲或間歲。季冬農隙之時。恭請聖駕親臨校閱。一以試將官之能否。一以觀軍士之勇怯。有技藝精熟者。分別賞賚。老弱不堪者。卽行汰易。如此。不惟使輦轂之下。常有數萬精兵。得居重馭輕之道。且此一舉。動傳之遠近。皆知皇上加意武備。整飭戎事。亦足以伐狂虜之謀。銷未萌之患。誠轉弱爲強之一機也。伏乞聖裁。奉聖旨。覽卿奏。俱深切時務。具見謀國忠懇。該部院看議行。



康南海先生著

官制議

布面一册  
紙面

八一  
角元

歐洲十一國遊記第一編

布面  
紙面

八一  
角元

歐洲十一國遊記第二編

布面  
紙面

六八  
角角

飲冰室主人著

飲冰室文集

三元

新大陸遊記

有圖  
無圖

六八角角

中國之武士道

三角五分

中國學術思想變遷論

二角

四大家政治學說

三角

李鴻章

三角

康南海

二角

中國國債史

二角

越南亡國史

三角五分

德育鑑

五角

# 廣智書局出版新書目錄

世界近世史	九角	鐵路指南	一元
世界進化史	八角	萬國商務志	六角五分
英吉利史	七角	工商管理要術	四角五分
俄羅斯史	八角	家政學第一種	三角五分
政治學	一元五角	家政學第二種	三角
政治汎論	二元	歐洲財政史	三角
政治原論	七角五分	中國財政紀畧	二角
英國憲法論	六角	福澤諭吉談叢	三角五分
英國憲法史	一元二角	加藤弘之天則百話	四角
國憲汎論	一元	公德講話	二角五分
教育學史	八角	人羣進化論	五角
教育學問答	二角五分	修學篇	二角五分

上海棋盤街中市




# 廣智書局出版新書目錄

新地理	意大利三傑傳	中西偉人傳	處女衛生論	最近衛生學	樂典教科書	實驗小學管理術	學校衛生學	中國文明小史	中學文法教科書	中國之武士道	中等教育倫理學
二角	二角五分	三角	三角五分	二角	一元	二角五分	二角	四角	七角	三角五分	四角
中國偵探案	怪現狀 第一卷	電術奇談	極樂世界	妖塔奇談	青年鏡	初級英文範	華英商賈會話	華英學生會話	華英合璧訓蒙編 第二冊	華英合璧訓蒙編 第一冊	英華二十世紀讀本 第一編
二角	四角	五角五分	二角五分	三角五分	三角	五角	二角	二角	二角	一角五分	七角五分

上海棋盤街中市

光緒三十三年六月初版  
光緒三十三年十月再版



校證者

廣智書局編輯部

印刷所

上海西門外梅林山路順元里  
廣智書局活版部

發行所

上海英界四馬路  
廣智書局

分售處

各省大書莊

定價  
精製全壹冊壹元三角  
並製全貳冊壹元



(張江陵書牘)

12

112337

~~11~~

2